

香酱

唐 房玄齡 等撰

中 華

書

局

第

四六至卷五· 五

卷

九(傳)

册

晉書卷四十六

列傳第十六

劉頌

出其下,時人爲之語曰:「雷、蔣、穀、魯,劉最爲祖。」父觀,平陽太守。、頌少能辨物理,爲時 人所稱。蔡孝廉,舉秀才,皆不就。文帝辟爲相府掾,奉使于蜀。時周新平,人饑土荒,頌 劉碩字子雅,廣陵人,漢廣陵厲王胥之後也。 世爲名族。同郡有雷、蔣、瀔、魯四姓,皆

表求振貸,不待報而行,由是除名。

竟,傾執據無罪,寅遂得免,時人以頤比張釋之。在職六年,號爲詳平。會滅吳,諸將爭功, 褒巡撫|| 揚,以奉使稱旨,轉黃門郎。 遷議郎,守廷尉。 時尚書令史|| 扈寅非罪下獄,詔使考 **遭頤校其事,以|王渾爲上功,|王濬爲中功。帝以頤持法失理,左遷京兆太守,不行,轉任河** 武帝踐阼,拜尙書三公郎,典科律,申寃訟。累遷中書侍郎。咸寧中,詔頌與散騎郎白

列

一二九四

内。 便利。尋以母憂去職。服闋,除淮南相。在官嚴整,甚有政績。 臨發,上便宜,多所納用。郡界多公主水碓,遏塞流水,轉爲浸害,頌表罷之,百姓獲其 舊修芍陂,年用數萬人,豪

頌在郡上疏曰:

强兼幷,孤貧失業,頌使大小勠力,計功受分,百姓歌其平惠。

郡草具所陳如左,未及書上,會臣嬰丁天罰,寢頓累年,今謹封上前事。 報,勿以爲疑。」臣受詔之日,喜懼交集,益思自竭,用忘其鄙,願以螢燭,增暉重 國,言淺多違,猶願陛下垂省,使臣微誠得經聖鑒,不總棄於常案。 臣昔忝河內,臨辭受詔:「卿所言悉要事,宜大小數以聞。 恒苦多事,或不能悉有 如有足採,冀補 臣 雖才不經 光。 到

萬

封幼 守,吳人有不自信之心,宜得壯主以鎭撫之,使內外各安其舊。又孫氏爲國,文武衆 巍盛美, 全制,始成于今,超秦、漢、魏氏之局節,紹五帝三代之絕跡。 功被無外,光流後 易生風 雅皇子于吳蜀,臣之愚慮,謂未盡善。夫吳越剽輕,庸蜀險絕,此故變釁之所出, 伏見詔書,開啓土宇,以支百世,封建戚屬,咸出之藩,夫豈不懷,公理然也。 塵之地。 三五之君殆有慚德。何則?彼因自然而就之,異乎絕跡之後更創之。雖然, 且自吳平以來,東南六州將士更守江表,此時之至患也。 叉內兵外 樹國

不靖。 國內。 者,分王吳蜀。 長乃遣君之,於是無晚也。 職,數擬天朝,一旦堙替,同于編戶。不識所蒙更生之恩,而災困逼身,自謂失地,用懷 內兵得散,新邦乂安,兩獲其所,於事爲宜。宜取同姓諸王年二十以上人才高 今得長王以臨其國,隨才授任,文武並敍,士卒百役不出其鄉,求富貴者取之于 以其去近就遠,割裂土字,令倍於舊。以徙封故地,用王幼稚,須皇子 急所須地,交得長主,此事宜也。臣所陳封建,今大義已

君也。 言必當,然要以不隱所懷爲上報之節。 徒荷恩寵,不異凡流。 也。 臣聞:不憚危悔之患,而願獻所見者,盡忠之臣也;垂聽逆耳,甘納苦言者,濟世之 臣以期運,幸遇無諱之朝。雖嘗抗疏陳辭,氾論政體,猶未悉所見,指言得失, 願陛下缺半日之間,垂省臣言。 臣竊自愧,不盡忠規,無以上報,謹列所見如左。臣誠未自許所 若萬 一足採,則微臣更生之年,如皆瞽妄,則國

舉,然餘衆事,儻有足採,以參成制,故皆幷列本事。

帝,奢淫 煩理 末陵遲,閹豎用事,小人專朝,君子在野,政荒衆散,遂以亂亡。 一亂,兼肅文教,積數十年,至于延康之初,然後更淸下順,法始大行。 伏惟陛下雖應天順人,龍飛踐阼,爲創基之主,然所遇之時,實是叔世。 驕縱,傾殆之主也。 然內盛臺榭聲色之娛,外當三方英豪嚴敵,事成克舉,少 魏武帝以經略之才,撥 逮至文明二 何則?漢

列

祚始基 不軌于法。 有愆違 臣言豈不少概聖心夫! 旣往。以陛下明聖,猶未及叔世之弊,日以成始初之隆,傳之後世,不無慮乎!意者, 以至于今,可以言政。而自泰始以來,將三十年,政功美績,未稱聖旨,凡諸事業,不茂 也。 未可一旦直繩御下,誠時宜也。 人有言,膏粱之性難正,故曰時遇叔世。當此之秋,天地之位始定,四海洗心整綱之會 日遷就肅。 然陛下猶以用才因宜,法寬有由,積之在素,異于漢魏之先,三祖崛起,易朝之爲, ,逮于咸熙之末,其間累年。雖鈇鉞屢斷,翦除凶醜,然其存者咸蒙遭時之恩, ,其故何也?實賴前緒,以濟勳業。然法物政刑,固已漸穨矣。自嘉平之初,晉 譬由行舟,雖不橫截迅流,然俄向所趣,漸靡而往,終得其濟。 泰始之初,陛下踐阼,其所服乘皆先代功臣之胤,非其子孫,則其曾玄。古 然至所以爲政,矯世衆務,自宜漸出公塗,法正 積微稍著, 一威斷,

後世獨任智力以安大業。若未盡其理,雖經異時,憂責猶追在陛下,將如之何!願陛 可以比跡三代。如或當身之政,遺風餘烈不及後嗣,雖樹親戚,而成國之制不建,使夫 下善當今之政,樹不拔之勢,則天下無遺憂矣。 目下之政,政安遺業,使數世賴之。若乃兼建諸侯而樹藩屏,深根固 顧惟萬載之事,理在二端。 天下大器,一安難傾,一傾難正。故慮經後世者,必精 一帶, 則祚 延無窮,

寧社 九服。 謂功格天地,土廣三王,舟車所至,人迹所及,皆爲臣妾,四海大同,始于今日。 賓,正朔有所不加,實有戰國相持之勢。 移在陛下。 弟,而不建成國之制,祚亦不延。 中,然跡其衰亡,恒在同姓失職,諸侯微時,不在强盛。昔呂氏作亂,幸賴齊代之援,以 後,雜而用之,前後二代各二百餘年。揆其封建不用,雖强弱不適,制度舛錯,不盡事 德,及興王之顯親,列爵五等,開國承家,以藩屛帝室,延祚久長,近者五六百歲,遠者 遠慮固。 勢者,諸侯是也,任人者,郡縣是也。郡縣之察,小政理而大勢危,諸侯爲邦,近多違而 至 僅將千載。 且善言今者,必有驗之於古。唐虞以前,書文殘缺,其事難詳。至於三代,則並建明 乘牛車。 稷。 夫聖明不世及,後嗣不必賢,此天理之常也。故善爲天下者,任勢而不任人。任 夫武王聖主也,成王賢嗣也,然武王不恃成王之賢而廣封建者,慮經無窮也。 七國叛逆,梁王捍之,卒弭其難。自是之後,威權削奪,諸侯止食租奉,甚者 聖王推終始之弊,權輕重之理,包彼小違以據大安,然後足以藩固內外,維鎭 長短之應,禍福之徵,可見於此。 逮至秦氏,罷侯置守,子弟不分尺土,孤立無輔,二世而亡。漢承周秦之 是以王莽得擅本朝,遂其姦謀,傾蕩天下,毒流生靈。 魏氏承之,圈閉親戚,幽囚子弟,是以神器速傾,天命 大晉之興、宣帝定燕、太祖平蜀、陛下滅吳、可 又魏氏雖正位居體,南面稱帝,然三方未 光武紹起,雖封樹子 宜承大

勳之籍,及陛下聖明之時,開啓土宇,使同姓必王,建久安於萬載,垂長世於無窮

應而 則 ? 遺緒,得中賢之佐, 體賢鄙,亦均一 立相持之勢以御其臣。 建基旣厚,藩屛强禦,雖置幼君赤子而天下不懼,曩之所謂重臣者,今悉反忠而爲任臣 H 任臣因所籍以盡公。 重臣,俱執 以賢,此事情之不可易者也。 多 何則? 何則? 一,政教漸穨,欲國之無危,不可得也。 國 至,又自然也。 臣 有 又聞國有任臣則安,有重臣則亂。而王制,人君立子以適不以長,立適以長不 可傾之勢,則執權者見疑,衆疑難以自信,而甘受死亡者非人情故也。若乃 國統而立斷者也。 理無危勢,懷不自猜,忠誠得著,不惕于邪故也。 勢固易持故也。 契,等於無慮。 而樹國本根不深,無幹輔之固,則所謂任臣者化而爲重臣矣。 是以闇君在位,則重臣盈朝,明后臨政,則任臣列職。夫任臣之與 盡公者,政之本也,樹私者,亂之源也。 是以五等旣列,臣無忠慢,同於竭節,以徇其上。 而賢明至少,不肖至衆,此固天理之常也。 然成敗相反,邪正相背,其故何也。重臣假所資以樹私, 且樹國苟固,則所任之臣,得賢益理,次委中智,亦足以 又非徒唯然而已。 借令愚劣之嗣,蒙先哲之 聖王 推斯言之,則泰日少,亂 一知賢哲之不世及,故 物類相求,感 羣后旣 建,繼 何

然則建邦苟盡其理,則無向不可。 是以周室自成康以下,逮至宣王,宣王之後,到

有爲。 國。 常,不累十年,好惡未改,情願未移。 何也? 于赧王,其問歷載,朝無名臣,而宗廟不隕者,諸侯維持之也。故曰,爲社稷計,莫若建 俱奮,令其力足以維帶京邑。若包藏禍心,惕于邪而起,孤立無黨,所蒙之籍不足獨以 之外,然後能令君臣各安其位,榮其所蒙,上下相持,用成藩輔。 祿,兼翼王室。 國,臣榮其朝,各流福祚,傳之無窮;上下一心,愛國如家,視百姓如子,然後能保荷天 夫邪正逆順者,人心之所繫服也。 法同郡縣,無成國之制故也。 然齊此甚難, 陛下宜與達古今善識事勢之士深共籌之。 建侯之理, 使君樂其 今諸王裂土,皆兼於古之諸侯,而君賤其爵,臣恥其位,莫有安志,其故 今之建置, 宜使率由舊章, 一如古典。然人心繫 臣之愚慮,以爲宜早創大制,遲回衆望,猶在十年 ' 今之建置,宜審量事勢,使諸侯率義而動,同忿 如今之爲,適足以虧

使親者得轉處近。十世之遠,近郊地盡,然後親疏相維,不得復如十世之內。然猶樹 天下土田方里之數,都更裂土分人,以王同姓,使親疏遠近不錯其宜,然後可以永安。 親 親疏,轉有所廢,以有所樹,則是郡縣之職,非建國之制。 有所,遲天下都滿,已彌數百千年矣。 古者封建旣定,各有其國,後雖王之子孫,無復尺土,此今事之必不行者也。若推 今方始封而親疏倒施**,**甚非所宜。 今宜豫開此地,令十世之內, 宜更大量

天府之藏,徒棄穀帛之資,無補鎭國衞上之勢也。

列

權,言 國周 耳,若備舊典,則官司以數,事所不須,而以虛制損實力。至于慶賞刑斷,所以衞下之 境內充實,乃作禮樂。唯宗廟社稷,則先建之。至於境內之政,官人用才,自非內史、 臣所舉二端,蓋事之大較,其所不載,應在二端之屬者,以此爲率。今諸國本一郡之政 頓設也。 古者封國,大者不過土方百里,然後人數殷衆,境內必盈其力,足以備充制度。今雖一 國 宜令諸 相 命於天子,其餘衆職及死生之斷、穀帛資實、慶賞刑威、非封爵者,悉得專之。今 環近將千里,然力實寡,不足以奉國典。所遇不同,故當因時制宜,以盡事適今。 不重則無以威衆人而衞上。 王 須車甲器械旣具,羣臣乃服綵章;倉廩已實,乃營宮室;百姓已足,乃備官司; 國容少而軍容多,然於古典所應有者悉立其制,然非急所須,漸而備之,不得 故臣之愚慮,欲令諸侯權具,國容少而軍容多,然

周之封建,使國重於君,公侯之身輕於社稷,故無道之君不免誅放。 下無亡國,天子乘之,理勢自安,此周室所以長在也。漢之樹置君國,輕重不殊,故諸 故國祚不泯。不免誅放、則羣后思懼,胤嗣必繼,是無亡國也。 至曾玄。人性不甚相遠,古今一揆,而短長甚違,其故何邪?立意本殊而 亦終於必備今事爲宜。 周之建侯,長享其國,與王者並,遠者僅將千載,近者猶數百年,漢之諸王,傳祚暨 諸侯思懼, 然後軌道, 敦興滅繼絕之義, 制不同故也。

列傳第十六 劉頌

業于固成之勢,則可以無遺憂矣。 **外居重固之安,可謂根深華嶽而四維之也。臣之愚,願陛下置天下于自安之地,寄大** 廟,副在有司。寡弱小國猶不可危,豈況萬乘之主!承難傾之邦而加其上,則自然永 且建侯之理,本經盛衰,大制都定,班之羣后,著誓丹青,書之玉版,藏之金匱,置諸宗 子生,以繼其統,然後建國無滅。又班固稱「諸侯失國亦猶網密」,今又宜都寬其檢。 于誅絕,又無子應除,苟有始封支胤,不問遠近,必紹其祚。若無遺類,則虛建之,須皇 上,勢孤無輔,故姦臣擅朝,易傾大業。今宜反漢之弊,修周舊跡。 王失度,陷于罪戮,國隨以亡。不崇興滅繼絕之序,故下無固國。 下無固國,天子居 國君雖或失道,陷

者、富貴之徒也、爲無私者終得其私、故公私之利同也。今欲富者不由貧自得富、欲貴 者不安賤自得貴,公私之塗旣乖,而人情不能無私,私利不可以公得,則恒背公而橫 不矜,不矜然後廉恥厲,守貧者必節欲,節欲然後操全。以此處務,乃得盡公。盡公 可去,故直同公私之利,而詭其求道,使夫欲富者必先由貧,欲貴者必先安賤。安賤則 無準,故臣思立吏課而肅淸議。夫欲富貴而惡貧賤,人理然也。聖王大諳物情,知不 士。下不專局,又無考課,吏不竭節,故無高能。無高能,則有疾世事;少名士,則後進 今閻閻少名士,官司無高能,其故何也?清議不肅,人不立德,行在取容,故無名

教穨 黜陟 樂之貴,俄在不鮮之地;約己潔素者, 蒙儉德之報,列于淸官之上。 二業分流, 令各有 是以 也。 然俗放都奢,不可頓肅,故臣私慮,願先從事於漸也。 來旣久,難反一朝。又世放都靡,營欲比肩,羣士渾然,庸行相似,不可頓肅,甚殊 風節日穨,公理漸替,人士富貴,非軌道之所得。 且教不求盡善、善在抑尤、同侈之中、猶有甚泰。使夫昧適情之樂者、捐其顯 以此爲政,小大難期。[三然

察也。 之懼 豫之虞,誠以政體宜然,事勢致之也。 執 竊以爲今欲盡善,故宜考終。 有違,故精事 能者勸,罪不 恒居其易則安,人臣不處其難則亂。今陛下每精事始而略于考終,故羣吏慮事懷成敗 下,然後 要 輕, 而已,委務于下而不以事自嬰也。 天下至大,萬事至衆,人君至少,同于天日,故非垂聽所得周覽。是以聖王之化, 旣以 人臣 飾文采以避目下之譴重,此政功所以未善也。 施行,因其成敗,以分功罪,甚易識也。易識在考終,難察在造始,故人君 始,以求 可蔽,則違慢日肅,此爲國之大略也。 功罪形于成敗之徵,無逃其誅賞。 無失。 又以衆官勝任者少, 何則?精始難校故也。 何則。夫造創謀始,逆闇是非,以別能否,甚難 分職旣定,無所與焉,非憚日昃之勤,而牽於逸 故罪不可蔽,功不 故不 臣竊惟陛 ·委務, 又羣官多不勝任, 亦宜委務, 使 **今人主能恒居易執要** 寧居日昃也。 下聖心,意在 可誣。 功不 盡善,懼政 臣之愚慮, 以 可誣、則 其

列傳第十六 劉頌

軟也。 盡仰成之理,都委務於下,至如今事應奏御者,蠲除不急,使要事得精可三分之二。 旨,此其徵也。 不能也。 善事,闇劣不得以尸禄害政。 能者得以成功,不能者得以著敗。 不調,甚者必改而更張。」凡臣所言,誠政體之常,然古今異宜,所遇不 下不專事,居官不久,故能否不別。 此校才考實,政之至務也。今人主不委事仰成,而與諸下共造事始, 然今欲舉一忠賢,不知所賞,求一負敗,不知所罰。及其免退,自以犯法耳,非 登進者自以累資及人間之譽耳,非功實也。 陛下御今法爲政將三十年,而功未日新,其咎安在。古人有言:「琴瑟 如此不已,則勝任者漸多,經年少久, 敗著可得而廢,功成可得逐任,然後賢能常居位以 何以驗之。今世士人決不悉良能也,又決不悉疲 若謂不然,則當今之政未稱聖 即羣司編得 同。 則功罪難分。 陛下縱未得 其人

書書主,賞罰繩之,其勢必愈考成司非而已。於今親掌者動受成於上,上之所失,不得 處。其餘外官皆專斷之,歲終臺閣課功校簿而已。 復以罪下,歲終事功不建,不知所責也。夫監司以法舉罪,獄官案劾盡實,法吏據辭守 統,若丞相之爲。惟立法創制,死生之斷,除名流徙,退殆大事,及連度支之事,臺乃奏 成,於古制爲重,事所不須,然今未能省幷。可出衆事付外寺,使得專之,尚書爲其都 古者六卿分職,冢宰爲師。 秦漢已來,九列執事,丞相都總。 此爲九卿造創事始,斷而 今尚書制斷,諸卿 行之,尚

全人,[8] 此所謂欲理而反亂者也。 舉大而略小。 文,大較雖同,然至於施用,監司與夫法獄體宜小異。 何則。夫細過微闕,謬妄之失,此人情之所必有,而悉糾以法,則朝野無 獄官唯實,法吏唯文、監司則欲

曰「過 懼所司之不舉,則謹密網以羅微罪。使奏劾相接,状似盡公,而撓法不亮固已在其中 之罪者,類出富强,而豪富者其力足憚,其貨足欲,是以官長顧勢而頓筆。下吏縱姦, 密之案,必責犯强舉尤之奏,當以盡公,則害政之姦自然禽矣。夫大姦犯政而亂兆庶 而 以害政,舉之則微而益亂,大綱不振,則豪强橫肆,豪强橫肆,則百姓失職矣,此錯所急 倒所務之由也。今宜令有司反所常之政,使天下可善化。及此非難也,人主不善碎 [K] 此爲政之要也。而自近世以來,爲監司者,類大綱不振而微過必舉。 微過不足 非徒 故善爲政者綱舉而網疏,綱舉則所羅者廣,網疏則小必漏,回所羅者廣則爲政不 而 則皆天網之所漏,所犯在甚泰,然後王誅所必加,此舉罪淺深之大 能改。」又曰:「不貳過。」凡此數者,皆是賢人君子不能無過之言也。 無益於政體,清議乃由此而 **[益傷。古人有言曰:「君子之過,如日之蝕焉。」又** 例 者 苟不至 也

賢人君子,苟不能無過,小疵不可以廢其身,而輒繩以法,則愧於明時。 故 君子得全美以善事,不善者必夷戮以警衆,此爲政 誅赦之準式 也。 何則:雖有所 何 則?所謂

列傳第十六 劉頌

犯, 尤,然後簡而不漏,大罪必誅,法禁易全也。 何則。 害法在犯尤,而謹搜微過,何異放 小過,舉賢才。」又曰:「無求備於一人。」故冕而前旒,充纊塞耳,意在善惡之報必取其 過,清議益穨。是以聖人深識人情而達政體,故其稱曰:「不以一眚掩大德。」又曰:「 聽,因名可亂,假力取直,故淸議益傷也。凡舉過彈違,將以肅風論而整世教,今舉小 大 兕豹于公路,而禁鼠盜于隅隙。古人有言,「鈇鉞不用而刀鋸日弊,不可以爲政」,此言 事緩而小事急也。時政所失,少有此類,陛下宜反而求之,乃得所務也。 輕重甚殊,於士君子之心受責不同而名不異者,故不軌之徒得引名自方,以惑衆 赦

表,或 之患,勢不可久。 事 不及下車,故能動合事機,大得人情。 昔魏武帝分離天下, 使人役居戶, 各在一方, 旣 必 雖身丁 因時 視 勢所須,且 夫權制不可以經常,政乖不可以守安,此言攻守之術異也。百姓雖愚,望不虛生, 險若夷。 給京城運漕,父南子北,室家分離,咸更不寧。 而發。 其困,而私怨不生,誠以三方未悉蕩幷,知時未可以求安息故也。是以甘役如 |意有曲爲,權假一時,以赴所務,非正典也。 然逡巡至今,積年未改,百姓 有因而發,則望不可奪,事變異前,則時不可違。明聖達政,應赴之速, 至于平吳之日,天下懷靜,而東南二方,六州郡兵,將士武吏,戍守江 此宜大見處分,以副人望。魏氏錯役,亦應改舊。 又不習水土,運役勤瘁,並有死亡 此二者各盡其理,

蒙已不訾矣。 然黔首感恩懷德,謳吟樂生必十倍於今也。自董卓作亂以至今,近出百年,四海勤瘁, 不得悉然為之,苟盡其理,可靜三分之二,東役可不出千里之內。但如斯而已,天下所 未可以希遵在昔,放息馬牛,然使受百役者不出其國,兵備待事其鄉,實在可爲。 丁難極矣。六合渾幷,始於今日,兆庶思寧,非虛望也。然古今異宜,所遇不同,誠亦 縱復

似 賢在官久。官久非難也,連其班級,自非才宜,不得傍轉以終其課,則事善矣。平糴已 在 患,宜逆加 爲之,雖少有廢,而計終已大益。農官有十百之利,及有妨害,在始似如未急,終作大 有 息役,息役在無爲。倉廩欲實,實在利農,利農在平糴。 生天 成制,其未備者可就周足,則穀積矣。無爲匪他,却功作之勤,抑似益而損之利。 益 已,則天下靜矣。此三者旣舉,雖未足以厚化,然可以爲安有餘矣。 然事患緩急,權計輕重,自非近如此類,準以爲率,乃可與爲,其餘皆務在靜息。 m 政務多端,世事之未盡理者,難徧以疏舉,振領總綱,要在三條。凡政欲靜,靜在 損之謂也。 地自然之財、農是也。所立爲指於此、事誠有功益。 功,以塞其漸。 然今天下自有事所必須,不得止已,或用功甚少而所濟至重。 如河汴將合,沈萊苟善,則役不可息。 爲政欲著信,著信在簡賢,簡 荷或妨農,皆務所息,此悉 諸 如 此類,亦不得已 夫王者之利**,** 目下

而 不須於陛下而自能者也。 之美,勳在垂統,使夫後世蒙賴以安。其爲安也,雖昏猶明,雖愚若智。 然能善算輕重,權審其宜,知可與可廢,甚難了也, 在善化之爲,要在靜國。 一个勤所不須,以傷所憑。 鈞此二者,何務孰急,陛下少垂恩迴慮, 詳擇所安, 則大理 至夫修飾官署,凡諸作役務爲恒傷過泰,不患不舉,此將來所 至於仰蒙前緒,所憑日月者,實在遺風繫人心,餘烈匡幼弱, 自非上智遠才,不幹此任。 濟世功者,實 夫創業

隆,何孝文足云!臣之此言,非臣下褒上虚美常辭,其事實然。若所以資爲安之理,或 年少久,終必有成。願陛下少察臣言。 未盡善,則恐良史書勳,不得遠盡弘美,甚可惜也。然不可使夫知政之士得參聖慮,經 矣。若善當身之政,建藩屏之固,使晉代久長,後世仰瞻遺跡,校功考事,實與湯武比 貴,而躬行布衣之所難,孝儉之德,冠于百王,又有之矣。履宜無細,動成軌度,又有之 下龍飛鳳翔,應期踐阼,有創業之勳矣。掃滅强吳,奄征南海,又有之矣。以天子之 世之私議,竊比陛下於孝文。臣以爲聖德隆殺,將在乎後,不在當今。 何則?陛

將士之役,居職之宜,諸所陳聞,具知卿之乃心爲國也。〔刊〕動靜數以聞。」 叉 論 肉刑,見刑法志。韶答曰:「得表陳封國之制,宜如古典,任刑齊法,宜復肉刑,及六州

論律令事,爲時論所美。人之,轉吏部尙書,建九班之制,欲令百官居職希遷,考課能否,明 元康 初,從淮南王允入朝。 會誅楊駿,頌屯衛殿中,其夜,韶以頌爲三公尚書。 又上疏

其賞罰。賈郭專朝,仕者欲速,竟不施行。

聽。 錢二十萬、朝服一具,諡曰貞。 制。 督攝衆事有功,追封梁鄒縣侯,[亞]食邑千五百戶 傷時望,不可復誅頌。」林乃止。 周勃誅諸呂而尊孝文,霍光廢昌邑而奉孝宣,並無九錫之命。違舊典而習權變,非先王之 曰:「昔漢之錫魏,魏之錫晉,皆一時之用,非可通行。 今宗廟乂安,雖嬖后被退,勢臣受誅, 林聞之,大怒,憚頌持正而不能害也。孫秀等推崇倫功,宜加九錫,百僚莫敢異議。頌獨 頌無子,養弟和子雍早卒,更以雍弟詡子隱爲適孫,襲封。云永康元年,韶以頌誅賈謐 九錫之議,請無所施。」張林積忿不已,以頌爲張華之黨,將害之。孫秀曰:「誅張、裴已 及趙王倫之害張華也,頌哭之甚慟。聞華子得逃,喜曰:「茂先,卿尚有種也」」倫黨張 於是以頌爲光祿大夫,門施行馬。尋病卒,使使者弔祭,賜 中書侍郞劉沈議、頌當時少輩,應贈開府。 孫秀素恨之,不

得出諸實器。 頤弟彪字仲雅,參安東軍事。伐吳,獲張悌,累官積弩將軍。 歷荆州刺史。次弟仲字世混,歷黃門郎、滎陽太守,未之官,卒。 及武庫火,彪建計斷屋,

初,頌嫁女臨淮陳矯,矯本劉氏子,與頌近親,出養於姑,改姓陳氏。中正劉友譏之,頌

屈。 上, 曰:「舜後姚虞、陳田本同根系,而世皆爲婚,禮律不禁。 為陳騫所止, 頤作色呵之,畿曰:「友以私議冒犯明府爲非,然鄉里公論稱屈。」」友辟公府掾、尙書郎、 故得不劾。 頌問明法掾陳默、蔡畿曰:「鄕里誰最屈。」二人俱云:「劉友 今與此同義,爲婚可也。」友方欲 列

李重

黄沙御史。

代。 之法 斟 改, 無越境之交,上下體固,人德歸厚。 未易故也。 曰:「 先王 孤,與羣弟居,以友愛著稱。 一一一 叉以為 也。 李重字茂曾, 方今聖德之隆, 周 秦,並 議 H. 疑。 古者諸侯之治,分土有 其 制,以時因革,因革之理,唯變所 建侯守,亦使分土有定, 檢防轉碎,徵刑失實,三三故朝野 臣 以革法創 江夏鍾武人也。父景,[10]秦州刺史、都亭定侯。 光被四表,兆庶顒顒,欣覩太平。 制 弱冠爲本國中正,遜讓不行。 當先盡開塞利害之理, 常,一 秦反 而牧司 國有定主,人無異 斯 道, 適。 必 之論 罷侯置守,風 各舉賢, 九品 僉謂 然承魏氏彫弊之跡, 始於喪亂, 舉 貢士任 望, 而 驅 後爲始 俗淺薄,自此 卿大夫世 錯 動 之, 風 之鄉 俗, 軍 使體 中之政, 平王文學, 議 重少好學,有 禄, 爲弊已 例 事 仕無出 來 大 合聖 人 矣。 誠 甚。 通 物播越, 上疏 非 而 典, 漢革 位 無 而 經 文辭; 之思,臣 比蹤三 否滯 陳 國 至 其 九品 於 不 早 亦 議 刊

列

僔

第

+

六

李重

寄隱 直道 由 此 括 而 叉 而 行 建樹官司,功在簡久。 觀,誠令二者旣行,卽 於閭伍,則邑屋皆爲有司。 也。 以爲選例九等,當今之要,所宜施用也。 人思反本,修之於鄉,華競自息,而禮讓 階級 若任非所由, 事非所覈, 則雖竭聖智, 猶不足以贍其事 少,則人心定,久其事,則政化 聖王知天下之難,常從事於其易,故 成而 日隆· 能 否著, 矣。」 此三代所 以

辨其 私產 嚴。 得違 商有 而不行,非漏而不及,能而不用也。 及漢 下 制 一,則 魏 分 制。 五 今 奴 遷 如 、因循 不不 太子舍人,轉尙書郎。 物九等貢賦 婢限數, 實皆未嘗 若 和 遷其業,所以利用厚生, 所陳 舊跡,王法 縣一 及禁百姓賣田宅。 而 曲爲之立限 歲之中,有違 之序,然後公私制定,率 稱光、幹之議,此皆衰世踰侈,當時之患。 所峻者,唯服物 時太中大夫恬和 也。 犯者三家,洛陽縣十家已上,官長免。 八年己巳詔書 中書 蓋以諸侯之軌旣滅,而井田之制未復,則王者之法不得 各肆其力也。 車器有貴賤 |啓可, 土均齊。 屬主者爲條制。 表陳便宜,稱漢孔光、魏徐幹等議,使王 申明律令, 周官以土均之法,經其 之差,令不 自秦 立阡陌,建郡縣,而 諸士卒百 然盛漢之初 **僭擬以亂尊卑耳。** 重 奏曰:「先王 三 如詔 以上, 不議 土地 書之旨,法 斯 井田 其制,光等作 之制,士農工 所服 制 至于 已沒。 之制 乘皆 奴婢 一公已 制 "; 而 降 不

制 人之私 人之田 :宅旣無定限,則奴婢不宜偏制其數,懼徒爲之法, 實碎而難檢。

亚 制 等 **尚簡易,法禁已具,和** 表 無施

常 故 奏 有 贖貨 登 不爲 所 滯 貶 叉 之 果 , 者寡 秩 司 遠近近 居 隸 官。 校 了, 而 非 異 尉石鑒奏,鬱林太守介登役使所監,求召還,尚書荀愷以爲遠郡非人 制 所 所 重駁曰:「臣 以 濟者衆。 肅清 詔 從 王化 之。 今如登郡 聞 ・う
輯 立 寧殊 法 無制 比者 域 也。 "; 所 多 若聽 臣 以 愚 齊 以 其 衆 檢邪 爲 貶秩 宜 聽鑒 居官, 非必 所 動 曲 Ŀ 爲 尋 一,先召登還 準 事 例, 情, 懼 mi 日. 庸 理 無 才負遠, 使 情 所 體 遺 所 例 必

目。一 心 爲 論 拔 以 經 人 用 重 間 如 時 泔出 典 司 太 奏 流 徒 燕 處 熙 海 書之旨,以二品繫資,或失廉退之士,故開寒素以明尚德之舉。 左 決, 日 通 初, 國 西 郭 之事,晚乃務學,少長 長 中 多皆 遷 案如癸酉韶 湯 史 正 廷 荀組 劉 施行 尉 琅邪 沈 平。 以 舉 劉 爲『寒素 霍 遷尙 駁 珩 書, 原 廷 爲 燕國 書 尉奏邯鄲醉等,文多不載。 廉 寒素 吏 讓宜 人異業, 者 部 霍 當當 原、 郎、務抑 崇 司 謂 年踰 徒 馮 浮 門寒身素, 府 翊吉謀 競 不從, 始 華競,不 宜 立, 黜 等爲 草野 o 沈又抗詣 無世 其有 通 秘書 之譽未洽, 私 祚 再遷 謁 履 之資。 鄎 ,特留 謙 中書 中書郎、每大 及諸王 寒 **心素靖恭** 奏原,而中 原為 德 心 隱 一文學, 禮 列 逸, 無 司 求 侯, 聞 徒 己者,應 由 事及疑 書復 故 總御 是羣 顯 不 海 佩 應 下 內 金紫 人倫,實 才 議,輒參 有 寒 莫 司 華舉, 素 徒 以 不 先 先 參 歸

薦,如 掌邦教,當務峻準評,以一風流。 應二品,非所 州刺史許猛特以原名聞,擬之西河, 始舉原,先諮侍中、領中書監譁,前州大中正、後將軍嬰,河南尹軼。 執銓衡。 內全遁逸之節,行成名立,搢紳慕之,委質受業者千里 非所謂擬人必於其倫之義也。 ,或耄期稱道,出處默語,唯義所在。 此 而 如詔 陳原隱居求志,篤古好學,學不爲利,行不要名,絕跡窮山,韞韣道藝,外無希世之 | 猶謂草野之譽未洽,德禮 求備。 :書所求之旨,應爲二品。」 詔從之。 但原定志窮山, 然古之厲行高尚之士,或棲身巖穴,或隱跡丘園,或克己 誠當考之於邦黨之倫,審之於任舉之主。|沈爲中正,親 無聞,舍所徵檢之實, 修述儒道, 求加徵聘。 未可以少長異操,疑其所守之美, 義在可嘉。 如沈所列, 而 若遂抑替,將負幽邦之望,傷敦 一而應,有孫孟之風,嚴鄭之操。 州黨之議旣舉, 無明理正辭,以奪沈 去三年、諸州還朝、幽 叉刺 而遠同終始之 所 史班詔表 且

兼階 |咸寧二年,始以太子中庶子徵安定皇甫謐,四年又以博士徵南安朱沖,[110]|太康元年,復以 俱 處 要職 許之者,嘉其服膺高義也。昔先帝患風流之弊,而思反純朴,乃諮詢 級繁多,重議之,見百官志。 重 與李毅同爲吏部郎,時王戎爲尙書,重以淸尙見稱,毅淹通有智識,雖二人 ,成以識會待之,各得其所。 又上疏曰:「凡山林避寵之士,雖違世背時,出處 一般字茂彦、
一一篇史闕其行事。 于時內官重,外官輕, 朝衆, 搜求 殊軌, (操異) 然 隱逸。 而

四縣。 世 **虜護軍、平陽太守,崇德化,修學校,表篤行,拔賢能,淸簡無欲,正身率下,在職三年,彈黜** 雖 太子庶子徵沖,雖皆以病疾不至,而朝野悅服。 篤俗者也。 ,年近耋耄,而志氣克壯,耽道窮藪,老而彌新,操尙貞純,所居成化,誠山栖耆德,足以表 弟嶷亡,表去官。 臣以爲宜垂聖恩,及其未沒,顯加優命。」時朝廷政亂,竟不能從。 陛下遠邁先帝禮賢之旨,臣訪沖州邑,言其 出為行討

殯斂之地,詔於典客署營喪。 永康 初,趙王倫用爲相國左司馬,以憂逼成疾而卒,時年四十八。 追贈散騎常侍,諡曰成。子武,有美名,官至侍中,咸和初卒。 家貧,宅宇狹小,無

也哉 華婉 理, 直, 臣專命 駁 何 而 史臣曰:子雅 田 以 理 舉朝戰 產 尙 歸 茲。 之制 切要。 , 慄,苟避菹 至於緣其 詞愜事當, 束髮登朝,竭誠奉國,廣陳封建,深中機宜,詳辨刑名,該覈政體。 遊目西京,望賈誼而 私議, 一醢,頌以此 蓋 **亹亹可觀。** 不平劉 7時,忠 友, 非遠,眷言東國,顧 異 及銳志銓衡, 鯁不撓,哭張公之非罪,拒趙王之妄錫 夫 僧 而 知 善, 留 心隱逸, 舉不避讐者歟 郎顗 而 有 濬沖期之識 餘。 1 逮元康 李 重 會, 言 之間 ,雖古遺 因 雖文慚 量 革之 賊 虚

劉 頌 剛直, 義形 於詞。 自下摩上,彼實有之。 李重清雅,志迺無私。 推賢拔滯,

列

傳

第

嘉言在茲。懋哉兩哲,邦家之基。

校勘記

- **殖未及叔世之弊** 通鑑八二「及」作「反」,論上下文義,作「反」者是,「及」蓋形近誤。
- (三) 所以衞下之權 周校:「御」誤「衞」。
- C川」小大難期「小大」、各本作「小在」、不可解、今從殿本。
- 則朝野無全人 「全人」,各本作「立人」,今從殿本。臺書治要三〇亦作「全人」。
- いまし 網疏則小必漏 「小必漏」,羣書治要三〇作「小罪必漏」,有「罪」字義長。
- 所羅者廣則爲政不苛 羣書治要三〇作「所羅者廣,則大罪不縱,則甚泰必刑; 微過必漏

政不苛」,今本恐有脫誤。

- てもし 具知卿之乃心爲國也 各本作「具之知卿乃心爲國也」,今從殿本。
- 文先敍「襲封」,後敍「追封」,失之疏略。 更以雍弟詡子隔爲適孫襲封 劉頌前無所封,則「襲封」者,「襲」下文所追封之「梁鄒縣侯」。 }傳
- フォリ 永康元年至 梁鄒縣侯 後、「永康」疑爲「永寧」之誤。 誅張華、 裴頠及劉頌之死並在永康元年,追封劉頌當在趙王倫被殺以

記

高祖之父名昞)改。

二二 徵刑失實 | 斠注:「刑」當從通典一四作「形」。

茂彦 各本作「茂修」,今依宋本、殿本。文選哭范僕射詩注引晉諸公讚亦作「茂彦」。

南安朱沖 「南安」原誤倒作「安南」,據朱沖傳、閻纘傳及通志一二三乙正。

晉書卷四十七

列傳第十七

傳玄 子咸 咸從父弟祗

爲晉王,以玄爲散騎常侍。 遷弘農太守,領典農校尉。所居稱職,數上書陳便宜,多所匡正。五等建,封鶉觚男。 秀才,除郎中,與東海繆施俱以時譽選入著作,撰集魏書。後參安東、衞軍軍事,轉溫令,再 善屬文,解鍾律。 性剛勁亮直,不能容人之短。郡上計吏,再舉孝廉,太尉辟,皆不就。 傅玄字休奕,北地泥陽人也。 及受禪,進爵爲子,加駙馬都尉。 祖燮,漢漢陽太守。父幹,魏扶風太守。 玄少孤貧,博學 州舉

先王之臨天下也,明其大敎,長其義節,道化隆於上,淸議行於下,上下相奉,人懷義心。 亡 秦蕩滅先王之制,以法術相御,而義心亡矣。近者魏武好法術,而天下貴刑名;魏文慕通 帝初卽位,廣納直言,開不諱之路,玄及散騎常侍皇甫陶共掌諫職。玄上疏曰:「臣聞

一三七

列

傳第十七

傅玄

秦之病 是以 之典文,臣詠歎而已,將又奚言!惟未舉淸遠有禮之臣,以敦風節,未退虛鄙,以懲 達,引而天下賤守節。 猶 敢有言。」詔報曰:「舉淸遠有禮之臣者,此尤今之要也。」 乃使玄草詔進之。 復發於 今。 陛下聖德,龍興受禪,弘堯舜之化,開正直之路,體夏禹之至儉,綜殷周 其後綱維不攝,而虛無放誕之論盈於朝野,使天下無復淸議,而亡 不恪,臣 玄復上

病滿 得其人,一 官之累,此王政之急也。 百日不 臣聞舜舉五臣,無爲而化,用人得其要也。 日則損不貲,況積 差,宜令去職,優其禮秩而寵存之,旣差而後更用。 日乎! 典謨 曰「無曠庶官」, 天下羣司猥多,不可不審得其人也。不 言職之不可久廢也。 臣不廢職於朝,國 諸 育疾 無曠

疏曰

學以教 離 其分,百官子 而 通其貨。 其事 學校未設,游手多而親農者少,工器不盡其宜。 臣 ;徒繫名於太學,然不聞先王之風。 之,選明師以訓之,各隨其才優劣而 聞先王分士農工商 故雖天下之大,兆庶之衆, 弟不修經藝而務交遊,未知莅 以經國制事,各一其業而殊其務。 無有一人游 授用之。 「事而坐享天祿,農工之業多廢,或逐 今聖明之政資始,而漢魏之失未改,散官衆 手。 臣以爲亟定其制,通計天下若干人 農以豐其食,工以足其器,商賈以 分數之法,周備 自士已上子弟,爲之立太 如 此。 漢魏 淫 利 不定

爲士,足以副在官之吏;若干人爲農,三年足有一年之儲;若干人爲工,足其器用;若干 人為商賈,足以通貨而已。尊儒尚學,貴農賤商,此皆事業之要務也。

世,是以明堂、月冷著帝藉之制。伊尹古之名臣,耕於有莘,晏嬰齊之大夫,避莊公之 上,義合古制。 立慎終之化,居不見久,則競爲一切之政。六年之限,日月淺近,不周黜陟。 乎!虞書曰:「三載考績,三考黜陟幽明。」是爲九年之後乃有遷敍也。 者使學,其餘皆歸之於農。 人而授事,士農工商之分不可斯須廢也。 兄則友,爲弟則悌。天下足食,則仁義之敎可不令而行也。 而收其租稅,家得其實,而天下之穀可以無乏矣。夫家足食,爲子則孝,爲父則慈,爲 又多,加以服役爲兵,不得耕稼,當農者之半,南面食祿者參倍於前。使冗散之官農, 者,不督使學,則當使耕,無緣放之使坐食百姓也。今文武之官旣衆,而拜賜不在職者 難,亦耕於海濱。昔者聖帝明王,賢佐俊士,皆嘗從事於農矣。王人賜官,宂散無事 前皇甫陶上事,欲令賜拜散官皆課使親耕,天下享足食之利。禹稷躬稼,祚流後 若百工商賈有長者,亦皆歸之於農。 若未能精其防制,計天下文武之官足爲副貳 爲政之要,計人而置官,分 務農若此, 故居官久,則念 何有不贍 陶之所

列 傳 夫儒學者,王敎之首也。 尊其道,貴其業,重其選,猶恐化之不崇,忽而不以爲急, 第 + 七 傅

玄

此,而學校之綱舉矣。

臣懼 書而已,算其人之謂也。 日有陵遲而不覺也。 仲尼有言:「人能弘道,非道弘人。」然則尊其道者,非惟尊其 貴其業者,不妄敎非其人也。 重其選者,不妄用非其人也。若

豈得不使發憤耶!二常侍所論,或舉其大較而未備其條目,亦可便令作之,然後主者八坐 補過,獲保高位。 慨,至使杜口結舌。 廣共研精。 **書奏,帝下詔曰:「二常侍懇懇於所論,可謂乃心欲佐益時事者也。** 四海知區區之朝無諱言之忌也。」俄遷侍中。 人猶不拒誹謗,況皆善意在可採錄乎!近者孔鼂、綦毋龢皆案以輕慢之罪,所以皆原,欲使 凡關言於人主,人臣之所至難。而人主若不能虛心聽納,自古忠臣直士之所慷 苟言有偏善,情在忠益,雖文辭有謬誤,言語有失得,皆當曠然恕之。 每念於此,未嘗不歎息也。 故前韶敢有直言,勿有所距,庶幾得以發懞 而主者率以常制裁之, 古

泰始四年,以爲御史中丞。 初,玄進皇甫陶,及入而抵,玄以事與陶爭,言諠譁,爲有司所奏,二人竟坐觅官。 時頗有水旱之災,玄復上疏曰:

阜,人未大饑,下祗畏之詔,求極意之言,同禹湯之罪己,侔周文之夕惕。 以人事耳。 臣 [聞聖帝明王受命,天時未必無災,是以|堯有九年之水,陽有七年之旱,惟能 故洪水滔天而免沈溺,野無生草而不困匱。 伏惟陛下聖德欽明,時 臣伏歡喜,上 小水 濟之

便宜五事

宜佃兵持官牛者與四分,持私牛與官中分,則天下兵作歡然悅樂,愛惜成穀,無有損棄 分,士得二分,持私牛及無牛者,官得七分,士得三分,人失其所,必不歡樂。 士得四分,自持私牛者,與官中分,施行來久,衆心安之。今一朝減持官牛者,官得八 其一日,耕夫務多種而耕暵不熟,徒喪功力而無收。 又舊兵持官牛者,官得六分, 臣愚以爲

二千石以十數。 其二日,以二千石雖奉務農之詔,猶不勤心以盡地利。 臣愚以爲宜申漢氏舊典,以警戒天下郡縣,皆以死刑督之。 昔漢氏以墾田不實, 徵殺

方宜。 伏見河堤謁者車誼不知水勢, 水功至大,與農事並興,非一人所周故也。 其三日,以魏初未留意於水事, 轉爲他職, 先帝統百揆, 更選知水者代之。 今謁者一人之力,行天下諸水, 分河堤爲四部, 幷本凡 五 可分爲五部, 無時 謁 使各精其 者,以 得編

之課,而 其頃畝, 其四日,古以步百爲畝,今以二百四十步爲一畝,所覺過倍。 田兵益甚,功不能修理,至畝數斛已還,或不足以償種 但務修其功力,故白田收至十餘斛,水田收數十斛。 自頃以來, 非與曩時異天地,橫 近魏 初課田,不務多 日 增 田 頃畝

列

遇災害也,其病正在於務多頃畝而功不修耳。竊見河堤謁者石恢甚精練水事及田事, 知其利害,乞中書召恢,委曲問其得失,必有所補益

皆使幷屬秦州,令烈得專御邊之宜。 定西州都尉募樂徙民,重其復除以充之,以通北道,漸以實邊。詳議此二郡及新置郡, 制,則惡胡東西有窟穴浮游之地,故復爲患,無以禁之也。宜更置一郡於高平川,因安 惟恐胡虜適困於討擊,便能東入安定,西赴武威,外名爲降,可動復動。 諸胡雖已無惡,必且消弭,然獸心難保,不必其可久安也。若後有動釁,烈計能制之。 患,使鮮卑數萬散居人間,此必爲害之勢也。秦州刺史胡烈素有恩信於西方,今烈往, 其五日,臣以爲胡夷獸心,不與華同,鮮卑最甚。 本鄧艾苟欲取一時之利,不慮後 此二郡非烈所

之,此誠爲國大本,當今急務也。如所論皆善,深知乃心,廣思諸宜,動靜以聞也。」 韶曰:「得所陳便宜,言農事得失及水官興廢,又安邊御胡政事寬猛之宜,申省周備,一二具

施行,而常見優容。轉司隸校尉。 五年,遷太僕。時比年不登,芜胡擾邊,詔公卿會議。」玄應對所問,陳事切直,雖不盡

品秩在諸卿下,以次坐,不絕席。而謁者以弘訓宮爲殿內,制这位在卿下。 獻皇后崩於弘訓宮,設喪位。 舊制、司隸於端門外坐、在諸卿上、絕席。其入殿、按本 玄恚怒,厲聲色

踊不寐,坐而待旦。 表不以實,坐発官。 而責謁者。謁者妄稱尙書所處,玄對百僚而駡尙書以下。 於是貴游懾伏,臺閣生風。尋卒於家,時年六十二,諡曰剛 然」玄天性峻急,不能有所容,每有奏劾,或值日暮,捧白簡,整簪帶,竦 御史中丞庾純奏玄不敬,玄又自

『不見賈生,自以過之,乃今不及』,信矣! 斷得失,各爲區例,名爲傳子,爲內、外、中篇,凡有四部、六錄,合百四十首,數十萬言,幷文 理濟,經綸政體,存重儒教,足以塞楊墨之流遁,齊孫孟於往代。每開卷,未嘗不歎息也。 集百餘卷行於世。 <u></u>玄少時避難於河內,專心誦學,後雖顯貴,而著述不廢。撰論經國九流及三史故事,評 玄初作內篇成,子咸以示司空王沈。 沈與玄書曰:「省足下所著書,言富

其後追封淸泉侯。子咸嗣。

甫之志。 咸字長虞,剛簡有大節。 好屬文論, 雖綺麗不足, 風格峻整,識性明悟,疾惡如仇,推賢樂善,常慕季文子、仲山 而言成規鑒。 潁川庾純常歎曰:「長虞之文近乎詩人之

之官,自表解職。 咸寧初,襲父爵,拜太子冼馬,三累遷尚書右丞。出爲冀州刺史,繼母杜氏不肯隨咸 三旬之間,遷司徒左長史。時帝留心政事,詔訪朝臣政之損益。咸上言

列

傳第

十七七

傅

玄

作矣!

皆生於百姓。 更多。 災患,便不繼贈。 軍 見聖詔以百姓饑饉爲慮,無能云補,伏用慚恧,敢不自竭,以對天問。 便有菜色者,誠由官衆事殷,復除猥濫,蠶食者多而親農者少也。臣以頑疏,謬忝近職,每 下,未有踰陛下也。 曰:「陛下處至尊之位,而修布衣之事,親覽萬機,勞心日昃。 ,乃盈於十。 空校牙門,無益宿衞,而虛立軍府,動有百數。 一夫不農,有受其飢,今之不農,不可勝計。 夏禹敷土,分爲九州,今之刺史,幾向一倍。戶口比漢十分之一,而置郡縣 以爲當今之急,先幷官省事,靜事息役,上下用心,惟農是務也 然泰始開元以暨于今,十有五年矣。而軍國未豐,百姓不贍,一歲不登 五等諸侯,復坐置官屬。 縱使五稼普收,僅足相接,**暫有** 在昔帝王、躬自菲薄,以利天 舊都督有四,今幷監 諸所寵給,

獨上。 奪惟意,乃奏免駿大中正。 所,不能接賓,求以尙書郎曹馥代毓,旬日復上毓爲中正。 咸 在位多所 舒奏减激訕不直,詔轉咸 、執正。 豫州大中正夏侯駿上言,〔三魯國 司徒魏舒,駿之姻屬,屢却不署,咸據正甚苦。 為車騎司 馬。 小中正、司空司馬孔毓, 司徒三却,駿故據正。 舒終不從,咸遂 咸以 四移病 駿與

古者臣無玉食,今之賈豎皆厭粱肉。 下,食肉衣帛,皆有 咸 以世俗奢侈,又上書曰「臣以爲穀帛難生,而用之不節,無緣不匱。 其制。 竊謂奢侈之費,甚於天災。 古者后妃乃有殊飾,今之婢妾被服綾羅。 古者磨有茅莢,今之百姓競豐其屋。 故先王之化天 古者大夫乃

由 不徒行,今之賤隸乘輕驅肥。古者人稠地狹而有儲蓄,由於節也,今者土廣人稀而患不足, 於奢也。 魏武帝歎曰:『孤之法不如毛尚書。』令使諸部用心,「图」各如毛玠,風俗之移,在不難 欲時之儉,當詰其奢,奢不見詰,轉相高尚。 昔毛玠為吏部尚書,時無敢好衣美

矣。」又議移縣獄於郡及二社應立,朝廷從之。遷尙書左丞。

聖上 漸 亡隕,方在 荀愷從兄喪,自表赴哀,詔聽之而 之事旣畢,明公當思隆替之宜。周公聖人,猶不免謗。 顒 彌 加 溝,權 以不平。 顯 而 ,戴仰宸 上欲委政於公,諒闇自居,此雖謙讓之心,而天下未以爲善。天下未以爲善者,以億兆顒 貶, 春 秋 一不可假,故雖斬焉在疾,而躬覽萬機也。逮至漢文,以天下體大,服重難久,遂制旣 以 世祖武皇帝雖大孝烝烝,亦從時釋服,制心喪三年,至於萬機之事,則有不遑。今 非成王之年乎!得意忘言,言未易盡。 即位,楊駿輔政。咸言於駿曰「事與世變,禮隨時宜,諒闇之不行尙矣。由世道 隆風教。」帝以駿管朝政,有詔不問,駿甚憚之。 信 極,聽於冢宰,懼天光有蔽。人心旣已若此,而明公處之固未爲易也。 由 宿,聖恩矜憫, 是欲 出爲京兆、弘農太守,駿甥李斌說駿,不宜斥出正人,乃止 聽使臨喪。 未下,愷乃造慶。咸因奏曰:「死喪之戚,兄弟孔懷。同堂 韶未下而 **苟明公有以察其悾款,言豈在多。」時司隸** 便以行造,急諂媚之敬,無友于之情。宜 以此推之,周公之任旣未易而處,況 咸復與 駿 箋諷 切之, 駿 意 稍 折 , 竊謂 山陵

列

致忿耳。 直正,欲以苟且爲明哲耳!自古以直致禍者,當自矯枉過直,或不忠允,欲以亢厲爲聲,故 答曰:「衞公云,酒色之殺人,此甚於作直。坐酒色死,人不爲悔。逆畏以直致禍,此由心不 臺,維正八坐,此未易居。以君盡性而處未易居之任,益不易也。 而相觀每事欲了。生子癡,了官事,官事未易了也。了事正作癡,復爲快耳! 一般弟濟素與咸善,與咸書曰:「江海之流混混,故能成其深廣也。 天下大器,非可稍了, 安有悾悾爲忠益,而當見疾乎」居無何,駿誅。咸轉爲太子中庶子,遷御史中丞。 想慮破頭,故具有白。」咸 左丞總司天

皆由東安公。謂殿下至止,當有以正之。正之以道,衆亦何所怒乎! 此者也。無功而厚賞,莫不樂國有禍,禍起當復有大功也。人而樂禍,其可極乎! 郡公,餘侯伯子男,旣妄有加,復又三等超遷。此之熏赫,震動天地,自古以來,封賞未有若 死莫不欣悅,故論功寧厚,以敍其歡心。此羣下所宜以實裁量,而遂扇動,東安封王,孟李 發自天聰,孟觀、李肇與知密旨耳。至於論功,當歸美於上。觀等已數千戶縣侯,聖上以駿 無狀,便作伊周,自爲居天下之安,所以至死。其罪旣不可勝,亦是殿下所見。駿之見討, 且猶不免疑,況臣旣不聖,王非孺子,而可以行伊周之事乎!上在諒闇,聽於冢宰,而楊駿 而今皆更倍論,莫不失望。一咸之愚亢,不惟失望而已,竊以爲憂。 時太宰、汝南王亮輔政,咸致書曰:「咸以爲太甲、成王年在蒙幼,故有伊周之事。 衆之所怒,在於不平 又討駿之時,殿下在 作此者,

外,實所不綜。 今欲委重,故令殿下論功。 論功之事,實未易可處,莫若坐觀得失, 有居正

之事宜也。」

夏侯駿也。 前摩天子逆鱗,欲以盡忠;今觸猛獸之鬚,非欲爲惡,必將以此見恕。」曰原不納。 **欻摩天子逆鱗!』自知所陳,誠頟頟觸猛獸之鬚耳。** 觸楊駿,幾爲身禍,況於殿下,而當有惜!往從駕,殿下見語:『卿不識韓非逆鱗之言耶,而 感,先帝崩背,宜自咎責,而自求請命之勞,而公以爲少府。 過尊門,冠蓋車馬,塡塞街衢,此之翕習,旣宜弭息。又夏侯長容奉使爲先帝請命,祈 至於此。 重,宜反此失。 咸復以亮輔政專權,又諫曰:「楊駿有震主之威,委任親戚,此天下所以諠譁。 一犬吠形,羣犬吠聲,懼於羣吠,遂至叵聽也。」咸之爲人,不能面從而有後言。 謂宜靜默頤神,有大得失,乃維持之,自非大事,一皆抑遣。 所以敢言,庶殿下當識其不勝區 私竊之論,云長容則公之姻,故 比四造詣,及經 長容者, 今之處 禱 無

此弊誠宜亟革之,當內外通塞無所偏耳。旣使通塞無偏,若選用不平,有以深責,責之苟 外。內外之任,出處隨宜,中間選用,惟內是隆,外舉旣穨,復多節目,競內薄外,遂成風俗。 才非一流,職有不同。譬諸林木,洪纖枉直,各有攸施。故明揚逮于仄陋,疇咨無拘內 會丙寅, 韶羣僚舉郡縣之職以補內官。咸復上書曰:「臣咸以爲夫興化之要,在於官

列

以何 発而 內外 出人。 深, 也。 無憂不平 委任 之衆職各得其才, 爲 無恥 不能 貴 当者 之懼,甚於限 出 臣 戰, 也。 也。 人,當隨事 聞刑懲小 孰與倚限法 苟委任之,一則 且 廖柱不可以調瑟,況乎官人而可以限乎,伏思所限者,以防選用不能 法。 粲然之美於斯 人,義責君子,君子之責,在心不在限也。 而 制,無須 是法之失,非己之尤,尤不在己,實之無懼,所謂『齊之以刑,人 以苟 発乎 慮罪之及,二則懼致怨謗。 、限法。 可觀。 法之有限,其於致遠,無乃泥乎! 如此,非徒御之以限,法之所致, 己快則朝野稱詠,不善則衆惡 正始中,任何晏以選舉, 或謂不制 乃委任之由 其法,

都官 **靦然**, 掩檢以避其鋒耳。 意,授非所堪。 乞,乃使於官舍設靈坐。 聽,敕使者就拜,咸復送還印綬。 見 歸,此之戰 咸 以此 虚 再爲本郡 爲先。 隆 寵 披露丹款,歸窮 中正 前受嚴詔,視 而 在職有日,旣無赫然 經彌日月,未有所 遭繼 咸又上表曰:「臣旣駑弱,不勝 母憂去官。 事 上聞,謬詔旣往, 非徒|毅有王臣匪躬之節,亦由所奏見從, 公車 之日,私 得。 不通,催使攝 之舉, 頃之, 心自誓,隕越爲報。 斯由陛 叉不 起以議郞,長兼司隸校尉。 終然 下有以獎厲,慮於愚戆, 應弦 職 無改。 重任 (垂翅) 咸 災 臣 身 人誰 以貨賂流 一雖不 加在哀疚,假息 無兄弟, 復憚? 能滅 行 身 喪祭 威風得伸也。」詔 故 所 將 以 咸前後固辭, 光 全 必 無主, 宜 日 禄 一禮教, 死繫, 深 闋 大 陸 絕 夫 重 故自 劉 自 切 義 下 不 較 過 陳 無

爲司隸,聲震內外,遠近淸肅。

曰:「但當思必應繩中理,威風日伸,何獨劉毅」」

不能證 兼 史中丞解結以咸劾戎爲違典制,越局侵官,干非其分,奏殆咸官。 等官。」詔曰:「政道之本,誠宜久於其職,咸奏是也。 便遷,百姓困於無定,吏卒疲於送迎」。 績,九年 河南尹何攀等,京都肅然,貴戚懾伏。 時朝廷寬弛,豪右放恣,交私請託,朝野溷淆。 靜風俗,以凝庶績,至令人心傾動,開張浮競。 一黜陟。 其在周禮,三年大比。 孔子亦云,『三年有成』。而中間以來,長吏到官,未幾 時僕射王戎無吏部,咸奏、「戎備位台輔, 咸以「聖人久於其道,天下化成。 咸奏免河南尹澹、左將軍倩、廷尉高光、 戏職在論道,吾所崇委,其解禁止。」御 中郎李重、李義不相匡正。云請免戎 韶亦 不許。 是以唐虞 兼掌選舉, 三載考

丞專司內百僚,司隸專司外百僚。 外者、禁防之事已於中丞說之故也。中丞、司隸俱糾皇太子以下,則共對司內外矣,不爲中 推責州坐,卽今所謂行馬內語施於禁防。 宫内禁防,外司不得而行,故專施中丞。今道路橋梁不修,鬭訟屠沽不絕,如此之比,中丞 百僚,而不得復說行馬之內者,內外衆官謂之百僚,則通內外矣。司隸所以不復說行 '雖在行馬外,而監司不糾,亦得奏之。如令之文,行馬之內有違法憲,謂禁防之事耳。 咸 上事以爲「按令,御史中丞督司百僚。皇太子以下,其在行馬內,有違法憲者皆彈糾 自有中丞、司隸以來,更互奏內外衆官,惟所糾得無內外 旣云中丞督司百僚矣,何復說行馬之內乎! 馬內

列

之限 觀聽, 官 糾之,尚書在行馬之內而 原, 太子而不得糾尙書,臣之闇塞旣所未譬。 敕云但爲 `今臣裁糾尙書,而當有罪乎?」咸累自上稱引故事,條理灼然,朝廷無以易之。 是以 也。 無 乃有怪邪 申陳其愚。司隸與中丞俱共糾皇太子以下,則從皇太子以下無所不糾也。 過耳,非所不及也,以此見原。 而 結 一旦横挫臣,臣前所以不羅縷者,冀因結奏得從私願也。 ! 臣識石公前在殿上脫衣,爲司 不得糾,無有此理。 臣忝司直之任,宜當正己率人,若其有過,不敢受 皇太子爲在行馬之內邪,皇太子在行馬之內而 此理灼然,而結以此挫臣。 隸荀愷所奏,先帝不以爲非,于時莫謂侵 今旣所願 臣可無恨耳,其於 不從, 得糾皇 得 而

也。」元康 , 敷、晞、纂。 吳郡 四年卒官,時年五十六。 顧樂常與親故書曰:「傅長虞爲司 長子敷 嗣 詔贈司隸校尉,朝服一具、衣一襲、錢二十萬,諡曰貞。有 隸,勁直忠果, 劾按驚人。 雖非周才, 偏亮可貴

卒,時年四十六。 亂 避地會稽,元帝引爲鎭東從事 敷字類根,清靜有道,素解屬文。 晞亦有才思,爲上虞令,甚有政績,卒於司徒西曹屬。 中 鄎。 除太子舍人,轉尙書郎、太傅參軍,皆不起。 素有羸疾,頻見敦喻, 辭不 獲 発 う 輿病到職 永嘉之 數月

祗字子莊。 父嘏,魏太常。 祗性至孝,早知名,以才識明練稱。 武帝始建東宮、起家太

濟汎溢,鄧艾嘗著濟河論,開石門而通之,至是復浸壞。 子舍人,累遷散騎黃門郎,賜爵關內侯,食邑三百戶。 凶導從。 其後諸卿夫人葬給導從,自此始也。 服終,為榮陽太守。 母憂去職。及葬母、詔給太常五等吉 祗乃造沈萊堰,至今克豫無水患, 自魏黃初大水之後,河

百姓爲立碑頌焉。尋表兼廷尉,遷常侍、左軍將軍

僚佐不可加罰。」詔又赦之。「祗多所維正皆如此。 又收駿官屬,祗復啓曰:「昔魯芝爲曹爽司馬,斬關出赴爽,宣帝義之,尚遷靑州刺史。 兵所害。尚書左僕射荀愷與楷不平,因奏楷是駿親,收付廷尉。 今內外隔絕,不知國家所在,何得安坐!」茂乃驚起。 閉,內外不通。祗請與尙書武茂聽國家消息,揖而下階。茂猶坐,祗顧曰:「君非天子臣邪 始崩,臣下論功者也。」駿不從。入爲侍中。 及帝崩,梓宮在殯,而太傅楊駿輔政,欲悅衆心,議普進封爵。一祗與駿書曰:「未有帝王 時將誅駿,而駿不之知。 駿既伏誅,裴楷息瓚,駿之壻也,爲亂 祗證楷無罪,有詔赦之。時 祗侍駿坐,而雲龍門 駿之

公,日子八百戶,餘二千二百戶封少子暢爲武鄉亭侯。又以本封賜兄子雋爲東明亭侯。 除河南尹,未拜,遷司隸校尉。以討楊駿勳,當封郡公八千戶,固讓,減半,降封靈川縣

兵反,以祗爲行安西軍司,加常侍,率安西將軍夏侯駿討平之。遷衞尉,以風疾遜位,就拜 楚王瑋之矯詔也,祗以聞奏稽留,免官。 朞年,遷光祿勳,復以公事免。 氏人齊萬年

列

常侍,食卿祿秩,賜錢及牀帳等。尋加光祿大夫,門施行馬。

王戎、陳準等相與言曰:「傅公在事,吾屬無憂矣。」其爲物所倚信如此。〔5〕 及趙王倫輔政,以爲中書監,常侍如故,以鎭衆心。 祗辭之以疾, 倫遣御史輿祗就職。

黄門郞陸機、右丞周導王尊等付廷尉。 草本非祗 也,孫秀與義 倫篡,又爲右光祿、開府, 所撰,於是詔復光祿大夫。 陽 王威等十餘人預撰儀式禪文。 加侍中。 子宣,尙弘農公主。 以禪文出中書,復議處祗罪, 惠帝還宮,臧以經受僞職請退,不許。 及倫敗,齊王冏收侍中劉逵、常侍賜捷杜育 會赦得原。 初,倫之篡 後以禪文

君臣 位,遷光祿大夫、侍中,未拜,加右僕射、中書監。 太傅,侍中 ,謙光之道,由此上下雍穆。 專遷太子少傳,上章遜位還第**。** -如故。 疾篤遜位,不許。 祗 明達國體,朝廷制度多所經綜。歷左光祿、開府,行太子 遷司徒,以足疾,詔版輿上殿,不拜。 及成都王穎爲太傅,復以祗爲少傅,加侍中。 時太傅東海王越輔政,祗旣居端右,每宣 懷帝即

以義誠不終,力疾手筆敕厲其二子宣、暢,辭旨深切,覺者莫不感激慷慨。 臺,推賦爲盟主,以司徒、持節、大都督諸軍事傳檄四方。 方伯徵義兵,祗自屯 大將軍尚晞表請遷都,使臧出詣河陰,修理舟檝,爲水行之備。 盟津 小城,宣弟暢行河陰令,以待宣。 遣子宣將公主與尚 祗 以暴疾薨,時年六十九。 及洛陽陷沒,遂共 **祗著文章駁論十** 書令 和郁赴告 祗自 建行

餘萬言。

安,以宣爲左丞,不就,遷黃門郎。懷帝卽位,轉吏部郎,又爲御史中丞。卒年四十九,無 尙書郎、太子中舍人,遷司徒西曹掾。去職,累遷爲祕書丞、驃騎從事中郞。 宣字世弘。年六歲喪繼母,哭泣如成人,中表異之。及長,好學,趙王倫以爲相國掾、 惠帝至自長

子,以暢子沖爲嗣。

識朝儀,恒居機密,勸甚重之。作晉諸公敍讚二十二卷,又爲公卿故事九卷。 子詠,過江爲交州刺史、太子右率。 未弱冠,甚有重名。以選入侍講東宮,爲祕書丞。尋沒於石勒,勒以爲大將軍右司馬。諳 暢字世道。年五歲,父友見而戲之,解暢衣,取其金環與侍者,暢不之惜,以此賞之。年 咸和五年卒。

所譏,惜哉 操,抗辭正色,補闕殉違,諤諤當朝,不忝其職者矣。及乎位居三獨,彈擊是司,遂能使臺閣 臨晉,居諒直之地, 生風,貴戚斂手。 史臣曰:武帝覽觀四方,平章百姓,永言啓沃,任切爭臣。傅玄體强直之姿,懷匪躬之 1 古人取戒於韋弦、良有以也。 雖前代鮑萬,何以加之! 有先見之明矣。 傳祗名父之子,早樹風猷,崎嶇危亂之朝,匡救君臣之 然而惟此編心,乏弘雅之度,驟聞競爽,爲物議 長虞風格凝峻,弗墜家聲。 及其納諫汝南,獻書

列傳

第

十七

校勘記

際,卒能保全祿位,可謂有道存焉。

贊曰:鶉觚貞諒,實惟朝望。 志厲强直,性乖夷曠。 長虞剛館,無虧風尚。 子莊才識,

爰膺衮職。 忠績未申,泉途遽逼

校勘記

(一) 慕通達 「通達」原作「通遠」,今從殿本。 通鑑七九亦作「通達」。

[二] 咸寧初襲父爵拜太子洗馬 據類聚一〇〇、御覽一一引傳咸自敍,其爲太子洗馬在泰始九年,

此列襲爵後,不確。

<u>___</u> 夏侯駿 「駿」,各本作「俊」,今從殿本。下同。 參卷四校記。

令使諸部用心 御覽二一四引傳咸集表「令」作「今」,宜從之。

つまし 必將以此見恕 「恕」,各本作「怒」,今從南監本及吳本。通志一二三引亦作「恕」。

李義 |勞校:「義」當作「毅」。按:李重傳可證。

靈川縣公 諸史考異:據宋書傅弘之傳「靈川」當作「靈州」。 按:據後漢書傅變傳,靈州爲傳祗

祖籍。

其爲物所倚信如此 册府四五八「物」上有「人」字。

晉書卷四十八

列傳第十八

向雄

宴而遣之。 違生背死以立於時!殿下讎枯骨而捐之中野,爲將來仁賢之資,不亦惜乎「一帝甚悅,與談 葬之哉!今王誅旣加,於法已備。雄感義收葬,敎亦無闕。法立於上,敎弘於下,何必使雄 葬,若復相容,其如王法何,」雄曰:「昔者先王掩骼埋胔,仁流朽骨,當時豈先卜其功罪而後 帝召雄而責之曰:「往者王經之死,卿哭王經於東市,我不問也。今鍾會躬爲叛逆,又輒收 又以少譴繫雄於獄。司隸鍾會於獄中辟雄爲都官從事,會死無人殯斂,雄迎喪而葬之。文 之死也,雄哭之盡哀,市人咸爲之悲。後太守劉毅嘗以非罪笞雄,曰及吳奮代毅爲太守, 向雄字茂伯,河內山陽人也。父韶,彭城太守。雄初仕郡爲主簿,事太守王經。及經

怒,問雄曰:「我令卿復君臣之好,何以故絕。」雄曰:「古之君子進人以禮,退人以禮,今之進 君臣之好。 累遷黃門侍郎。 雄不得已,乃詣毅,再拜曰:「向被詔命,君臣義絕,如何。」於是卽去。 時吳奮、劉毅俱爲侍中,同在門下,雄初不交言。 武帝聞之,敕雄令復 帝聞而大

劉河內於臣不爲戎首,亦已幸甚,安復爲君臣之好」帝從之。

侍中,又出爲征虜將軍。 徑出,遂以憤卒。 弟雖多,然有名望者少。齊王臥在京邑,所益實深,不可不思。」帝不納。雄固諫忤旨,起而 人若加諸膝,退人若墜諸川。 泰始中,累遷秦州刺史,假赤幢、曲蓋、鼓吹,賜錢二十萬。咸寧初,入爲御史中丞,遷 太康初,爲河南尹,賜爵關內侯。 齊王攸將歸藩,雄諫曰:「陛下子

弟匡、惠帝世爲護軍將軍。

段灼

段灼字休然,敦煌人也。世爲西土著姓,果直有才辯。 少仕州郡,稍遷鄧艾鎭西司馬,

從

艾破蜀有功,封關內侯,累遷議郎。 武帝即位,灼上疏追理艾曰:

惜哉,言艾之反也!以艾性剛急,矜功伐善,而不能協同朋類,輕犯雅俗,失君子之心, 故征西將軍鄧艾,心懷至忠,而荷反逆之名,平定巴蜀,而受三族之誅,臣竊悼之。

故莫肯理之。臣敢昧死言艾所以不反之狀。

經困 萬,束馬懸車,自投死地,勇氣陵雲,將士乘勢,故能使劉禪震怖,君臣面縛。軍不踰 卒之役。 是歲 官軍大敗之後,士卒破膽,將吏無氣,倉庫空虚,器械殫盡。 艾欲積穀强兵,以待有事。 武之任,所在輒有名績,固足以明宣皇帝之知人矣。會值洮西之役,官兵失利,刺史王 時,而巴蜀蕩定,此又固足以彰先帝之善任矣。 指授長策。 艾受命忘身,龍驤麟振,前無堅敵。 蜀地阻險,山高谷深,而艾步乘不滿二 重慮,思惟可以安邊殺敵莫賢於艾,故授之以兵馬,解狄道之圍。 圍解,留屯上邽。 承 於圍城之中。 (少雨,又爲區種之法,手執耒耜,率先將士,所統萬數,而身不離僕虜之勞,親執士 **艾本屯田掌犢人,宜皇帝拔之於農吏之中,顯之於宰府之職。處內外之官,據文** 故落門、段谷之戰、能以少擊多,摧破强賊、斬首萬計。遂委艾以廟勝成圖, 當爾之時,二州危懼,隴右懍懍,幾非國家之有也。先帝以爲深憂

兵,束身就縛,不敢顧望。誠自知奉見先帝,必無當死之理也。 郡未附,矯令承制,權安社稷。 軍鍾會,有吞天下之心,恐艾威名,知必不同,因其疑似,構成其事。 艾功名已成,亦當書之竹帛,傳祚萬世。 雖遠常科,有合古義,原心定罪,事可詳論。 七十老公,復何所求哉!艾以禪初降,遠 會受誅之後,艾參佐官 艾被詔書,卽遣强 故鎭西將

列

第十八

段

灼

於漢文,天下之事可爲痛哭者,良有以也。 夫反非小事,若懷惡心,卽當謀及豪傑,然後乃能興動大衆,不聞过有腹心一人。 屬、部曲將吏、愚戆相聚,自共追艾,破壞檻車,解其囚執。 口無惡言,獨受腹背之誅,豈不哀哉!故見之者垂涕,聞之者歎息。 艾在困地,是以狼狽失據。 此賈誼所以慷慨 臨死

之無罪,吳人傷子胥之冤酷,皆爲之立祠。天下之人爲艾悼心痛恨,亦由是也。 樂為陛下死矣! 死無所恨。 赦冤魂於黃泉,收信義於後世,則天下徇名之士,思立功之臣,必投湯火, 聽艾門生故吏收艾尸柩,歸葬舊墓,還其田宅,以平蜀之功,繼封其後,使艾闔棺定諡, 陛下龍興,闡弘大度,受誅之家,不拘敍用,聽艾立後,祭祀不絕。昔秦人憐白起 謂可

帝省表,甚嘉其意。

灼後復陳時宜日:

者,此天時不如地利。城非不高,池非不深,穀非不多,兵非不利,委而去之,此地利不 不可攻也。人心不和,雖金城湯池,不能守也。臣推此以廣其義,舜彈五絃之琴,詠南 如人和。 臣聞天時不如地利,地利不如人和。三里之城,五里之郭,圜圍而攻之,有不克 然古之王者,非不先推恩德,結固人心。人心苟和,雖三里之城,五里之郭,

子弟。 云割地,譬猶囊漏貯中,亦一家之有耳。若慮後世强大,自可豫爲制度,使得推恩以分 選中郞傅相,才兼文武,以輔佐之。 如家,君臣分定,百世不遷,連城開地,爲晉、魯、衞。所謂盤石之宗,天下服其强矣。雖 司徒、衞將軍三王宜留洛中鎮守,其餘諸王自州征足任者,年十五以上悉遣之國。 爲 睦 其要莫若推恩以協和黎庶,故推恩足以保四海,不推恩不足以保妻子。 風之詩,而天下自理,由堯人可比屋而封也。 乘,流死之孤,哀聲未絕。故臣以爲陛下當深思遠念,杜漸防萌,彈琴詠詩,垂拱而已。 九族爲先,周文以刑于寡妻爲急,明王聖主莫不先親後疏,自近及遠。臣以爲太宰、 如此則枝分葉布、稍自削小、漸使轉至萬國、亦後世之利、非所患也。 聽於其國繕修兵馬,廣布恩信。 曩者多難,姦雄屢起,攪亂衆心,刀鋸相 必撫下猶子,愛國 是故唐堯以親

伊尹歸殷;殷邦不和,呂氏入周。殷監在於夏后,去事之誠,誠來事之鑒也。 國之興也,由於九族親睦,黎庶協和,其衰也,在於骨肉疏絕,百姓離 糅,例受茅土。似權時之宜,非經久之制,將遂不改,此亦煩擾之人,漸亂之階也。 絕,不祥莫大焉。間者無故又瓜分天下,立五等諸侯。 **今之宜,諸侯强大,是爲太山之固。** 昔在漢世,諸呂自疑,內有朱虛、東牟之親,外有諸侯九國之强,故不敢動搖。 非我族類,其心必異。 上不象賢,下不議功,而是非雜 而魏法禁錮諸王,親戚隔 ناد 故夏邦不安, 於

一三四

叉陳曰:

雖下功必侯;如在州郡,至雖功高不封,四非所謂近不重施,遠不遺恩之謂也。 以逼江由之勢,得封者三十人。自金城以西,非在欣部,無一人封者。苟在中軍之例, 乙亥詔書,州郡將督,不與中外軍同,雖在上功,無應封者。 昔伐蜀,募取凉州兵馬、羌胡健兒,許以重報,五千餘人,隨艾討賊,功皆第一。而 唯金城太守楊欣所領兵,

怨,由來久矣。詩云:「尸鳩在桑,其子七兮。淑人君子,其儀一兮。」臣以爲此等宜蒙 振於秦庭,吳刀耀於魚腹,視死如歸,豈不有由也哉!夫功名重賞,士之所競,不平致 臣聞魚懸由於甘餌,勇夫死於重報。故荆軻慕燕丹之義,專諸感闔閭之愛,匕首

套

灼前後陳事,輒見省覽。然身微宦孤,不見進序,乃取長假還鄉里。臨去,遣息上

表曰:

意在於不忘光君榮親,情所不能已已者也。臣伏自悼,私懷至恨:生長荒裔,而久在外 於其君,猶孝子之於其親:進則有欣然之慶,非貪官也,退則有戚然之憂,非懷祿也。其 之聽,採狂夫之言,原臣侵官之罪,不問干忤之愆,天地恩厚,於臣足矣。 臣受恩三世,剖符守境,試用無績,沈伏數年,犬馬之力, 無所復堪。 臣聞忠臣之 陛下弘廣納

悼者也。 臣之恨五也。慚日月之所養,愧昊蒼而無報,此臣之所以懷五恨而歎息,臨歸路而自 之恨四也。夏之日忽以過,冬之夜尋復來,人生百歲,尚以爲不足,而臣中年嬰災,此 當歸死於地下,此臣之恨三也。哀二親早亡隕,兄弟並凋喪,孝敬無復施於家門,此臣 時,而不能垂功名於竹帛,此臣之恨二也。逮事聖明之君,而尩悴羸劣,陳力又不能, 任,自還抱疾,未嘗觀見,陛下竟不知臣何人,此臣之恨一也。遭運會之世,値有事之

寬明博納,所以能成帝業也。 敢華言而爲佞者也。 昔漢高祖初定天下, 于時戍卒婁敬上書諫曰: 「陛下取天下不與 神狐未見,仙芝萐莆未生,麒麟未游乎靈禽之囿,鳳皇未儀於太極之庭,此臣之所以不 為勸戒。又田肯建一言之計、非親子弟莫可使王齊者、而受千金之賜。故世稱漢祖之 謂陸賈曰:「爲我著秦所以亡,而吾所以得之者。」賈乃作新語之書,述敍前世成敗,以 成周同,而欲比隆成周,臣竊以爲不侔。」於是漢祖感悟,深納其言,賜姓爲劉氏。又顧 語有之曰:「華言虛也,至言實也,苦言藥也,甘言疾也。」臣欲言天下太平,而靈龜

王垂制,聖賢吐言,來事之明鑒也。孟子曰:「堯不能以天下與舜,則舜之有天下也,天 今之言世者,皆曰<u>堯舜復興,天下已太平矣。臣獨以爲未,亦竊有所勸焉。且</u>百

列

孫卿 與之也。 |軻、孫卿不通禪代之變,遂作禪代之文,刻石垂戒,班示天下,傳之後世,亦安能使將來 之衆,受禪於靡陂,而自以德同唐虞,以爲漢獻卽是古之堯,自謂卽是今之舜,乃謂孟 所與者也。」曩昔西有不臣之蜀,東有僭號之吳,三主鼎足,並稱天子。魏文帝率萬乘 不之曉之子而之舜。舜曰天也,乃之中國,踐天子位焉。若居曉之宮,逼曉之子,非天 也,而無親戚子弟之守,此豈深思遠慮,杜漸防萌者乎! 順人,同符唐虞,然法度損益,則亦不異於昔魏文矣,故宜資三至以强制之。而今諸王 非至辯莫之能分,至衆也,非至明莫之能見。此三至者,非聖人莫之能盡。」由此言之, 忽骨肉之恩,忘藩屏之固,竟不能使四海賓服,混一皇化,而于時羣臣莫有諫者,不其 君子皆曉然心服其義乎!然魏文徒希慕堯舜之名,推新集之魏,欲以同於唐虞之盛, 有立國之名,而無襟帶之實。 過矣哉 、孟軻亦各有所不取焉。陛下受禪,從東府入西宮,兵刃耀天,旌旗翳日。雖應天 !孫卿曰:「堯舜禪讓,是不然矣。天下者,至重也,非至强莫之能任;至大也, 昔舜爲相, 堯崩, 三年之喪畢, 舜避堯之子於南河, 天下諸侯朝覲者、獄訟者, 又蜀地有自然之險,是歷世姦雄之所闚闟,逋逃之所聚

如抱火厝於積薪之下,而寢其上,火未及然,因謂之安。 此言誠存不忘亡,安不忘亂者

旹漢文帝據已成之業,六合同風,天下一家。而賈誼上疏陳當時之勢,猶以爲譬

朝廷詠康哉之歌, 戒。 也。 韶,置**箴諫之官,赫然寵異諤諤之臣,以明好直言之信,恐陳事者知直言之不用,皆杜** 盡除 然臣之慺慺,亦竊願陛下居安思危,無曰高高在上,常念臨深之義,不忘履冰之 一魏世之弊法, 綏以新政之大化, 使萬邦欣欣, 喜戴洪惠, 蜫蟲草木, 咸蒙恩澤。 山藪無伐檀之人,此固天下所視望者也。 陛下自初踐阼,發無諱之

口

結舌,祥瑞亦曷由來哉!

崇必信之道,又張設議者之難,凡五事以聞。 休,歸近 忠,愍臣狂直,無使天下以言者爲戒。 信 異端也。 而言,敢歷論前代隆名之君及亡敗之主廢興所由,又博陳舉賢之路,廣開養老之制, 臣 [無陸生之才,不在顧問之地,蓋聞主聖臣直,義在於有犯無隱。 遺墓。 辭義實淺,不足採納。 顧瞻宮闕,繋情皇極,不勝丹款,遣息穎表言。 然臣私心,誠謂有可發起覺悟遺忘。 疾痛增篤,退念桑梓之詩,惟狐死之義,輒取長 臣之所言,皆直陳古今已行故事,非新聲 臣不惟疏遠,未 願陛下察臣 愚

舉賢 諤諤. 明王霸主及亡國誾君,故可得而稱,至于忠蹇賢相及佞諂姦臣,亦可得而言。 (以自佐;而亡國破家者相繼,皆由任失其人。所謂賢者不賢,忠者不忠也。 盡規之臣,無不昌也,任用阿諛唯唯之士,無不亡也。 其 一曰:臣聞善有章也,著在經典,惡有罰也,戒在刑書。 是有國者皆欲求忠以自輔 上自遠古,下洎秦漢,其 故朝有

言前 之所以歸惡者也。 也。 留心待賢,遠求異士,招由余於西戎,致五羖於宛市,取丕豹於晉鄉,迎蹇叔於宗里。至 本伯翳之後,微微小邑,至秦仲始大,有車馬禮樂侍御之好焉。自穆公至於始皇,皆能 |公之身,得管仲,其功如彼;用<u>豎貂,其</u>亂如此。 夫榮辱存亡,實在所任,可不審哉 之功,有尊周之名,誠管夷吾之力。及其死也,蟲流出門,豈非任豎貂之過乎!且一恒 乘之主,而 致天平地寧,四門穆穆,其功固在重華之爲相。夏癸放於鳴條,商辛梟於牧野,此俱萬 仁義,毒流黔首。故陳勝、吳廣,奮臂大呼,而天下響應。於是趙高逆亂,閻樂承指, 由是四方雄俊繼踵而至,故能世爲强國,吞滅諸侯,奄有天下,兼稱皇帝,由謀臣之助 周室旣衰,諸侯並爭,天王微弱,政遂陵遲。齊桓公,淫亂之主耳,然所以能九合一匡 而後歸于亳。旣已放而復還,殷道微而復興,諸侯咸服,號稱太宗,實賴阿衡之盡忠也。 長夜之飲,於是登糟丘,臨酒池,觀牛飲,望肉林,龍逢忠而被害,比干諫而 二世窮迫,自戮望夷。子嬰雖立,去帝爲王,孤危無輔,四旬而亡。此由邪臣擅命,指 道化未淳,崩于沙丘。胡亥乘虐,用詐自悞,不能弘濟統緒,克成堂構,而乃殘賊 任賢所由興,任不肖所以亡者。 國滅身擒,由不能屬任賢相,用婦人之言,荒淫無道,肆志沈宴,作靡靡之樂, 太甲暴虐,顚覆湯之典制,於是伊尹放之桐宮,而能改悔反善,三年 堯之末年,四凶在朝而不去,八元在家而不舉,然 剖心,天下

亦由 「爲川 爲居 登天衢,令漢 者,漢之三公,成帝保傅也,帝親幸其家,拜禹牀下,深問天災人事。 范增之謀不用。假令羽旣距項伯之邪說,斬沛公于鴻門,都咸陽以號令諸侯,則天下 臣 軍辛慶忌 是以朱雲 爲社稷深慮,忠言嘉謀,陳其災患,則王氏不得專權寵,王莽無緣乘勢位, 之刃而 **晝被文繡,此蓋世俗兒女之情耳,而羽榮之。** 無敵 鹿爲馬,所以速秦之禍也。秦失其鹿,豪傑競逐,項羽旣得而失之,其咎在烹韓生,而 日「天亡我,非戰之罪」,甚痛矣哉!且夫士之歸仁,[云]猶水之歸下,禽之走曠野,故曰 了誠足以爲後世之戒,何益於|漢室所由亡也哉!然世之論者以爲亂臣賊子無道之甚 項氏 矣。 取天下,用六國之資,無唐虞之禪,豈徒賴良平之奇謀,盡英雄之智力而已乎, 魚者獺也,爲藪驅雀者鸇也,爲湯武驅人者桀紂也」。漢高祖 爲驅 抗節求尚 叩 上,廷辱保傅,罪 而羽距韓生之忠諫,背范增之深計,自謂霸王之業已定,都彭城,還故鄉,爲 頭流血, 祚中絕也。 人也。 方斬 以死爭之。 子孫承基二百餘年,逮成帝委政舅家,使權勢外移。 馬劍,欲以斬禹,以戒其餘,可謂忠矣。 **禹佞諂不忠,挾懷私計,徒低仰於五** 死無赦、詔御史將雲下,欲急烹之。 若不然, 則雲已摧碎矣。 是故五載爲漢所擒,至此尚不知覺悟,乃 後雖釋檻 侯之間,苟取容媚 雲攀殿 mi 成帝尚 禹當惟大臣之節, 起於布衣,提三尺 不修,欲 折 復 檻,幸賴 遂託雲龍而 安昌侯張禹 不 以 寤 彰 一,乃以 而 左將 明直

辨,盆子承之而覆敗,公孫述又稱帝於蜀漢。如此數子,固非所謂應天順人者,徒爲光 林,矢于牧野,維予侯興。」又曰:「侯服于周,天命靡常。」由此言之,主非常人也,有德 武之驅除者耳。夫天下者,蓋亦天下之天下,非一人之天下也。「殷商之旅,其會如 異哉!其所由然者,非取之過,而守之非道也。」漭旣屠肌,六合雲擾,劉聖公已立而不 其威詐,班宣符讖,震暴殘酷,窮凶極惡,人怨神怒,冬雷電以驚其耳目,夏地動以惕其 業詎可冀哉!」莽卽位之後,自謂得天人之助,以爲功廣三王,德茂唐虞,乃自驕矜,奮 惟殷周取守之術,崇道德,務仁義,履信實,去華爲,施惠天下,十有八年,恩足以感百 宗族稱孝,朋友歸仁。及其輔政成哀之際,勤勞國家,動見稱述。然于時人士詣闕上 者莫過於|莽,此亦猶||村之不善不如是之甚也。傳稱||莽始起外戚,折節力行,以要名譽, 則天下歸之,無德則天下叛之。故古之明王,其勞心遠慮,常如臨川無津涯。於是法 夷。由是天下忿憤,內外俱發,四海分崩,城池不守,身死於匹夫之手,爲天下笑,豈不 姓,義足以結英雄,人懷其德,豪傑並用,如此,宗廟社稷宜未滅也,光武雖復賢才,大 爲之宗主,故漭得遂策命孺子而奪其位也。昔陽武之興,亦逆取而順守之耳。向莽深 書薦,荐者不可稱紀,內外羣臣莫不歸,莽功德。遭遇漢室中微,國嗣三絕,而太后壽考, 心腹。而|莽猶不知覺悟,方復重行不順時之令,竟連伍之刑,佞媚者親幸,忠諫者誅

永終天祿,恐爲將來賢聖之驅除也。且臣聞之,懼危者,常安者也,憂亡者,恒存者也。 使夫有國之君能安不忘危,則本枝百世,長保榮祚,名位與天地無窮,亦何慮乎爲來者 聽其姑息之辭。四門穆穆,關而不闔,待諫者而無忌。恒戰戰慄慄,不忘戒懼,所以欲 直如砥矢,信義感人神。雖有椒房外戚之寵,不受其委曲之言,雖有近習愛幸之豎,不 天地,象四時,隆恩德,敬大臣,近忠直,遠佞人。仁孝著乎宮牆,弘化洽乎兆庶;爲平

之驅除哉!傳有之曰:「狂夫之言,明主察焉。」

臣,稱帝私附,此亦國之羞也。陛下誠欲致熊羆之士,不二心之臣,使奮威准浦、震服 魏,使秦人不敢東向,在楚,則三晉不敢南謀。曾參、閔騫,誠孝子也,不能宿夕離其 選舉,塗塞耳目,九品訪人,唯問中正。故據上品者,非公侯之子孫,則當塗之昆弟也。 蠻荆者,故宜疇咨博采,廣開貢士之路,薦巖穴,舉賢才,徵命考試,匪俊莫用。 今臺閣 親,豈肯出身致死,涉危險之地哉!今大晉應期運之所授,齊聖美於有虞,而吳人不 二者苟然,則蓽門蓬戶之俊,安得不有陸沈者哉! 其二曰:士之立業,行非一概。吳起貪官,母死不歸,殺妻求將,不孝之甚。然在

下之大道乎!昔明王聖主,無不養老。。老人衆多,未必皆賢,不可悉養。故父事三老, 其三日:昔田子方養老馬,而窮士知所歸,況居天下之廣居,立天下之正位,行天

所以明孝,宗事五更,所以明敬。 蓋之報,發仁惠之詔,廣開養老之制。 饑者易爲食,渴者易爲飲,天下元元瞻望新政。 下雖定,而華山之陽無放馬之羣,桃林之下未有休息之牛,故以吳人尙未臣服故也。夫 孟子曰:「吾老以及人之老,吾幼以及人之幼。」今天 願陛下思子方之仁,念犬馬之勞,思帷

利賞、遂立績效、功在第一。今州郡督將、並已受封、羌胡健兒、或王或侯、不蒙論敍 往每興軍渡河,未曾有變,故刺史郭綏勸帥有方,深加獎厲,要許重報。 使人以義,而可以不信行之哉!臣前爲西郡太守,被州所下己未詔書:「羌胡道遠,其 晉人自可差簡丁强,如法調取,至於羌胡,非恩意告論,則無欲度金城、河西者也。 但募取樂行,不樂勿强。」臣被詔書,輒宣恩廣募,示以賞信,所得人名卽條言征西。 晉文猶不貪原而失信,齊桓不惜地而背盟,況聖主乎 其四曰:法令賞罰,莫大乎信。古人有言:「人而無信,不知其可。」況有養人以惠, 是以 所募感恩 自 其

亦煙人失繁弱於雲夢,尚未爲亡其弓也。其於神器不移他族,則始祖不遷之廟,萬年 計,使異姓無裂土專封之邑,同姓並據有連城之地,縱復令諸王後世子孫還自相幷,蓋 奪於重臣,國祚移於他人。故滅周者秦,非姬姓也,代漢者魏,非劉氏也。 其五日:昔周漢之興,樹親建德,周因五等之爵,漢有河山之誓。 及其衰也,神器 於今國家大

列傳第十八 閻纘

制,祿奉禮秩,並同天下諸侯之例。 形勢足以相接,則陛下可高枕而臥耳。臣以爲諸侯伯子男名號皆宜改易之,使封爵之 亂原,臣故曰五等不便也。 放勛欽明而有丹朱,瞽瞍頑凶而有虞舜。天下有事無不由兵,而無故多樹兵本,廣開 漢祖之起,俱無尺土之地,況有國者哉!將謂大晉世世賢聖,而諸侯之胤常不肖邪 億兆不改其名矣。大晉諸王二十餘人,而公侯伯子男五百餘國,欲言其國皆小乎,則 臣以爲可如前表,諸王宜大其國,增益其兵,悉遣守藩,使 則

防,使著事奮筆,必有紀焉。昔伊尹恥其君不爲堯舜,此臣所以私懷慷慨,自忘輕賤者 况夫巍巍大晉,方將登太山,禪梁父,刻石書勳,垂示無窮。宜遠鑒往代興廢,深爲嚴 也。 臣聞與覆車同軌者未嘗安也,與死人同病者未嘗生也,與亡國同法者未嘗存也。

| 灼書奏,帝覽而異焉,擢爲明威將軍、魏興太守。卒于官。

閻纘

6,仕吳至牂柯太守。[<] 纘僑居河南新安,少游英豪,多所交結,博覽墳典,該通物理。 父 閻纘字續伯,「刊巴西安漢人也。祖圃,爲張魯功曹,勸魯降魏,封平樂鄉侯。父璞,嗣

年,纘無怨色,孝謹不怠。母後意解,更移中正,乃得復品。 卒,繼母不慈,續恭事彌謹。而母疾之愈甚,乃誣續盜父時金寶,訟于有司。遂被淸議十餘

懼,塡冢 尉司馬,有功,封平樂鄉侯。 監華崎。 基、岳畏罪,推纘爲主。 爲太傅楊駿舍人,轉安復令。 而逃,續獨以家財成墓,葬駿而去。國子祭酒鄒湛以續才堪佐著作,日日萬於秘書 崎曰:「此職閑廩重,貴勢多爭之,不暇求其才。」遂不能用。 墓成,當葬,廢從弟模告武陵王澹,日別將表殺造意者。 駿之誅也,纘棄官歸,要駿故主簿潘岳、掾崔基等共葬 河間王顒引為西戎校 衆咸

愍懷太子之廢也,
「續與棺詣闕,上書理太子之冤曰

衞網 也。 案古典,太子居以士禮,與國 能以道訓。 太盛,所以 饒先帝,父母驕之。 伏見 、周文、石奮、疎廣、洗馬、舍人亦無汲黯、鄭莊之比,遂使不見事父事君之道。 幸賴天慈,全其首領。臣伏念適生於聖父而至此者,由於長養深宮,沈淪富貴,受 赦文及牓下前太子遹手疏,以爲驚愕。自古以來,臣子悖逆,未有如此之甚 致敗也。 友無亮直三益之節,官以文學爲名,實不讀書,但共鮮衣好馬,縱酒高會, 非但東宮,歷觀諸王師友文學,皆豪族力能得者,率非龔遂、王陽, 每見選師傅下至羣吏,率取膏粱擊鍾鼎食之家,希有寒門儒素如 人齒,以此明先王欲令知先賤然後乃貴。 自頃 東宮亦微 臣

嬉遊博弈,豈有切磋,能相長益!臣常恐公族遲陵,以此歎息。今適可以爲戒,恐其被

斥,棄逐遠郊,始當悔過,無所復及。

薄賓客。如此,左右前後,莫非正人。師傅文學,可令十日一講,使共論議於前。敕使 但道古今孝子慈親,忠臣事君,及思愆改過之義,皆聞善道,庶幾可全。 事、涉履艱難、事君事親、名行素聞者,使與共處。使嚴御史監護其家,絕貴戚子弟、輕 允恭肅,體道居正,以爲之友。置游談文學,皆選寒門孤宦以學行自立者,及取服勤更 **祿大夫劉寔,寒苦自立,終始不衰,年同呂望,經籍不廢,以爲之保。尚書僕射裴頗,明** 輕於戾太子,尙可禁持,重選保傅。如司空張華,道德深遠,乃心忠誠,以爲之師。 應笞耳」漢武威悟之,築思子之臺。今遹無狀,言語悖逆,受罪之日,不敢失道,猶爲 昔戾太子無狀,稱兵距命,而虚關三老上書,有田千秋之言,猶曰:「子弄父兵,罪

匡矯。 兢兢慎罰,事父以孝,父沒,事母以謹,聞于天下,于今稱之。 漢高皇帝數置酒 「孤臣孽子,其操心也危,慮患也深」,故多善功。|李斯云:「慈母多敗子,嚴家無格虜。」 於庭、欲廢太子、後四晧爲師、子房爲傅、竟復成就。前事不忘、後事之戒。」孟軻有云、 能自全。及至明帝,因母得罪,廢爲平原侯,爲置家臣庶子,師友文學,皆取正人,共相 昔太甲有罪,放之三年,思庸克復,爲殷明王。又魏文帝懼於見廢,夙夜自祗,竟

改,棄之未晚也

隙。 由陛 儲副大事,不宜空虚。宜爲大計,小復停留。 下驕適,使至於此,庶其受罪以來,足自思改。 方今天下多虞,四夷未寧,將伺國 先加嚴誨, 依平原侯故事, 若不悛

擢 臣老母見臣爲表,乃爲臣卜卦,云「書御卽死」。妻子守臣,涕泣見止。 臣獨 言年四十,未有太子。臣嘗備近職,雖未得自結天日,情同閽寺,悾悾之誠,皆爲國計。 **,嘗爲近職,此恩難忘,何以報德?唯當陳誠,以死獻忠。 輒具棺絮,伏須刑誅。** 臣素寒門,無力仕宦,不經東宮,情不私適。念昔楚國處女諫其王曰「有龍無尾」, 以爲頻見拔

書御不省。

免,命也夫!」過叱賈謐尸曰:「小兒亂國之由,誅其晚矣!」 及張華遇害,賈謐被誅,朝野震悚,纘獨撫華尸慟哭曰:「早語君遜位而不肯,今果不

皇太孫立,纘復上疏曰:

即納臣言,不致此禍。 乘車入殿、號曰車氏。 臺。 高廟令田千秋上書,不敢正言,託以鬼神之教,而孝武大威,月中三遷,位至丞相, 臣前上書訟太子之枉,不見省覽。昔壼關三老陳衞太子之冤,而漢武築思子之 恨臣精誠微薄,不能有感,竟使太子流離,沒命許昌。 天贊聖意,三公獻謀,庶人賜死,罪人斯得,太子以明,臣恨其 向 令陛下

臣得 所繫。 道。 昔呂后臨朝、肆意無道。周昌相趙、三召其王而昌不遣、先徵昌入,乃後召王。此由漢 伏見詔書建立太孫,斯誠陛下上順先典以安社稷,中慰慈悼冤魂之痛,下令萬國 興已來,用法太嚴,遲速之間,輒加誅斬。一身伏法,猶可强爲,今世之誅,動輒滅門。 閉門距命,後遂擁護皇孫,督罰乳母,卒至成人,立爲孝宣皇帝。 苟志於忠,無往不可。 道,又令不相嚴憚,易相規正。 置太子,居以士禮,與國人齒,爲置官屬,皆如朋友,不爲純臣。 晚,無所復及。詔書慈悼,迎喪反葬,復其禮秩,誠副衆望,不意呂霍之變復生於今日! 歷觀古人雖不避死,亦由世敎寬以成節。吉雖距詔書,事在於忠,故宥而不責。 以成神武。雖周誅二叔,漢掃諸呂,未足以喻。 本寬,得使爲快。假令如今,呂后必謂昌已反,夷其三族,則誰敢復爲殺身成義者 一、此法宜改,可使經遠。又漢初廢趙王張敖,其臣貫高謀弑高祖,高祖不誅,以明臣 田叔 如周昌,固護太子得如邴吉,距詔不坐,伏死諫爭,則聖意必變,太子以安。 **昔漢武旣信姦讒,危害太子,復用望氣之言,欲盡誅詔獄中囚。**邴吉以皇孫在焉, 追惟庶人,所爲無狀,幾傾宗廟,賴相國、太宰至忠憤發,潛謀俱斷,奉贊聖意, 、「孟舒十人爲奴、髡鉗隨王,隱親侍養,故令平安。向使晉法得容爲義,東宮之 臣願陛下因此大更釐改,以爲永制。禮 既使上厭至望,以崇孝

叔、孟舒侍從不罪者,則隱親左右,姦凶毒藥無緣得設,太子不夭也。

邪矯詐 其罪。 慮也。 周昌 莫有警嚴覆請審者,此由恐畏滅族。今皇孫沖幼,去事多故。若有不虞,强臣專制,姦 令:自今已後,諸有廢興倉卒,羣臣皆得輒嚴,須錄詣殿前,面受口詔,然後爲信,得同 及司 爱倩贈以 隸所 臣 不遣王節,下聽臣子隱親,得如田叔、孟舒,不加罪責,則永固儲副,以後安嗣之遠 然臣故莫從,良有以也。又本置三率,盛其兵馬,所以宿衞防虞。而使者卒至, 來事 .每責東宮臣故無侍從者,後聞頗有於道路望車拜辭,而有司收付洛陽獄,奏科 ,雖有相國保訓東宮,擁佑之恩同於

邴吉,適可使玉體安全,宜開來防,可著于 九 奏,諸敢拜辭於道路者,明詔稱揚,使微異於衆,以勸爲善,以獎將來也。 列,權有忠意,獨不蒙賞。 難知,往事可改。 臣前每見詹事裴權用心懇惻,舍人秦戢數上疏 謂宜依倩爲比,以寵其魂。 推尋表疏,如秦戢輩 啓諫; 而

纘又陳

溢,無念修己,率多輕薄浮華,相驅放縱,皆非所補益於吾少主者也。皆可擇寒門篤行、 之士,忠貞清正,老而 下文武將吏,且勿復取盛戚豪門子弟,若吳太妃家室及賈、郭之黨。 今相國雖已保傅東宮,保其安危。 不衰,如城門校尉梁柳、白衣南安朱沖比者,以爲師傅。其侍臣以 至於旦夕訓誨,輔導出入,動靜劬勞,宜選寒苦 如此 之輩,生 一而富

列傳第十八 閻緞

學問素士、更履險易、節義足稱者,以備羣臣,可輕其禮儀,使與古同,於相切磋爲益。

今不忍小相維持,令至闕失頓相罪責,不亦誤哉 者,乃不知名六畜,可不勉哉!昔周公親撻伯禽,曹參笞窋二百,聖考慈父皆不傷恩。 友,諸葛恪爲賓,臥同牀帳,行則參乘,交如布衣,相呼以字,此則近代之明比也。 之子不患不富貴,不患人不敬畏,患於驕盈,不聞其過,不知稼穡之艱難耳。 昔魏文帝之在東宮,徐幹、劉楨爲友,文學相接之道並如氣類。 吳太子登,顧譚爲 至於甚 天子

篇曰:「王季一飯亦一飯、再飯亦再飯。」5113安有逸豫五日一觀哉! 亦疏,易致構間。 人,萬機事多,故闕私敬耳。 今主上臨朝,太子無事, 專主孝養,宜改此俗。 文王世子 在禮,太子朝夕視膳,昏定晨省,跪問安否,於情得盡。 故曰「一朝不朝,其間容刀」。五日之制,起漢高祖,身爲天子,父爲庶 五日一朝,於敬旣簡,於恩

纘又陳

者以臣名資輕淺,不肯見與。世人見笑,謂爲此職進退難居,有必死憂。臣獨以爲茍 行衞護。皇太子初見誣陷,臣家門無祐,三世假親,具嘗辛苦,以家觀國, 固知太子有 臣故求副監國,欲依邴吉故事,距違來使,供養擁護,身親飲食醫藥,冀足救危。主 今迎太子神柩,孤魂獨行,太孫幼沖,不可涉道。謂可遣妃奉迎遠路,令其父府隨

故河南尹向雄,昔能犯難葬故將鍾會,文帝嘉之,始拔顯用,至於先帝,以爲右率。 其小人,不足具責。故孔子曰:「可以託六尺之孤, 臨大節而不可奪。」是以聖王愼選。 全儲 間之事,若得向雄之比,則豈可觸哉!此二使者,但爲愚怯,亦非與謀,但可誅身,自全 君,賈氏所誅,甘心所願。今監國御史直副皆當三族,侍衞無狀,實自宜然。 如郭俶、郭斌,則於刑爲當。 臣謂 如

徒,更相翕習,故世號魯公二十四友。 咸云淸當,臣獨謂非。 黨,自己共相沈淨,人士羞之,聞其晏然,莫不爲怪。 理,而亦疏遠,往免父喪之後,停家五年,雖爲小屈,有識貴之。 其意,欲與諸司馬家同。」皆爲臣寒心。伏見詔書,稱明滿奮、樂廣。 宜得柱石之士如周昌者。 又東宮亦宜妙選忠直亮正,如向雄比。陛下千秋萬歲之後,太孫幼沖,選置兵衞, 但岳徵二十四人,宜皆齊黜,以肅風敎。 世俗淺薄,士無廉節,賈謐小兒,恃寵恣睢,而淺中弱植之 又謐前見臣表理太子,曰:「閻兒作此爲健,然觀 今韶書暴揚其罪,並皆遣出,百姓 潘岳、繆徵等皆謐父 侍郎賈胤,與謐親

纘 朝 又表宜還。 廷善其忠烈,擢爲漢中太守。 騰不護細行,而慷慨好大節。 趙王倫死、旣葬、纘以車轢其冢。時張華兄子景後徙漢中, 卒於官,時年五十九。 纘五子,皆開朗有才力。

長子序爲遼西太守,屬王浚自用其人,序不得之官。 依青州刺史尚晞、刑政苛虐、亨數

切諫,爲晞所害。

也。茂伯篤終,哭王經以全節。休然追遠,理鄧艾以成名。故得義感明時,仁流枯骨。 奏而待嚴誅,輿棺以趨鼎鑊,察言觀行,豈非忠直壯乎!顧視晉朝公卿,曾不得與其徒隸齒 而結舌,義士蓄憤而吞擊。閻續伯官旣微於侍郎,位不登於執戟,輕生重義,視死如歸,伏 史臣曰:愍懷之廢也,天下稱其冤。然皆懼亂政之參夷,懾淫嬖之凶忍,遂使謀臣懷忠 雖

朱勃追論新息,樂布奏事彭王,弗之尚也。 贊曰: 咸義收會,篤終理艾。 道旣相侔,名亦俱泰。

續伯區區,輿櫬陳春。

偏茲淫嬖,

弗遂良圖。啜其泣矣,何嗟及乎!

校勘記

- 劉毅嘗以非罪答雄 侍中與河內太守,劉準則曾爲侍中與河內太守(見世說方正注引晉諸公贊)。下同。 |勞校:「劉毅」當從世說方正作「劉準」。按: 勞說是。 劉毅傳不言其會為
- 此又固足以彰先帝之善任矣 「叉」,各本作「艾」,今從局本。

- [三] 如在州郡 各本無「在」字,今從殿本。
- [B] 雖功高不封 各本「雖」下行「下」字,今從殿本。
- 八五 ご 迎蹇叔於宗里 「宗」當爲「宋」字之誤。 自「招由余於西戎」四語,都用李斯諫逐客書。

(史記李

斯傳此句作「迎蹇叔於宋」。

- ハベン 士之歸仁 此用孟子離婁上文。孟子「士」作「民」,此蓋唐人諱二名改。
- [七] 閻纘 「纘」,楊駿傅、五行志上作「纂」。
- 仕吳至牂柯太守 璞、無「吳」字。 勞校: 牂柯郡未嘗屬吳,「吳」字疑衍。 斠注"唐書宰相世系表但云牂柯太守
- 八九山 模參與誅楊駿之謀,則「模」乃賈后族兄賈模也。 **駿從弟模告武陵王澹** 舉正與梁玉繩瞥記謂,楊駿被誅,親黨夷三族,不得再有從弟。 又司馬澹時為東武公,未封 玉。 史稱賈
- 堪佐著作 各本原脫「作」字。 校文:通典二六引纂集作「可佐著作」,此奪一字。 按: 册府八二

八「著」下亦有「作」字,今據補。

- 王季一 飯亦一飯再飯亦再飯 禮記文王世子作「文王一飯亦一飯」文王再飯亦再飯」。
- 〔二〕繆徴 原誤作「繆徽」,參卷四四校記。

晉書卷四十九

列傳第十九

覽羣籍,尤好莊老。嗜酒能嘯,善彈琴。當其得意,忽忘形骸。時人多謂之癡,惟族兄文 然獨得,任性不羈,而喜怒不形於色。或閉戶視書,累月不出,或登臨山水,經日忘歸。 阮籍字嗣宗,陳留尉氏人也。父瑀,魏丞相掾,知名於世。 籍容貌瓌傑,志氣宏放,傲 博

|業每歎服之,以爲勝己,由是咸共稱異。

抗足。開府之日,人人自以爲掾屬,辟書始下,而下走爲首。昔子夏在於西河之上,而文侯 聞其有雋才而辟之,籍詣都亭奏記曰:「伏惟明公以含一之德,據上台之位,英豪翹首,俊賢 擁篲,鄒子處於黍谷之陰,而昭王陪乘。 夫布衣韋帶之士,孤居特立,王公大人所以禮下之 籍嘗隨叔父至東郡,兗州刺史王昶請與相見,終日不開一言,自以不能測。太尉蔣濟

列

傳

第十

九

阮

一三五九

籍不至,得記 誅,時人服其遠識。 者,爲道存也。 高貴鄉公卽位,封關內侯,徙散騎常侍。 復爲尙書郎,少時,又以病免。及曹爽輔政,召爲參軍。 黍稷之餘稅。 於然。 負薪疲病,足力不强,補吏之召,非所克堪。乞迴謬恩, 今籍無|鄒卜之道,而有其陋,猥見採擇,無以稱當。 遺卒迎之,而籍已去,濟大怒。 宣帝爲太傅,命籍爲從事中郎。 於是鄉親共喻之,乃就 及帝崩,復爲景帝大司馬從事中郎 籍因以疾辭,屏於田里。 方將耕於東臯之陽, 以光淸舉。」初, 吏。 後謝 歲餘而爽 病歸 濟恐 輸

也。 言。 爲大將軍從事中郎。 帝大悦,即拜東平相。籍乘驢到郡,壞府舍屛鄣,使內外相望,法令淸簡,旬日 致之罪,皆以酣醉獲免。及文帝輔政,籍嘗從容言於帝曰:「籍平生曾游東平,樂其風土。」 文帝初欲爲武帝求婚於籍,籍醉六十日,不得言而止。鍾會數以時事問之,欲因其可否而 殺母,禽獸之不若。」衆乃悅服 帝曰:「殺父,天下之極惡,而以爲可乎。」籍曰:「禽獸知母而不知父,殺父,禽獸之類 籍 本有濟世志,屬魏晉之際,天下多故,名士少有全者,籍由是不與世事,遂酣飲爲常 有司言有子殺母者,籍曰:「嘻!殺父乃可,至殺母乎!」坐者怪 而還。帝引 其失

朝宴必與焉。 籍 聞 步兵廚營人善釀,有貯酒三百斛,乃求爲步兵校尉。 會帝讓九錫,公卿將勸進,使籍爲其辭。 籍沈醉忘作,臨詣府,使取之,見 遺落世事,雖去佐職,恒游府 **齎酒挾琴造焉,籍大悅,乃見靑眼。由是禮法之士疾之若讐,而帝每保護之。** 青白眼,見禮俗之士,以白眼對之。及嵇喜來弔,籍作白眼,喜不懌而退。 「阮籍旣方外之士,故不崇禮典。我俗中之士,故以軌儀自居。」時人歎爲兩得。籍又能爲 直言窮矣,舉聲一號,因又吐血數升。毁瘠骨立,殆致滅性。裴楷往弔之,籍散髮箕踞,醉 而直視,楷弔喭畢便去。或問楷:「凡弔者,主哭,客乃爲禮。 與決賭。 籍 雖不拘禮教,然發言玄遠,口不臧否人物。 旣而飲酒二斗,舉聲一號,吐血數升。 性至孝,母終,正與人圍棊,對者求止,籍 及將葬、食一蒸肫、飲二斗酒、然後臨訣、 籍既不哭,君何爲哭。」楷曰: 喜弟康聞之,乃

由 徑路,車迹所窮,輒慟哭而反。嘗登廣武,觀楚漢戰處,嘆曰:「時無英雄,使豎子成名」」 (牢山)望京邑而嘆,於是賦豪傑詩。景元四年冬卒,時年五 籍不識其父兄,徑往哭之,盡哀而還。其外坦蕩而內淳至,皆此類也。 籍嘗詣飲,醉,便臥其側。籍旣不自嫌,其夫察之,亦不疑也。 籍嫂嘗歸寧,籍相見與別。或譏之,籍曰「禮豈爲我設邪」鄰家少婦有美色,當壚沽 干 应 兵家女有才色, 時率意 獨駕,不 未嫁 而

籍能屬文,初不留思。 作詠懷詩八十餘篇,爲世所重。著達莊論,敍無爲之貴。 文多

列傳第十九 阮籍

奉蝨 爾 嶺,聞有聲若鸞鳳之音,響乎巖谷,乃登之嘯也。 自以爲吉宅也。行不敢離縫際,動不敢出褌襠,自以爲得繩墨也。 黨,長聞鄰國。 子,惟法是修,惟禮是克。手執圭璧,足履繩墨。行欲爲目前檢,言欲爲無窮則。 」太康中,爲太子庶子。 子渾 處於輝中而 籍嘗於蘇門山遇孫登,與商略終古及栖神導氣之術,登皆不應, 字長 上欲圖三公,下不失九州牧。 成, 不能出也。 有父風。 君子之處域內,何異夫蝨之處褌中乎 少慕通達,不飾小節。 獨不見羣蝨之處褌中,逃乎深縫,匿 逐歸著大人先生傳,其略曰:「世人所謂君 籍謂曰:「仲容已豫吾此流, 一此亦籍之胸懷本趣 然炎丘火 籍因長 流,焦邑滅都, 嘯而退。 汝不得復 乎壞絮, 少 一稱鄉 至半 也

爲。 咸以竿挂大布犢鼻於庭,人或怪之,答曰:「未能免俗,聊復 |咸與籍居道南, 諸阮居道北, 北阮富而 咸字仲容。 父熙,武都太守。 减任達不拘, 與叔父籍爲竹林之游, 當世禮法者譏 南阮貧。 七月七日,北阮盛曬衣服, 「爾耳! 皆錦綺粲 其所

先,見咸心醉,不覺歎焉。 人之職,必絕於時。」武帝以咸耽酒浮虛,遂不用。 歷 仕散騎侍郎。 山濤舉咸典選,曰:「阮咸貞素寡欲,深識淸濁,萬物不能移。 而居母喪,縱情越禮。 素幸姑之婢,姑當歸于夫家,初云留婢,旣 太原郭奕高爽有識量,知名於時,少所推 若在官

而自從去。時方有客,咸聞之,遽借客馬追婢,旣及,與婢累騎而還,論者甚非之。

行,籍弗之許。 向,大酌更飲。 善,每以得意爲歡。 咸 妙解音律, 時有羣豕來飲其酒,咸直接去其上,自且便共飲之。 **荀勖每與咸論音律,自以爲遠不及也,疾之,出補始平太守。** 善彈琵琶。 諸阮皆飲酒,咸至,宗人間共集,不復用杯觴斟酌,以大盆盛酒,圓 雖處世不交人事, 惟共親知絃歌酣宴而已。 羣從昆弟莫不以放達爲 與從子脩特相 以壽終。 坐相

嗟良久,卽命辟之。時人謂之「三語掾」。太尉王衍亦雅重之。瞻嘗羣行,冒熱渴甚,逆旅 有井,衆人競趨之,膽獨逡巡在後,須飲者畢乃進,其夷退無競如此。 然。「三見司徒王戎,戎問曰:「聖人貴名教,老莊明自然,其旨同異。」瞻曰:「將無同。」戎咨 所在。內兄潘岳每令鼓琴,終日達夜,無忤色。由是識者歎其恬澹,不可榮辱矣。舉 旨有餘。 **瞻字千里。性清虛寡欲,自得於懷。** 善彈琴,人聞其能,多往求聽,不問貴賤長幼,皆爲彈之。神氣沖和,而不知向人 讀書不甚研求,而默識其要,遇理而辯,辭不足而 止灼

一禮,年八歲出就外傅,明始可以加師訓之則,十年曰幼學,明可漸先王之教也。 東海王越鎭許昌, 以瞻爲記室參軍,與王承、謝覷、鄧攸俱在越府。 越與瞻等書曰: 然學之所

列

傳

入淺,體之所安深。是以閑習禮容,不如式瞻儀度,諷誦遺言,不若親承音旨。 **令淑之質,不聞道德之風,望諸君時以閑豫,周旋誨接。」** 小兒毗旣無

須臾消滅。 客遂屈,乃作色曰:「鬼神,古今聖賢所共傳,君何得獨言無!即僕便是鬼。」於是變爲異形, 客通名詣瞻,寒溫畢,聊談名理。客甚有才辯,瞻與之言,良久及鬼神之事,反覆甚苦。 永嘉中,爲太子舍人。瞻素執無鬼論, 瞻默然。意色大惡。 後歲餘,病卒於倉垣,時年三十。 物莫能難,每自謂此理足可以辯正幽明。 忽有

務嬰心。時帝旣用申韓以救世,而字之徒未能棄也。雖然,不以事任處之。 楹」而以字焉。 終日酣縱,恒爲有司所按,帝每優容之。 学字遙集。 初辟太傅府、遷騎兵屬。避亂渡江、元帝以爲安東參軍。 其母,卽胡婢也。字之初生,其姑取王延壽魯靈光殿賦曰「胡人遙集於上 蓬髮飲酒,不以王 轉丞相從事中

以今王莅鎭,威風赫然,皇澤遐被,賊寇斂迹,氛祲旣澄,日月自朗,臣亦何可爝火不息。正 事,宜節飲也。」「学答曰:「陛下不以臣不才,委之以戎旅之重。臣僶勉從事,不敢有言者,竊 應端拱嘯詠,以樂當年耳。」遷黃門侍郎、散騎常侍。嘗以金貂換酒,復爲所司彈劾,帝宥 琅邪王裒爲車騎將軍,鎭廣陵,高選綱佐,以字爲長史。帝謂曰:「卿旣統軍府,郊壘多 孫廣嗣

之。轉太子中庶子、左衞率,領屯騎校尉。

崎入受顧命,過字,要與同行。 升車,乃告之曰:「主上遂大漸,江左危弱,實資羣賢,共康世 韶就家用之,尚書令郗鑒以爲非禮。 求暫下,便徒步還家。 卿時望所歸,今欲屈卿同受顧託。」學不答,固求下車,嶠不許。 明帝卽位,遷侍中。從平王敦,賜爵南安縣侯。 帝曰:「就用之誠不快,不爾便廢才。」及帝疾大漸,溫 轉吏部尚書,領東海王師,稱疾 垂至臺門,告嶠內迫, 不

盡,餘兩 生當著幾量展」神色甚閑暢。於是勝負始分。 初,祖約性好財,学性好展,同是累而未判其得失。有詣約,見正料財物,客至,屛當不 小麓,以著背後,傾身障之,意未能平。 或有詣阮,正見自蠟展,因自嘆曰:「未知一

中郎 卒,遂苦求出。 將、廣州刺史、假節。 主幼時艱,運終百六,而庾亮年少,德信未孚,以吾觀之,將兆亂矣。」會廣州刺史劉顗 咸 和 初,拜丹楊尹。 王導等以字疏放,非京尹才,乃除都督交廣寧三州軍事、鎭南將軍、領平越 時太后臨朝,政出舅族。 未至鎭,卒,年四十九。 尋而蘇峻作逆,識者以爲知幾。 字謂所親曰:「今江東雖累世,而年數實

「今見鬼者云著生時衣服,若人死有鬼,衣服有鬼邪。」論者服焉。後遂伐社樹,或止之,脩 脩字宣子。 好易老,善清言。嘗有論鬼神有無者,皆以人死者有鬼,脩獨以爲無,曰:

曰:「若社而爲樹,伐樹則社移,樹而爲社,伐樹則社亡矣。」

無言,但欣然相對。常步行,以百錢挂杖頭,至酒店,便獨酣暢。雖當世富貴而不肯顧,家 性簡任,不修人事。絕不喜見俗人,遇便舍去。意有所思,率爾褰裳,不避晨夕,至或

無儋石之儲,宴如也。與兄弟同志,常自得於林阜之間。

耳!」及與脩談、言寡而旨暢,衍乃歎服焉。 者不」。衍族子敦謂衍曰:「阮宣子可與言。」 衍曰:「吾亦聞之,但未知其亹亹之處定何如 王衍當時談宗,自以論易略盡,然有所未了,研之終莫悟,每云「不知比沒當見能通之

梁國張偉志趣不常,自隱於屠釣,脩愛其才美,而知其不眞。偉後爲黃門郎、陳留內

史,果以世事受累。

脩居貧,年四十餘未有室,王敦等斂錢爲婚,皆名士也,時慕之者求入錢而不得。

翼,如山之形。 脩所著述甚寡,嘗作大鵬贊曰:「蒼蒼大鵬,誕自北溟。 海運水擊,扶搖上征。 **翕然層舉,背負太淸。** 假精靈鱗,神化以 志存天地,不屑唐庭。 生。 鷽鳩仰 如雲之

笑,尺鷃所輕。

超世高逝,莫知其情。」

王敦 轉太傅行參軍、太子洗馬。 時爲鴻臚卿,謂脩曰:「卿常無食,鴻臚丞差有祿,能作不。」脩曰:「亦復可爾耳」 避亂南行,至西陽期思縣,爲賊所害,時年四十二。

黄門侍郎,遷吏部郎,在銓管之任,甚有稱績。 太子中舍人、庶子。 放字思度。 祖略、齊郡太守。父顗、淮南內史。放少與字並知名。 時雖戎車屢駕,而放侍太子,常說老莊,不及軍國。 明帝甚友愛之。 中興、除太學博士、

浦,逢陶侃將高寶平梁碩自交州還,放設饌請實,伏兵殺之。寶衆擊放,敗走,保簡陽城,得 到州少時,暴發渴,見寶爲祟,遂卒,朝廷甚悼惜之,年四十四。追贈廷尉。 時成帝幼沖,庾氏執政,放求爲交州,乃除監交州軍事、揚威將軍、交州刺史。 行達寧

放素知名,而性清約,不營產業,爲吏部郎,不免饑寒。 王導、庾亮以其名士,常供給衣

食。子晞之,南頓太守。

已,出 甚被知遇。裕以敦有不臣之心,乃終日酣觴,以酒廢職。 裕字思曠。宏達不及放, [5] 而以德業知名。 為溧陽 令,復以 公事発官。 由是得違敦難、論者以此貴之。 弱冠辟太宰掾。 敦謂裕 非當世實才,徒有虛譽而 大將軍王敦命爲主簿,

列傳第十九 阮籍

曠傍。」 **寵辱,雖古之沈冥,何以過此」人云,四裕骨氣不及逸少,簡秀不如眞長,韶潤不如仲祖,** 東陽太守。 爲從事中郎,固 流 思致不如殷浩,而兼有諸人之美。成帝崩,裕赴山陵,事畢便還。 郎,不就。 必當逐己,而疾去,至方山不相及。劉惔歎曰:「我入東,正當泊安石渚下耳,不敢復近思 咸 和 初 即家拜臨海太守,少時去職。 、除尙 尋徵侍中,不就。還剡山,有肥遁之志。有以問王羲之,羲之曰:「此公近不驚 解 書郎。 不就。 時事故之後,公私弛廢,裕遂去職還家,居會稽剡 朝廷將欲徵之,裕知不得已,乃求爲 司空都鑒請爲長史,詔徵秘書監,皆以疾 王舒撫軍長史。 諸人相與追之,裕亦審時 縣。 舒薨,除 司徒王導引 辭。 復除 吏部

爲長,於是構辭數百言,精義入微,聞者皆嗟味之。裕嘗以人不須廣學,正應以禮讓爲 裕雖不博學,論難甚精。嘗問謝萬云:「未見四本論,君試爲言之。」萬敍說旣畢,裕以 日靜默,無所修綜,而物自宗焉。在剡曾有好車,借無不給。有人葬母,意欲借而 後裕聞之,乃歎曰:「吾有車而使人不敢借,何以車爲」」遂命焚之。

或問裕曰:「子屢辭徵聘,而宰二郡,何邪。」裕曰:「雖屢辭王命,非敢爲高也。 在 東 逼,並無所就。 山久之,復徵散騎常侍,領國子祭酒。 御史中丞周閔奏裕及謝安違詔累載,並應有罪,禁錮終身,詔書貰 俄而復以爲金紫光祿大夫,領琅邪王師 吾少無

官情、兼拙於人間、旣不能躬耕自活、必有所資、故曲躬二郡。 豈以騁能,私計故耳。」年六

十二卒。[至]三子:慵、寧、普。

腆弟萬齡及歆之子彌之,元熙中並列顯位。 傭 寧,鄱陽太守。普,驃騎諮議參軍。 傭子歆之,中領軍。 寧子腆,公秘書監。

嵇康

嵇康字叔夜、譙國蛭人也。 其先姓奚,會稽上虞人,以避怨,徙焉。 蛭有嵇山, 家于其

側,因而命氏。兄喜,有當世才,歷太僕、宗正。

爲君 然,情不繫於所欲,故能審貴賤而通物情。 靜 爲神 通,長好老莊。 人以爲龍章鳳姿, 神 字 虚者,心不存於矜尙,體亮心達者,情不繫於所欲。 仙稟之自然,非積學所得,至於導養得理,則安期、彭祖 康早孤,有奇才,遠邁不羣。身長七尺八寸,美詞氣,有風儀,而土木形骸,不自藻飾, 無私 ,其論曰:「夫稱君子者,心不措乎是非,而行不違乎道者也。 與魏宗室婚,拜中散大夫。 天質自然。 恬靜寡欲,含垢匿瑕,寬簡有大量。 物情順通, 常修養性服食之事 故大道無違,越名任心, 矜尙不存乎心,故能越 之倫 `, 彈 可及, 學不 琴詠詩,自 乃著養 師受, 何以言之? 生論 名教 故是非無措 足於懷。 博覽無 而 夫氣 任 叉以 不 該 自 以

列

第

游,世所謂「竹林七賢」也。」成自言與康居山陽二十年,未嘗見其喜慍之色。 然無措,而事與是俱也。」其略如此。蓋其胸懷所寄,以高契難期,每思郢質。 忘其爲身』,斯言是矣。 君子之行賢也,不察於有度而後行也,任心無邪,不議於善而後正 **匿情矜吝,小人之至惡,虛心無措,君子之篤行也。** 也。是故言君子則以無措爲主,以通物爲美,言小人則以匿情爲非,以違道爲闕。 惟陳留阮籍、河內山濤,豫其流者河內向秀、沛國劉伶、籍兄子咸、琅邪王戎,遂爲竹林之 也,顯情無措,不論於是而後爲也。 是故傲然忘賢,而賢與度會;忽然任心,而心與善遇;儻 以生爲貴者,是賢於貴生也。 ` 由斯而言,夫至人之用心,固不存有措矣。 是以大道言『及吾無身,吾又何恵』。無 故曰,『君子行道, 所與神交者 何者?

卷素書、遽呼康往取、輒不復見。烈乃歎曰:「叔夜志趣非常而輒不遇、命也」其神心所感、 每遇幽逸如 又遇王烈,共入山,烈嘗得石髓如飴,卽自服半,餘半與康,皆凝而爲石。又於石室中見一 孫登,康遂從之遊。登沈默自守,無所言說。康臨去,登曰:「君性烈而才雋,其能觅乎」」康 康嘗採藥游山澤,會其得意,忽焉忘反。時有樵蘇者遇之,咸謂爲神。至汲郡山中見 此。

山濤將去選官,舉康自代。康乃與濤書告絕,曰:

聞足下欲以吾自代,雖事不行,知足下故不知之也。恐足下羞庖人之獨割,引尸

祝以自助,故爲足下陳其可否。

臧之風,長卿慕相如之節,意氣所託, [刊亦不可奪也。 同致,循性而動,各附所安。故有「處朝廷而不出,入山林而不反」之論。且延陵高子 房之佐漢,接輿之行歌,其揆一也。仰瞻數君,可謂能遂其志者也。故君子百行,殊塗 所謂達能兼善而不渝,窮則自得而無悶。以此觀之,故知堯舜之居世,許由之巖棲,子 之哉!又仲尼兼愛,不羞執鞭,子文無欲卿相,而三爲令尹,是乃君子思濟物之意也。 老子、莊周,吾之師也,親居賤職,柳下惠、東方朔,達人也,安乎卑位。吾豈敢短

宜,無萬石之愼,而有好盡之累,久與事接,疵釁日興,雖欲無患,其可得乎! 讐,幸賴大將軍保持之耳。吾以不如<u>嗣宗之資,而有慢弛之闕;又不識物情,</u>闇於機 師之,而未能及。至性過人,與物無傷,惟飲酒過差耳,至爲禮法之士所繩,疾之如仇 又讀老莊,重增其放,故使榮進之心日穨,任逸之情轉篤。 又聞道士遺言,餌朮黃精,令人久壽,意甚信之。游山澤,觀魚鳥,心甚樂之。 吾每讀尚子平、臺孝威傳,慨然慕之,想其爲人。 加少孤露,母兄驕恣,不涉經學, 阮嗣宗口不論人過,吾每

?作吏,此事便廢,安能舍其所樂,而從其所懼哉!!

夫人之相知,貴識其天性,因而濟之。馬不逼伯成子高,全其長也,仲尼不假蓋於

終始,眞相知者也。 子夏,護其短也。 近諸葛孔明不迫元直以入蜀,華子魚不强幼安以卿相,此可謂能相 自卜已審,若道盡塗殫則已耳,足下無事寃之令轉於溝壑也。

琴一曲,志意畢矣,豈可見黃門而稱貞哉!若趣欲共登王塗,期於相致,時爲歡益,一 旦迫之,必發狂疾。自非重讐,不至此也。旣以解足下,幷以爲別。 悢,如何可言。今但欲守陋巷,教養子孫,時時與親舊敍離闊,陳說平生,濁酒一杯,彈 吾新失母兄之歡,意常悽切。女年十三,男年八歲,未及成人,況復多疾,顧此悢

此書旣行,知其不可羈屈也。

康高致,每一相思,輒千里命駕,康友而善之。後安爲兄所枉訴,以事繫獄,辭相證引,遂復 性絕巧而好鍛。宅中有一柳樹甚茂,乃激水圜之,每夏月,居其下以鍛。東平呂安服

收康。康性慎言行,一旦縲紲,乃作幽憤詩,曰:

不師。爰及冠帶,憑寵自放,抗心希古,任其所尙。託好莊老,賤物貴身,志在守樸,養 嗟余薄祜,少遭不造,哀榮靡識,越在襁褓。 母兄鞠育,有慈無威,恃愛肆姐,不訓

素全眞。

不由己。 日予不敏,好善誾人,子玉之敗,屢增惟塵。大人含弘,藏垢懷恥。人之多僻,**政** 惟此編心,顯明臧否,感悟思愆,怛若創痏。欲寡其過,謗議沸騰,性不傷物,

頻致怨憎。 **昔慚柳惠,今愧孫登,內負宿心,外**恧良朋。 仰慕嚴鄭,樂道閑居,與世無

營,神氣晏如。

厲翼北游,順時而動,得意忘憂。 此 命,亦又何求? 幽 阻,實恥訟冤,時不我與。 咨予不淑,嬰累多虞。 匪降自天,實由頑疏,理弊患結,卒致囹圄。 雖曰義直,神辱志沮,澡身滄浪,曷云能補。 嗟我憤歎,曾莫能疇。 事與願違,遘茲淹留, 對答鄙訊, 繁 雍 雍鳴 窮達有

除之,以淳風俗」。帝旣昵聽信會,遂弁害之。 卯,誠以害時 故往造焉。 公無憂天下, 曰:「聞所聞而來,見所見而去。」會以此憾之。及是,言於文帝曰:「嵇康, 心焉內疚,庶勖將來,無馨無臭。 攪余情,安樂必誠,乃終利貞。 初,康居貧,嘗與向秀共鍛於大樹之下,以自贍給。 古人有言,善莫近名。奉時恭默,咎悔不生。 康不爲之禮,而鍛不輟。 `亂教、故聖賢去之。 顧以康爲慮耳。」因譖「康欲助毌丘儉,賴山濤 康、安等言論放蕩,非毀典謨,帝王者所不宜容。宜因釁 煌煌靈芝,一年三秀,予獨何爲,有志 良久會去,康謂曰:「何所聞 採薇山阿,散髮巖岫,永嘯長吟,頤神養壽 萬石周愼,安親保榮。 潁川鍾會,貴公子也,精練有才辯, 不聽。 而來? 昔齊戮華士, 魯誅少正 不 臥龍也,不可起。 何所見而去。」會 就。 世務紛紜,祇 懲難思復

談音律,辭致淸辯,因索琴彈之,而爲廣陵散,聲調絕倫,遂以授康,仍誓不傳人,亦不言其 從吾學廣陵散,吾每靳固之,廣陵散於今絕矣!」時年四十。 而恨焉。 康 將刑東市,太學生三千人請以爲師,弗許。康顧視日影,索琴彈之,曰:「昔袁孝尼嘗 初,康嘗游于洛西,暮宿華陽亭,引琴而彈。 夜分,忽有客詣之,稱是古人,與康共 海內之士,莫不痛之。帝尋悟

千載也。又作太師箴,亦足以明帝王之道焉。復作聲無哀樂論,甚有條理。子紹,別有傳。 康善談理,又能屬文,其高情遠趣,率然玄遠。撰上古以來高士爲之傳贊,欲友其人於 姓字。

向秀

焉。始,秀欲注,嵇康曰:「此書詎復須注,正是妨人作樂耳。」及成,示康曰:「殊復勝不?」又 與康論養生,辭難往復,蓋欲發康高致也 數十篇,歷世才士雖有觀者,莫適論其旨統也,秀乃爲之隱解,發明奇趣,振起玄風,讀之者 超然心悟,莫不自足一時也。惠帝之世,郭象又述而廣之,儒墨之迹見鄙,道家之言遂盛 向秀字子期,河內懷人也。清悟有遠識,少爲山濤所知,雅好老莊之學。莊周著內外

康善鍛,秀爲之佐,相對欣然,傍若無人。又共呂安灌園於山陽。康旣被誅,秀應本郡

計入洛。 文帝問曰:「聞有箕山之志,何以在此。」秀曰:「以爲巢許狷介之士,未達堯心,豈

足多慕。」帝甚悅。秀乃自此役,作思舊賦云:

好,威音而歎,故作賦曰: 以事見法。嵇博綜伎藝,於絲竹特妙,臨當就 經其舊廬。 余與嵇康、呂安居止接近,其人並有不羈之才。嵇意遠而疏,呂心曠而放,其後並 于時日薄虞泉,寒冰凄然。 鄰人有吹笛者, 命,顧 視日影,索琴而彈之。 發聲寥亮。 追想曩昔游宴之 逝將西邁,

殷墟。 於寸陰。 受罪兮,歎黃犬而長吟。 條兮,息余駕乎城隅。 後爲散騎侍郎,轉黃門侍郎、散騎常侍,在朝不任職,容迹而已。卒於位。二子:綽、悌。 將命適於遠京兮,遂旋反以北徂。濟黃河以汎舟兮,經山陽之舊居。 惟追昔以懷今兮,心徘徊以躊躇。 聽鳴笛之慷慨兮,妙聲絕而復尋。 踐二子之遺迹兮,歷窮巷之空廬。 悼嵇生之永辭兮,顧日影而彈琴。 棟宇在而弗毀兮,形神逝其焉 佇駕言其將邁兮,故援翰以寫 歎黍離之愍周兮, 悲麥秀於 託運遇於領會兮,寄餘命 如。 瞻曠野之蕭 心。 昔李斯之

劉伶

劉伶字伯 倫, 沛國人也。身長六尺,容貌甚陋。 放情肆志,常以細宇宙齊萬物爲心。

妻。 濟默少言,不妄交游,與阮籍、嵇康相遇,欣然神解,攜手入林。 奮拳 五斗解酲。 惟當祝鬼神自誓耳。便可具酒肉。」妻從之。 乘鹿車,攜一壺酒,使人荷鍤而隨之,謂曰:「死便埋我。」 其遺形骸 而往。 妻捐酒毁器,涕泣諫曰:「君酒太過,非攝生之道,必宜斷之。」怜曰:「善! 婦兒之言,「台愼不可聽。」仍引酒御肉,隗然復醉。 |伶徐曰:「雞肋不足以安尊拳。」其人笑而 伶跪祝曰:「天生劉伶,以酒爲名。 止 嘗醉與俗人相忤,其人攘袂 初不以家產有無介意。 如此。 嘗渴甚,求酒於其 吾不能自禁, 飲一 ー 斛,

之載浮萍。二豪侍側焉,如蜾蠃之與螟蛉。」 槽,銜杯漱醪,奮髯箕踞,枕麴藉糟,無思無慮,其樂陶陶。 兀然而醉,怳爾而醒。 士,聞吾風聲,議其所以,乃奮袂攘襟,怒目切齒,陳說禮法,是非蜂起。先生於是方捧甖承 地,縱意所如。 雷霆之聲,熟視不睹泰山之形。不覺寒暑之切肌,利欲之感情。俯觀萬物,擾擾焉若江海 生,以天地爲一朝,萬期爲須臾,日月爲扃牖,八荒爲庭衢。 **怜雖陶兀昏放,而機應不差。未嘗厝意文翰,惟著酒德頌一篇。其辭曰:「有大人先** 止則操卮執觚,動則挈榼提壺,惟酒是務,焉知其餘。 行無轍迹,居無室廬,幕天席 有貴介公子、搢紳 靜聽不 聞 處

嘗爲建威參軍。 | 泰始初對策,盛言無爲之化。時輩皆以高第得調,恰獨以無用罷。 竟

少知名,通簡有高識,不修威儀,好老易,能歌善鼓琴,王衍、嵇紹並奇之。 謝鯤字幼輿,陳國陽夏人也。 祖鸞,典農中郎將。父衡,以儒素顯,仕至國子祭酒。

齒。時人爲之語曰:「任達不已,幼輿折齒。」覷聞之,傲然長嘯曰:「猶不廢我嘯歌。」 琴,不以屑意,莫不服其遠暢,而恬於榮辱。鄰家高氏女有美色,覷嘗挑之,女投梭,折其兩 名。于時名士王玄、阮脩之徒,並以鯤初登宰府,便至黜辱,爲之歎恨。 鯤聞之,方清歌鼓 忤容。旣舍之,又無喜色。太傅東海王越聞其名,辟爲掾,任達不拘,尋坐家僮取官稟除 永興中,「亞長沙王义入輔政,時有疾覷者,言其將出奔。义欲鞭之,鯤解衣就罰,曾無

斷,視之,鹿也,尋血獲焉。爾後此亭無復妖怪。 宿,此亭舊每殺人。將曉,有黃衣人呼鯤字令開戶,鯤憺然無懼色,便於窗中度手牽之,胛 越尋更辟之,轉參軍事。與以時方多故,乃謝病去職,避地于豫章。嘗行經空亭中夜

名,無砥礪行,居 王澄在敦坐,見覷談話無勧,惟歎謝長史可與言,都不眄敦,其爲 左將軍王敦引爲長史,以討杜弢功封咸亭侯。 身於可否之間,雖自處若穢,而動不累高。 母憂去職,服闋,遷敦大將軍長史。 敦有不臣之迹,顯於朝野。 人所慕如 此。 鯤不徇功 時 鯤

第

慢、桓彝、阮孚等縱酒,敦以其名高,雅相賓禮。 知不可以道匡弼,乃優游寄遇,不屑政事,從容諷議,卒歲而已。每與畢卓、王尼、阮放、羊

惟識量淹遠,至於神鑒沈深,雖諸葛瑾之喻孫權不過也。」 「端委廟堂,使百僚準則,鯤不如亮。一丘,一壑,自謂過之。」溫嶠嘗謂鯤子尚曰:「尊大君豈 嘗使至都,明帝在東宮見之,甚相親重。問曰:「論者以君方<u>庾亮,自謂何如。」答曰:</u>

藉其才望,逼與俱下。 曰:「隗誠始禍,然城狐社鼠也。」敦怒曰:「君庸才,豈達大理。」出人爲豫章太守,又留不遣, 及|敦將爲逆,謂||鯤曰:「劉隗姦邪,將危社稷。吾欲除君側之惡,匡主濟時,何如?」對

)頭,諫之甚切,敦大怒,命斬嶠,時人士畏懼,**莫**敢言者。 鯷曰:「明公舉大事,不戮一人。 嶠 邪!一子不相當,吾已收之矣。」覷與質素相親重,聞之愕然,若喪諸己。參軍王嶠以敦誅 耳。」初,敦謂鯤曰:「吾當以周伯仁爲尙書令,戴若思爲僕射。」及至都,復曰:「近來人情何 以獻替忤旨,便以釁鼓,不亦過乎」」敦乃止。 士之望,明公舉而用之,羣情帖然矣。」是日,敦遣兵收周、戴,而覷弗知,敦怒曰:「君粗疏 如『覷對曰:「明公之舉,雖欲大存社稷,然悠悠之言,實未達高義。周顗、戴若思,南北人 |敦至||石頭,||敷曰:「吾不復得爲盛德事矣。」||鯤曰:「何爲其然?但使自今以往,日忘日去

之心 以奉主上,如斯則勳侔一匡,名垂千載矣。」|敦曰:「君能保無變乎。」對曰:「覷近日 上側席,遲得見公,宮省穆然,必無虞矣。 百人,亦復 實有未達。 敦旣誅害忠賢,而稱疾不朝,將還武昌。 何損於時」竟不朝而 若能朝天子,使君臣釋然,萬物之心於是乃服。 去。 公若入朝,鯤請侍從。」敦勃然曰:「正復殺君等數 **覷喻敦曰:「公大存社稷,建不世之勳,然天下** 杖衆望以順羣情, 入難, 盡沖退 主

別有 使之郡,涖 傳 是時朝望被害,皆爲其憂。 政清肅,百姓愛之。 **尋卒官、時年四十三。** 而鯤推理安常,時進正言。 敦死後,追贈太常,諡 敦旣不能用,內亦不悅。 日康。 子尚 軍

胡 毋輔之 子謙之

邊任 王澄、王敦、庾澂俱爲太尉王衍所昵,號曰四友。 舉爲 胡毋輔之字彥國 太尉長史,終河 泰山 南 奉高 令。 人也。 輔之少擅高名,有知 高祖班,漢執金吾。 澄嘗與人書曰「彦國 人之鑒。 父原,練習兵馬,山濤 性嗜酒、任縱 吐佳言如 不 拘 鋸木屑,霏 小 稱其才堪 節 與

霏不絕,誠 辟 別駕、太尉掾,並不 爲後進領袖 也。 就。

列 傳 第 + 九 胡 册 輔 之 以家貧,求試守繁昌令,始節酒自厲,甚有能名。 遷尙 書郎。

阜俱爲放達。

光逸畫夜酣飲,不視郡事。 豫討齊王冏,賜虧陰平男。累轉司徒左長史。 成都王穎爲太弟,召爲中庶子,遂與謝鯤、王澄、阮脩、王尼、畢 復求外出,爲建武將軍、樂安太守。 與那人

灣過河南門下飲,河南騶王子博箕坐其傍,輔之叱使取火。 之,擢爲功曹。其甄拔人物若此。 吾事則已,安復爲人使」輔之因就與語,歎曰:「吾不及也」,薦之河南尹樂廣,廣召見,甚悅 子博曰:「我卒也,惟不乏

討、坐免官。尋除寧遠將軍、揚州刺史,不之職,越復以爲右司馬、本州大中正。越薨,避亂 九。子謙之。 渡江、元帝以爲安東將軍諮議祭酒,遷揚武將軍、湘州刺史、假節。到州未幾卒,時年四十 東海王越聞輔之名,引爲從事中郎,復補振威將軍、陳留太守。王彌經其郡,輔之不能

以爲狂。輔之正酣飲,謙之闚而厲聲曰:「彦國年老,不得爲爾!將令我尻背東壁。」輔之歡 笑,呼入與共飮。其所爲如此。年未三十卒。 (職之字子光。才學不及父,而傲縱過之。至酣醉,常呼其父字,輔之亦不以介意,談者

爲吏部郎,常飲酒廢職。 畢卓字茂世,新蔡鮦陽人也。 比舍郎釀熟,卓因醉夜至其甕間盜飲之,爲掌酒者所縛,明旦視 父諶,中書郎。卓少希放達,爲胡毋輔之所知。 太興末,

中,便足了一生矣。」及過江,爲溫嶠平南長史,卒官。 之,乃畢吏部也,遽釋其縛。「卓遂引主人宴於甕側,致醉而去。 卓嘗謂人曰:「得酒滿數百斛船,四時甘味置兩頭,右手持酒杯,左手持蟹螯,拍浮酒船

王尼

羊飲酒,醉飽而去,竟不見護軍。護軍大驚,即與尼長假,因覓爲兵。 護軍歎曰:「諸名士持羊酒來,將有以也。」尼時以給府養馬,輔之等入,遂坐馬廏下,與尼炙 洛陽令曹攄請解之。據等以制旨所及,不敢。輔之等齎羊酒詣護軍門,門吏疏名呈護軍, 士,胡毋輔之與琅邪王澄、北地傅暢、中山劉輿、潁川荀邃、河東裴遐迭屬河南功曹甄述及 王尼字孝孫,城陽人也,或云河內人。本兵家子,寓居洛陽,卓犖不羈。初爲護軍府軍

東嬴公騰辟爲車騎府舍人,不就。時尚書何綏奢侈過度,尼謂人曰:「綏居亂世,矜豪 第十 九 畢 卓 Ŧ 尼

匹。 之。今尼屋舍資財,悉爲公軍人所略,尼今飢凍,是亦明公之負也。」越大笑,卽賜絹五十 數之,言甚切。又云:「公負尼物。」越大驚曰:「寧有是也。」尼曰:「昔楚人亡布,謂令尹盜 爲東海王越所殺。初入洛,尼詣越不拜。 乃爾,將死不久。」人曰:「伯蔚聞言,必相危害。」尼曰:「伯蔚比聞我語,已死矣。」未幾,綏果 諸貴人聞,競往餉之。 越問其故,尼曰:「公無宰相之能,是以不拜。」 因

俄而燈卒,荆土饑荒,尼不得食,乃殺牛壞車,煑肉噉之。旣盡,父子俱餓死。 畜露車,有牛一頭,每行,輒使子御之,暮則共宿車上。 常歎曰:「滄海橫流,處處不安也。」 洛陽陷,避亂江夏。時王澄爲荆州刺史,遇之甚厚。尼早喪婦,止有一子。無居宅,惟

半曼弟聃

州里稱陳留阮放爲宏伯,高平都鑒爲方伯,日日之泰山胡毋輔之爲達伯,濟陰下盡爲裁伯,陳 守,以公事免。慢任達穨縱,好飲酒。溫嶠、庾亮、阮放、桓彝同志友善,並爲中興名士。時 留蔡謨爲朗伯,阮|| 爲誕伯,| 高|| | 劉|| 爲|| 委伯,[二]| 而|| 曼爲|| 動伯,凡八人,號|| 兗|| 州八伯,蓋擬 避難渡江,元帝以爲鎭東參軍,轉丞相主簿,委以機密。歷黃門侍郎、尚書吏部郎、晉陵太 羊曼字祖延,太傅祜兄孫也。父暨,陽平太守。曼少知名,本州禮命,太傅辟,皆不說。

古之八雋也。

有羊固拜臨海太守,竟日皆美,雖晚至者猶獲盛饌。 論者以固之豐腆,乃不如曼之眞 官,相飾供饌。 其士望,厚加禮遇,不委以事,故得不涉其難。 王敦旣與朝廷乖貳、羈錄朝士、曼爲右長史。 曼拜丹楊,客來早者得佳設,日宴則漸罄,不復及精,隨客早晚而 敦敗,代阮孚爲丹楊尹。 曼知敦不臣,終日酣醉,諷議 時朝士過江 而已 不問貴賤。 率。 初拜 敦以

南郡悼公主,除秘書郎,早卒。弟聃。 安所求生。」勒衆不動,爲峻所害,年五十五。。峻平,追贈太常。 蘇峻作亂,加前將軍,率文武守雲龍門。 王師不振,或勸曼避峻。 子賁嗣,少知名,尚明帝女 曼曰:「朝廷破敗,吾

猾伯,而聃以狼戾爲瑣伯,蓋擬古之四凶。 鴻臚陳留江泉以能食爲穀伯,豫章太守<u>史</u>疇以大肥爲笨伯,[三]散騎郎高平張嶷以狡妄爲 **聃宇彭祖。少不經學,時論皆鄙其凡庸。** 先是,兗州有八伯之號,其後更有四伯。 大

司奏聃罪當死,以景獻皇后是其祖姑,應八議。成帝詔曰:「此事古今所無,何八議之有 疑郡人簡良等爲賊,殺二百餘人,誅及嬰孩,所髠鎖復百餘。庾亮執之,歸于京都。 **鹏初辟元帝丞相府,累遷廬陵太守。剛克粗暴,恃國戚,縱恣尤甚,睚眦之嫌輒加刑** 有

典也。 猶未忍肆之市朝,其賜命獄所。」兄子實尙公主,自表求解婚。 詔曰:「罪不相及,古今之令 王導又啓「開罪不容恕、宜極重法。山太妃憂戚成疾、陛下罔極之恩、宜蒙生全之宥。」於 一辆雖極法,於實何有!其特不聽離婚。」
」現邪太妃山氏, 聃之甥也, 入殿叩頭請命。

是詔下曰:「太妃惟此一舅,發言摧咽,乃至吐血,情慮深重。 股往丁茶毒,受太妃撫育之 恩,同於慈親。 若不堪難忍之痛,以致頓弊,股亦何顏以寄。 今便原聃生命,以慰太妃渭陽

之思。」於是除名。頃之,遇疾,恒見簡良等爲祟,旬日而死。

光逸

溫,勢必凍死,柰何惜一被而殺一人乎!君子仁愛,必不爾也,故寢而不疑。」令奇而釋之。 逸解衣炙之,入令被中臥。令還,大怒,將加嚴罰。

逸曰:「家貧衣單,沾溼無可代。若不暫 光逸字孟祖,樂安人也。初爲博昌小吏,縣令使逸送客,冒寒舉體凍溼,還遇令不在,

才。」便呼上車,與談良久,果俊器。令怪客不入,吏白與光逸語。令大怒,除逸名,斥遣之。 後舉孝廉,爲州從事,棄官投輔之。輔之時爲太傅越從事中郞,薦逸於越,越以門寒而

胡毋輔之與荀邃共詣令家,望見逸,謂邃曰:「彼似奇

後爲門亭長,迎新令至京師。

不召。越後因閑宴,責輔之無所舉薦。輔之曰:「前舉光逸,公以非世家不召,非不舉也。」

越卽辟焉。 書到郡縣,皆以爲誤,審知是逸,乃備禮遣之。

大叫。 髮裸裎,閉室酣飲已累日。 葬 以世難,避亂渡江,復依輔之。 輔之驚曰:「他人決不能爾,必我孟祖也。」遽呼入,遂與飲,不拾晝夜。 逸將排戶入,守者不聽, 逸便於戶外脫衣露頭於狗竇中窺之而 。初至,屬輔之與謝鯤、阮放、畢卓、羊曼、桓彝、阮孚散 時人謂之

元帝以逸補軍諮祭酒。中興建,爲給事中,卒官。

武舍子陵於潺湲之瀬,松蘿低舉,用以優賢,巖水澄華,茲焉賜隱,臣行厥志,主有嘉名。 登|李室。若夫儀天布憲,百官從軌,經禮之外,棄而不存。是以|帝堯縱許由於埃塩之表,光 以茲自口,於焉翫物,殊異虛舟,有同攘臂。儲、阮竹林之會,劉畢芳樽之友,馳騁莊門,排 其旨,而馳辯無窮,棄彼榮華,則俯輕爵位,懷其道術,則顧蔑王公,舐痔兼車,鳴鳶吞腐。 是以伯陽垂範,鳴謙置式,欲崇諸己,先下於人,猶大樂無聲,而蹌鸞斯應者也。莊生放達 於嵇康遺巨源 名利,其退也,餐和履順,以保天眞。 若乃一其本原,體無爲之用,分其華葉,開寓言之道, 史臣曰:夫學非常道,則物靡不通,理有忘言,則在情斯遣。其進也,撫俗同塵,不居 之書,阮氏創先生之傳,軍諮散髮,吏部盜樽,豈以世疾名流,茲焉自垢?

傅

尸素。 鍛竈而不迴,登廣武而長歎,則嵇琴絕響,阮氣徒存。通其旁徑,必彫風俗,召以效官,居然 **軌躅之外,或有可觀者焉。** 咸能符契情靈,各敦終始,愴神交於晚笛,或相思而動

駕。史臣是以拾其遺事,附于篇云。

春雲斂映。旨酒厥德,憑虛其性。不翫斯風,誰虧王政? 贊曰:老篇爱植,孔教提衡。各存其趣,道貴無名。 相彼非禮,遵乎達生。秋水揚波,

校勘記

(一) 直接去其上 册府八五五作「直接其上」,疑是。

舉止灼然 勞校:孫志祖曰「止」字疑衍。「灼然」者,晉世選舉之名,于九品中正爲第二品,見

溫轎傳、鄧攸傳。

宏達不及放 「達」,各本作「遠」,今從局本。 通志一二三亦作「達」。

CED 人云 本作「又云」,今依册府八二七、通志一二三改。

八 年六十二卒 「二」,南監本作「三」,局本作「一」,今從宋本、吳本、殿本。

【六〕 寧子腆 「腆」,安紀作「腆之」。

[P] 意氣所託 「託」,各本作「先」,今從局本。

記

- 婦兒之言 類聚七二引語林、御覽四八〇引竹林七賢論「婦兒」皆作「婦人」。
- [九] 永興中 勞校:「永興」當作「太安」。
- C10〕 方伯 册府八八二引「方」作「放」。
- 委伯 斠注:御覽四○七引晉中興書「委伯」作「秀伯」。 册府八八二亦作「秀伯」。
- 史疇 料注:御覽三七八引晉中興書「史疇」上有「陳留」二字。 江泉、張嶷皆有郡名,此疑脫。

晉書卷五十

列傳第二十

曹志

魏宗英, 朕甚嘉之。 其以志爲樂平太守。」志在郡上書, 以爲宜尊儒重道, 請爲博士置吏卒。 當須簡授,而自頃衆職少缺,未得式敍。前濟北王曹志履德淸純,才高行潔,好古博物,爲 騎射。|植曰:「此保家主也。」立以爲嗣。後改封濟北王。 爲鄄城縣公。詔曰:「昔在前世,雖曆運迭興,至於先代苗裔,傳祚不替,或列藩九服,式序 王官。選衆命賢,惟德是與,蓋至公之道也。魏氏諸王公養德藏器,壅滯曠久,前雖有詔, 武帝爲撫軍將軍,迎陳留王于鄴,志夜謁見,帝與語,自暮達旦,甚奇之。及帝受禪,降 曹志字允恭,譙國譙人,魏陳思王植之孼子也。少好學,以才行稱,夷簡有大度,兼善

遷章武、趙郡太守。

雖累郡職,不以政事爲意,晝則遊獵,夜誦詩書,以聲色自娛,當時見者

未能 審其量 也

作。 作目錄、請歸尋按。」還奏曰:「按錄無此。」帝曰:「誰作。」」志曰:「以臣所聞,是臣族父冏所 爲散騎常侍、國子博士。」帝嘗閱六代論,問志曰:「是卿先王所作邪。」」志對曰:「先王有手所 以先王文高名著,欲令書傳于後,是以假託。」帝曰:「古來亦多有是。」顧謂公卿曰:「父 咸寧初,詔曰:「鄄城公曹志,篤行履素,達學通識,宜在儒林,以弘胄子之敎。 其以志

不掉, 葬。 助化,而遠出海隅。晉朝之隆,其殆乎哉」,乃奏議曰:「伏聞大司馬齊王當出藩東夏,備物 子證明,足以爲審。 工 盡禮,同之二伯。 者,當有磐石之固。 萬世之基也。 不可之藩。 後雖 幹植 後遷祭酒。 **豈與召公之歌棠棣,** :不强,枝葉不茂,骨骾不存,皮膚不充。 有 五 志又常恨其父不得志於魏,因愴然歎曰:「安有如此之才,如此之親,不得樹本 古之夾輔王室,同姓則周公其人也,異姓則太公其人也, 霸代興,桓文譎主,下有請隧之僭,上有九錫之禮,終於譎 齊王攸將之國,下太常議崇錫文物。時博士秦秀等以爲齊王宜內匡朝政, 今陛下爲聖君,稷契爲賢臣,內有魯衞之親,外有齊晉之輔,坐而 自今已後,可無復疑。」 夫欲享萬世之利者,當與天下議之。故天之聰明, 周詩之詠鴟鴞 同日論哉! 自羲皇以來,豈是一姓之獨 今聖朝創業之始, 自我人之聰明。 皆身在內, 始之不諒, ПП 不正,驗於尾大 有 Ĭ 欲結其心 守安,此 五世反 後 難

照。 魏 議者不指答所問,橫造異論,策免太常鄭默。於是有司奏收志等結罪,詔惟免志官,以公還 切,百年之後必書晉史,目下將見責邪。」帝覽議,大怒曰:「曹志尙不明吾心,況四海乎」以 欲獨擅其威,而財得沒其身,周漢能分其利,而親疏爲之用。此自聖主之深慮,日月之所 議所不敢。[1] 志以爲當如博士等議。」議成當上,見其從弟高邑公嘉。 嘉曰:「兄議甚 事 ,雖淺,當深謀之,言雖輕,當重思之。 志備位儒官,若言不及禮,是志寇竊。 知忠不

惡諡。 頃之,志復爲散騎常侍。 崔 褒歎 曰:「魏顆不從亂,以病爲亂故也。 遭母憂,居喪過禮,因此篤病,喜怒失常。 今諡曹志而諡其病, 豈謂其病不爲亂乎! 九年卒,太常奏以

第,其餘皆付廷尉

庾峻 子珉 敳

於是諡

爲定。

正簡 素、仕 庾峻字山甫,潁川 魏 爲太僕。 父道,○□廉退貞固,養志不仕。 鄢陵 人也。 祖康,才學洽聞,漢司徒辟,有道徵,皆不就。 牛馬有 提齧者, 恐傷人, 不貨於市。 伯父嶷,中

及諸子貴、賜拜太中大夫。

峻 少好學, 有才思。 嘗游京師,聞魏散騎常侍蘇林老疾在家,往候之。 林嘗就乘學、見

列

茂,此尊祖積德之所由也。」 ·峻流涕,良久曰:「尊祖高才而性退讓,慈和汎愛,清靜寡欲,不營當世,惟修德行 **陵舊五六萬戶,聞今裁有數百。 君二父孩抱經亂,獨至今日,尊伯爲當世令器,君兄弟復俊** 而已。 |鄢

允。 帝講詩,中庶子何劭論風雅正變之義,峻起難往反,四坐莫能屈之。 旨,申暢疑滯,對答詳悉。遷秘書丞。長安有大獄,久不決,拜峻侍御史,往斷之,朝野稱 史,峻懼雅道陵遲,乃潛心儒典。屬高貴鄉公幸太學,問尚書義於峻,峻援引師說,發明經 武帝踐阼,賜爵關中侯,遷司空長史,轉祕書監、御史中丞,拜侍中,加諫議大夫。常侍 歷郡功曹,舉計掾,州辟從事。太常鄭袤見峻,大奇之,舉爲博士。時重莊老而輕經

是時風俗趣競、禮讓陵遲。。峻上疏曰:

受爵者皆恥躬之不逮。斯山林之士、避寵之臣所以爲美也,先王嘉之。節雖離世,而 功而能知止。彼其清劭足以抑貪汙,退讓足以息鄙事。故在朝之士聞其風而悅之,將 玉,太上棲於丘園,高節出於衆庶。其次輕爵服,遠恥辱以全志。「己最下就列位,惟無 山林之士。朝廷之士,佐主成化,猶人之有股肱心膂,共爲一體也。山林之士,被褐懷 以無官而棄賢,則廢道。是故聖王之御世也,因人之性,或出或處,故有朝廷之士,又有 臣聞黎庶之性,人衆而賢寡,設官分職,則官寡而賢衆。爲賢衆而多官,則妨化,

德合於主, 行雖詭朝, 而功同於政。故大者有玉帛之命, 其次有几杖之禮, 以厚德載 物,出處有地。 旣廊廟多賢才,而野人亦不失爲君子,此先王之弘也。

祖反之,大暢斯否。 公之賤,而曹相諮之以政。 臣尙德兼愛,孰能通天下之志,如此其大者乎! 能出其右者,而未嘗干祿於時。以釋之之貴,結王生之襪於朝,而其名愈重。 謂之五蠹。 秦塞斯路,利出一官。雖有處士之名,四而無虧列於朝者,商君謂之六蝎,韓非 時不知德,惟爵是聞。故閭閻以公乘侮其鄕人,郞中以上爵傲其父兄。漢 任蕭曹以天下,重四晧於南山。 帝王貴德於上,俗亦反本於下。 以張良之勳,而班在叔孫之後,蓋 故田叔等十人,漢廷臣無 自非主

悔也 意未滿;功報矣,其求不已。 改其物,業定必易其敎。 功而不見下,已負敗而後見用。 石為之失平,淸濁安可復分? 昔者先王患向之所以取天下者,今之爲弊, 以普天之下,先競而後讓,舉世之士,有進而無退。 夫不革百王之弊,徒務救世之政,文士競智而務入,武夫恃力而爭先。 雖以爵祿使下,臣無貪陵之行,雖以甲兵定功,主無窮武之 又國無隨才任官之制,俗無難進易退之恥。 故因前而升,則處士之路塞矣。 大人溺於動俗, 執政撓於羣言, 又仕者黜陟無章, 位一高,雖無 是故功成必 官高矣,而 衡 是

孝。此其出言合於國檢,危行彰於本朝。去勢如脫屣,路人爲之隕涕,辭寵如金石,庸 夫爲之興行。是故先王許之,而聖人貴之。 及知止如王孫,知足如疎廣,雖去列位而居東野,與人父言,依於慈,與人子言,依於 以禮,人臣亦量能受爵矣。其有孝如王陽,臨九折而去官,潔如貢禹,冠一줲而不著, 仕,則官無秕政矣。能小而不能大,可降還涖小,則使人以器矣。人主進人以禮,退人 懷祿之嫌矣。 臣 . 愚以爲古者大夫七十懸車,今自非元功國老,三司上才,可聽七十致仕,則士無 其父母八十,可聽終養,則孝莫大於事親矣。 吏歷試無績,依古終身不

敦、終於皇輿爲之敗績,固不可不愼也。下人幷心進趣,上宜以退讓去其甚者。 復反。然後出處交泰,提衡而立,時靡有爭,天下可得而化矣。 不可以刑罰使,莫若聽朝士時時從志,山林往往間出。無使入者不能復出,往者不能 夫人之性陵上,循水之趣下也,益而不已必決,升而不已必困。始於匹夫行義不 退譲

又疾世浮華,不修名實,著論以非之,文繁不載。

日。 珉奉遵遺命、斂以時服。 二子"珉′敳。 九年卒,韶賜朝服一具、衣一襲、錢三十萬。 臨終,敕子珉朝卒夕殯,幅巾布衣,葬勿擇

珉字子琚。 性淳和好學,行己忠恕。少歷散騎常侍、本國中正、侍中,封長岑男。

及是,竟不免焉。 因大號哭, 賊惡之。 之未陷也, 既爲侍中, 直于省內, 謂同僚許遐曰「世路如此, 禍難將及, 吾當死乎此屋耳」 懷帝之沒劉元海也,至既從在平陽。元海大會,因使帝行酒,既不勝悲憤,再拜上酒, 太元末,追諡日貞。 、會有告珉及王儁等謀應劉琨者,元海因圖弑逆,珉等並遇害。 初,洛陽

見賦,問曰:「若有意也,非賦所盡,若無意也,復何所賦?」答曰:「在有無之間耳」 若四節之素代兮,豈當今之得遠。且安有壽之與天兮,或者情橫多戀。 若豪鋒之半。 於遼廓之庭兮,委體乎寂寥之館。 大德亡其情願。 兮,榮辱固亦同貫。 寄通而已。 遺字子 嵩。 **數見王室多難,終知嬰禍,乃著意賦以豁情,猶賈誼之服鳥也。** 飄颻玄曠之域兮,深漠暢而 處衆人中,居然獨立。嘗讀老莊,曰:「正與人意屬同。」太尉王衍雅 蠢動皆神之爲兮,癡聖惟質所建。 眞人都遣穢累兮,性茫蕩 長不滿七尺,而腰帶十圍,雅有遠韵。為陳留相,未嘗以事嬰心,從容酣 存亡旣已均齊兮,正盡死復何歎。 天地短 靡玩。 於朝生兮,億代促於始旦。 兀與自然幷體兮,融液忽而 物咸定於無初兮,俟時至而 其詞曰:「至 顧瞻宇宙微 宗統竟 四散。」從子亮 而 無岸。 初不 |理歸於渾 細兮, 重之。 別分, 後驗。 縦驅 眇

列

「卿自是當世大才,我疇昔之意都已盡矣。」 遷吏部郎。是時天下多故,機變屢起,) 敳常靜默無爲。參東海王越太傅軍事,轉軍諮 數甚知之,每日:「郭子玄何必減庾子嵩。」

像後爲太傅主簿,任事專勢。 時越府多雋異、澂在其中,常自袖手。豫州牧長史河南郭象善老莊,時人以爲王驹

數縱心事外,無迹可間。後以其性儉家富,說越令就換錢千萬,冀其有吝,因此可乘。
越於 法。」衍甚奇之。 之不置。|行曰:「君不得爲耳。」|澂曰:「卿自君我,我自卿卿。我自用我家法,卿自用卿家 所取矣。」輿於是乃服。 越甚悅,因曰:「不可以小人之慮度君子之心。」 王術不與澂交,澂卿 衆坐中問於澂,而澂乃穨然已醉,幘墮机上,以頭就穿取,徐答云:「下官家有二千萬,隨公 森森如千丈松,雖礧砢多節,施之大廈,有棟梁之用。 **澂有重名,爲搢紳所推,而聚斂積實,談者譏之。** 時劉輿見任於越,人士多爲所構,惟 都官從事溫嶠奏之,戲更器嶠,目嶠

石勒之亂,與衍俱被害,時年五十。

郭象

郭象字子玄,少有才理,好老莊,能清言。太尉王衍每云:「聽象語,如懸河瀉水,注而

爲太傅主簿,甚見親委,遂任職當權,熏灼內外, 不竭。」州郡辟召,不就。 常閑居,以文論自娛。 後辟司徒掾,稍至黃門侍郎。 由是素論去之。永嘉末病卒,著碑論十 東海王越引

惟秋水、至樂二篇未竟而秀卒。秀子幼,其義零落,然頗有別本遷流。 不傳於世,遂竊以爲己注,乃自注秋水、至樂二篇,又易馬蹄一篇,其餘衆篇或點定文句而 其後秀義別本出,故今有向、郭二莊,其義一也。 先是注莊子者數十家,莫能究其旨統。 向秀於舊注外而爲解義,妙演奇致,大暢玄風, 象爲人行薄,以秀義

庾純 子專

庾純字謀甫。博學有才義,爲世儒宗。郡補主簿,仍參征南府,累遷黃門侍郎,封關內

侯、歷中書令、河南尹。

謂曰:「君行常居人前,今何以在後。」純曰:「旦有小市井事不了,〔云是以來後。」世言純之 純曰:「長者爲壽,何敢爾乎」完曰:「父老不歸供養,將何言也」,純因發怒

純以 拜及 所 中 儀 度。 『八十月 世。 違 之不若。 朝倫。」遂 不歸供養,卿爲無天地。臣不服罪自引, 以 丞 犯 「賈充!天下兇兇,由爾一人。」充曰:「充輔佐二世,蕩平巴燭,有何罪而天下爲之兇 孔恂 憲 光宣道化,示 凡才,備位 臣。 **充慚怒**,上表解職。 臣得以凡才, 度,不可 、制」,誠以衰老之年,變難無常也。 臣不自量,飲酒過多。 **発純官** 劾 充 純 爲三公,論道 ,請発官。 以訓。 卿尹,不惟謙敬之節,不忌覆車之戒,陵上無禮,悖言自口,宜加顯 人軌儀 擢授顯任。 請臺兎臣官,廷尉結罪,大鴻臚削 純懼,上河南尹、關內侯印綬,上表自劾曰:「司空公賈充請諸 也。 興化,以教義責臣,是也。 韶曰:「先王崇尊卑之禮,明貴賤之序,著溫克之德, 昔廣漢陵慢宰相,獲犯 醉亂行酒,重酌於公,公不肯飲,言語往來,公遂 易戒濡首,論誨酒困,而臣 而更忿怒,厲聲名公,臨時諠 臣不惟生育之恩,求養老父,而 而以枉錯直,居下犯上,醉酒 上之刑; 爵 土。 聞義 灌夫 敕身 不服,過言 託醉肆 不謹,伏須罪 **読,**遂至荒越。 念,致 盈庭,贖慢 懷祿貪榮, 記 誅 沈酗 迷荒,昏亂 阿臣 黜, 之罪 台司 之禍 一御史 卵校

曰:「凡斷正臧否,宜先稽之禮、律。八十者,一子不從政;九十者,其家不從政。

叉以

純

父老

示

求

供養,使據禮

典正其臧

否。

太傅何曾、太尉荀顗

驃騎

將軍

齊

王

攸

新令亦如

得而 恩愷悌、示加貶退、臣愚無所淸議。」河南功曹史龐札等表 令,年九十,乃聽悉 法 得歸,純無得歸之理。 隨父之制。 削 之。 無兄弟,授之遠郡,辛苦自歸,皆不見聽。 不忘其君,孝故不忘其親。 而近習常人之失,云應在譏貶。」司徒石苞議:「純榮官忘親,惡聞格言,不忠不孝,宜 司空公以 外處其貶黜,斌愚以爲非理 爵土。 」 子 按純父年八十一,兄弟六人,三人在家,不廢侍養。純不求供養,其於禮、律未有違也。 也。 純 司徒西曹掾劉斌議以爲三敦敍風俗,以人倫爲先,人倫之教,以忠孝爲主。 是以爲臣者,必以義斷其恩,爲子也,必以情割其義。 備位卿尹,望其有加於人。而純荒醉,肆其忿怒。臣以爲純不遠布孝至之行 然後君父 歸。 兩濟,忠孝各序。 純雖自聞,同不見聽。 今之矣 實未九十,不爲犯令。 若孝必專心於色養,則明君不得而臣,忠必不顧其親,則父 也。 禮,年八十,一子不從政。 |純兄||峻以父老求歸、||峻若得歸、||純 且純近爲京尹,父在界內,時得自啓定省,獨於禮 近遼東太守孫和、廣漢太守鄧良皆有老母,良 **罵辱宰相,宜加放斥,** 純有二弟在家,不爲違 在朝則 無不 從君之命,在家則 以明國 歸之勢,峻不 典。 禮 忠故 一除名 母不 叉

禮 人 典正 無闕孝養之道,爲臣不違在公之節也。先王制禮垂訓,莫尙於周。當其時也,姬公 臣 其 郡 臧否。 前 尹關內侯純,醉酒失常,戊申詔書旣免尹官,以父篤老不求供養,下五府依 臣謹按三王養老之制,八十,一子不從政,九十,其家不從政,斯誠 使

列傳第二十 庚純

列郡。近太宰獻王諸子,亦在藩外。古今同符,忠孝並濟。 之限,削除爵士。是爲公旦立法,還自越之,魯侯爲子,卽爲罰首也。石奮期頤,四子 ,伯禽之魯,孝子不匱,典禮無愆。今公府議,七十時制,八十月制,欲以駁奪從政

罪,深自奏劾,求入重法。 制,開其殆原。 律雖有常限,至於疾病歸養,不奪其志。 先王立禮,敬同於父,原始要終,齊於所生,如此猶患人臣罕能致身。今公府議云,禮 之義也。 以暴慢。 而 一尹之所以仍見擢授也。 臣聞悔吝之疵,君子有之。尹性少飲多,遂至沈醉。尹醒聞知,悼恨前失,執謙引 臣聞父子天性,愛由自然,君臣之交,出自義合,而求忠臣必於孝子。 按奏狀不忠不孝,羣公建議削除爵土,此愚臣所以自悲自悼,拊 尹少履清苦,事親色養,歷職內外,公廉無私,此陛下之所以屢發明詔, 今公府不原所由,而謂傲很,是為重罪過醉之言,而沒迷復 尹行己也恭,率下也敬,先衆後己,實是宿心。 如此則爲禮禁正直,而陷人以詐, [亞達越王 心泣 旦 血也 由醉,實 是以

飾之名,而損忠誠之實也。夫禮者,所以經國家,定社稷也。 自表,求歸供養,詔喩不聽。 前每表屢蒙定省。 按今父母年過八十,[10]聽令其子不給限外職,誠以得有歸來之緣。 尹昆弟六人,三人在家,孝養不廢。 國體法同,兄弟無異,而虛責尹不求供養如斯,臣懼 兄侍中峻,家之嫡長,往比 故陶唐之隆,順考古典 今尹 居在 長假

受黜,而所由者醉。公以教義見責,而所因者忿。 周成之美,率由舊章。 伏惟陛下聖德欽明,敦禮崇教,疇諮四嶽,以詳典制。 **積**弘以立義,由醉以得罪,禮律不復 尹以犯違

爲斷,文致欲以成法。是以愚臣敢冒死亡之誅,而恥不伸於盛明之世。

惟蒙哀察。

點。」販坐発官。 古人云:『由醉之言,俾出童殺。』明不責醉,恐失度也。所以觅純者,當爲將來之醉戒耳。齊 帝復下詔曰:「自中世以來,多爲貴重順意,賤者生情,故令釋之、定國得揚名於前世。今議 教官,此純召不俟駕之日。而後將軍販敢以私議貶奪公論,抗言矯情,誣罔朝廷,宜加貶 **免黜,不宜升進。侍中甄德進曰:「孝以顯親爲大,祿養爲榮。詔赦純前愆,擢爲近侍,兼掌** 王、劉掾議當矣。」復以純爲國子祭酒,加散騎常侍。後將軍荀販於朝會中奏純以前坐不孝 責以不去官供養也。 大晉依聖人典禮,制臣子出處之宜,若有八十,皆當歸養,亦不獨純也。 賣庾純,不惟溫克,醉酒沈湎,此責人以齊聖也。疑賈公亦醉,若其不醉,終不於百客之中

旣 · **免黜,純更以此愧之,亟往慰勉之,時人稱純**通恕。 初,販與純俱爲大將軍所辟,販整麗車服,純率素而已, 販以爲愧恨。至是,毀純。

侍中,以父憂去官。 起爲御史中丞,轉尙書。除魏郡太守,不之官,拜少府。年六十

四卒。子專。

列傳第二十 庚純

<u>勇宇允臧。少有淸節,歷位博士。齊王攸之就國也,下禮官議崇錫之物。</u> <u>專與博士</u>太

叔廣、劉暾、繆蔚、郭頤、秦秀、傅珍等上表諫曰:

會已平,韶大司馬齊王出統方嶽,當遂撫其國家,將準古典,以垂永制 十人,元勳睦親,顯以殊禮,而魯、衞、齊、晉大啓土宇,並受分器。所謂惟善所在,親疏 一也。大晉龍興,隆唐周之遠跡,王室親屬,佐命功臣,咸受爵土,而四海乂安。今吳 書稱帝堯「克明俊德,以親九族」。武王光有天下,兄弟之國十有六人,同姓之國四

|芮、畢、毛諸國,皆入居公卿大夫之位,明股肱之任重,守地之位輕也,未聞古典以三事 出之國,亦不復假台司虛名爲隆寵也。 之重出之國者。漢氏諸侯王位尊勢重,在丞相三公上。其入讚朝政者,乃有兼官,其 昔周之選建明德以左右王室也,則周公爲太宰,康叔爲司寇,聃季爲司空。 及召、

「公室將卑,其枝葉先落。」公族,公室之本,而去之,諺所謂芘焉而縱尋斧柯者也。 也。又曰:「親不在外,羇不在內。今寒疾在外,鄭丹在內,君其少戒之。」叔向有言: 在庭」,先儒以爲賤妨貴,少陵長,遠間親,新間舊,小加大也。不在庭,不在朝廷爲政 昔申無字曰「五大不在邊」, 先儒以爲貴寵公子公孫, 累世正卿也。 又曰「五細不

外在外也。今天下已定,六合爲家,將數延三事,與論太平之基,而更出之,去王城二 夷交侵,救急朝夕,然後命召穆公征淮夷。故其詩曰「徐方不回,王曰旋歸」,宰相 建東海也。古禮,三公無職,坐而論道,不聞以方任嬰之。惟周室大壞,宣王中興,四 今使齊王賢邪,則不宜以母弟之親尊,居魯衞之常職,不賢邪,不宜大啓土字,表 不得

千里,違舊章矣。

之。」韶冤純罪。 言,假託無諱,請收旉等八人付廷尉科罪。」專父純詣廷尉自首:「專以議 草 見 示,愚淺聽 所問,答所不問,大怒,事下有司。尚書朱整、褚䂮等奏:「專等侵官離局,迷罔朝廷,崇飾惡 · 專草議,先以呈父純,純不禁。 太常鄭默、博士祭酒曹志並過其事。 武帝以博士不答

當加罪戮,以彰凶慝。 爲戮首。 謂朱整曰:「國家乃欲誅諫臣!官立八座,正爲此時,卿可共駁正之。」整不從, 駿怒起,曰: 「旉等備 「非所望也」,乃獨爲駁議。左僕射魏舒、右僕射下邳王晃等從駿議。奏留中七日,乃詔曰: 廷尉劉頌又奏旉等大不敬,棄市論,求平議。尚書又奏請報聽廷尉行刑。尚書夏侯駿 爲儒官,不念奉憲制,不指答所問,敢肆其誣罔之言,以干亂視聽。而虜是議主,應 但專及家 人並自首,大信不可奪。 猶復不忍,皆丐其死命。 诱、陟、嫥等並除名。」 秦秀、傅珍前者虚妄,幸而得免,復不以爲懼,

列

後數歲,復起爲散騎侍郎。終于國子祭酒。

秦秦李

秦秀字玄良,新興雲中人也。父朗,魏驍騎將軍。秀少敦學行,以忠直知名。 咸寧中,

何曾卒,下禮官議諡。秀議曰:

爲博士。

父子塵累而蒙恩貸若會者也。 之醜,示後生之傲,莫大於此。 侈,惡之大也。」<u>大晉</u>受命,勞謙隱約,曾受寵二代,顯赫累世。 暨乎耳順之年,身兼三 公之位,食大國之租,荷保傅之貴,執司徒之均。二子皆金貂卿校,列于帝側。方之古 奏科|尹模,此二者實得臣子事上之槪。然資性驕奢,不循軌則。 人,責深負重,雖舉門盡死,猶不稱位。 石巖巖,赫赫師尹,人具爾瞻。」言其德行高峻,動必以禮耳。」丘明有言:「儉,德之恭, 以古義言之,非惟失輔相之宜,違斷金之利也。穢皇代之美,壞人倫之敎,生天下 故太宰何會,雖階世族之胤,而少以高亮嚴肅,顯登王朝。事親有色養之名,在官 自近世以來,宰臣輔相,未有受垢辱之聲,被有司之劾, 而乃驕奢過度,名被九域,行不履道,而享位非 詩云:「節彼南山,惟

簀而沒,蓋明愼終,死而後已。齊之史氏,亂世陪臣耳,猶書君賊,累死不懲。 代守典之官,敢畏强盛,而不盡禮。管子有言:「禮義廉恥,是謂四維,四維不張,國乃 復何畏哉!所謂四維,復何寄乎!謹按諡法:「名與實爽曰繆,怙亂肆行曰醜。」曾之行 滅亡。」宰相大臣,人之表儀,若生極其情,死又無貶,是則帝室無正刑也。王公貴人, 周公弔二季之陵遲,哀大教之不行,於是作諡以紀其終。曾參奉之,啓手歸全,易 況於皇

時雖不同秀議,而聞者懼焉。

己,皆與此同,宜諡繆醜公。

野以完位居人上,智出人下,愈以秀爲知言。 案小才, 乃居伐國大任, 吾將哭以送師。」或止<u>秀曰:「昔蹇叔知</u>秦軍必敗, 故哭送其子耳。 於是乃止。及孫皓降于王濬,充未之知,方以吳未可平,抗表請班師。沈表與告捷同至,朝 **今吳君無道,國有自亡之形,羣率踐境,將不戰而潰。子之哭也,旣爲不智,乃不赦之罪。」** 秀性忌讒佞,疾之如讐,素輕鄙賈充,及伐吳之役,聞其爲大都督,謂所親者曰:「充文

|公子爲後,春秋書『莒人滅鄫』。聖人豈不知外孫親邪!但以義推之,則無父子耳。 又案詔 書『自非功如太宰,始封無後如太宰,江三所取必己自出如太宰,不得以爲比』。然則以外孫 及充薨,秀議曰:「充舍宗族弗授,而以異姓爲後,悖禮溺情,以亂大倫。 昔鄶養外孫莒

爲後,自非元功顯德,不之得也。天子之禮,蓋可然乎。絕父祖之血食,開朝廷之禍門。

法『昏亂紀度日荒』,請諡荒公。」不從。

借天子百萬之衆,平而有之,與國家結兄弟之交,臣恐朝野實皆**甘之**耳。今濬舉<u>蜀</u>漢之卒, 數旬而平吳,雖舉吳人之財寶以與之,本非已分有焉,而遽與計校乎。」「三三 孫晧之虚名,足以驚動諸夏,每一小出,雖聖心知其垂亡,然中國輒懷惶怖。 加三事,今濬還而降等,天下安得不惑乎!吳之未亡也,雖以三祖之神武,猶躬受其屈。以 顯位,立功之後更得寵人之辱號也。四海視之,孰不失望!蜀小吳大,平燭之後,二將皆就 爲之怨。秀乃上言曰:「自大晉啓祚,輔國之號,率以舊恩。此爲王濬無功之時,受九列之 王濬有平吳之勳,而爲王渾所譖毀。帝雖不從,無明賞罰,以濬爲輔國大將軍,天下咸 當爾時,有能

士前後垂二十年,卒於官。 後與劉暾等同議齊王攸事,忤旨,除名。尋復起爲博士。秀性婞直,與物多忤。

門,蹇蹇匪躬,慺慺體國。故能抗言鳳闕,忤犯龍鱗,身雖暫屈,道亦弘矣!庾氏世載淸德, 始終之遠慮,遂乃君茲靑土,作牧東藩。遠邇驚嗟,朝野失望。曹志等服膺敎義,方軌儒 史臣曰:齊獻王以明德茂親,經邦論道,允釐庶績,式敍彝倫。」武帝納姦諂之邪謀,懷

見稱於世,汝潁之多奇士,斯焉取斯。 謀甫素疾佞邪,而發因醉飽,投鼠忌器,豈易由言。

竊人之財,猶謂之盜,子玄假譽攘善,將非盜乎!

贊曰:魏氏維城,濟北知名。 潁川多士, 峻亦飛英。 長岑徇義,祭酒遺榮。 謀甫三爵,

酗營斯作。 像旣攘善,秀惟癉惡。 **勇獻嘉謀,幾趨鼎鑊。**

校勘記

(1) 議所不敢 周校"「義」誤「議」。

父道 料注:魏志管寧傳注、張臶傳注兩引庾氏譜以及元和姓纂、 鄧名世姓氏辨證「道」 皆作

「遁」,此作「道」,乃「遁」之誤。

[1] 全志 「全志」,各本作「全名」,今從局本。

图〕雖有處士之名 「雖」,各本作「唯」,今從局本。

CK 〕 旦有小市井事不了 「旦」,各本作「且」,今從局本。

フキノ 不遠布孝至之行 通志一二三「孝至」作「至孝」、與下句「常人」對文。

C《】而近習常人之失 「習」,各本作「惜」,今從宋本。

列傳第二十 校勘記

- **一元 山** 而陷人以詐「人」,各本作「入」,今從殿本。、册府六一四亦作「人」。
- 按今父母年過八十 通志一二三及册府六一四「今」作「令」。
- 始封無後 各本脱「無」字,今從殿本。賈充傳亦有「無」字。
- [11] 而遽與計校乎 「遽」,各本作「據」,局本作「遽」,今從之。

晉書卷五十

列傳第二十一

皇甫謐 子方回

十,不好學,游蕩無度,或以爲癡。 農,遂博綜典籍百家之言。沈靜寡欲,始有高尚之志,以著述爲務,自號玄晏先生。 成仁,曾父烹豕以存教,豈我居不卜鄰,教有所闕,何爾魯鈍之甚也!修身篤學,自汝得之, 樂、聖眞之論。 於我何有!因對之流涕。。腦乃感激,就鄉人席坦受書,勤力不怠。居貧,躬自稼穡,帶經而 之養,猶爲不孝。』汝今年餘二十,目不存敎,心不入道,無以慰我。」因歎曰:「昔]孟母三徙以 皇甫謐字士安,幼名靜,安定朝那人,漢太尉嵩之會孫也。出後叔父,徙居新安。 後得風痹疾,猶手不輟卷。 嘗得瓜果,
輒進所後叔母任氏。 任氏曰:「孝經云:『三牲

或勸艦修名廣交,艦以爲「非聖人孰能兼存出處,居田里之中亦可以樂」堯舜之道,何必 列 第二十一 皇 甫 鰮 四〇九

崇接世利,事官鞅掌,然後爲名乎」。 作玄守論以答之,曰:

以至道不損,至德不益。何哉?體足也。如迴天下之念以追損生之禍,運四海之心以 乎!又生爲人所不知,死爲人所不惜,至矣!喑聾之徒,天下之有道者也。夫一人死 **擾全道以損性命,安得去貧賤存所欲哉。吾聞食人之祿者懷人之憂,形强猶不堪,況 貴者,理世也,人之所美者,及時也。先生年邁齒變,饑寒不贍,轉死溝壑,其誰知乎。」** 損,厚故終不薄。苟能體堅厚之實,居不薄之眞,立乎損益之外,游乎形骸之表,則我 廣非益之病, 豈道德之至乎! 夫唯無損, 則至堅矣, 夫唯無益, 則至厚矣。 堅故終不 吾之弱疾乎!且貧者士之常,賤者道之實,處常得實,沒齒不憂,孰與富貴擾神秏精者 而天下號者,以爲損也,一人生而四海笑者,以爲益也。然則號笑非益死損生也。是 |諡曰:「人之所至惜者,命也,道之所必全者,形也,性形所不可犯者,疾病也。 或謂||艦日:「富貴人之所欲,貧賤人之所惡,何故委形待於窮而不變乎。 且道之所

聞道,夕死可矣,況命之修短分定懸天乎! 遂不仕。耽翫典籍,忘寢與食,時人謂之「書淫」。或有箴其過篇,將損**耗精神。**諡曰:「朝

叔父有子旣冠,謐年四十喪所生後母,遂還本宗。

出門,食不過鹽菜,貧者不以酒肉爲禮。今作郡而送之,是貴城陽太守而賤梁柳,豈中古人 城陽太守梁柳,謐從姑子也,當之官,人勸謐餞之。 諡曰:「柳爲布衣時過吾,吾送迎不

之道,是非吾心所安也。」

以通志焉。 時魏郡召上計掾,舉孝廉,景元初,相國辟,皆不行。其後鄉親勸令應命,謐爲釋勸論 其辭曰:

實也。 遂究賓主之論,以解難者,名曰釋勸 慮。 門不敢入。咎繇之徒兩遂其願者,遇時也。 大慶,萬姓賴之,雖未成禮,不宜安寢,縱其疾篤,猶當致身。余唯古今明王之制,事無 關內侯,進奉朝請,禮如侍臣。唯余疾困,不及國寵。宗人父兄及我僚類,咸以爲天下 人哉!今聖帝龍興,配名前哲,仁道不遠,斯亦然乎!客或以常言見逼,或以逆世爲 巨細,斷之以情,實力不堪,豈慢也哉!乃伏枕而歎曰:「夫進者,身之榮也,退者,命之 余謂上有寬明之主,下必有聽意之人,[1]天網恢恢,至否一也,何尤於出處哉! 相 設余不疾,執高箕山,尙當容之,況余實篤!故堯舜之世,士或收迹林澤,或過 國晉王辟余等三十七人,及泰始登禪,同命之士莫不畢至,皆拜騎都尉,或賜爵 故朝貴致功之臣,野美全志之士。 彼獨 何

客曰:「蓋聞天以懸象致明,地以含通吐靈。 故黃鍾次序,律呂分形。 是以春華發

四

列

漢、鴻漸之秋也。 萼,夏繁其實, 秋風逐暑, 冬冰乃結。 人道以之,應機乃發。 三材連利,明若符契。 故 局操,無乃乖於道之趣乎? 朝,又投祿利之際,委聖明之主,偶知己之會,時淸道眞,可以沖邁,此眞吾生濯髮雲 不伸。今子以英茂之才,游精於六藝之府、散意於衆妙之門者有年矣。 拔,超次邁倫,騰高聲以奮遠,抗宇宙之淸晉。由此觀之,進德貴乎及時,何故屈此 褐以相秦,或冒謗以安鄭,或乘駟以救屯,或班荆以求友,或借術於|黃神。 士或同升於唐朝,或先覺於有莘,或通夢以感主,或釋釣於渭濱,或叩角以干齊,或解 韜光逐藪,含章未曜,龍潛九泉,聲焉執高,棄通道之遠由,守介人之 故能電飛景 既遭皇禪之 而

惠不加人,行不合道,身嬰大疢,性命難保。 臻,饑不待餐,振藻皇塗,咸秩天官。子獨栖遲衡門,放形世表,遜遁丘園,不睨華好, **迕主之累,下致駭衆之疑。** 心,沖靈翼於雲路,浴天池以濯鱗,排閶闔,步玉岑,登紫闥,侍北辰,翻然景曜,雜沓英 輔唐虞之主,化堯舜之人,宣刑錯之政,配殷周之臣,銘功景鍾,參敍彝倫,存則鼎 且吾聞招搖昏迴則天位正,五教班敍則人理定。 · 夫貴陰賤璧, 聖所約也; 顚倒衣裳, 明所箴也。子其鑒先哲之洪範, 副聖朝之虛 達者貴同,何必獨異。羣賢可從,何必守意。方今同 若其羲和促轡,大火西穨,臨川恨晚,將復 如今王命切至,委慮有司,上招

食,亡爲貴臣,不亦茂哉!而忽金白之輝曜,忘靑紫之班瞵,辭容服之光粲,抱弊褐之

終年,無乃勤乎」

至通。 中,陰陽不治,運化無窮,自然分定,兩克厥中。二物俱靈,是謂大同,彼此無怨,是謂 寧,含羅萬類,旁薄羣生,寄身聖世,託道之靈。 容,未喻聖皇之兼愛也;循方圓於規矩,未知大形之無外也。故曰,天玄而淸,地靜而 元氣混蒸,衆品仰化,誕制殊徵。故進者享天祿,處者安丘陵。是以寒暑相推,四宿代 主人笑而應之曰:「吁!若賓可謂習外觀之暉暉,未覩幽人之髣髴也,見俗人之不 若夫春以陽散,冬以陰凝,泰液含光,

|子疏 眞,苟榮朝夕之急者也,豈道化之本與 勢成,廉頗存而趙重,樂毅去而燕輕,公叔沒而魏敗,孫臏則而齊寧,蠡種親 反賜之說,項奮拔山之力,蒯陳鼎足之勢,東郭劫於田榮,顏闔恥於見逼。 而楚傾。 若乃衰周之末,貴詐賤誠,牽於權力,以利要榮。故蘇子出而六主合,張儀入而橫 是以君無常籍,臣無定名,損義放誠,一虛一盈。 故馮以彈 劍威主,女有 斯皆棄禮喪 而越 一霸,屈

切也;欲混混若玄流,不欲蕩蕩而名發也;欲索索而條解,不欲契契而 若乃聖帝之創化也,參德乎二皇, 三齊風乎虞夏,欲溫溫而和暢,不欲察察而明 繩結也,欲芒芒

沈,損之不得,測之愈深。眞吾徒之師表,余迫疾而不能及者也。子議吾失宿而駭衆, 塵,宛轉萬情之形表,排託虛寂以寄身,居無事之宅,交釋利之人。輕若鴻毛,重若泥 岑, 君平因蓍以道著, 四皓潛德於洛濱, 鄭眞躬耕以致譽, 幼安發令乎今人。皆持難奪 思娛道於至貧,榮期以三樂處尼父,黔婁定論於布衾,干木偃息以存魏,荆萊志邁於江 賢之禮,野有遁竄之人。是以支伯以幽疾距唐,李老寄迹於西鄰,顏氏安陋以成名,原 動之安者,不假慮於羣賓。故能棄外親之華,通內道之眞,去顯顯之明路,入昧昧之埃 之節,執不迴之意,遭拔俗之主,全彼人之志。故有獨定之計者,不借謀於衆人,守不 吾亦怪子較論而不折中也。 不欲瑣瑣而執法也。是以見機者以動成,好遁者無所迫。故曰,一明一昧,得道之概, 而 一弛一張,合禮之方,一浮一沈,兼得其眞。故上有勞謙之愛,下有不名之臣,朝有聘 無垠際,不欲區區而分別也,欲闇然而日章,至不欲示白若冰雪也,欲醇醇而任德,

逢乎若人,故乞命訴乎明王。 求絕編於天錄,亮我躬之辛苦,冀微誠之降霜,故俟罪而 疾,孔子斯歎。若黃帝創制於九經,岐伯剖腹以蠲腸,扁鵲造號而尸起,文擊徇命於齊 王,醫和顯術於秦晉,倉公發祕於漢皇,華佗存精於獨識,仲景垂妙於定方。 徒恨生不 夫才不周用,衆所斥也;寢疾彌年,朝所棄也。 是以胥克之廢, 丘明列焉; 伯牛有

之。臣聞上有明聖之主,下有輸實之臣,上有在寬之政,下有委情之人。唯陛下留神垂恕, 更旌褒俊,索隱於傅巖,收釣於渭濱,無令泥滓久濁清流。」謐辭切言至,遂見聽許 唯臣疾疢,抱釁牀蓐,雖貪明時,懼斃命路隅。設臣不疾,已遭堯舜之世,執志箕山,猶當容 小人,禮不同器,況臣穅蘧,糅之彫胡。庸夫錦衣,不稱其服也。竊聞同命之士,咸以畢到, 歎息。臣聞韶衞不並奏,雅鄭不兼御,故部子入周,禍延王叔,虞丘稱賢,樊姬掩口。 呼喻,父兄見出,妻息長訣。仰迫天威,扶輿就道,所苦加焉,回不任進路,委身待罪,伏枕 祖食冰,當暑煩悶,加以咳逆,或若溫瘧,或類傷寒,浮氣流腫,四肢酸重。於今困劣, 疾,軀半不仁,右脚偏小,十有九載。又服寒食藥,違錯節度,辛苦荼毒,于今七年。 頑蒙,備食鬥栗,猶識唐人擊壤之樂,宜赴京城,稱壽闕外。而小人無良,致災速禍,久嬰篤 髮林阜,人綱不閑,鳥獸爲羣。 其後武帝頻下韶敦逼不已,謐上疏自稱草莽臣曰:「臣以尩弊,迷於道趣,因疾抽簪,散 陛下披榛採蘭,幷收蒿艾。是以皐陶振褐,不仁者遠。 隆冬裸 救命 臣惟

怠。 初服寒食散,而性與之忤,每委頓不倫,嘗悲恚,叩刃欲自殺,叔母諫之而止 歲餘,又舉賢良方正,並不起。自表就帝借書,帝送一車書與之。謐雖羸疾,而披閱不

濟陰太守蜀人文立,表以命士有贄爲煩,請絕其禮幣,詔從之。 證開而歎曰:「亡國之

愛其禮。』棄之如何? 政之失賢,於此乎在矣。」 之不重,豈吝其煩費哉!且一禮不備,貞女恥之,況命士乎「孔子曰:『賜也,爾愛其羊,我 讓而退,明去之易也。若殷陽之於伊尹,文王之於太公,或身卽莘野,或就載以歸,唯恐禮 舊也。故孔子稱夙夜强學以待問,席上之珍以待聘。士於是乎三揖乃進,明致之難也,一 大夫不可與圖存,而以革歷代之制,其可乎!夫『東帛戔戔』,易之明義,玄纁之贄,自古之

爲功曹,並不應。著論爲葬送之制,名曰篤終,曰: 子。」證固辭篤疾。帝初雖不奪其志,尋復發詔徵爲議郎,又召補著作郎。司隸校尉劉毅請 咸寧初,又詔曰:「男子皇甫謐沈靜履素,守學好古,與流俗異趣,其以謐爲太子中庶

有等差,防終以素,豈流俗之多忌者哉。吾年雖未制壽,然嬰疢彌紀,仍遭喪難,神氣 損劣,困頓數矣。常懼天隕不期,慮終無素,是以略陳至懷 |玄晏先||生以爲存亡天地之定制,人理之必至也。 故禮六十而制壽,至于九十,各

體,則與氣升降,尸不久寄,與地合形。形神不隔,天地之性也,尸與土幷,反眞之理 也。今生不能保七尺之軀,死何故隔一棺之土。然則衣衾所以穢尸,棺椁所以隔真, 也,精歇形散,魂無不之,故氣屬于天,寄命終盡,窮體反眞,故尸藏于地。是以神不存 夫人之所貪者,生也,所惡者,死也。雖貪,不得越期,雖惡,不可逃遁。人之死

其器物,用待亡者。今若以存況終,非卽靈之意也。 土,漢書以爲賢於秦始皇。如令魂必有知,則人鬼異制,黃泉之親,死多於生,必將備 故桓司馬石椁不如速朽,季孫璵璠比之暴骸,文公厚葬,春秋以爲華元不臣,楊王孫親 如其無知,則空奪生用,損之無

益,而啓姦心,是招露形之禍,增亡者之毒也。

之人,又無不發之墓也。故張釋之曰:「使其中有欲,雖固南山猶有隙,使其中無欲,雖 意於無益,棄死者之所屬,知者所不行也。。易稱「古之葬者,衣之以薪,葬之中野,不封 形骸,或剝臂捋金環,或捫腸求珠玉。焚如之形,[三]不痛於是?自古及今,未有不死 不樹」。是以死得歸眞,亡不損生。 隅 無石椁,又何戚焉」斯言達矣,吾之師也。夫贈終加厚,非厚死也,生者自爲也。遂生 而書表於上也。 夫葬者,藏也,藏也者,欲人之不得見也。

而大爲棺椁,備贈存物,無異於埋金路 雖甚愚之人,必將笑之。豐財厚葬以啓姦心,或剖破棺椁,或牽曳

置尸牀上。擇不毛之地,穿阬深十尺,長一丈五尺,廣六尺,阬訖,舉牀就阬,去牀下 物,一皆絕之。吾本欲露形入阬,以身親土,或恐人情染俗來久,頓革理難,今故觕爲 之制。奢不石椁,儉不露形。氣絕之後,便卽時服,幅巾故衣,以籧篨裹尸,麻約二頭, 故吾欲朝死夕葬,夕死朝葬,不設棺椁,不加纏斂,不修沐浴,不造新服,殯啥之

平,還其故草,使生其上,無種樹木、削除,使生迹無處,自求不知。 不見可欲,則姦不 古不崇墓,智也。今之封樹,愚也。若不從此,是戮尸地下,死而重傷。 祭,但月朔於家設席以祭,百日而止。臨必昏明,不得以夜。 若亡有前後,不得移耐。 生心,終始無怵惕,千載不慮患。形骸與后土同體,魂爽與元氣合靈,眞篤愛之至也。 冤悲沒世,長爲恨鬼。 王孫之子,可以爲誡。 死誓難違,幸無改焉 何必周禮。 平生之物,皆無自隨,唯齎孝經一卷,示不忘孝道。 籧篨之外,便以親土。 無問師工,無信卜筮,無拘俗言,無張神坐,無十五日朝夕上食。禮不墓 祔葬自周公來,非古制也。舜葬蒼梧,二妃不從,以爲一定, 制服常居,不得墓次。夫 魂而有靈,則 土與地

而竟不仕。 太康三年卒,時年六十八。子童靈、方回等遵其遺命。

重於世。 證所著詩賦誄頌論難甚多,又撰帝王世紀、年曆、高士、逸士、列女等傳、玄晏春秋,並 門人擊虞、張軌、牛綜、席純、皆爲晉名臣。

造之、著素士服、望門輒下而進。三敦遣從弟廙代侃、遷侃爲廣州。侃將詣敦、方回諫曰: 蠶而後衣,耕而後食,先人後已,尊賢愛物,南土人士咸崇敬之。刺史陶侃禮之甚厚。侃每 方回少遵父操,兼有文才。永嘉初,博士徵,不起。避亂荆州,閉戶閑居,未嘗入城府。

欲殺侃 「吾聞敵國滅,功臣亡。 回爲侃所敬,責其不來詣己,乃收而斬之。 ,賴周訪獲免。 **廙旣至荆州,大失物情,百姓叛廙迎杜弢。** 足下新破杜弢,功莫與二,欲無危,其可得乎」。侃不從而行。 荆土華夷,莫不流涕。 **廙大行誅戮以立威,以**方 敦果

摯虞

|摯虞字仲洽, 京兆長安人也。 父模,魏太僕卿。 虞少事皇甫謐,才學通博,著述不倦。

郡檄主簿

或放。 情,而 延福,違此而行,所以速禍。 **虞嘗以死生有命,富貴在天。 天之所祐者義也,「KJ 人之所助者信也,** 《後引之以正,反之以義,推神明之應於視聽之表, 崇否泰之運於智力之外,以明天任 故借之以身、假之以事、先陳處世不遇之難、遂棄彝倫、輕舉遠游、 然道長世短,禍福舛錯,怵迫之徒,不知所守, 以極常 蕩 履信思順, 而 積 人問 憤 所以 惑之 或迷

命之不可違,故作思游賦。 其辭曰

明璜。 度兮,儀陰陽以定制。 有 製文霓以爲衣兮,襲采雲以爲裳。 軒轅之遐胄兮,氏仲任之洪裔。 匪時運其焉行兮,乘太虛 敷華穎於末葉兮、晞靈根於上世。 要華電之煜爚兮,珮玉衡之琳琅。 一而搖曳。 戴朗月之高冠兮,綴 準乾坤 明景日以 太白之 以斡

列

鑒形兮,信煥曜而重光。

韜塵于市北兮,瓶罍抗方於兩楹。 鸞皇耿介而偏栖兮,蘭桂背時而獨榮。 關寒暑以練 夏像

眞兮,豈改容而爽情。

旋顧。 微兮,孰舍盈而戢沖。 暇兮,限天晷之有度。 迫脅兮,思攄翼乎八荒。望雲階之崇壯兮,願輕舉而高翔。 有傷。蹇委深而投奧兮,庶芬藻之不彰。芳處幽而彌馨兮,寶在夜而愈光。 星鳥逝而時反兮,夕景潛而 威昆吾之易越兮,懷暉光之速暮。 往者倏忽而不逮兮,來者冥昧而未著。二儀泊焉其無央兮,四節環轉而 握隋珠與蕙若兮,時莫悅而未遑。 聆鳴蜩之號節兮,恐隕葉於凝露。 且融。景三后之在天兮,行 羡一稔而三春兮,尚含英以容豫。 歎聖哲之永終。 彼未遑其何恤兮,懼獨美之 希前軌而 增騖兮,眷後 諒道修而 悼曜靈之靡 逼區內之 極而 命

遂遐兮,氣亹亹而愈新。 問津。召陵陽於游谿兮,旌王子於柏人。前祝融以掌燧兮,殿玄冥以掩塵。 衞兮,六氣紛以成羣。 驂白獸於商風兮,御蒼龍於景雲。 造庖犧以問象兮,辨吉繇於姬文。將遠游於太初兮,鑒形魄之未分。四靈儼 挹玉膏於萊嵎兮,掇紫英於瀛濱。揖太昊以假憇兮,聽賦政 簡厮徒於靈圉兮,從馮夷而 形剽剽 而爲 m

列傳第二十一 擊處

兮, 訪北叟之倚伏。乘增冰而遂濟兮, 凌固陰之所滀。 羌神漂而氣浮。 育。晒倏忽之躁狂兮,喪中黃於耳目,偭燭龍而游衍兮,窮大明於北陸。 浮鷂於弱水兮,泊舳艫兮中流。苟精粹之攸存兮,誠沈羽以汎舟。軼望舒以陵厲兮, 明以承旂兮,駔天馬而高馳。 極之路促。 之韡曅兮,仍騰躍乎陽谷。 觀玄烏之參趾兮,會根壹之神籌。擾毚兔於月窟兮, 太陽於炎離。 洪範翕而復張兮,百卉隕而更震。 詔繼阿而右迴兮,觀朱明之赫戲。 戚溽暑之陶鬱兮,余安能乎留斯!聞碧雞之長晨兮,吾將往乎西游。 訊碩老於金室兮,采舊聞於前修。 吸朝霞以療飢兮,降廩泉而濯足。 讒羲和於丹丘兮,誚倒景之亂儀。 睇玉女之紛彯兮,執懿筐於扶木。覽玄象 莅羣神於夏庭兮,迴蒼梧而結知。 **譏淪陰於危山兮,問王母於椒丘** 詰姮娥於蓐收。 探龜蛇於幽穴兮,瞰罔養之潛 將縱轡以逍遙兮, 尋凱風 **爱攬轡而旋驅** 而南暨兮,謝 恨 羅鷦 奥 東

保乂兮,顏履仁而夙徂。何否泰之靡所兮,眩榮辱之不圖?運可期兮不可思,道可知 導兮,覲天帝於淸都。 觀渾儀以寓目兮,拊造化之大鑪。 爰辨惑於上皇兮,稽吉凶之 元符。唐則天而民咨兮,癸亂常而感虞。孔揮涕於西狩兮,臧考祥於婁句。跖肆暴而 攀招搖而上躋兮,忽蹈廓而凌虛。登閶闔而遺眷兮,頫玄黃於地輿。召黔雷以先 求之者勞兮欲之者惑,信天任命兮理乃自得。

旦固。 则 滯 且 而爲 承明訓以發蒙兮,審性命之靡求。 也四位爲匠,乾巛爲均。 陵。 禍不可攘,福不 可徵。 散而爲物,結而爲人。 其否兮有豫,其泰兮有數。 將澄神而守一兮,奚飃飃而遐游 陽降陰升,一替一興。 成形兮未察,靈像兮 流 而爲

至歡。 好兮,盍息駕於一 斐陳辭以告退兮,主悖惘而 枉矢鑠其在手兮,狼弧翔其斯彎。 餐。 會司儀於有始兮, 永歎。 惟升降之不仍兮,詠別易 延嘉賓於九乾。 睨翟犬於帝側兮,殪熊羆於靈軒。 陳鈞 天之廣樂兮, 而 會難。 願 大饗以致 展萬舞之

陽兮, 兮味琴書。 衢,心闇易兮識故居。 繁榮而督引兮,將遄降而速邁。 兮臨玄根。 景條爍徽霍兮,仰流旌 旃兮,建雄 庭。 豐隆 爾乃清道 奄稅駕乎少儀。 軒其警衆兮,鉤陳帥以屬兵。 虹之采旌。 樂自然兮識窮達,澹無思兮心恒娛。 觀品物兮終復魂,形已消兮氣猶存。 | 夙蹕, 載輪修祖。 垂旄 路遂遒兮情欣 乘雲車電鞭之扶輿委移兮,駕應龍青虯之容裔陸離。 跨列缺兮闚乾似,揮玉 於攸機 華雲依霏而 班命授號, 轙輈整旅。 繩。 欣,奄忽歸兮反常閭。 前湛湛 堪輿竦而進時兮,文昌肅以司行。 翼衡兮,日月炫 關兮出天門。 而攝進兮,後傑傑而 眺懸 舟之離離兮,懷舊都之藹藹。 兆司鬱 晃而 修中和兮崇彝倫, 涉漢津兮望崐崘,經赤霄 以居 映蓋。 方馳。 四路兮, 蹈煙熅 且啓行 萬 抗蚩尤之修 俯游 靈 大道繇 森 兮辭天 於重 光 而 13 陳 逸

堂策問,曰:「頃日食正陽,水旱爲災,將何所修,以變大眚。及法令有不宜於今,爲公私

若有文武器能有益

於時務

而

所

「臣聞古之聖明」

欲詳覽其對,究觀賢士大夫用心。」因詔諸賢良方正直言,會東

武帝詔曰:「省諸賢良答策,雖所言殊

皆明於王義,有益政道。

舉賢良,與夏侯湛等十七人策爲下第,拜中郎。

期運,則雖陶唐、殷湯

有所不變

天下幸甚。

期運度數,自然之分,固非人

則天人之情可得而

見,

咎徵之至

言不

方外遐裔, 豈或有命世

傑

出

而 未 賞罰黜陟,豈或有

不

得其

其有日月之眚,

水旱之

動

, L

不憂災

茍

人,除聞喜令。

臣生長蓽門,不逮異物,雖有賢才,所未接識,不敢瞽言妄舉,無以疇答聖問。」擢爲太子舍

時天子留心政道,又吳寇新平,天下乂安,上太康頌以美層德。其辭曰:

底績。 定朝鮮,奄征韓貊。文旣應期,席卷梁益。元憝委命,九夷重譯。邛、冉、哀牢,是焉 間,割據三江。明明上帝,臨下有赫。乃宜皇威,致天之辟。奮武遼隧,罪人斯獲。 衛內圮。 於休上古,人之資始。四隩咸宅,萬國同軌。 天難旣降,時惟鞠凶。龍戰獸爭,分裂遐邦。 有漢不競,喪亂靡紀。 備 管 岷 蜀,度 逆 海 東 。 畿服外叛,侯 權乃緣 撫

陽。 獄,望帝之封。猗歟聖帝,胡不封哉! 代天工。天地不違,黎元時邕。 穆宮廟,歌雍詠鑠。 及王靈。 正,取亂以奇。 弓矢櫜服,干戈戢藏。 我皇之登,二國旣平。靡適不懷,以育羣生。吳乃負固,放命南冥。 皇震其威,赫如雷霆。 耀武六旬,輿徒不疲。飲至數實,干旄無虧。 光天之下,莫匪帝略。 嚴嚴南金,業業餘皇。 三務斯協,用底厥庸。 截彼江沔,荆舒以清。 窮髮反景, 承正受朔。 雄劍班朝,造舟爲梁。 旣遠其迹,將明其蹤。 邈矣聖皇,參乾兩離。 洋洋四海、率禮和樂。 龍馬騤騤,風于瞱 聲教未暨,弗 聖明· 有造,實 喬山惟 陶化以 穆

以母憂解職。久之,召補尙書郞。

物垂則,示人之極。凡物有多而易改,亦有少而難變,亦有改而致煩,有變而之簡。度量是 審度。今兩尺並用,不可謂之同,知失而行,不可謂之謹。不同不謹,是謂謬法,非所以軌 之所取徵,皆絓閡而不得通,故宜改今而從古也。唐虞之制,同律度量衡,仲尼之訓,謹權 用之,律呂不合,史官用之,曆象失占,醫署用之,孔穴乖錯。此三者,度量之所由生,得失 則器用合宜。一本不差而萬物皆正,及其差也,事皆反是。今尺長於古尺幾於半寸,樂府 儀,則天地無所隱其情,準正三辰,則懸象無所容其謬,施之金石,則音韵和諧,措之規矩, 天兩地,以正算數之紀,依律計分,以定長短之度。其作之也有則,故用之也有徵。考步兩 久,不宜復改。 虞駁曰:「昔聖人有以見天下之賾而擬其形容,象物制器,以存時用。 故參 夫一者也。臣以爲宜如所奏。」又表論封禪,見禮志**。** 人所常用,而長短非人所戀惜,是多而易改者也。正失於得,反邪於正,一時之變,永世無 二,是變而之簡者也。憲章成式,不失舊物,季末苟合之制,異端雜亂之用,當以時釐改,貞 將作大匠陳勰掘地得古尺,尚書奏:「今尺長於古尺,宜以古爲正。」潘岳以爲習用已

虞以漢末喪亂,譜傳多亡失,雖其子孫不能言其先祖,撰族姓昭穆十卷,上疏進之,以

爲足以備物致用,廣多聞之益。以定品違法,爲司徒所劾,詔原之。

列

蒙德澤。今一旦更以主者思文不審,收旣往之詔,奪已澍之施,臣之愚心竊以爲不可。」詔 先帝遺惠餘澤,普增位一等,以酬四海欣戴之心。驛書班下,被于遠近,莫不鳥騰魚躍,喜 明,不愛千乘之國而惜桐葉之信,所以重至尊之命而達於萬國之誠也。前乙巳赦書,遠稱 時太廟初建,詔普增位一等。後以主者承詔失旨,改除之。虞上表曰:「臣聞昔之聖

闇 子監撫 虞爲節。皇太子與國爲體,理宜釋服,卒哭便除。」虞答預書曰:「唐稱遏密,殷云諒闇,各舉 太孫尙薨,有司奏「御服齊衰朞」。詔令博士議。 虞曰:「太子生,舉以成人之禮,則殤理除 以爲名,非旣葬有殊降。周室以來,謂之喪服。 之制,乃自上古,是以高宗無服喪之文,而唯文稱不言。漢文限三十六日。魏氏以降,旣 太孫亦體君傳重,由位成而服全,非以年也。」從之。虞又議玉輅、兩社事,見輿服志。 元康中,遷吳王友。時荀顗撰新禮,使虞討論得失而後施行。元皇后崩,杜預奏:「諒 之重,以宜奪禮,葬訖除服,變制通理、垂典將來,何必附之於古,使老儒致爭哉」。皇 喪服者,以服表喪。今帝者一日萬機,太

來,不親郊祀,禮儀弛廢。虞考正舊典,法物粲然。及洛京荒亂,盜竊縱橫,人饑相食。虞

秘書監、衞尉卿、從惠帝幸長安。及東軍來迎,百官奔散,遂流離鄠杜之間,轉入

後得還洛,歷光祿勳、太常卿。

時懷帝親郊。

自元康以

Щ

後

歷

中,糧絕飢甚,拾橡實而食之。

素清貧,遂以餒卒。

<u>虞撰文章志四卷,注解三輔決錄,又撰古文章,類聚區分爲三十卷,名曰流別集,各爲</u>

之論,辭理愜當,爲世所重。

者,恒爲其辭。 虞善觀玄象,嘗謂友人曰:「今天下方亂,避難之國,其唯涼土乎」」性愛士人,有表薦 東平太叔廣樞機淸辯,廣談,虞不能對,虞筆,廣不能答,更相嗤笑,紛然於

束晳

世云。

束皙字廣微,陽平元城人,漢太子太傅疎廣之後也。王莽末,廣會孫孟達避難,自東海

徙居沙鹿山南,因去疎之足, [公] 遂改姓焉。 皙博學多聞,與兄璆俱知名。 少遊國學,或問博士曹志曰:「當今好學者誰乎。」 志曰: 祖混,隴西太守。父龕,馮翊太守,並有名譽。

之,鏖以爲憾,諷州郡公府不得辟,故晳等久不得調。 陽平東廣微好學不倦, 人莫及也。」還鄉里,察孝廉,舉茂才,皆不就。 璆婜石鑒從女,棄

明, 請天三日甘雨零。 太康中,郡界大旱,督爲邑人請雨,三 我黍以育,我稷以生。 日而雨注,衆謂皙誠感,爲作歌曰:「束先生,通 何以疇之。報束長生。」皙與衛恒厚善、聞恒

列傳第二十一 束皙

遇禍,自本郡赴喪。

嘗爲勸農及<u>雞</u>諸賦,[5] 文頗鄙俗,時人薄之。 而性沈退,不慕榮利,作玄居釋以擬客

難其斷巨

彼迷此、愚竊不取。 價、泥蟠深處,永戢琳琅之耀,匿首窮魚之渚,當唐年而慕長沮,邦有道而反甯武。 動,畫騁鑽玄之思,曠年累稔,不墮其志。鱗翼成而愈伏,術業優而不試。乃欲闔匵辭 當康衢而咏白水之詩。今先生耽道修藝,嶷然山峙,潛朗通微,洽覽深識,夜兼忘寐之 干時。上國有不索何獲之言,周易著躍以求進之辭。華老負金鉉以陳烹割之說,齊客 務,熙帝載而鼓皇風。生則率土樂其存,死則宇內哀其終。是以君子屈己伸道,不恥 問之曰:「蓋聞道尙變通,達者無窮。世亂則救其紛,時泰則扶其隆。 束晳閑居,門人並侍。 方下帷深譚,隱几而咍,含毫散藻,考撰同異, 振天維以贊百 在側者進而

野遺白顚之叟。盍亦因子都而事博陸,憑鷁首以涉洪流,蹈翠雲以駭逸龍,振光耀以 沈鰌。 若乃· 徒屈蟠於埳井,眄天路而不游,學旣積而身困,夫何爲乎祕丘 士以援登,進必待求,附勢之黨橫擢,則林藪之彥不抽,丹墀步紈袴之童,東

且 |歲不我與,時若奔駟,有來無反,難得易失。 先生不知盱豫之讖悔遲,而忘夫朋

翼,夕宿七娥之房,朝享五鼎之食,匡三正則太階平,贊五敎而玉繩直。 學自桎,囚大道於環堵,苦形骸於蓬室。 盍之義務疾,亦豈能登海湄而抑東流之水,臨虞泉而招西歸之日。 徒以曲畏爲梏,儒 豈若託身權戚,憑勢假力,擇棲芳林,**飛不**待 孰若茹藿餐

東子曰:「居!吾將導爾以君子之道, 諭爾以出處之事。 爾其明受余訊, 謹 聽

余志。

蔬,終身自匿哉!」

其軌迹不同,而道無貴賤,必安其業,交不相羨,稷契奮庸以宣道,巢由洗耳以避禪,同 安,士樂志之所執,或背豐榮以巖栖,或排蘭闥而求入,在野者龍逸,在朝者鳳集。 **眄**,夫何權戚之云附哉 之疇乎!且道睽而通,士不同趣,吾竊綴處者之末行,未敢聞子之高喻,將忽蒲輪而不 垂不朽之稱,俱入賢者之流。 昔元一旣啓,兩儀肇立,離光夜隱,望舒晝戢,羽族翔林,嶥蛁赴溼,物從性之所 參名比譽,誰劣誰優。何必貪與二八爲羣,而恥爲 七人 雖

汙,或不食其祿,比從政於匣笥之龜,譬官者於郊廟之犢,公孫泣涕而辭相,楊雄抗論 夜歎,晨華暮落,忠不足以衞己,禍不可以預度,是士諱登朝而競赴林薄。[10]或毁名自 昔周漢中衰,時難自託,福兆旣開,**患端亦作,朝遊巍峩之宮,夕墜崢嶸之壑,**晝笑

列

於赤族。

逃,寵祿可以順保。

怒,臣無氂纓之請,上下相安,率禮從道。 朝養觸邪之獸,庭有指佞之草,禍戮可以忠 今大晉熙隆,六合寧靜。 蜂蠆止毒,熊羆輟猛,五刑勿用,八紘備整,主無驕肆之

璜不能迴西鄰之寇,平勃不能正如意之立,干木臥而秦師退,四晧起而戚姬泣。 之身可榮,忘大倫者,則萬乘之主猶辱。將研六籍以訓世,守寂泊以鎭俗,偶鄭老於海 拖繡。且能約其躬,則儋石之稸以豐,苟肆其欲,則海陵之積不足,存道德者,則匹夫 假甲於龜,魚不借足於獸,何必笑孤竹之貧而羨齊景之富!恥布衣以肆志,寧文裘而 是何舍何執,何去何就?謂山岑之林爲芳,谷底之莽爲臭。守分任性,唯天所授,鳥不 蓋無爲可以解天下之紛,澹泊可以救國家之急,當位者事有所窮,陳策者言有不入,濯 不擾其覺,殷憂不干其寐,捐夸者之所貪,收躁務之所棄,薙聖籍之荒蕪,總羣言之一 隅,匹嚴叟於僻蜀。且世以太虛爲輿,玄鑪爲肆,神游莫競之林,心存無營之室,榮利 至。口己全素履於丘園,背纓緌而長逸,請子課吾業於千載,無聽吾言於今日也。」 且夫進無險懼,而惟寂之務者,率其性也。兩可俱是,而舍彼趣此者,從其志也。 夫如

張華見而奇之。石鑒卒,王戎乃辟璆。華召皙爲掾,又爲司空、下邳王晃所辟。華爲司空,

復 以 爲賊曹屬。

時欲廣農,皙上議曰:

之謂。 致,詔書之旨,亦將欲盡此理乎。 於原隰,勤薦義於中田,猶不足以致倉庾盈億之積也。 無霡霂之潤,秋繁滂沲之患,水旱失中,雩禳有請。 伏見詔書,以倉廪不實,關右饑窮,欲大興田農,以蕃嘉穀,此誠有虞戒大禹盡力 然農穰可致,所由者三:一曰天時不譽,二曰地利無失,三曰人力咸用。 雖使巖和平秩,后稷親農,理 然地利可以計生, 人力可以課 若必春 疆

剛川

防,令監司精察,一人失課,負及郡縣,此人力之可致也。 今天下千城,人多游食,廢業占空,無田課之實。 較計九州,數過萬計。 可申嚴此

以稱 業少之人,雖頗割徙,在者猶多,田諸菀牧,不樂曠野,貪在人間。 業於賦給之賜,此地利之可致者也。 於鉅鹿,是其效也。可悉徙諸牧,以充其地,使馬牛猪羊齕草於空虛之田,游食之人受 此誠不然。 有道,豈利之所以會哉。又如汲郡之吳澤,良田數千頃,泞水停洿,人不墾植。 又州司十郡,土狹人繁,三魏尤甚,而猪羊馬牧,布其境內,宜悉破廢,以供無業。 案古今之語,以爲馬之所生,實在冀北,大賈牂羊,取之淸渤,放豕之歌,起 昔雕胚在坰,史克所以頌魯僖,却馬務田,老氏所 故謂北土不宜畜牧, 聞

揚、虎、豫,汙泥之土,渠塢之宜,必多此類,最是不待天時而豐年可獲者也。以其雲雨 其國人,皆謂通泄之功不足爲難,爲鹵成原,其利甚重。而豪强大族,惜其魚捕之饒, 之流,史起惜漳渠之浸,明地利之重也。宜詔四州刺史,使謹按以聞。 生於畚臿,多稌生於決泄,不必望朝隮而黃潦臻,榮山川而霖雨息。是故兩周爭東西 **構說官長,終於不破。此亦谷口之謠,載在史篇。謂宜復下郡縣,以詳當今之計。 荆、**

之業,以關西郊之田,此又農事之大益也。 徙還西州,以充邊土,賜其十年之復,以慰重遷之情。一舉兩得,外實內寬,增廣窮人 又昔魏氏徙三郡人在陽平頓丘界,今者繁盛,合五六千家。二郡田地逼狹,謂可

轉佐著作郎,撰晉書帝紀、十志,遷轉博士,著作如故。

篇,與周易略同,經辭則異。」卦下易經一篇,似說卦而異。公孫段二篇,公孫段與邵陟論 殺之,太甲殺伊尹,文丁殺季歷,自周受命,至穆王百年,非穆王壽百歲也,幽王旣亡、日思 年。蓋魏國之史書,大略與春秋皆多相應。其中經傳大異,則云夏年多殷,益于啓位,啓 十三篇,記夏以來至周幽王爲犬戎所滅,以事接之,三家分,口己仍述魏事至安釐王之二十 有共伯和者攝行天子事,非二相共和也。其易經二篇,與周易上下經同。易蘇陰陽卦二 初,太康二年,汲郡人不準盜發魏襄王墓,自己或言安釐王冢,得竹書數十車。其紀年

十九篇 文寫之。 收之,多 識名題。 也。 數, 次言丘藏金玉事。 春」似是造書者姓名也。 穆天子傳五篇,言周穆王游行四海,見帝臺、西王母。 國語三篇,言楚晉事。 」燼簡斷札,文旣殘缺,不復詮次。 周食田法,周書,論楚事,周穆王美人盛姬死事。 皙在 冢中又得銅劍一枚,長二尺五寸。漆書皆科斗字。 .著作,得觀竹書,隨疑分釋,皆有義證。 繳書二篇,論弋射法。 名三篇,似禮記,又似爾雅、論語。 **瑣語十一篇,**諸 武帝以其書付祕書校綴次第,尋考指歸,而 國卜夢妖怪 生封一篇,帝王所封。 遷尙 相書也。 大凡七十五篇,七篇簡 .書郞 圖詩一篇,畫贊之屬也。 初發冢者燒策照取 梁丘 大曆二篇。鄒子談 |藏一篇,先敍魏之世 篇,書左傳諸卜筮, 寶物,及官 書折壞,不 叉 以今 雑 天 書 類

好事。」 侯,因此立 俱亡,邨人以爲怪,乃招攜之水濱 羽觴隨波』。 缸 **皙進日:「虞小生,不足以知,臣請言之。** 帝嘗問 爲曲 又秦昭王以三日置酒 水。 三日曲水之義,虞對曰:「漢章帝時, 二漢相緣,皆爲盛集。」帝大悅,賜晳 洗祓,遂因水以 河曲,見金人奉 昔周公成洛邑, 汎觴,其義 水心 平原徐肇以三月初生三女,至三 金五 之劍,日 起此。」帝曰:「必 十斤 『今君制 因流 水以 有 汎 西夏。」 酒, 如 所 故逸 談, 乃 霸諸 詩 便 H 云 非

皙,皙曰:「此漢明帝 有 人於嵩高 Щ 顯節陵中策文也。」檢驗果然,時人伏其博識 下得竹簡 枚,上兩行科斗書, 傳以 相 示, 莫有 知者。 司空張華以問

趙王倫 爲相國,請爲記室。 晳辭疾罷歸,教授門徒。 年四十卒,元城市里爲之廢業,門

生故人立碑墓側。

暫才學博通,所著三一魏人士傳,七代通記,晉書紀、志,遇亂亡失。 其五經通論、發蒙

記、補亡詩、文集數十篇,行于世云。

王接

王接字祖游,河東猗氏人,漢京兆尹傳十世孫也。父蔚,世修儒史之學。 魏中領軍曹

獻所知。 光,則非隨侯之掌。伏惟明府苞黃中之德,耀重離之明,求賢與能,小無遺錯,是以鄙老思 爲務。同郡馮收試經爲郎,七十餘,薦接於原曰:「夫騂駵不總轡,則非造父之肆,明月不流 之妙味,經世之徽猷也。不患玄黎之不啓,竊樂春英之及時。」原卽禮命,接不受。原乃呼 接幼喪父,哀毁過禮,鄉親皆歎曰:「王氏有子哉」」渤海劉原爲河東太守,好奇,以旌才 竊見處士王接,岐嶷儁異,十三而孤,居喪盡禮,學過目而知,義觸類而長,斯玉鉉

終,柴毀骨立,居墓次積年。備覽衆書,多出異義。性簡率,不修俗操,鄉里大族多不能善

見曰:「君欲慕肥遁之高邪。」對曰:「接薄祜,少孤而無兄弟,母老疾篤,故無心爲吏。」及母

簿,迎 之,唯裴頠雅知焉。 太守溫字,字奇之,轉功曹史。 平陽太守柳澹、散騎侍郎裴遐、尚書僕射鄧攸皆與接友善。 州辟部平陽從事。 時泰山羊亮爲平陽太守,薦之於司 後為郡主

隸校尉王堪,出補都官從事。

原,其可救 應 慶,天下秀孝一 秀才行。」接報書曰:「今世道交喪,將遂剝亂,而識智之士鉗口韜筆,禍敗日深,如 永 寧初,舉秀才。 乎? 皆不試,接以爲恨。 非榮斯行,欲極陳所見,冀有覺悟耳。」是歲,三王義舉,惠帝復阼,以 友人際陽潘滔遺接書曰:「擊虞、下玄仁並謂足下應和鼎味,可無以 除中郎,補征虜將軍司 馬。 國 火之燎 [有大

今山東 風 則亡之,古之道也。 莫敢不肅矣。」 蕩陰之役,侍中嵇紹爲亂兵所害,接議曰:「夫謀人之軍,軍敗則死之,謀 方欲大舉,宜 朝廷從之。 蕩陰之役,百官奔北,唯

嵇紹守職以遇不道, 明高節, 以號令天下。 依春秋褒三 一累之義, 加紹致命之賞, 可謂臣矣, 叉可 人之國,國危 則 稱 退邇 痛矣。 向

越 率 諸 加 侯 間 討 王 顒 顒 欲遷駕長安,與關 尚 書令王堪 統 行 臺,上請接補尚 東 乖 異,以接成都王佐,難之,表轉臨汾公相 書殿中郎、未至 而卒,年三 十九。 國。 及 東海

傳, 經所不書, 接 學 雖 博 通,特精 傳 不 妄起, 於文爲儉, 常謂 左氏辭義 通經爲長。 鴻富, 任城何休訓釋甚詳,而 自是 家書, 不主 爲 經發。 黜周 王魯、大體乖 公羊附經立

7

紛,可試論之。」接遂詳其得失。擊虞、謝衡皆博物多聞,咸以爲允當。 之,亦有證據。

督又釋難,而庭堅已亡。散騎侍郎潘滔謂接曰「卿才學理議,足解二子之 汲冢書,未訖而遭難。 **核**,且志通公羊而往往還爲公羊疾病。 接乃更注公羊春秋,多有新義。 二人,雜論議、詩賦、碑頌、駁難十餘萬言,喪亂盡失。 佐著作郎束晳述而成之,事多證異義。時東萊太守陳留王庭堅難 又撰列女後傳七十 時秘書丞衛恒考正

長子愆期,流寓江南,緣父本意,更注公羊,又集列女後傳云。

恥,確乎不拔,斯固有晉之高人者歟! 洎乎篤終立論,薄葬昭儉,旣戒奢於季氏,亦無取於 廣微絕羣。財成禮度,刊緝遺文。魏篇式序,漢册斯分。祖游後出,亦播淸芬。 乃年位不充,天之報施,何其爽也!王接才調秀出,見賞知音,惜其夭枉,未申驥足,嗟夫! 博聞之士也。或攝官延閣,裁成言事之書,或莅政秩宗,參定禋郊之禮。 虞旣厄於從理,晳 王孫,可謂達存亡之機矣。擊虞、束皙等並詳覽載籍,多識舊章,奏議可觀,文詞雅贈,可謂 贊曰:士安好逸,栖心蓬蓽。屬意文雅,忘懷榮秩。遺制可稱,養生乖術。擊虞博聞, 史臣曰:皇甫謐素履幽貞,閑居養疾,留情筆削,敦悅丘墳,軒冕未足爲榮,貧賤不以爲

- 下必有聽意之人 各本無「下」字、今從吳本。
- てニン 二皇 殿本作「三皇」。「二皇」謂伏羲神農,亦可通。
- 欲閣然而日章 「日」,各本作「內」,今從宋本。中庸云:「君子之道,闇然而日章」,諡語蓋本

此。

- 所苦加焉 册府七七八「焉」作「篤」。
- つまし 焚如之形 通志一二四上、册府九〇七「形」作「刑」。

通志一二四上「義」作「順」。據下「履信思順」句,作「順」蓋是。

天之所祐者義也

- フキン 景三后之在天兮 「景」,各本作「旻」,今從殿本。
- 因去疎之足 說文了「疏」從「疋」得聲,元和姓纂引晉書「足」作「疋」,可從。「疎」又「疏」之異體,

當時俗書「疎」字作「踈」、故生「去足」之說。

广九 及麩諸賦 對注:書鈔一四四引束皙湯餅賦凡十條、疑此處脫「湯」字。

是士諱登朝「是」,册府七七〇作「是以」,按文義,當從之。

總羣言之一至 册府七七○「至」作「致」、疑是。

- 太康二年至盜發魏襄王墓 見卷三校記。
- 列 傳 第二十一 校 勘 記

(18) 幽王旣亡 | 李校:「幽王」當作「厲王」。

晉書卷五十二

列傳第二十二

郤詵

郤詵字廣基,濟陰單父人也。父晞,尚書左丞。 詵博學多才,褒偉倜儻,不拘細行,州

郡禮命並不應。

泰始中,詔天下舉賢良直言之士,太守文立舉詵應選。

弊,建不刊之統,移風易俗,刑措不用,豈非化之盛歟。何修而嚮茲。 股獲承祖宗之休 烈, 霸德之淺歟。期運不可致歟。且夷吾之智,而功止於霸,何哉。夫昔人之爲政,革亂亡之 也?聖王旣沒,遺制猶存,霸者迭興而翼輔之,王道之缺,其無補乎?何陵遲之不反也?豈 何由。虞夏之際,聖明係踵,而損益不同。周道旣衰,仲尼猶曰從周。因革之宜,又何殊 韶曰:「蓋太上以德撫時,易簡無文。至于三代,禮樂大備,制度彌繁。文質之變,其理

傳第二十二 郤旣

列

四四〇

夫苦役,豈政刑之謬,將有司非其任歟。各悉乃心,究而論之。上明古制,下切當今。朕之 慮之,將何以辨所聞之疑昧,獲至論於讜言乎。加自頃戎狄內侵,災害屢作,邊甿 于茲七載,而人未服訓,政道罔述。以古況今,何不相逮之遠也。雖明之弗及,猶思與羣賢 流離,征

失德,所宜振補。其正議無隱,將敬聽之。」

之極、盡禮樂之致、窮制度之理、其文詳備、仲尼因時宜而日從周、非殊論也。 整。 止 則 也。 王之化先禮樂,五霸之興勤政刑。 |于霸,不亦宜乎! 遂陵遲。 虞夏之相因,而損益不同,非帝王之道異,救弊之路殊也。 臣聞 是以竊有自疑之心,雖致身於闕庭,亦僶俛矣。伏讀聖策,乃知下問之旨篤焉。 伏惟陛下以聖德君臨,猶垂意於博採,故招賢正之士,而臣等薄陋,不足以降大問 上古推賢讓位,教同德一,故易簡而人化,三代世及,季末相承,故文繁而後 所由之路本近,故所補之功不侔也。 禮樂之化深,政刑之用淺。 而齊桓失之葵丘,夷吾淪于小器,功 勤之則可以小安,墮之 周當二代之流,承彫僞 臣聞 聖

官之也。今之典刑,匪無一統,宰牧之才,優劣異績,或以之興,或以之替,此蓋人能弘 策曰:「建不刊之統,移風易俗,使天下洽和,何修而嚮茲。」臣以爲莫大於擇人而 其所不適,深其薄過,非恕也。且天子於諸侯,有不純臣之義,斯責之矣。施行之道, 者削,貢而不適亦削。夫士者,難知也;不適者,薄過也。不得不責,强其所不知也;罰 關梁,邪門啓矣,朝廷不責賢,正路塞矣。得失之源,何以甚此!所謂責賢,使之相舉 夜,俗不一也。 且人無愚智,咸慕名宦,莫不飾正於外,藏邪於內,故邪正之人難得而 也,所謂關梁,使之相保也。賢不舉則有咎,保不信則有罰。故古者諸侯必貢士,不貢 頓爲寒暑,人主亦不能頓爲隆替,故寒暑漸於春秋,隆替起於得失。當今之世,宦者無 失世者,未嘗不爲衆邪所積也。方其初作,必始於微,微而不絕,其終乃著。天地不能 知也。任得其正,則衆正益至,若得其邪,則衆邪亦集。 乎!賢苟求達,達在修道,窮在失義,故靜以待之也。 故動以要之也。動則爭競,爭競則朋黨,朋黨則誣調,誣調則臧否失實,眞僞相冒,主 下無魘,主聽用察,德之所趣也。故能使之靜,雖日高枕而人自正,不能禁動,雖復夙 聽用惑,姦之所會也。 不求賢乎!今之官者,父兄營之,親戚助之,有人事則通,無人事則塞,安得不求 爵 今人相 政"非政弘人也。 與求爵。 古之官人,君責之於上,臣舉之於下,得其人有賞,失其人有罰,安得 舍人務政,雖動何益?臣竊觀乎古今,而考其美惡: 古人相與求賢, 。靜則貞固,貞固則正直,正直則信讓,信讓則推賢,推賢不伐,相 爵苟可求,得在進取,失在後時, 物繁其類、誰能止之!故亡國

此! 知。 刊之統,移風易俗,刑措而不用也。 其宜,則生生豐植,人用資給,和樂興焉。是故寡過而遠刑,知恥以近禮,此所以建不 清耳。若欲善之,宜創舉賢之典,峻關梁之防。其制旣立,則人愼其舉而不苟,則賢者可 競,誰憂之者?雖今聖思勞於夙夜,所使爲政,恒得此屬,欲聖世化美俗平,亦俟|河之 戮者矣。貪鄙竊位,不知誰升之者?獸兕出檻,不知誰可咎者?漏網 吞 政事紛亂,於私則汙穢狼籍。 之,無縱以失之也。今則不然,世之悠悠者,各自取辨耳。故其材行並不可必,於公則 寧縱不濫之矣。今皆反是,何也?夫賢者天地之紀,品物之宗,其急之也,故寧濫以得 · 人之於利,如蹈水火焉。前人雖敗,後人復起,如彼此無已,誰止之者? 風流 知賢而試,則官得其人矣。官得其人,則事得其序,事得其序,則物得其宜,物得 自頃長吏特多此累,有亡命而被購懸者矣,有縛 舟,何以過 東而絞

其施, 其命可授,其力可竭,以戰則克,以攻則拔。是以善者慕德而安服,惡者畏懼而削迹。 夏,則臯陶作士,此欲善其末,則先其本也。 夫任賢則政惠,使能則刑恕。 政惠則下仰 而志勇。 策曰:「自頃夷狄內侵,災眚屢降,將所任非其人乎?何由而至此?」臣聞 蠻 夷 猾 刑恕則人懷其勇。 苟思共利而除其害,以生道利之者,雖死不貳,以逸道勞之者,雖動不怨。 施以殖其財,勇以結其心。故人居則資贍而知方,動則親上

苦。 耕必有十年之儲,薨湯遭之而人不困,有備故也。 土相接,而豐約不同;或頃畝相連,而成敗異流,固非天之必害於人,人實不能均其勞 止戈而武,義實在文,唯任賢然後無患耳。若夫水旱之災,自然理也。故古者三十年 失之於人,而求之於天,則有司惰職而不勸,百姓殆業而咎時,非所以定人志,致 自頃風雨雖頗不時,考之萬國,或境

若收不知言以致知言,臣則可矣,是以辭鄙不隱也。 臣誠愚鄙不足以奉對聖朝,猶進之於廷者,將使取諸其懷而獻之乎,臣懼不足也。 豐年也。

宜勤人事而已。

以對策上第,拜議郎。母憂去職。

夕拜哭。 詵 母病,苦無車,及亡,不欲車載柩,家貧無以市馬,乃於所住堂北壁外假葬,開戶,朝 養雞種蒜,竭其方術。 喪過三年,得馬八匹,輿柩至冢,負土成墳。未畢,召爲征

東參軍。徙尙書郎,轉車騎從事中郎。

吏部 尚書崔洪薦詵爲左丞。 及在職,嘗以事劾洪,洪怨詵,詵以公正距之,語在洪傳。

洪聞而慚服。

爲天下第一,猶桂林之一枝,崑山之片玉。」帝笑。 累遷雍州刺史。 武帝於東堂會送,問詵曰:「卿自以爲何如。」詵對曰:「臣舉賢良對策, 侍中奏免\就官,帝曰:「吾與之戲耳,不足

列

怪也。」詵在任威嚴明斷,甚得四方聲譽。 卒於官。 子延登爲州別駕。

阮种

阮种字德猷,陳留尉氏人,漢侍中胥卿八世孫也。 弱冠有殊操,爲嵇康所重。 康著養

生論,所稱阮生,即种也。 察孝廉,爲公府掾。

是時西虜內侵,災眚屢見,百姓饑饉,詔三公、卿尹、常伯、牧守各舉賢良方正直言之

士。於是太保何會舉种賢良。

適,播醇美之化,杜邪枉之路,斯誠羣黎之所欣想盛德而幸望休風也。」 覽焉。」|种對曰:「夫天地設位,聖人成能,王道至深,所以行化至遠。 故能開物成務,而功業 道術,儼然而進,朕甚嘉焉。其各悉乃心,以闡喩朕志,深陳王道之本,勿有所隱,朕虚心以 載。朕應踐洪運統位,七載於今矣。惟德弗嗣,不明于政,宵興惕厲,未燭厥猷。 子大夫韞韥 於其道,而天下化成。』宜師蹤往代,襲迹三五,矯世更俗,以從人望。令率士遷義,下知所 不匱,近無不聽,遠無不服,德逮羣生,澤被區宇,聲施無窮,而典垂百代。故經曰:『聖人久 策曰:「在昔哲王,承天之序,光宅宇宙,咸用規矩乾坤,惠康品類,休風流行,彌于千

又問政刑不宣,禮樂不立。對曰:「政刑之宣,故由乎禮樂之用。昔之明王,唯此之務,

所 以防遏暴慢,感動心術,制節生靈,而陶化萬姓也。[1] 禮以體德,樂以詠功,樂本於和,而

禮師於敬矣。」

奉世 是以 侮邊 設。 積;農傷則 國 狼 奴 熾 之首,詳 之口 競戦 者之伐, 以 羣 夷 征 事 書歎『蠻夷帥服』。自魏氏以來,夷虜內附,鮮有桀悍侵漁之患。 而 叉 叉 問問 醜蕩駭,緣 問 南 今醜 夷 "或干賞啗利"妄加討戮。 庶徴 勝之功,貪攻取之利,良將勁卒,屈於沙漠,勝敗 及 答徵作見。 羌,皆兵不 狄 戎蠻猾夏。 有征 其 人匱,積 う誠 虜內居,與百姓雜處,邊東擾 之用。詩曰『敬之敬之,天惟顯思』,天聰明自我人聰明,是以 以 非計之得者也。 衆制 無戰,懷遠 間 費 血刃,摧 而 寡,令匈奴遠迹,收 對日 對曰:「戎蠻猾夏,侵敗王略,雖古盛世,猶有此虞。 則 動。 國 [三]陰陽 虚。 以德,不聞以兵。夫兵凶器,而戰危事 雖三州覆敗,牧守不反,此非胡 抑 强 昔漢武之世,承文帝之業,資海內之富,役其材 是以 暴,擒 否泰,六沴之災,則 夫以微 盗賊 其首惡 功祁連,飲馬瀚海,天下之程,已過太半矣。 羈 習,人又忘戰。 蜂起,山 而 御悍馬,叉乃操 一, 此 則 東不 人主 折 振。 衝 受方 、相若,克不過當,夭百姓 修 厭 虜之甚 政以禦之,思 難、勝敗相辨、中世之明 **暨宣元之時**,趙充國 以 任者,又 也。 煩策,其 勁 兵興 曲 ′)蓋用 非其材,或 是邊守遂怠,鄣塞不 不 患而 則 人主祖 之者過 制者,固 傷農, 故詩稱『獫狁孔 防 臣 之命, 以以 承天命,日 之,建皇極 征 以 也 衆 西零 狙 其 、效也。」 夫虛 甘 集 詐,侵 理 塡 心 臣 則 也。 聞 中 囟 費

愼 一日也。 故能 應受多福而永世克祚,此先王之所以退災消眚也。」

立,則 矜節之士,則野無貪冒之人。 夫廉恥之於政,猶樹藝之有豐壤,良歲之有膏澤,其生物 此先王所以保乂定功,化洽黎元,而勳業長世也。故上有克讓之風,則下有不爭之俗,朝有 辟,猶不勝矣。 然茂矣。 風醇俗美,皆數百年保天之祿。 又問經化之務。對曰:「大王道之本,經國之務,必先之以禮義,而致人於廉恥。 《君子軌道而讓於善,廉恥立,則小人謹行而不淫於制度。 賞以勸其能,威以 懲 若廉恥不存,而惟刑是御,則風俗彫弊,人失其性,錐刀之末,皆有爭心,雖峻 而秦二世而弊者,蓋其所由之塗殊也。」 其廢。 禮義 必油

愛人, 此昔之聖王所以恭己南面而化於陶鈞之上者,以其所任之賢與所賢之信也。 也。 職,則萬機 武 經德,所以成功丕業,咸熙庶績者,莫先於選建明哲,授方任能。 夫賢才之畜於國,由良工之須利器,巧匠之待繩墨也。 又問:「將使武成七德,文濟九功,何路而臻于茲? 凡厥庶事,曷後曷先。」對曰:「夫文 則曲 退則砥節潔志, 《咸理,庶僚不曠。 書曰:『天工人其代之。』然 直 正 其於政也,如農者之殖磽野,旱年之望豐穡,必不幾矣。此三代所以享德長 而 衆形得矣。 營職不干私義,出心必由公塗,明度量以呈其能,審經 是以 人主必勤求賢,而佚以任之也。 則繼天理物,寧國安家,非賢 器用利,則斷 賢臣之於主, 進則 令才當其官而 削易 制 而 方今海內之 材不 以效其功。 功 (無以 ·病,繩 忠國 稱 刑嚴 成 其

士皆傾望休光,希心紫極,唯明主之所趣舍。 一授職 , 呈能制官, 朝無素餐之士, 如此化流罔極, 樹功不朽矣。」 若開四聰之聽,廣疇咨之求,抽羣英,延俊义。

若有 所諱 具陳 乃 患苦者,有宜損益,使公私 水旱饑饉者,何以救之? 更延羣士,庭以問之。 也 所 文武隱逸之士,各舉所知,雖幽賤負俗, 時 种 懷。 與郤詵及東平王康俱居上第,卽除尚書郎。 又比年連有水旱災眚,雖戰戰兢兢,未能究天人之理,當 中間 韶曰:「前者對策,各指答所問, 兩濟者,委曲陳之。 多事,未得寧靜,思 勿有所限。 叉政 以省息煩務, 在得 然毀譽之徒,或言對者因緣假託, 人,而 未盡子大夫所欲言,故復 故虛心思聞事實, 令百姓不 知之至難,唯有因 何修 失其所。 以 勿務 應其變? 華辭,莫有 人視 若人有所 延 聽耳。 遇

備。 究,臣誠蒙昧,所以 頃陰陽 之聖王 此 誠堯舜之用 若政有愆 种 隔幷, 一,政道 對 曰:「伏惟陛下以聖哲玄覽,降卹黎蒸,將濟元元,同之三代,旁求俊义,以 備 水 心也。 失, 早爲災,亦猶 而 刑理 制 爲罪。 先 臣猥以 具, 頗 僻,則庶徵不 臣 軌 聞 期運之致。不然,則亦有司之不帥,不能宣承聖德,以贊揚大 頑魯之質, 人 以 天 生蒸庶, 務,致之於本,是以雖 應,而淫亢爲災。 應淸明之舉,前者對策,不足以 樹君 以司 牧之, 此則 有 人君道洽, 水旱之眚,而 天 人 之理,而 則 無饑饉 彝 疇 興 塞 倫 廢 攸 聖 之 之 序 患 由 輔 所 五. 也 也 至化, 陳不 福 昔 自 來

列傳

至。』孔子曰:『視其所以,觀其所由,人焉廋哉!』若夫文武隱逸之士,幽賤負俗之才,故非 道未孚則人無固志。此則損益之至務,安危之大端也。 化,故和氣未降而人事未敍也。方今百姓凋弊,公私無儲,誠在於休役靜人,勸嗇務 其救也。 愚臣之所能識。 人之所患,由於役煩網密而信道未孚也。役煩則百姓失業,網密則下背其誠,信 謹竭愚以對。」 傳曰:『始與善,善進,則不善蔑 分, 此 由

策奏,帝親覽焉,又擢爲第一。 轉中書郎。 進止有方,正己率下,朝廷咸憚其威容。 毎

爲駁議,事皆施用,遂爲楷則。 遷平原相。

此,朕何憂乎」一种爲政簡惠,百姓稱之,卒于郡。 時襄邑衞京自南陽太守遷于河內,與种俱拜,帝望而歎曰:「二千石皆若

袁甫

母年十八,便守節鞠養,勤勞備至。 華譚字令思,廣陵人也。 祖融,吳左將軍、錄尚書事。父醑,吳黃門郎。譚朞歲而孤, 及長,好學不倦,爽慧有口辯,爲鄰里所重。 揚州 刺史

周浚引爲從事史,愛其才器,待以賓友之禮。

太康中,刺史嵇紹舉譚秀才,將行,別駕陳總餞之,因問曰:「思賢之主以求才爲務,進

列傳第二十二 華譚

亡之不暇,何論功名之立哉!故上官昵而屈原放,宰嚭寵而伍員戮,豈不哀哉!若仲舒抑 妄則不忠之責生。豈故爲哉?淺明不見深理,近才不覩遠體也。是以言不用,計不施,恐死 賢,所用有廊廟之器,居官者日冀元凱之功,在上者日庶堯舜之義,彼豈知其政漸毁哉 遲。 而 取之士以功名爲先,何仲舒不仕武帝之朝,賈誼失分漢文之時。此吳晉之滯論,可辨此理 於|孝武,賈誼失於|漢文,蓋復是其輕者耳。故白起有云:『非得賢之難,用之難。 雖有求賢之名,而無知才之實。言雖當,彼以爲誣;策雖奇,彼以爲妄。誣則毁己之言入, 之難。』得賢而不能用,用而不能信,功業豈可得而成哉!」 後別。」譚曰:「夫聖人在上,物無不理,百揆之職,非賢不居。故山林無匿景,衡門不棲 至承統之王,或是中才,或復凡人,居聖人之器,處兆庶之上,是以其教日穨,風俗漸 又中才之君,所資者偏,物以類感,必於其黨,黨言雖非,彼以爲是。以所授有顏冉之 非用之難,

勞謙 臣 以皐陶見舉,不 之廣,西有醜施之氐,故謀夫未得高枕,邊人未獲晏然,將何以長弭斯患,混淸六合。」對曰: 聞 日昃,務在 譚至洛陽,武帝親策之曰:「今四海一統,萬里同風,天下有道,莫斯之盛。 然北有未羈 聖人之臨天下也,祖乾綱以流化,順谷風 仁者遠,陸賈重漢,遠夷折節。 擇才,宣 明巖穴,垂光隱滯。俊乂龍躍,帝道以光,淸德鳳翔,王化克舉。 今聖朝德音發於帷幄, 清風翔乎無外, 戎旗 以興仁,兼三才以御物,開四聰以招賢。

門,廢鄭聲之樂,混淸六合,實由乎此。雖西北有未羈之寇,殊漠有不朝之虜,征之則勞師 南指,江漢席卷,干戈西征,羌蠻慕化,誠闡四門之秋,興禮教之日也。 得之則無益,故班固云:『有其地不可耕而食,得其人不可臣而畜,來則懲而禦之,去則備而 殊才望險而雲集。 守之。』蓋安邊之術也。 虛高館以俟賢,設重爵以待士,急善過於饑渴,用人疾於影響,杜佞諂之 故髦俊聞聲而響赴,

者也。」 也。 進其賢才,待以異禮,明選牧伯,致以威風,輕其賦斂,將順咸悅,可以永保無窮,長爲 分崩,英雄鼎峙,蜀棲岷隴,吳據江表。至大晉龍興,應期受命, 潛謀,歸命向 人敦樸,易可化誘,吳人輕銳,難安易動乎。 然殊俗遠境,風土不同,吳阻長江,舊俗輕悍。 叉策曰:「吳獨恃險,今旣蕩平。 化。 |蜀染化日久,風教遂成,|吳始 獨人服化,無攜貳之心,而吳人**越**雎,屢作妖寇。 今將欲綏靜新附,何以爲先。」對曰:「臣聞漢末 初附,未改其化,非爲蜀 所安之計,當先籌其人士,使雲翔 文皇運籌,安樂順軌,聖上 人敦慤而吳人易動 閶 **豈蜀** 闔

尚方武庫之用未邪。」對曰:「夫唐堯歷載,頌聲乃作,文武相承,禮樂大同。 清一八紘,殺盪 點,將修文德以綏之,舞干戚以來之,故兵戈載戢,武夫寢息。 又策曰:「聖人稱如有王者,必世而後仁。 今天成地平,大化無外,雖匈奴未羈,羌氐 如此,已可消鋒刃爲 佃 器,罷

善教;安不忘危,聖人常誠。 失大舜之德,猶有三苗之征,以周之盛,獫狁爲寇。 無外,萬國順軌,海內斐然。雖復被髮之鄉,徒跣之國,皆習章甫而入朝,要衣裳以磬折。 無爲罷武庫之常職,鑅鋒刃爲佃器。 雖有文德,又須武備。 自可倒戢干戈,苞以獸 備預不虞,古之

皮,將帥之士,使爲諸侯,於散樂休風,未爲不泰也。」

殷周之隆,而甫侯制律。律令之存,何妨於政。若乃大道四達,禮樂交通,凡人修行,黎庶 勵節,刑罰懸而不用,律令存而無施,適足以隆太平之雅化,飛仁風乎無外矣。」 其歸一也。今誠風教大同,四海無虞,人皆感化,去邪從正。夫以堯舜之盛,而猶設象刑, 帝殊禮,三王異教,故或禪讓以光政,或干戈以攻取。至於興禮樂以和人,流淸風以寧俗, 下太平,四方無事,百姓承德,將就無爲而乂。〔三〕至於律令,應有所損益不。〕對曰:「臣聞五 又策曰:「夫法令之設,所以隨時制也。時險則峻法以取平,時泰則寬網以將化。 今天

萬里同風,州郡貢秀孝,臺府簡良才,以八紘之廣,兆庶之衆,豈當無卓越儁逸之才乎!譬 下及帝王,莫不張皇綱以羅遠,飛仁風以被物。故得賢則教興,失人則政廢。今四海一統, 其理也。]對曰:「臣聞興化立法,非賢無以光其道,平世理亂,非才無以宣其業。上自皇巖, 統始同,宜搜才實。州郡有貢薦之舉,猶未獲出羣卓越之倫。將時無其人。有而致之未得 又策曰「昔帝舜以二八成功」文王以多士與周。夫制化在於得人,而賢才難得。今大

列傳

蟬於帷 由 也。 南 舜 海 而 **甫顯** 幄,或剖符於千里,巡狩必有呂公之遇,宵夢必有巖穴之感。 不少明月之寶,大宛不乏千里之駒也。 ,殷湯革王之命,伊尹負鼎而方用。 異哲難見,遠數難覩,故堯舜太平之化,二八 當今聖朝禮亡國之士,接遐裔之人, 賢儁之出,可企 踵 或 貂 而

王生於 齊,段干偃息而成名,諒否泰有時,曷人力之所能哉」濟甚禮之。 答曰:「吁!存亡有運,興衰有期,天之所廢,人不能支。」徐偃修仁義而失國,仲尼逐魯而逼 乎。」濟又日 不出於中域 拔賢儁於巖穴。 「不悟鄉里乃有如此才也」」博士王濟於衆中嘲之曰:「五府初開,羣公辟命,採英奇於仄陋, 時九州秀孝策無逮譚者。譚素以才學爲東土所推。同郡劉頌時爲廷尉,見之歎 東夷,大禹生於西羌。 也。 「夫危而不持, 顚而不扶, 至於君臣失位, 國亡無主, 凡在冠帶, 將何所取哉!」 君吳楚之人,亡國之餘,有何秀異而應斯舉。」譚答曰:「秀異固產 是以明珠文具,生於江鬱之濱;夜光之璞,出乎荆藍之下。 子弗聞乎?昔武王克商,遷殷頑民於洛邑,諸君得非其苗裔 故以人求之,文 於 方外, 息曰:

以示 爲淮陵太守。 · 功曹。 尋除郎· 中,遷太子舍人、本國中正。以母憂去職。 而 (廷掾張延爲作答教,其文甚美。譚異而薦之,遂見升擢。 又舉寒族周訪爲孝廉,訪果立功名,時以譚爲知人。以父墓毁去官。尋除尚 服闋,爲鄄城令,過濮水,作莊子贊 及譚爲廬江, 延已

書郎。

譚遣司馬褚敦討平之。又遣別軍擊冰都督孟徐,獲其驍率。 三百斛以助之。 寧初,出爲郟令。于時兵亂之後,境內饑饉,譚傾心撫卹。 譚甚有政績,再遷廬江內史,加綏遠將軍。 以功封都亭侯,食邑千戶,賜絹 時石冰之黨陸珪等屯據諸縣, 司徒王戎聞而善之,出穀

|甘揚威使也。」|譚答不知,遺絹二匹以遣之。使反,告卓。|卓曰:「此華侯也。」復求之,譚已 東海王越所捕,下令敢有匿者誅之,卓投譚而免。及此役也,卓遣人求之曰:「華侯安在?吾 去,遣人視之,而更移近馥。馥歎曰「吾嘗謂華令思是臧子源之疇,今果效矣。」甘卓嘗爲 譚,下壽陽獄。 言其非,由此爲燦所怨。又在郡政嚴,而與上司多忤。 揚州刺史劉陶素與譚不善,因 法 收 亡矣。後爲紀瞻所薦,而爲顧榮所止遏,遂數年不得調。 陳敏之亂,吳士多爲其所逼。顧榮先受敏官,而潛謀圖之。 鎭東將軍周馥與譚素相親善,理而出之。及甘卓討馥,百姓奔散,馥謂譚已 譚不悟榮旨,露檄遠近,極

曰:「譚聞霸主遠聽,以求才爲務,僚屬量身,以審已爲分。故疎廣告老,漢宣不違其志,干 上牋進之,帝親自覽焉。轉丞相軍諮祭酒,領郡大中正。譚薦干寶、范珧於朝,乃上牋求退 建興初,元帝命爲鎭東軍諮祭酒。譚博學多通,在府無事,乃著書三十卷,名曰辨道,

列

之功,拾遺無補闕之績;過在納言,闇於舉善,狂寇未賓,復乏謀策。年向七十,志力日衰, |木偃息,文侯就式其廬。|譚無古人之賢,竊有懷遠之慕。 自登淸顯,出入二載,執筆無贊事

素餐無勞,實宜辭退。 謹奉還所假左丞相軍諮祭酒版。」不聽。

不得志。時晉陵朱鳳、吳郡吳震並學行淸修,老而未調,譚皆薦爲著作佐郎 建武初,授秘書監,固讓不拜。太興初,拜前軍,以疾復轉秘書監。自負宿名,恒怏怏

貴,市道小人爭半錢之利,此之相去,何啻九牛毛也!」聞者稱善。 或問譚曰:「諺言人之相去,如九牛毛,寧有此理乎。」譚對曰:「昔許由、巢父讓天子之

卒於家。贈光祿大夫,金章紫綬,加散騎常侍,諡曰胡。二子:化、茂。 復存於今。」帝不懌。久之,加散騎常侍,屢以疾辭。及王敦作逆,譚疾甚,不能入省,坐免。 於帝,由是官塗不至。譚每懷觖望,嘗從容言於帝曰:「臣已老矣,將待死祕閣。汲黯之言, 戴若思弟邈,則譚女壻也。譚平生時常抑若思而進邈,若思每銜之。殆用事,恒毀譚

化字長風,爲征虜司馬,討汲桑,戰沒。茂嗣爵。

曰:「唯欲宰縣,不爲臺閣職,何也。」」甫曰:「人各有能有不能。譬繒中之好莫過錦,錦不可 淮南袁甫字公胄,亦好學,與譚齊名,以詞辯稱。嘗詣中領軍何勖,自言能爲劇縣。勖

長!黃霸馳名於州郡,而息譽於京邑。廷尉之材,不爲三公,自昔然也。」聞善之,除 以爲餡;穀中之美莫過稻,稻不可以爲齎。 是以聖王使人,必先以器,苟非周 材,何 能 松 悉

積,積憂成陰,陰積成雨,雨久成水,故其域恒澇也。 |壽陽已西皆是中國,新平强吳,美寶皆 何以恒水。]甫曰:「壽陽已東皆是吳人,夫亡國之音哀以思,鼎足强邦,一朝失職,憤歎甚 天下和平,災害不生矣。」觀者歎其敏捷。年八十餘,卒於家。 入,志盈心滿,用長歡娛。公羊有言,魯僖甚悅,故致旱京師。 轉淮南國大農、郞中令。 石珩問甫曰:「卿名能辯,豈知壽陽已西何以恒旱。 壽陽已東 若能抑强扶弱,先疏後親,則

待終祕閣,積薪之恨,豈獨古人乎! 衢,求之前哲,亦足稱矣。一思行已徇義,志篤周甘,仁者必勇,抑斯之謂!雖才行夙章,而 安,朝廷屬意於求賢,薖軸有懷於干祿。一部詵等並韞價州里, 東然應召,對揚天問,高步雲 史臣曰: 夫緝政釐俗, 拔羣才以成務; 振景觀光, 俟明主 而 宣 績。 武皇之世,天下乂

贊曰:阏阮洽聞,含章體政。 華生毓德,褫巾應命。 鳥路曾飛,龍津派泳。素業可久,

高芬斯盛。

列

校勘記

【13 將就無為而义「乂」、各本作「又」、今從殿本。
【13 而陶化萬姓也「姓」、各本作「性」、今從宋本。

晉書卷五十三

列傳第二十三

愍懷太子 子彪 臧 尚

臣稱太子似宣帝,於是令譽流於天下。 非常,不宜令照見人君也。」由是奇之。嘗從帝觀豕牢,言於帝曰:「豕甚肥,何不殺以享士, 而使久費五穀?」帝嘉其意,卽使烹之。因撫其背,謂廷尉傅祗曰:「此兒當興我家。」嘗對羣 失火,武帝登樓望之。太子時年五歲,牽帝裾入闇中。帝問其故,太子曰:「暮夜倉卒,宜備 皇子共戲殿上,惠帝來朝,執諸皇子手,次至太子,帝曰:「是汝兒也。」惠帝乃止。宮中嘗夜 愍懷太子遹字熙祖,惠帝長子,母曰謝才人。幼而聰慧,武帝愛之,恒在左右。嘗與諸

馮蓀爲文學。惠帝卽位,立爲皇太子。盛選德望以爲師傅,以何劭爲太師,王戎爲太傅,楊 時望氣者言廣陵有天子氣,故封爲廣陵王,邑五萬戶。以劉寔爲師,孟珩爲友,楊準、 列 傳第二十三 愍懷太 子 一四五七

蒙,今出東宮,惟當賴師傅羣賢之訓。其游處左右,宜得正人使共周旋,能相長益者。」於是 **禪、尚書令華廙息恒與太子游處,以相輔導焉。** 使太保衛瓘息庭、司空泰息略、太子太傅楊濟息毖、太子少師裴楷息憲、太子少傅張華息 濟爲太保,裴楷爲少師,張華爲少傅,和嶠爲少保。元康元年,出就東宮,又詔曰:「適尙幼

坐氊中而刺之。 以供嬖寵。冼馬江統陳五事以諫之,太子不納,語在統傳中。舍人杜錫以太子非賈后所生, 其鞅勒,使墮地爲樂。或有犯忤者,手自捶擊之。性拘小忌,不許繕壁修牆,正瓦動屋。 宦媚諛於太子曰:「殿下誠可及壯時極意所欲,何爲恒自拘束。」每見喜怒之際,輒歎曰:「殿 而后性兇暴,深以爲憂,每盡忠規勸太子修德進善,遠於讒謗。太子怒,使人以針著錫常所 葵菜、藍子、雞、麪之屬,而收其利。 東宮舊制,月請錢五十萬,備於衆用,太子恒採取二月, 於宮中爲市,使人屠酤,手揣斤兩,輕重不差。其母本屠家女也,故太子好之。又令西園賣 之器,太子從之。於是慢弛益彰,或廢朝侍,恒在後園游戲。愛埤車小馬,令左右馳騎,斷 下不知用威刑,天下豈得畏服!」太子所幸蔣美人生男,又言宜隆其賞賜,多爲皇孫造玩弄 及長,不好學,惟與左右嬉戲,不能尊敬保傅。 賈后素忌太子有令譽,因此密敕黃門閹

太子性剛,知賈謐恃后之貴,不能假借之。。謐至東宮,或捨之而於後庭游戲。詹事裴

『皇后萬歲後,吾當魚肉之。』非但如是也,若宮車晏駕,彼居大位,依楊氏故事,誅臣等而廢 平,因此譖太子於后曰:「太子廣買田業,多畜私財以結小人者,爲賈氏故也。密聞其言云。 后爲謐聘之,心不能平,頗以爲言。諡嘗與太子圍棊,爭道,成都王穎見而訶謐,謐意愈不 韓氏以自固。而壽妻賈午及后皆不聽,而爲太子聘王衍小女惠風。太子聞衍長女美,而賈 權諫曰:「賈謐甚有寵於中宮,而有不順之色,若一旦交構,大事去矣。宜深自謙屈,以防其 后於金墉,如反手耳。不如早爲之所,更立慈順者以自防衞。」后納其言,又宣揚太子之短, 變,廣延賢士,用自輔翼。」太子不能從。 初,賈后母郭槐欲以韓壽女爲太子妃,太子亦欲婚

布諸遠近。于時朝野咸知賈后有害太子意。中護軍趙俊請太子廢后,日太子不聽。

之,其字半不成。旣而補成之,后以呈帝。帝幸式乾殿,召公卿入,使黃門令董猛以太子書 爲王,蔣爲內主。願成,當三牲祠北君,大赦天下。要疏如律令。」太子醉迷不覺,遂依而寫 **| 妃共要剋期而兩發,勿疑猶豫,致後患。 茹毛飲血於三辰之下,皇天許當掃除患害,立道文** 之。文曰:「陛下宜自了,不自了,吾當入了之。中宮又宜速自了,不了,吾當手了之。 幷謝 | 岳作書草,若禱神之文,有如太子素意,因醉而書之,令小婢承福以紙筆及書草使太子書 和,呼太子入朝。旣至,后不見,置于別室,遣婢陳舞賜以酒棗,逼飮醉之。使黃門侍郎潘 九年六月,有桑生于宫西厢,日長尺餘,數日而枯。十二月,賈后將廢太子,詐稱上不

列

董猛 爲庶 議至 及青 纏汝鬉。」又曰:「南風起兮吹白沙,遙望魯國鬱嵯峨,千歲髑髏生齒牙。」南風,后名,沙門, 許昌宮之別坊,令治書御史劉振持節守之。 灣以兵仗送太子妃王氏、三皇孫于金墉城,考竟謝淑妃及太子保林蔣俊。 又使黃門自首,欲與太子爲逆。 及大將軍 太子小字也。 人。 紙 日西不決。 矯以長 詔曰 是日太子游玄圃,聞有使者至,改服出崇賢門,再拜受詔,步出承華門,乘粗犢車。 梁王肜、鎮東將軍淮南王允、前將軍東武公澹、趙王倫、太保何劭詣東宮,廢太子 廣公主辭白帝曰:「事宜速決,而羣臣各有不同,若有不從詔,宜以軍法 : [適書如此,今賜死。] 偏示諸公王,莫有言者,惟張華、裴頠證明太子。 后懼事變,乃表発太子爲庶人,詔許之。 韶以黄門首辭班示公卿。 先是,有童謠曰:「東宮馬子莫聾空,前 於是使尚書和郁持節,解結爲副, 又遣澹以千兵防送太子,更幽于 明年正月,賈后 從事。」 至臘月

實相 得見 |文病,中宮三遣左右來視,云:『天教呼汝。』到二十八日暮,有短函來,題言東宮發,疏云: 盡忠孝之節,無有惡逆之心。 隣 愍 。 母。 初,太子之廢也,妃父王衍表請離婚。 自宜 于時表國家乞加徽號,不見聽許。 城君亡,不見存恤,恒在空室中坐。 雖非中宮所生,奉事有 太子至許,遺妃書曰:「鄙雖頑愚, 疾病旣篤,爲之求 去年十二月,道文疾病 如親母。 自爲太子以來,敕見禁檢,不 請恩福 無有 困篤,父子之情, 心念爲善,欲 悪 ŗ 自道

來,使寫。急疾不容復視,實不覺紙上語輕重。父母至親,實不相疑,事理如此,實爲見誣, 書。』鄙便驚起、視之,有一白紙,一靑紙。催促云:『陛下停待。』又小婢承福持筆研墨黃紙 那!天與汝酒飲,不肯飲,中有惡物邪?』遂可飲二升,餘有一升,求持還東宮飮盡。 喜,何以不飲。天與汝酒,當使道文差也。』便答中宮:『陛下會同一日見賜,故不敢辭,通 **『言天教欲見汝。』即便作表求入。二十九日早入見國家,須臾遣至中宮。** 想衆人見明也。」 不得已,更飲一升。飲已,體中荒迷,不復自覺。須臾有一小婢持封箱來,云:『詔使寫此文 不飲三升酒也。且實未食,恐不堪。又未見殿下,飲此或至顚倒。』陳舞復傳語云:『不孝 酒噉棗盡。鄙素不飲酒,即便遺舞啓說不堪三升之意。中宮遙呼曰:『汝常陛下前持酒! 不得王是成國耳。』中宮遙呼陳舞:『昨天教與太子酒棗。』便持三升酒、大盤棗來見與,使飲 語:『中宮旦來吐不快。』使住空屋中坐。須臾中宮遣陳舞見語:『聞汝表陛下爲道文乞王, 中宮左右陳舞見 逼迫 H

倫,倫深納焉。 計旣定,而秀說倫曰:「太子爲人剛猛,若得志之日,必肆其情性矣。 中宮,與賈后親密。太子之廢,皆云豫知,一旦事起,禍必及矣。何不先謀之!」秀言於趙王 太子,二人深傷之,說趙王倫謀臣孫秀曰:「國無適嗣,社稷將危,大臣之禍必起。而公奉事 太子旣廢非其罪,衆情憤怨。右衞督司馬雅,宗室之疏屬也,與常從督許超並有寵於 明公素

二十

葬之。 實憐愍,特乞天恩,賜以王禮。妾誠闍淺不識禮義,不勝至情,冒昧陳聞。」詔以廣陵王禮 黃門孫慮齎至許昌以害太子。初,太子恐見耽,恒自煮食於前。慮以告劉振,振乃徙太子 爲稽顙,正其名號。此志不遂,重以酸恨。逾雖罪在莫大,猶王者子孫,便以匹庶送終,情 不幸喪亡,傷其迷悖,又早短折,悲痛之懷,不能自已。妾私心冀其刻肌刻骨,更思孝道,規 廁,慮以藥杵椎殺之,太子大呼,聲聞于外。 時年二十三。 將以庶人禮葬之,賈后表曰:「適 於小坊中,絕不與食,宮中猶於牆壁上過食與太子。慮乃逼太子以藥,太子不肯服,因如 殿中人欲廢賈后,迎太子。賈后聞之憂怖,乃使太醫令程據合巴豆杏子丸。三月,矯詔使 必害太子,然後廢買后,爲太子報讐,猶足以爲功,乃可以得志。」倫然之。秀因使反間,言 加賞於公,當謂公逼百姓之望,翻覆以免罪耳。若有瑕釁,猶不免誅。 事賈后,街談巷議,皆以公爲賈氏之黨。今雖欲建大功於太子,太子雖將含忍宿忿,必不能 不若遷延却期,賈后

于凶構,致爾于非命之禍,俾申生、孝己復見于今。賴宰相賢明,人神憤怨,用啓朕心,討厥 遵遺旨,越建爾儲副,以光顯我祖宗。祗爾德行,以從保傅,事親孝敬,禮無違者。 故皇太子之靈曰:嗚呼!維爾少資岐嶷之質,荷先帝殊異之寵,大啓土宇,奄有淮陵。 股奉 及賈庶人死,乃誅劉振、孫慮、程據等,册復太子曰:「皇帝使使持節、兼司空、衞尉伊策 而朕昧

和郁率東宮官屬具吉凶之制,迎太子喪於許昌 禮,反葬京畿,祠 有罪,咸伏其辜。 以太牢。 何補於荼毒冤魂酷痛哉?是用忉怛悼恨,震動於五內。 魂 而 有靈,尙 獲 爾 心。」帝 爲太子服長子斬衰, 羣臣齊衰, 今追復皇太子喪 使尚 書

懷。 規,古今一 時。 崇, 逝,戎車雷 生,含枉莫訟。 殯日 太子三子:膨、腻、尚,並與父同幽 名振 六月己卯,三葬于顯 嗚呼哀哉 咨爾遹 喪之發也,大風雷電,幃蓋飛裂。 同 理。 震。 軌。 1 1 芒芒羽蓋,翼翼縉紳。 皇孫啓建,隆祚爾 今爾之負,抱冤于東。 幼稟英挺,芬馨誕茂。 是用建爾儲副, 爾之降廢,實我不明 平陵。 永統皇基。 金 子。 帝感閻纘 墉 。牝亂 雖悴前 悠悠 旣表髫齔,高明逸秀。 同悲等痛, 又爲哀策曰:「皇帝臨軒,使洗馬劉務告于皇太子之 之言, 有識,孰 沈裁,釁結 如何 終,庶榮後 孰不 凶 立思子臺,故臣江統、 戾 不 酸 潛 哀 禍 辛 始。 構, 慟 成。 1 禍害如茲 庶光 電穸既營,將 壺關干主,千秋 昔爾聖祖,嘉爾淑美。 爾之逝 來葉,永世 矣,誰 1 哀 陸機並作誄頌焉 寧 百 感 悟己。 不泯。」諡 爾 其 和 神。 形 昔之申 異 痛 顯 華 髦 世 貫 詔 日 愍 雷 同 仍 四

舊也。 非 寧元年正月,趙王倫篡位,廢爲濮陽王,與帝俱遷金墉,尋被害。太安初,追諡曰哀。 命而沒。今立臧爲皇太孫。〔三還妃王氏以母之,稱太孫太妃。 太子官屬卽轉爲太孫官 趙王倫行太孫太傅。」五月,倫與太孫俱之東宮,太孫自西掖門出,車服侍從皆愍懷之 臧字敬文。 到銅駝街,宮人哭,侍從者皆哽咽,路人抆淚焉。桑復生于西廂,太孫廢,乃枯。永 永康元年四月,封臨淮王。己巳,詔曰"「咎徵數發,姦回作變,適旣逼廢,

癸卯,薨,帝服齊衰朞,諡曰沖太孫。 尚字敬仁。永康元年四月,封爲襄陽王。永寧元年八月,立爲皇太孫。太安元年三月

疏斥正士,好屠酤之賤役,耽苑囿之佚遊,可謂靡不有初,鮮克有終者也。旣而中宮凶忍, 來之望。及于繼明宸極,守器春坊,四教不勤,三朝或闕,豹姿未變,鳳德已衰,信惑姦邪, 百辟無爭臣之節。遂使冤逾楚建,酷甚戾園。 久懷危害之心,外戚諂諛,競進讒邪之說;坎牲之謀已搆,斃犬之譖遂行,**一人乏探隱之聰,** 史臣曰:愍懷挺岐嶷之姿,表夙成之質。武皇鍾愛,旣深詒厥之謀;天下歸心,頗有后 雖復禮備哀榮,情深憫慟,亦何補於荼毒

歸胙生災。旣罹凶忍,徒望歸來。

校勘記

(一) 中護軍趙俊 「趙俊」趙王倫傅作「趙浚」。

(三) 六月己卯 劈梭"「己卯」當從本紀作「壬寅」。 六月庚寅朔,無己卯。

CMJ永康元年四月封臨淮王己巳詔曰至今立臧爲皇太孫 |勞|校 本紀立臧爲皇太孫在 五月。 按

四月辛卯朔,無己巳。五月有己巳。

列 傅 第 _

+ Ξ

校 勘 記

晉書卷五十四

列傳第二十四

陸機孫極

里,閉門動學,積有十年。以孫氏在吳,而祖父世爲將相,有大勳於江表,深慨孫晧舉而棄 有異才,文章冠世,伏膺儒術,非禮不動。抗卒,領父兵爲牙門將。年二十而吳滅,退居舊 陸機字士衡,吳郡人也。 **昔漢氏失御,姦臣竊命,禍基京畿,毒徧宇內,皇綱弛頓,王室遂卑。於是羣雄蜂** 祖遜,吳丞相。 父抗,吳大司馬。 機身長七尺,其聲如鐘。 少

駭,[1] 義兵四合。吳武烈皇帝慷慨下國,電發荆南,權略紛紜,忠勇伯世,威棱則夷羿 哮闞之羣風驅,熊羆之族霧合。 震盪,兵交則醜虜授馘,遂掃淸宗劥,蒸禋皇祖。于時雲興之將帶州,焱起之師跨邑, 雖兵以義動,同盟勠力,然皆苞藏禍心,阻兵怙亂,或

師無謀律,喪威稔寇。忠規武節,未有如此其著者也。

輿於夷庚,反帝坐於紫闥,挾天子以令諸侯,清天步而歸舊物。戎車旣次,羣凶側目, 賓禮名賢,而張公爲之雄,交御豪俊,而周瑜爲之傑。彼二君子皆弘敏而多奇,雅達而 犯衆,攻無堅城之將,戰無交鋒之虜。誅叛柔服,而江外底定,飭法修師,則威德翕赫。 聰哲,故同方者以類附,等契者以氣集,江東蓋多士矣。將北伐諸華,誅鉏干紀,旋皇 大業未就,中世而殞。 武烈旣沒,長沙桓王逸才命世,弱冠秀發,招攬遺老,與之述業。神兵東驅,奮寡

當、潘璋、黃蓋、蔣欽、周泰之屬宣其力,風雅則諸葛瑾、張承、步騰以名聲光國,政事則 基强諫以補過。 咨、沈珩以敏達延譽,術數則吳範、趙達以磯祥協德,

董襲、陳武殺身以衞主,駱統、劉 尋聲而響臻,志士晞光而景騖,異人輻輳,猛士如林。於是張公爲師傅,周瑜、陸公、魯 庸、呂蒙之儔,入爲腹心,出爲股肱;甘寧、凌統、程普、賀齊、朱桓、朱然之徒奮其威,韓 之以篤敬,申之以節儉,疇諮俊茂,好謀善斷,束帛旅於丘園,旌命交乎塗巷。故豪彦 、潘濬、呂範、呂岱以器任幹職,奇偉則虞翻、陸績、張惇以風義舉政, 三奉使則趙 用集我大皇帝,以奇蹤襲逸軌,叡心因令圖,從政咨於故實,播憲稽乎遺風;而加 謀無遺計,舉不失策。 故遂割據山川,跨制荆吳,而與天下爭衡矣。

降及歸命之初,典刑未滅,故老猶存。 偏師 千旅 之屬掌機事,元首雖病,股肱猶良。爰逮末葉,羣公旣喪,然後黔首有瓦解之患,皇家 輣息於朔野;黎庶発干戈之患,戎馬無晨服之虞,而帝業固矣。 駿,擾於外閑,明珠瑋寶,耀於內府,珍瑰重迹而至, 奇玩應響而赴, 輶軒騁於南荒,衝 尹盡規於上,黎元展業於下,化協殊裔,風衍遐圻。 禮,蒐三王之樂,告類上帝,拱揖羣后。 而立。 將,喪氣挫鋒, 魏氏嘗藉戰勝之威,率百萬之師,浮鄧塞之舟,下漢陰之衆,羽楫萬計,龍躍順流,銳師 規,而施績、范愼以威 困 危騁變, 而 列 後濟,絕命永安。續以濡須之寇,臨川摧銳,蓬蘢之戰,孑輪不反。由是二邦之 大皇旣沒,幼主莅朝,姦囘肆虐。景皇聿興,虔修遺憲,政無大闕,守文之良主也。 ,黜之赤壁,喪旗亂轍,僅而獲免,收跡遠遁。 ,武步原隰,謨臣盈室,武將連衡,喟然有吞

江滸之志,壹宇宙之氣。 西界庸益之郊,北裂淮漢之涘,東苞百越之地,南括羣蠻之表。於是講八代之 結壘千里,志報關羽之敗,圖收湘西之地。而我陸公亦挫之西陵,覆師敗績, 勢衄財匱,而吳莞然坐乘其弊,故魏人請好,漢氏乞盟,遂躋天號,鼎跱 重 一顯,丁奉、鍾離斐以武毅稱,孟宗、丁固之徒爲公卿,樓玄、賀邵 武臣毅卒,循江而守,長棘勁鎩,望姦而奮。庶 大司馬陸公以文武熙朝、左丞相陸凱 漢王亦憑帝王之號,帥巴漢之人,乘 乃俾一介行人,撫巡外域,巨象逸 四六九 而周瑜驅我

以謇諤盡

有土崩之釁,曆命應化而微,王師躡運而發,卒散于陣,衆奔于邑,城池無藩籬之固,山 川無溝阜之勢,非有工輸雲梯之械,智伯灌激之害,楚子築室之圍,燕人濟西之隊,軍

然未改,而成敗貿理,古今詭趣,何哉。彼此之化殊,授任之才異也。 夫曹劉之將非一世所選,向時之師無曩日之衆,戰守之道抑有前符,險阻之利俄 未浹辰而社稷夷矣。雖忠臣孤憤、烈士死節,將奚救哉!

其下篇曰:

器,不患權之我偪。執鞭鞠躬,以重陸公之威,悉委武衞,以濟周瑜之師。卑宮菲食, 華,虐亦深矣,其人怨。劉翁因險以飾智,功已薄矣,其俗陋。夫吳,桓王基之以武,太 歸魯子之功,削投怨言,信子瑜之節。是以忠臣競盡其謨,忠士咸得肆力,洪規遠略, 之議,而作三爵之誓,屏氣跼蹐,以伺子明之疾,分滋損甘,以育凌統之孤,登壇慷愾, 之德,而省游田之娛,賢諸葛之言,而割情欲之歡,感陸公之規,而除刑法之煩,奇劉基 豐功臣之賞,披懷虛己,納謨士之算。故魯肅一面而自託,士變蒙險而效命。高張公 親仁罄丹府之愛。拔呂蒙於戎行,試潘濬於係虜。推誠信士,不恤人之我欺,量能授 祖成之以德,聰明叡達,懿度弘遠矣。其求賢如弗及,卹人如稚子,接士盡盛德之容, 昔三方之王也、魏人據中夏、漢氏有岷益、吳制荆揚而掩有交廣。 曹氏雖功濟諸

甲將百萬,其野沃,其兵練,其器利,其財豐,東負滄海,西阻險塞,長江制其區字,峻山 帶其封域,國家之利未見有弘於茲者也。借使守之以道,御之以術,敦率遺典,勤人謹 許,曰:「天下其謂朕何!」宮室輿服,蓋慊如也。 爰及中葉,天人之分旣定,故百度之缺 粗修,雖醲化懿綱,未齒乎上代,抑其體國經邦之具,亦足以爲政矣。地方幾萬里,帶 固不厭夫區區者也。故百官苟合,庶務未遑。 初都建鄴,羣臣請備禮秩,天子辭而弗

政,回修定策,守常險,則可以長世永年,未有危亡之患也。

深溝高壘,按甲養威。反虜踠迹待戮,而不敢北窺生路,强寇敗績宵遁,喪師太半。分 步闡之亂,憑寶城以延强寇,資重幣以誘羣蠻。于時大邦之衆,雲翔電發,懸旍江介, 諮之大司馬陸公,公以四瀆天地之所以節宣其氣,固無可遏之理,而機械則彼我所共, 然也。昔蜀之初亡,朝臣異謀,或欲積石以險其流,或欲機械以禦其變。天子總羣議以 築壘遵渚,衿帶要害,以止吳人之西,巴漢舟師,沿江東下。陸公偏師三萬,北據東坑, 彼若藥長技以就所屈,即荆楚而爭舟檝之用,是天贊我也,將謹守峽口以待擒耳。逮 師百萬,啓行不過千夫,軸轤千里,前驅不過百艦。故劉氏之伐,陸公喩之長蛇,其勢 之存亡也。其郊境之接,重山積險,陸無長轂之徑,川阨流迅,水有驚波之艱。雖有銳 或曰:「吳蜀脣齒之國也,夫蜀滅吳亡,理則然矣。」夫蜀,蓋藩援之與國,而非吳人

廣州之亂,禍有愈乎向時之難,而邦家顚覆,宗廟爲墟。 驚,封域寡虞。 陸公沒而潛謀兆,吳釁深而六師駭。 夫太康之役,衆未盛乎曩 命銳師五千,西禦水軍,東西同捷,獻俘萬計。信哉賢人之謀,豈欺我哉!自是烽燧罕 嗚呼!「人之云亡,邦國殄 日之師;

瘁」,不其然歟

夫然,故能保其社稷而固其土字,麥秀無悲殷之思,黍離無愍周之威也。 也、則兆庶與之同患。安與衆同慶、則其危不可得也,危與下同患,則其難不足卹也。 和,寬沖以誘俊乂之謀,慈和以結士庶之愛。是以其安也,則黎元與之同慶,及其危 所以用之者失也。故先王達經國之長規,審存亡之至數,謙己以安百姓,敦惠以致人 非乏俊也,山川之險易守也,勁利之器易用也,先政之策易修也,功不興而禍遘何哉? 也。及其亡也,恃險而已,又孫卿所謂舍其參者也。夫四州之萌非無衆也,大江以南 如人和」,「在德不在險」,言守險之在人也。吳之興也,參而由焉,孫卿所謂合其參者 有言曰「天時不如地利」,。易曰「王侯設險以守其國」,言爲國之恃險也。又曰「地利不 場曰「湯武革命順乎天」,或曰「亂不極則治不形」,□ 言帝王之因天時也。古人

二俊。」又嘗詣侍中王濟,濟指羊酪謂機曰:「卿吳中何以敵此。」答云:「千里蓴羹,未下鹽 至太康末,與弟雲俱入洛,造太常張華。華素重其名,如舊相識,曰:「伐吳之役,利獲

郎。 豉。」 時人稱爲名對。 張華薦之諸公。後太傅楊駿辟爲祭酒。 E 旣起, 范陽盧志於衆中問機曰:「陸遜、陸抗於君近遠。」機曰:「如君於盧毓、盧珽。」志 雲謂機曰:「殊邦遐遠,容不相悉,何至於此」機曰:「我父祖名播四海,寧不知 會駿誅,累遷太子洗馬、著作 默

邪!議者以此定二陸之優劣。

軍 邊 九錫文及 遇赦 豫誅 吳王晏出鎭淮南,以機爲郎中令,遷尙書中兵郎,轉殿中郎。 而 賈 禪詔疑機與焉,遂收機等九人付廷尉。賴成都王穎、吳王晏並救理之,得滅死徙 止 **謐功,賜爵關** 中侯。 倫將篡位,以爲中書郎。 倫之誅也,齊王冏以機職在中書, 趙王倫輔政,引爲相國參

信, 其 而 (家)得 志匡世難,故不從 汝能齎書 初機有駿犬,名曰黃耳,甚愛之。 報還洛。 取消息不?」犬搖尾作聲。 其後 因以爲常。 時中 國多難,顧榮、戴若思等咸勸機還吳,機負其才望, 機乃爲書以竹筩盛之而繫其頸,犬尋路南走,遂至 旣而羈寓京師,久無家問,笑語犬曰:「我家絕無書

冏旣矜功自伐,受虧不讓,機惡之,作豪士賦以刺焉。 其序曰:

係乎彼。 夫立 德 存乎我者,隆殺止乎其域;係乎彼者,豐約惟所遭遇。 之基 有常, 而建功之路不一。 何則? 修 Ù 以爲量者 落葉俟微飇以隕,而 存 乎我,因 物以成 %務者 風

之業。故曰「才不半古,功已倍之」,蓋得之於時世也。歷觀今古,徼一時之功而居伊 不足煩哀響也。是故苟時啓於天,理盡於人,庸夫可以濟聖賢之功,斗筲可以定烈士 之力蓋寡,孟嘗遭雍門以泣,而琴之感以末。何哉?欲隕之葉無所假烈風,將墜之泣

周之位者有矣。

若負芒刺於背,非其然者歟? 是以君奭怏怏,不悅公旦之舉,高平師師,側目博陸之勢。 日代大匠斲者必傷其手。 阡陌之上,況乎世主制命,自下裁物者乎!廣樹恩不足以敵怨,勤興利不足以補害,故 柄,天下服其大節,故曰天可讐乎。而時有袨服荷戟,立乎廟門之下,援旗誓衆,奮於 任出才表者哉!且好榮惡辱,有生之所大期,忌盈害上,鬼神猶且不免,人主操其常 之勳,神器暉其顧眄,萬物隨其俯仰,心玩居常之安,耳飽從諛之說,豈識乎功在身外, 夫我之自我,智士猶嬰其累,物之相物,昆蟲皆有此情。 夫以自我之量而挾非常 且夫政由|甯氏, 忠臣所以慷慨, 祭則寡人, 人主所不久堪。 而成王不遣嫌吝於懷,宣帝

其所也。因斯以言,夫以篤聖穆親,如彼之懿,大德至忠,如此之盛,尚不能取信於人 齒,忠莫至焉。 嗟乎!光于四表,德莫富焉,王曰叔父,親莫昵焉,登帝天位,功莫厚焉,守節沒 而傾側顚沛,僅而自全,則伊生抱明允以嬰戮,文子懷忠敬 而 齒劍,固

闍 過己,惡寵祿之踰量,蓋爲此也。 將發,而 不服,則嚴刑峻制,以賈傷心之怨。 起於寵盛,而不知辭寵以招福。 以冒道家之忌,運短才而易聖哲所難者哉!身危由於勢過,而不知去勢以求安,禍 主之懷,止謗於衆多之口,過此以往,惡覩其可!安危之理,斷可識矣。 成敗之有會。 方偃仰瞪眄,Ga)謂足以夸世,笑古人之未工,忘己事之已拙,知爨勳之可矜, 是以事窮運盡,必有顚仆,風起塵合,而禍至常酷也。 見百姓之謀己,則申宮警守,以崇不畜之威,懼萬方之 然後威窮乎震主,而怨行乎上下,衆心日陊,危機 聖人忌功名之 叉況乎饕大名

籍,而大欲不止於身,至樂無愆乎舊,節彌效而德彌廣, 痛、豈不謬哉 盡不可益,盈難久持,超然自引,高揖而退,則巍巍之盛,仰邈前賢,洋洋之風,俯觀來 分,惟此而已。 而彼之必昧,然後河海之迹堙爲窮流,一匱之釁積成山嶽,名編凶頑之條,身厭荼毒之 夫惡欲之大端,賢愚所共有,而遊子殉高位於生前,志士思垂名於身後,受生之 夫蓋世之業,名莫盛焉,率意無違, 故聊爲賦焉,庶使百世少有悟云。 欲莫順焉。 身逾逸而 借使伊 名逾劭。 人頗覽天道,知 此 之不爲,

冏不之悟,而竟以敗

列

傅

第二十

四

陸

機又以聖王經國,義在封建,因採其遠指,著五等論曰:

制,始於黃唐,郡縣之治,創於秦漢,得失成敗,備在典謨,是以其詳可得而言。 夫體 一國經野,先王所愼,創制垂基,思隆後葉。 然而經略不同,長世異術。

利也」。 蓋三代所以直道,四王所以垂業也。 萬邦之思化,主尊賴羣后之圖身,譬猶衆目營方,則天網自昶,四體辭難,而心膂獲乂。 衰足以禦暴。 政,九服之內知有定主,上之子愛於是乎生,下之禮信於是乎結,[4] 世平足以敦風,道 爲已存乎利人。故易曰「悅以使人,人忘其勞」,孫卿曰「不利而利之,不如利而後利之 以見綏世之長御,識人情之大方,知其爲人不如厚己,利物不如圖身,安上在於悅下, 疆之典,裁其親疏之宜,使萬國相維,以成盤石之固, 宗庶雜居, 而定維城之業。 又有 而 廣終乎因人。故設官分職,所以輕其任也,並建伍長,所以弘其制也。 !恩篤,樂遠則憂深,故諸侯享食土之實,萬國受傳世之祚。 夫然,則南面之君各務其 夫王者知帝業至重,天下至廣。廣不可以偏制,重不可以獨任,任重必於借力,制 是以分天下以厚樂,則己得與之同憂,饗天下以豐利,而己得與之共害。利博 故强毅之國不能擅一時之勢,雄俊之人無所寄霸王之志。然後國安由 。於是乎立其封

故世及之制弊於强禦,厚下之典漏於末折,侵弱之纍遘自三季,陵夷之禍終乎七雄。 夫盛衰隆弊,理所固有,教之廢興,繫乎其人,原法期於必諒,〔六〕明道有時而闇。

取其 制 昔成湯親照夏后之鑒,公旦目涉商人之戒,文質相濟,損益有物。然五等之禮,不革于 時,封畛之制,有隆爾者,岳立豈玩二王之禍而闇經世之算乎。固知百世非可懸御,善 及承微積弊,王室遂卑,猶保名位,祚垂後嗣,皇統幽而不輟,神器否而必存者,豈非事 不 能 、少禍,非謂侯伯無可亂之符,郡縣非興化之具。 故國憂賴其釋位,主弱憑於翼戴。 無弊,而侵弱之辱愈於殄祀,土崩之困痛於陵夷也。是以經始獲其多福,慮終

勢使之然歟!

暴煙頓其觀鼎之志,豈劉頂之能窺關, 令主,十有餘世。 獨饗其利,主憂莫與共害。 道,有與共亡,覆滅之禍,豈在曩日 之小怨,亡萬國之大德,知陵夷之可患,闇土崩之爲痛也。 降及亡秦,棄道任術,懲周之失,自矜其得。 然片言動王,諸侯必應,一朝振矜,遠國先叛,故强晉收其請隧之圖, 雖速亡趨亂,不必一道,顚沛之釁,實由孤立。 Î 勝廣之敢號澤哉!借使秦人因循其制,雖則無 尋斧始於所庇,制國昧於弱下,國慶 周之不競,有自來矣。 是蓋思 五等 國乏

侯 漏 岨 網,皇祖 其國家之富,憑其士庶之力,勢足者反疾,土狹者逆遲,六臣犯其弱 漢 矯秦枉,大啓王侯,境土踰溢,不遵舊典,故賈生憂其危,晁錯痛其亂。 夷於點徒,西京病於東帝。 是蓋過正之災,而非建侯之累也。 綱 然呂氏之難, 七子 是以諸 ,衝其

則天下風靡,一夫從衡,而城池自夷,豈不危哉! 纂隆皇統,而由遵覆車之遺轍,養喪家之宿疾,僅及數世,姦宄充斥。卒有强臣專朝, 然,復襲亡秦之軌矣。是以五侯作威,不忌萬國,新都襲漢,易於拾遺也。 朝士外顧,宋昌策漢,必稱諸侯。逮至中葉,忌其失節,割削宗子,有名無實,天下曠 光武中興,

教劫殺之禍,衆望未改,而已見大漢之滅矣。 謀王室,然上非奧主,下皆市人,師旅無先定之班,君臣無相保之志,是以義兵雲合,無 勢耳。故烈士扼腕,終委寇讐之手,中人變節,以助虐國之傑。雖復時有鳩合同志以 興於共和,襄惠振於晉鄭。豈若二漢階闥暫擾,而四海已沸,嬖臣朝入,九服夕亂哉! **鼙震於閩宇,鋒鏑流於絳闕,然禍止畿甸,害不覃及,天下晏然,以安待危。 是以宜王** 之亡,夫何故哉?豈世乏曩時之臣,士無匡合之志歟。蓋遠績屈於時異,雄心挫於卑 遠惟王莽篡逆之事,近覽董卓擅權之際,億兆悼心,愚智同痛。然周以之存,漢以 在周之衰,難興王室,放命者七臣,干位者三子,嗣王委其九鼎,凶族據其天邑,鉦

屬,咸述其職,而淫昏之君無所容過,何則其不治哉!故先代有以興矣。苟或衰陵,百 官方庸能,雖或失之,其得固多,故郡縣易以爲政」。夫德之休明,黜陟日用,長率連 或以「諸侯世位,不必常全,昏主暴君,有時比迹,故五等所以多亂。今之牧守,皆 列傳第二十四 陸機

薄,兩 蔽 己者,在位所不憚,損實事以養名者,官長所夙慕也。 仕子之常志;修己安人,良士所希及。 度自悖,鬻官之吏以貨準財,則貪殘之萌皆羣后也,安在其不亂哉!故後王有以之廢 垂 五等則不然。 也。 且要而言之,五等之君,爲已思政,郡縣之長,爲吏圖物。何以徵之。蓋企及進取, 愚處 後嗣 亂 思其堂構,爲上無苟且之心,羣下知膠固之義。 知國爲己土,衆皆我民,民安,己受其利, 則過有深淺。 然則八代之制,幾可以一理貫,秦漢之典, 夫進取之情銳,而安人之譽遲,是故侵百姓以利 君無卒歲之圖,臣挾一時之志。 國傷,家嬰其病。 使其並賢居政, 故前 殆可以 則 功 人欲以 一言 有厚

隆晉室 行。 以建九合之功,燕惠疑樂毅以失垂成之業,今日之事,在公不在機也。」穎左長史盧志心害 長沙王义,假機後將軍、河北大都督,督北 三世 穎 . 爲將,道家所忌,又羈旅入宦,頓居羣士之右,而王粹、牽秀等皆有怨心,固辭 時成都 謂 機 ,遂委身焉。 鄕 機 人孫惠 日:「若功成事定,當爵爲郡公,位以台司,將軍勉之矣」」機曰:「昔齊桓 王穎推功不居,勞謙下士。 |亦勸機讓都督於粹,機曰:「將謂吾爲首鼠避賊,[10]適所以 穎以機參大將軍軍 機旣感全濟之恩,又見朝廷屢有 事,表爲平原內史。 中郎將王粹、冠軍牽秀等諸軍二十餘萬 太安初,穎與 變難,謂穎 河間 速 王 禍 都 人。 飅 任夷吾 也。」遂 必能 督。 起 機以 兵討 穎 康

機寵,言於潁曰「陸機自比管樂,擬君關主,自古命將遣師,未有臣陵其君而可以濟事者 以來,出師之盛未嘗有也。長沙王乂奉天子與機戰於鹿苑,機軍大敗,赴七里澗而死者如 也。」類默然。機始臨戎,而牙旗折,意甚惡之。列軍自朝歌至於河橋,鼓聲聞數百里,漢魏

積焉,水爲之不流,將軍買棱皆死之。[1]]

蔚、夏亦同被害。機既死非其罪,士卒痛之,莫不流涕。是日昏霧晝合,大風折木,平地尺 **穎牋,詞甚悽惻。** 蒙國重恩,入侍帷幄,出剖符竹。成都命吾以重任,辭不獲已。今日受誅,豈非命也」」因與 明而秀兵至。機釋戎服,著白恰,與秀相見,神色自若,謂秀曰「自吳朝傾覆,吾兄弟宗族 等皆政所用,與牽秀等共證之。顯大怒,使秀密收機。其夕,機夢黑幰繞車,手決不開,天 機節度,輕兵獨進而沒。政疑機殺之,遂譖機於穎,言其有異志。將軍王闡、郝昌、公師藩 不能用。超宣言於衆曰:「陸機將反。」又還書與政,言機持兩端,軍不速決。及戰,超不受 雪,議者以爲陸氏之寃。 超將鐵騎百餘人,直入機麾下奪之,顧謂機曰「貉奴能作督不」機司馬孫拯勸機殺之,機 初,宦人孟玖弟超並爲穎所嬖寵。超領萬人爲小都督,未戰,縱兵大掠。機錄其主者。 旣而歎曰:「華亭鶴唳,豈可復聞乎」」遂遇害於軍中,時年四十三。 二子

機天才秀逸,辭藻宏麗,張華嘗謂之曰:「人之爲文,常恨才少,而子更患其多。」弟雲嘗

然好游權門,與賈謐親善,以進趣獲譏。所著文章凡三百餘篇,並行於世。 與書曰:「君苗見兄文,輒欲燒其筆硯。」後葛洪著書,稱「機文猶玄圃之積玉,無非夜光焉, 五河之吐流,泉源如一焉。 其弘麗妍膽,英銳漂逸,亦一代之絕乎」,其爲人所推服 如此。

與顧榮以智全。 孫拯者,字顯世,吳都富春人也。能屬文,仕吳爲黃門郎。 吳平後,爲涿令,有稱績。 孫晧世,侍臣多得罪,惟拯

|拯譬遣之日:「吾義不可誣枉知故,卿何宜復爾。」二人曰:「僕亦安得負君」||拯遂死獄 慈、意亦死。 機 旣 爲孟玖等所誣,收拯考掠,兩踝骨見,終不變辭。門生費慈、宰意二人詣獄明拯, 中,而

陸雲 弟耽 從父兄喜

號日 二陸」。 **| 雲字士龍,六歲能屬文,性淸正,有才理。** 幼時吳尚書廣陵閔鴻見而奇之,曰:「此兒若非龍 少與兄機齊名,雖文章不及機,而持論 駒, 當是鳳雛。」後舉雲賢 過之,

良,時年十六。

列傅

第

__

+

四

型 雲

入洛。 機 初詣張華,華問雲何在。 機曰:「雲有笑疾,未敢自見。」俄而雲至。

遲。」華撫手大笑。 親白雉,何不張爾弓,挾爾矢。」隱曰:「本謂是雲龍騤騤,乃是山鹿野麋。 談。」雲因抗手曰:「雲間陸士龍。」隱曰:「日下荀鳴鶴。」鳴鶴,隱字也。 影,因大笑落水,人救獲免。 爲人多姿制,又好帛繩纏鬚。 刺史周浚召爲從事,謂人曰:「陸士龍當今之顏子也。」 **雲與荷隱素未相識,嘗會華坐,華曰:「今日相 | 雲見而大笑,不能自已。先是,嘗著縗絰上船,於水** 雲叉日「旣 獸微弩强,是以發 遇,可 中顧見其 勿爲常 開 青雲

譴責之,雲乃去官。 百姓追思之,圖畫形象,配食縣 共殺其夫,聞妻得出,欲與語,憚近縣,故遠相要候。」於是一縣稱其神明。 郡守害其能,屢 謂曰:「其去不出十里,當有男子候之與語,便縛來。」旣而果然。 能欺,市無二價。人有見殺者,主名不立,雲錄其妻,而無所問。 俄以公府掾爲太子舍人,出補浚儀令。縣居都會之要,名爲難理。雲到官肅然,下不 社 。十許日遣出,密令人隨後, 問之具服,云:「與此妻通,

宅以奉詔命,海內聽望,咸用欣然。臣愚以先帝遺教日以陵替,今與國家協崇大化、追闡前 歎息。 清河王昔起墓宅時,手詔追述先帝節儉之教,懇切之旨,形于四海。 清河王毀壞成 世以儉,卽位二十有六載,宮室臺榭無所新營,屢發明詔,厚戒豐奢。國家纂承,務在遵奉, 而世俗陵遲,家競盈溢,漸漬波蕩,遂已成風。雖嚴詔屢宣,而侈俗滋廣。每觀詔書,衆庶 尋拜吳王晏郞中令。 晏於西園大營第室,雲上書曰:「臣竊見世祖武皇帝臨朝拱默,訓

蹤者,實在殿下。 下允時望。 臣以 凡才,特蒙拔 先敦素朴而後可以訓正四方,凡在崇麗,一宜節之以制, 擢,亦思竭忠效節以報所受之施,是以不慮犯迕,敢陳所懷 然後上厭帝 رناه

如愚臣

.言有可采,乞垂三省。」

咸等能盡節益國,而功利百倍,至於光輔 之利,而使小人用事,大道陵替,此臣所以 所關,猶謂未詳,咸等督察,然後得信, 旣非開國勿 處義用情,庶無大戾。今處、南軍旅小人,定、泰士卒廝賤,非有淸愼素著,忠公足稱。 中尉該、大農誕皆淸廉淑慎,恪居所司,其下衆官,悉州閭一介,疏闇 定、給使徐泰等覆校諸官市買錢帛簿。 時晏信任部將,使覆察諸官錢帛,雲叉陳曰:「伏見令書,以部曲將李咸、馮南、司馬吳 愚以宜發明令,罷此等覆察,衆事一付治書,則大信臨下,人思盡節 臣愚以聖德龍興,光有大國,選衆官材,庶 國美, 慷慨也。 **猶未若開懷信士之無失。** 用 臣備位大臣、職在獻 之義, 又傷殿下推誠曠蕩 之咎, 可,苟有管見,敢不 矣。 雖可 況所益 之量 H 不 聞, 工肄業。 過 姑 雖 大臣 息 使

博延俊茂,熙隆載典。 明德,思和人神,莫不崇典謨以教思,興禮學以 而 周隆二代。大晉建皇,崇配天地,區夏旣混, **雲愛才好士,多所貢達。** 伏見衞將軍舍人同郡張鵬,茂德淸粹,器思深通。 移書太常府薦同郡張贈曰:「蓋聞在昔聖王、承天御世、 陶遠。 禮樂將庸。 是以 帝堯昭煥而道協 君侯 應 曆運之會,贊天 初慕聖門,棲心重 人天,西伯質交 人之期, 殷薦

列

懷愾 纓 巖穴耀穎之秋,河津託乘之日也。 淪 仞, 言敷其藻。 上帝之祀矣。」 玉 虚藏器,褧裳襲錦,緇衣被玉。 啓塗及階,遂升樞奧。 一階,論道紫宮,誠帝室之瑰寶,淸廟之偉器。 恨。 方今太淸關宇,四門啓籥,玄綱括地,天網廣羅,慶雲興以招龍,和風起而儀鳳,誠 探微集逸,思心洞神;論道屬書,篇章光覿。含奇宰府,婆娑公門。 抽靈匱於秘宮,披金縢於玄夏,思樂百氏,博採其珍, 曾泉改路,懸車將邁,考盤下位,歲聿屢遷。 搢紳之士,具 而贍沈淪下位,羣望悼心。 廣樂九奏,必登昊天之庭,韶夏六變,必饗 若得端委太學,錯綜先典;垂 辭邁翰林, **棲靜隱寶**

沙王,乃止 門父居之邪! 冏,以雲爲前鋒都督。 用其父爲邯鄲令,左長史盧志等並阿意從之,而雲固執不許,曰:「此縣皆公府掾資,豈有黃 入爲尚書郎、侍御史、太子中舍人、中書侍郎。 玖深忿怨。 會問 張昌爲亂,穎上雲爲使持節、 誅,轉大將軍右司馬。 **穎晚節政衰,雲屢以正言忤旨。** 成都王穎表爲淸河內史。 大都督、前鋒將軍以討昌。 穎將討齊王 會伐長 孟 玖欲

茍 齊三軍,威示遠近,所謂一人受戮,天下知識者也。 有 所懷, 機之敗也,幷收雲。 不敢 不 獻 昨聞教以陸機 穎官屬江統、蔡克、棗嵩等上疏曰:「統等聞 後失軍 ·期,師 徒敗績,以法加刑,莫不謂當。 且聞重教,以機圖爲反逆,應加族誅,未 人主聖明,臣下盡規, 誠 足以肅

便寄宿,見一年少,美風姿,共談老子,辭致深遠。 門生故吏迎喪葬淸河,修墓立碑,四時祠祭。所著文章三百四十九篇,又撰新書十篇,並行 十人,流涕固請,穎惻然有宥雲色。 軍趙浚,赦其子驤,驤詣明公而擊趙,卽前事也。」蔡克入至穎前,叩頭流血,曰:「雲爲孟 機,敢竭愚戆, 姓,然後加雲等之誅,未足爲晚。今此舉措,實爲太重,得則足令天下情服,失則必使四方 卵之危也。 所怨,遠近莫不聞。今果見殺,罪無彰驗,將令羣心疑惑,竊爲明公惜之。」僚屬隨克入者數 心離,不可不令審諦,不可不令詳愼。 察其實耳。 初,雲嘗行,逗宿故人家,夜暗迷路,莫知所從。 列 刑誅事大,言機有反逆之徵,宜令王粹、牽秀檢校其事。 直以機計慮淺近,不能董攝羣帥,致果殺敵,進退之間,事有疑似,故令聖鑒未 以備誹謗。」穎不納。 孟玖扶穎入,催令殺雲。 統等重請,類遲迴者三日。 統等區區,非爲陸雲請一身之命,實慮此舉有得失之

時年四十二。有二女、無男。

盧志又曰:「昔趙王

一殺

中護

玖

令事驗顯然, 暴之萬

知

本末者,莫不疑惑。夫爵人於朝,與衆共之,刑人於市,與衆棄之。惟刑之恤,古人所愼。

、舉義兵,以除國難,四海同心,雲合響應,罪人之命,懸於漏刻,泰平之期,

不旦則

赴累

機兄弟並蒙拔擢,俱受重任,不當背罔極之恩,而向垂亡之寇;去泰山之安,而

今明公興

向曉辭去,行十許里,至故人家,云此數 忽望草中有火光,於是趣之。至一家,

十里中無人居,雲意始悟。却尋昨宿處,乃王弼冢。雲本無玄學,自此談老殊進。

爲州里所痛悼如此。後東海王越討穎,移檄天下,亦以機、雲兄弟枉害罪狀穎云。 「不意三陸相攜闍朝,一旦湮滅,道業淪喪,痛酷之深,荼毒難言。 雲弟耽爲平東祭酒,亦有淸譽,與雲同遇害。大將軍參軍孫惠與淮南內史朱誕書曰: 國喪儁望,悲豈一人!」其

通、思玄、四愁而作娛賓、九思,眞所謂忍愧者也。」其書近百篇。 而作言道,覩賈子之美才而作訪論,觀子政洪範而作古今曆,覽蔣子通萬機而作審機,讀幽 爲自敍,其略曰:「劉向省新語而作新序,桓譚詠新序而作新論。 **喜字恭仲。父瑁,吳吏部尚書。喜仕吳,累遷吏部尚書。少有聲名,好學有才思。嘗** 余不自量, 國子雲之法言

不爲諂首,無所云補,從容保寵,此第五人也。過此已往,不足復數。故第二已上,多淪沒 卑,祿代耕養,玄靜守約,沖退澹然,此第二人也。 薛瑩最是國士之第一者乎。 答曰:『以理推之,在乎四五之間。』問者愕然請問。 政不懼,此第三人也。 孫晧無道,肆其暴虐,若龍蛇其身,沈默其體,潛而勿用,趣不 與平,又作西州淸論傳於世,借稱諸葛孔明以行其書也。 斟酌時宜,在亂猶顯,意不忘忠,時獻微益,此第四人也。 侃然體國思治,心不辭貴,以方見憚,執 可測,此第一人也。避算居 有較論格品篇曰:「或問予, 溫恭修愼, 答曰:『夫

而遠悔吝,第三已下,有聲位而近咎累。 是以深識君子,晦其明而履柔順也。』問者曰:『始

聞高論,終年啓寤矣。』」

以喜爲散騎常侍,尋卒。 或退身修志,放在草野。 太康中,下詔曰:「偽尚書陸喜等十五人,南士歸稱,並以貞潔不容時朝,或忠而獲罪, 主者可皆隨本位就下拜除,敕所在以禮發遣,須到隨才授用。」乃 子育、爲尚書郎、弋陽太守。

映,如朗月之懸光,疊意迴舒,若重巖之積秀。 馳英華於早年,風鑒澄爽,神情俊邁。 之意將騰,先灰勁翮。 棲火樹;飛鱗北逝,卒委湯池。 時之業,申能展用,保譽流功。 重光,羽楫吳運,文武奕葉,將相連華。 合。 其詞深而雅,其義博而顯,故足遠超枚馬,高躡王劉, 制 日:古人云:「雖煙有才,晉實用之。」觀夫陸機、陸雲,實荆衡之杞梓,挺珪璋於秀實, 然則榮利人之所貪,禍辱人之所惡,故居安保名,則君子處焉,冒危履貴,則哲士去 望其翔躍,焉可得哉!夫賢之立身,以功名爲本, 屬吳祚傾基,金陵畢氣,君移國滅,家喪臣遷。 遂使穴碎雙龍,巢傾 文藻宏麗,獨步當時, 而機以廊廟蘊 千條析理,則電坼霜開, 兩鳳。 一才,瑚璉標器,宜其承俊乂之慶,奉佐 百代文宗,一 激浪之心未騁,遽骨修鱗; 言論慷慨,冠乎終古。 一緒連文,則 人而已。 士之居世,以富貴 矯翮 然其 南 珠 高 一辭,翻 陵 流 祖 詞 雲 考 壁 迥

列

傅

降不祥,殃及後昆。是知西陵結其凶端,河橋收其禍末,其天意也,豈人事乎! 不誡於前,華亭之鶴,方悔於後。卒令覆宗絕祀,良可悲夫!然則三世爲將,釁鍾來葉,誅 危邦,竭心庸主,忠抱實而不諒,謗緣虛而見疑,生在己而難長,死因人而易促。 保名位,無忝前基。不知世屬未通,運鍾方否,進不能闢昏匡亂,退不能屛跡全身,而奮力 機雲之行已也,智不逮言矣。覩其文章之誠,何知易而行難?自以智足安時,才堪佐命,庶 而生滅有殊者,隱顯之勢異也。故曰,衒美非所,罕有常安,韜奇擇居,故能全性。 是知蘭植中塗,必無經時之翠,桂生幽壑,終保彌年之丹。非蘭惌而桂親,豈塗害而壑 上蔡之犬, 觀

校勘記

- **羣雄蜂駭** 「蜂」,各本作「鋒」,今從殿本。吳志孫晧傳注、文選、類聚一一亦均作「蜂」。
- 奇偉則虞翻陸績張惇 <u>斠注:吳志三嗣主傳注、文選「張惇」上均</u> 有「張溫」。
- 勤人謹 政 「勤人」,文選作「勤民」。「人」字乃唐人避諱改。 下文「理盡於人」、「悅以使人,人
- 忘其勞」等處同,不具校。
- 【8】或曰 | 李校:「或日」,文選作「玄日」,注引太玄經。
- Ħ 累遷太子洗馬著作郎 據陸機自作文,官著作郎在下文「轉殿中郎」之後,時爲元康八年。

于王延壽魯殿靈光賦。

下之禮信於是乎結 **(料)**注: 文選「禮」作「體」,注引禮記「體信以達順」,是當從文選作「體」。

按:本集亦作「體」。

原法期於必諒 (對注:文選「原」作「愿」、「諒」作「凉」、注謂愿、懲也、涼、薄也。 此「原」字爲

「愿」字之譌?「諒」字爲「涼」字之譌。

广九山 有隆爾者 文選作「有隆焉爾者」,多一「焉」字,論文法句法皆當有「焉」字。

(.01) 將謂吾爲首鼠避賊 「謂」,各本作「爲」,今從殿本。通鑑八五亦作「謂」。

將軍賈棱皆死之 惠紀、通鑑八五皆作「斬其大將賈崇等十六人」。

列

傳第

= +

四

校

勌記

晉書卷五十五

列傳第二十五

夏侯湛 弟淳 淳子承

夏侯湛字孝若,譙國譙人也。 祖威、魏兗州刺史。父莊、淮南太守。湛幼有盛才、文章

宏富,善構新詞,而美容觀,與潘岳友善,每行止同輿接茵,京都謂之「連璧」。

少爲太尉掾。泰始中,舉賢良,對策中第,拜郎中,累年不調,乃作抵疑以自廣。 其

辭日:

洪煇,干當世之務,觸人主之威,有效矣。而官不過散郎,舉不過賢良。鳳棲五春,龍 朝,揮翼初儀,而受卿尹之舉。盪典籍之華,談先王之言。入閶闔,躡丹墀,染彤管,吐 命也。吾子童幼而岐立,弱冠而著德,少而流聲,長而垂名。拔萃始立,而登宰相之 當路子有疑夏侯湛者而謂之曰:「吾聞有其才而不遇者,時也;有其時而不遇者,

侯湛

列

傳

第二十五

夏

舟船之畔, 惜東壁之光, 不以寓貧婦之目。抑非二三公之蔽賢也, 實吾子之拙惑也。」 音,漠然沉默。使吾子栖遲窮巷,守此困極,心有窮志,貌有饑色。吝江河之流,不以濯 吾子攀其飛騰之勢,挂其羽翼之末,猶奮迅於雲霄之際,騰驤於四極之外。今乃金口玉 猶將登爲大夫,顯爲卿尹。於何有寶咳唾之音,愛錙銖之力。 向若垂一鱗,迴一翼,令 之觀也。富於德,貴於官,其所發明,雖叩牛操築之客,傭賃拘關之隸,負俗懷譏之士, **頌之音,徒費情而秏力,勞神而苦心,此術亦以薄矣。而終莫之辯,宜吾子之陸沈也。** 蟠六年,英耀禿落,羽儀摧殘。而獨雍容藝文,蕩駘儒林,志不輟著述之業,口不釋雅 且以言乎才,則吾子優矣。以言乎時,則子之所與二三公者,義則骨肉之固,交則明道

小醜之所堪也。然過承古人之誨,抑因子大夫之忝在弊室也,敢布其腹心,豈能隱儿 夏侯子曰:「噫!湛也幸,有過,人必知之矣。吾子所以褒飾之太矣。斟酌之喻,非

客曰:「敢祗以聽。」

以覽其概乎!

也承門戶之業,受過庭之訓,是以得接冠帶之末,充乎士大夫之列,頗闚六經之文,覽 改,是吾憂也。』四德具而名位不至者,非吾任也。是以君子求諸己,小人求諸人。僕 夏侯子曰:「吾聞先大夫孔聖之言:『德之不修,學之不講,聞義不能徙,不善不能

顯乍昧,文則乍幽乍蔚。知之者則謂之欲逍遙以養生,不知之者則謂之欲遑遑以求 百家之學。弱年而入公朝,蒙蔽而當顯舉,進不能拔羣出萃,却不能抗排當世,志則乍

達,此皆未是僕之所匱也。

水之魚,喪家之狗,行不勝衣,言不出口,安能干當世之務,觸人主之威,適足以露狂簡 靡容悅,出入崎傾,逐巧點姙,嘔喁辯佞。隨羣班之次,伏簡墨之後。當此之時,若失 而增塵垢。縱使心有至言,言有偏直,此委巷之誠,非朝廷之欲也。 入朝而酬問。僕,東野之鄙人,頑直之陋生也。不識當世之便,不達朝廷之情,不能倚 僕又聞,世有道,則士無所執其節,黜陟明,則下不在量其力。是以當舉而不辭,

除之器。譬猶投盈寸之膠,而欲使江海易色,燒一羽之毛,而欲令大鑪增勢。若燎原之 內,飽其尺牘矣。若僕之言,皆糞土之說,消磨灰爛,垢辱招穢,適可充衞士之爨,盈掃 乃羣公百辟,卿士常伯,被朱佩紫,耀金帶白,坐而論道者,又充路盈寢,黃幄玉階之 三臺之寺,盈中書之閣。有司不能竟其文,當年不能編其籍,此執政之所厭聞也。若 習甲子者,皆奮筆揚文,議制論道。出草苗,起林藪,御青瑣,入金墉者,無日不有。充 **猶洪聲之收淸響,黎苗之樂函夏,若遊形之招惠景。鄉曲之徒,一介之士,曾諷急就、** 今天子以茂德臨天下,以八方六合爲四境,海內無虞,萬國玄靜,九夷之從王化,

列

歸志乎渦瀨,從容乎農夫,優游乎卒歲矣。 言數百,謂陵嶒一世,何吾子之失評也!僕固脂車以須放,秣馬以待却,反耕於枳落, 煙 ,彌天之雲,噓之不益其熱,喻之不減其氣。

今子見僕入朝暫對,便欲坐望高位,吐

也。 不安。 功,嗤桓文之勳,抵拯管仲,蹉雹晏嬰。 答、益、伊、呂、周、召之倫,叔豹、 仲熊之儔,稽古則踰黃唐,經緯則越虞夏, 蔑昆吾之 神,獨善其身,玄白沖虛,仡爾養眞。 以弱斷 於細猥之中,則爲功也重矣,時而清談,則爲親也周矣。 貴游,閭邑之搢紳,皆高門之子,世臣之胤,弘風長譽,推成而進,悠悠者皆天下之彦 家,萬國爲百郡,政有常道,法有恒訓,因循而禮樂自定,揖讓而天下大順。 興衰相形,安危相傾。故在位者以求賢爲務,受任者以進才爲急。今也則九州爲一 咳唾成珠玉,揮袂出風雲。 諷詁訓,傳詩書,講儒墨,說玄虛,僕皆不如也。 二三公之簡僕於凡庸之肆, 顯僕 古者天子畫土以封羣后,羣后受國以臨其邦,懸大賞以樂其成,列九伐以討其違, 是以居逸而思危,對食而肴乾。 為重,以怯言爲信。不知士者無公誹,不得士者不私愧。 **豈肯職聯鄙事,取才進人,此又吾子之失言也。子獨** 雖力挾太山,將不舉一羽, 其遠則欲升鼎湖,近則欲超太平。 今也則否。居位者以善身爲靜,以寡交爲愼, 且古之君子,不知士,則 揚波萬里, 彼在位者皆稷、契、 方將保重嗇 夫道學之 將不濯 不明

備,無假而自足。不與人路同嗜欲,不與世務齊榮辱。故能入無窮之門,享不死之年。 不聞夫神人乎!噏風飲露,不食五穀。登太清,遊山嶽,靡芝草,弄白玉。不因而獨

以此言之,何待進賢!

攘袂奮氣,發謀出奇。使鳴鶴受和,好饌見縻。抑乃沈身郎署,約志勤卑,不亦羸哉! 德入殷王,義感齊侯。故伊尹起庖廚而登阿衡,甯戚出車下而階大夫。外無微介,內 且伊尹之干成湯,甯戚之迕桓公,或投己鼎俎,或庸身飯牛,明廢興之機,歌白水之流, 無請謁,矯身擢手,徑躡名位。吾子亦何不慕賢以自厲,希古以慷慨乎」 客曰:「聖人有言曰:『邦有道,貧且賤焉,恥也。』今子値有道之世,當太平之會,不

位之不到,是猶反鏡而索照,登木而下釣,僕未以此爲不肖也。 頓於鄙劣而莫之能起也。以此言之,僕何爲其不自衒哉!子不嫌僕德之不劭,而疑其 朝堂,答世問,不過顯所知。僕以竭心思,盡才學,意無雅正可準,論無片言可採,是以 畝。百鍊之鑑,別鬚眉之數,而壁土不見泰山。鴻鵠一舉,橫四海之區,出靑雲之外, 陸斷狗馬,水截蛟龍,而鈆刀不能入泥。騏驥驊騮之乘,一日而致千里,而駑蹇不能邁 而尺鷃不陵桑楡。此利鈍之覺,優劣之決也。夫欲進其身者,不過千萬乘,而僕以上 夏侯子曰:「嗚呼!是何言歟!富與貴是人之所欲,非僕之所惡也。夫干將之劍,

僕 又非僕之所安也。 所能也。 若乃伊尹負鼎以干湯,呂尚隱遊以徼文,傅說操築以寤主,甯戚擊角以要君,此非 莊 周駘蕩以放言,君平賣卜以自賢,接輿陽狂以蔽身,梅福 若乃季札抗節於延陵,楊雄覃思於太玄,伯玉和柔於人懷,柳惠 棄家以求仙、此

絀 後 、選補太子舍人,轉尙書郞,出爲野王令。 於士官,僕雖不敏,竊頗仿佛其淸塵。」 以卹隱爲急,而緩於公調。 政淸務閑,優游

多暇,乃作昆弟誥。其辭曰:

之格言。」淳等拜手稽首。 于訓籍,傳于詩書者,厥乃不思,不可不行。 友于兄弟。』『死喪之戚,兄弟孔懷。』又曰,『周之有至德也, 惟正月才生魄,湛若曰:「咨爾弟淳、踠、蹈、謨、總、瞻:[1]古人有言,『孝乎惟孝, 爾其專乃心,一乃聽,砥礪乃性, 莫如兄弟。』於戲! 以聽我 古之載

欽若稽古訓,用敷訓典籍,乃綜其微言。 寅亮魏祖,用康乂厥世,遂啓土宇,以大綜厥勳于家。 志,用恢 祚于後。 湛若曰:「嗚呼 闡我令業。 世世 增 敷前 ! 維我后府君侯,祗服哲 軌, 惟我皇乃祖滕公,肇釐厥德厥功,以左右漢祖,弘濟于嗣 濟其好行美德。 嗚呼!自三墳、五典、八索、九丘,圖緯六藝, 明允相繼,冠冕胥及。 命,欽明文思,以熙柔我家道,丕隆我 我皇祖穆侯,崇厥基以允釐顯 以逮于皇曾祖 君,用垂 先緒 愍侯,

父之大業,斯文在茲。 令跡是奉。 厥乃畫分而食,夜分而寢。豈唯令跡是畏,實爾猶是儀。嗚呼,予其敬哉!! 我用夙夜匪懈,日鑽其道,而仰之彌高,鑽之彌堅,我用欲罷不敢。豈唯予躬是懼,實 后。我惟烝烝是虔,罔不克承厥誨,用增茂我敦篤,以播休美于一世,厥乃可不遵。惟 室蔡姬,以致其子道。蔡姬登遐,隘于穆侯之命,厥禮乃不得成,用不祔于祖姑。 及百家衆流,罔不探賾索隱,鉤深致遠。 族,乃高于古之人。古之人厥乃千里承師,矧我惟父惟母世德之餘烈,服膺之弗可及, 厥誨,惟仁義惟孝友是尙,憂深思遠,祗以防于微。翳義形於色,厚愛平恕,以濟其寬 厥乃我齔齒,則受厥教于書學,不遑惟寧。 敦詩書禮樂,孳孳弗倦。 我有識惟與汝服 兪!予聞之,周之有至德,有婦人焉。我母氏羊姬,宣慈愷悌,明粹篤誠,以撫訓羣子。 丕孝其心,用假于厥制,以穆于世父使君侯。惟伯后聰明叡智,奕世載德,用慈友于我 用騁其永慕,厥乃以疾辭位,用遜于厥家,布衣席稾,以終于三載。厥乃古訓無文,我后 用緝和我七子,訓諧我五妹。惟我兄弟姊妹束脩慎行,用不辱于冠帶,實母氏是 予其爲政蕞爾,惟母氏仁之不行是戚,予其望色思寬。 納 戒思詳。嗚呼!惟母氏信著于不言,行感于神明。若夫恭事于蔡姬,敦穆于九 且九齡而我王母薛妃登遐,我后孝思罔極,惟以奉于穆侯之繼 洪範九疇,彝倫攸敍。乃命世立言,越用繼尼 獄之不情,敎之不泰是訓, 惟乃

列

嗚呼!小子瞻,汝其見予之長於仁,未見予之長於義也。」 我蒙蔽,極否于義訓。嗟爾六弟,汝其滋義洗心,以補予之尤。予乃亦不敢忘汝之闕。 | 琬乃沈毅篤固,惟蹈厥清粹平理,謨茂哉儁哲寅亮,總其弘肅簡雅,瞻乃純鑠惠和。惟 景仰之弗 《可階。汝其念哉!俾羣弟天祚于我家,俾爾咸休明是履。 淳英哉文明柔順,

且直,廉而不劌,肅而不厲,厥其成予哉。用集我父母之訓,庶明厲翼,邇可遠在茲。 曾不知,予知之逌改,惟沖子是賴。 予親于心,愛于中,敬于貌。 厥乃口無擇言,柔惠 于先載,納誨于嚴父慈母。予其敬忌于厥身,而匡予之纖介,翼予之小疵,使予有過未 都!厥不行惟難,厥行惟易。」 手稽首曰:「兪!」湛曰:「都!在修身,在愛人。」瞻曰:「吁!惟聖其難之。」湛曰: 瞻曰:「兪!以如何。」湛若曰:「我之肇于總角,以逮于弱冠, 暨于今之二毛,受學

形貌以心,訪心於虞。」 湛曰:「兪!總亦昌言。」 總曰:「兪!若憂厥憂以休。」 湛曰: 及于人,不敢墮于勤,厥故維新。」湛曰:「兪!蹈亦昌言。」蹈曰:「兪!滋敬于己,不滋 !乃言厥有道。」淳曰:「兪!祗服訓。」湛 淳曰:「兪!明而昧,崇而卑,沖而恆,顯而賢,同而疑,厲而柔,和而矜。」湛曰: 惟敬 ·乃恃,無忘有恥。」湛曰:「兪!謨亦昌言。」謨曰:「兪!無忘於不可不虞**,** 日:「來!碗,汝亦昌言。」碗日:「兪!身不

歌曰:「訊德恭哉,訓翼從哉,內外康哉!」皆拜曰:「欽哉!」 拜手稽首,湛亦拜手稽首。 「兪!瞻亦昌言。」瞻曰:「兪!復外惟內,取諸內,不忘諸外。」 湛曰:「兪!休哉」 淳等 '乃歌曰:「明德復哉,家道休哉,世祚悠哉,百祿周哉」」又作

居邑累年,朝野多歎其屈。除中書侍郎,出補南陽相。遷太子僕,未就命,而武帝崩

惠帝即位,以爲散騎常侍。 元康初,卒,年四十九。著論三十餘篇,別爲一家之言。

風詩。 初 ,湛作周詩成,以示潘岳。岳曰:「此文非徒溫雅,乃別見孝弟之性。」岳因此遂作家

者謂湛雖生不砥礪名節,死則儉約令終,是深達存亡之理。 湛族爲盛門,性頗豪侈,侯服玉食,窮滋極珍。及將沒,遺命小棺薄斂,不修封樹。 論

息承渡江。 淳字孝沖。 亦有文藻,與湛俱知名。官至弋陽太守。 遭中原傾覆,子姪多沒胡寇,唯

巴東監軍 承字文子。 柳純、宜都太守譚該等,並露檄遠近,列敦罪狀。會甘卓懷疑不進,王師敗績,敦 參安東軍事,稍遷南平太守。 太興末,王敦舉兵內向,承與梁州刺史甘卓、

列

悉誅滅異己者,收承,欲殺之,承外兄王廙苦請得免。 尋爲散騎常侍。

潘岳 從子尼

邑號爲奇童,謂終賈之儔也。早辟司空太尉府,舉秀才。 潘岳字安仁,滎陽中牟人也。祖瑾,安平太守。父芘,琅邪內史。岳少以才穎見稱,鄉

泰始中,武帝躬耕藉田,岳作賦以美其事,曰:

蔥犗服于縹軛兮,紺轅綴於黛耜。嚴儲駕於廛左兮,俟萬乘之躬履。百僚先置,位以 兮, 啓四塗之廣阼。沃野墳腴, 膏壤平砥。 清洛濁渠, 引流激水。遐阡繩直, 邇陌如矢。 畿,野廬掃路,封人壝宮,掌舍設枑。青壇鬱其嶽立兮,翠幕黕以雲布。結崇基之靈阯 職分,自上下下,具惟命臣。襲春服之萋萋兮,接游車之轔轔。微風生於輕幰兮,纖埃 起乎朱輪。森奉璋以階列兮,望皇軒而肅震。若湛露之晞朝陽兮,衆星之拱北辰也。 伊晉之四年正月丁未,

三皇帝親率羣后藉于千畝之甸,禮也。於是乃使甸師清

蓋,衝牙錚鎗,稍納綷縩。金根照耀以烱晃兮,龍驥騰驤而沛艾。表朱玄於離坎兮,飛

之種,司農撰播殖之器,挈壺掌升降之節,宮正設門閭之蹕。天子乃御玉輦,蔭華

於是前驅魚麗,屬車鱗萃,閶闔洞啓,參塗方駟,常伯陪乘,太僕執轡。 后妃獻種

塡,塵霧連天,以幸乎藉田。蟬冕熲以灼灼兮,碧色肅其千千。 青縞於震兌。 晻 簫管嘲 一暫以啾嘈兮,鼓鼙硡穩以砰礚,筍簴嶷以軒翥兮,洪鐘越乎區外。 震震填 中黄曄以發輝兮,方綵紛其繁會。 五路鳴鑾,九旗揚旆,瓊鈒入藥,雲罕 似夜光之剖荆璞兮,若

茂松之依山顚也。

常勤兮,莫之課而自厲。躬先勞而悅使兮,豈嚴刑而猛制哉! 褐振裾,垂髫總髻,躡踵側肩,掎裳連襼。 黃塵爲之四合兮,陽光爲之潛翳。 班,或五或九。于斯時也,居靡都鄙,人無華裔,長幼雜遝以交集,士女頒斌而 而觀者,莫不抃舞乎康衢,謳吟乎聖世。 於是我皇乃降靈壇,撫御耦,游場染屨,洪縻在手。三推而舍,庶人終畝。 情欣樂乎昏作兮,慮盡力乎樹藝。 咸戾。 靡誰督而 動容發音 貴賤以

溢,固撓湯之用心,而存救之要術也。」若乃廟祧有事,祝宗諏日,簠簋普淖,則此之自 顯,夕惕若慄,圖匱於豐,防儉於逸,欽哉欽哉,惟穀之恤。展三時之弘務,致倉廩於盈 其末者端其本,善其後者愼其先。夫九土之宜弗任,四業之務不壹,野有菜蔬之色,朝 乏代耕之秩。無儲蓄以虞災,徒望歲以自必。三代之衰,皆此物也。今聖上 昧 旦 丕 實,縮鬯蕭茅,又於是乎出。黍稷馨香,旨酒嘉栗。宜其時和年登,而神降之吉也。古 有邑老田父,或進而稱曰:「蓋損益隨時,理有常然。高以下爲基,人以食爲天。正

二 十

Ŧi.

潘岳

孝治天下,其或繼之者,尟哉希矣!逮我皇晉,實光斯道,儀刑孚于萬國, 至矣哉!此一役也,二美顯焉,不亦遠乎,不亦重乎!敢作頌曰 人有言曰 故躬稼以供粢盛,所以致孝也,勸穡以足百姓,所以固本也。 :「聖人之德,無以加於孝乎!」夫孝者,天之性、人之所由靈也。 能本而孝,盛德大業 愛敬盡於祖 昔者明王以

存,祝史正辭。 及我私。我簠斯盛,我簋斯齊。我倉如陵,我庾如坻。念茲在茲,永言孝思。 人力普 「思樂甸畿,薄採其芳。大君戾止,言藉其農。 其農三推,萬國以祗。 神祇攸歆、逸豫無期。 一人有慶,兆民賴之。」 耨我公田,遂

射 山濤、領吏部王濟裴楷等並爲帝所親遇,岳內非之,乃題閣道爲謠曰「閣道東,有大牛。 后才名冠世,爲衆所疾,遂栖遲十年。 出爲河陽令,負其才而鬱鬱不得志。 時尚書僕

王濟鞅,裴楷翰,和嶠刺促不得休。」

懈,使老小貧戶守之,又差吏掌主,依客舍收錢。 岳議曰: 轉懷令。時以逆旅逐末廢農,姦淫亡命,多所依湊,敗亂法度,敕當除之。 十里一官

旅。』外傳曰:『晉陽處父過宵,舍於逆旅。』魏武皇帝亦以爲宜,其詩曰:『逆旅整設,以 官無役賦,因人成利,惠加百姓而公無末費。語曰:『許由辭帝堯之命,而舍於逆 「謹案:逆旋,久矣其所由來也。行者賴以頓止,居者薄收其直,交易貿遷,各得其

蔭,芻秣成行,器用取給。 疲牛必投,乘涼近進,發槅寫鞍,皆有所憩。 四海會同,九服納貢,八方翼翼,公私滿路。近畿輻輳,客舍亦稠。冬有溫廬,夏有涼 通商賈。』然則自堯到今,未有不得客舍之法。唯商鞅尤之,固非聖世之所言也。方今

路之蠹,姦利所殖也。率歷代之舊俗,獲行留之歡心,使客舍洒掃,以待征旅擇家而 息,豈非衆庶顒顒之望。」 之。故懸以祿利,許以功報。今賤吏疲人,獨專離稅,管開閉之權,藉不校之勢,此道 閉,不及攤門。或避晚關,迸逐路隅,祇是慢藏誨盜之原。苟以客舍多敗法敎,官守棘 攤,獨復何人。彼河橋孟津、解券輸錢、高第督察、數入校出、品郎兩岸相檢、猶懼或失 且 而官櫳之所乏也。又行者貪路,告糴炊爨,皆以昏晨。盛夏晝熱,又兼星夜,旣限早 一聞聲有救,已發有追,不救有罪,不追有戮,禁暴捕亡,恒有司存。凡此皆客舍之益, 又諸劫盜皆起於迥絕,止乎人衆。十里蕭條,則姦軌生心,連陌接館,則寇情震懾。

請曹列上,朝廷從之。

佐,引岳爲太傅主簿。、駿誅,除名。初,譙人公孫宏少孤貧,客田於河陽,善鼓琴,頗能屬 · 后之爲河陽令,愛其才蓺,待之甚厚。至是,宏爲楚王璋長史,專殺生之政。 時 駿綱紀 后頻宰二邑,勤於政績。調補尚書度支郎,遷廷尉評,以公事免。楊駿輔政,高選**吏**

選爲長安令,作西征賦,述所經人物山水,文淸旨詣,辭多不錄。徵補博士,未召,以母疾輒 皆當從坐,同署主簿朱振已就戮。岳其夕取急在外,宏言之璋,謂之假吏,故得免。 尋爲著作郞,轉散騎侍郞,遷給事黃門侍郞。

之辭也。臘二十四友,岳爲其首。 而乾沒不已乎了而居終不能改。 岳性輕躁,趨世利,與石崇等諂事賈謐,每候其出,與崇輒望塵而拜。構愍懷之文,岳 證晉書限斷,亦岳之辭也。其母數誚之曰:「爾當知足,

旣仕宦不達,乃作閑居賦曰:

徙官 普通人和長輿之論余也,固曰「拙于用多」。稱多者,吾豈敢,言拙,則信而有徵。方今**俊** 帝,爲河陽、懷令,尙書郎,廷尉評。今天子諒闇之際,領太傅主簿。 譽,忝司空太尉之命,所奉之主,即太宰魯武公其人也。 歎 則必立功立事,效當年之用。是以資忠履信以進德,修辭立誠以居業。 也。曰:嗟乎!巧誠有之,拙亦宜然。 俄而 而 岳 讀汲黯傳至司馬安四至九卿,而良史書之,題以巧宦之目,未曾不慨然廢書而 進階,再免,一除名,一不拜職,遷者三而已矣。 復官、除長安令。遷博士、未召拜、親疾、輒去官免。 顧常以爲士之生也,非至聖無軌微妙玄通者, 雖通塞有遇,抑亦拙 舉秀才爲郎。 自弱冠涉于知命之年,八 府主誅, 逮事 僕少竊鄉曲之 世 之效也。 除名為 祖 武

惟孝,友于兄弟,此亦拙者之爲政也。乃作閑居賦以歌事遂情焉。其辭曰: 池沼足以漁釣,春稅足以代耕。灌園鬻蔬,供朝夕之膳,牧羊酤酪,俟伏臘之費。孝乎 膝下色養,而屑屑從斗筲之役。於是覽止足之分,庶浮雲之志,築室種樹,逍遙自得。 **乂在官,百工惟時,拙者可以絕意乎寵榮之事矣。太夫人在堂,有嬴老之疾,尚何能違**

髦士投紱,名王懷璽,訓若風行,應猶草靡。 此里仁所以爲美,孟母所以三徙也。 子有事于柴燎,以郊祖而展義,張鈞天之廣樂,備千乘之萬騎,服棖棖以齊玄,管啾啾 飛,以先啓行,耀我皇威。其東則有明堂辟雍,清穆敞閑,環林縈映,圓海回泉,聿追孝 名綴下士。背京泝伊,面郊後市。浮梁黝以逕度,靈臺傑其高峙。闚天文之祕奧,覩 道吾不愚。何巧智之不足,而拙艱之有餘也!於是退而閑居,于洛之涘。身齊逸民, 以嚴父,宗文考以配天,祗聖敬以明順,養更老以崇年。若乃背冬涉春,陰謝陽施,天 國冑,左納良逸。祁祁生徒,濟濟儒術,或升之堂,或入之室。 教無常師,道在則是。故 而並吹,煌煌乎,隱隱乎,茲禮容之壯觀,而王制之巨麗也。兩學齊列,雙宇如一,右延 人事之終始。其西則有元戎禁營,玄幕綠徽,谿子巨黍,異絭同歸,礮石雷駭,激矢蝱 邀墳素之長圃,步先哲之高衢。雖吾顏之云厚,猶內愧於甯蘧。有道余不仕,無

列傳第二十五 潘岳

爱定我居,築室穿池,長楊映沼,芳枳樹櫞,遊鱗瀺灂,菡萏敷披,竹木蓊藹,靈果

藻麗之飾,華實照爛,言所不能極也。菜則蔥韭蒜芋,靑筍紫薑,菫薺甘旨,蓼菱芬芳, 表櫻胡之別,二柰耀丹白之色,石榴蒲桃之珍,磊落蔓延乎其側。梅杏郁棣之屬,繁榮 參差。張公大谷之棃,梁侯烏椑之柿,周文弱枝之棗,房陵朱仲之李,靡不畢植。

蘘荷依陰,時藿向陽,綠葵含露,白薤負霜。

以獻觴,咸一懼而一喜。 幾陋身之不保,而奚擬乎明哲,仰衆妙而絕思,終優游以養拙。 垂蔭,車結軌,陸摘紫房,水掛赬鯉,或宴于林,或禊于汜。昆弟斑白,兒童稚齒,稱萬壽 王畿,近周家園。體以行和,藥以勞宜,常膳載加,舊痾有痊。於是席長筵,列孫子,柳 人生安樂,孰知其他。退求已而自省,信用薄而才劣。奉周任之格言,敢陳力而就列。 於是凜秋暑退,熙春寒往,微雨新晴,六合清朗。太夫人乃御版輿,升輕軒,遠覽 壽觴舉,慈顏和,浮杯樂飲,絲竹駢羅,頓足起舞,抗音高歌,

際謂之曰:「安仁,卿亦復爾邪」」岳曰:「可謂白首同所歸。」岳金谷詩云:「投分寄石友,白首 誅之,夷三族。」岳將詣市,與母別曰:「負阿母」」初被收,俱不相知,石崇已送在市,岳後至, 何日忘之。」岳於是自知不免。俄而秀遂誣岳及石崇、歐陽建謀奉淮南王允、齊王冏爲亂, 及趙王倫輔政,秀爲中書令。岳於省內謂秀曰:「孫令猶憶疇昔周旋不。」答曰:「中心藏之, 初,芘爲琅邪內史,孫秀爲小史給岳,而狡黠自喜。岳惡其爲人,數撻辱之,秀常銜忿。

女,無長幼一時被害,唯釋子伯武逃難得免。 同所歸。」乃成其讖。」岳母及兄侍御史釋、弟燕令別、司徒掾據、據弟詵,兄弟之子,己出之 而豹女與其母相抱號呼不可解,會詔原之。

繞,投之以果,遂滿車而歸。時張載甚醜,每行,小兒以瓦石擲之,委頓而反。岳從子尼。 岳美姿儀,辭藻絕麗,尤善爲哀誄之文。 少時常挾彈出洛陽道,婦人遇之者,皆連手縈

文章見知。性靜退不競,唯以勤學著述爲事。著安身論以明所守,其辭曰: 尼字正叔。祖勖,漢東海相。父滿,平原內史。並以學行稱。尼少有清才,與岳俱以

端也、語者、榮辱之主也、求者、利病之幾也、行者、安危之決也。故君子不妄動也、動 然,用能免或繫之凶,享自天之祐。故身不安則殆,言不從則悖,交不審則惑,行不篤 君子安其身而後動,易其心而後語,定其交而後求,篤其志而後行。然則動者,吉凶之 乎。人人自私,家家有欲,衆欲並爭,羣私交伐。爭,則亂之萌也;伐,則怨之府也。怨 不能成其私,有欲者不能濟其欲,理之至也。欲苟不濟,能無爭乎。私苟不從,能無伐 則危。四者行乎中,則憂患接乎外矣。憂患之接,必生於自私,而興於有欲。自私者 必適其道,不徒語也,語必經於理;不苟求也,求必造於義;不虛行也,行必由於正。 夫 蓋崇德莫大乎安身,安身莫尚乎存正,存正莫重乎無私,無私莫深乎寡欲。是以

亂旣構,危害及之,得不懼乎?

騰,曲辯雲沸,寒暑殊聲,朝夕異價,駑蹇希奔放之跡,鈆刀競一割之用。至於愛惡相 騁乎當塗之務。朝有彈冠之朋,野有結綬之友,黨與熾於前,榮名扇其後。握權,則赴 攻,與奪交戰,誹謗噂略,毁譽縱橫,君子務能,小人伐技,風穨於上,俗弊於下。禍結而 者鱗集,失寵,則散者瓦解,求利,則託刎頸之歡,爭路,則構刻骨之隙。於是浮僞波 於私欲而終於爭伐哉! 恨爭也不强,患至而悔伐之未辯,大者傾國喪家,次則覆身滅祀。其故何邪?豈不始 然棄本要末之徒,知進忘退之士,莫不飾才銳智,抽鋒擢穎,傾側乎勢利之交,馳

私全;慎言而不適欲,故言濟而欲從;定交而不求益,故交立而益厚;謹行而不求名,故 競之遘災也,故犯而不校;知好伐之招怨也,故有功而不德。 安身而不爲私,故身正而 行成而名美。 天下猶我,故與天下同其欲,己猶萬物,故與萬物同其利。 君子則不然。知自私之害公也,然後外其身,知有欲之傷德也,故遠絕榮利,知爭 止則立乎無私之域,行則由乎不爭之塗,必將通天下之理,而濟萬物之

窮貴寵之榮而藉名位之重也,不忘退而已。存其治者,非謂嚴刑政之威而明司察之禁 夫能保其安者,非謂崇生生之厚而耽逸豫之樂也,不忘**危而已。有期進者,非謂**

者也。 法制,文辯流離、論議絕世,不得與之爭功。故安也者,安乎道者也。進也者,進乎德 膽,棄形器,貌若無能,志若不及,苟正乎心,非不治也。雖繁計策,廣術藝,審刑名,峻 饗重祿,執權衡,握機秘,功蓋當時,勢侔人主,不得與之比逸。 非不安也。雖坐華殿,載文軒,服黼繡,御方丈,重門而處,成列而行,不得與之齊榮。用 天時,分地利,甘布衣,安藪澤,沾體塗足,耕而後食,苟崇乎德,非不進也。 也,不忘亂而已。故寢蓬室,隱陋巷,披短褐,茹藜藿,環堵而居,易衣而出,苟存乎道, 治也者,治乎心者也。 未有安身而不能保國家,進德而不能處富貴,治心而不 遺意慮,沒才智,忘肝 雖居高位,

上 不能勸者,則害之所不能嬰也,譽之所不能益者,則毀之所不能損 如易勝,而當世莫之能困也。 而人敬焉。 心,曠神遠致,徙倚乎不拔之根,浮遊乎無垠之外,不自貴於物而物宗焉, 而非爭也,舍則藏於下而非讓也。 然思危所以求安,慮退所以能進,懼亂所以保治,戒亡所以獲存也。 可親而不可慢也,可尊而不可遠也。 達則濟其道而不榮也,窮則善其身而不悶也,用則立於 夫榮之所不能動者,則辱之所不能加也, 親之如不足,天下莫之能狎也, 也。 若乃弱志虚 不自重於人 利之所

能治萬物者也。

今之學者誠能釋自私之心,

塞有欲之求,

杜交爭之原,

去矜伐之態,

動則行乎至通

以事親,可以御一體,可以牧萬民,可以處富貴,可以安賤貧,經盛衰而不改,則庶幾乎 名位爲糟粕,勢利爲埃塵,治其內而不飾其外,求諸己而不假諸人,忠肅以奉上,愛敬 外物不能擾其神,哀樂不能盪其守,死生不能易其真,而以造化爲工匠,天地爲陶鈞, 之路,靜則入乎大順之門,泰則翔乎寥廓之宇,否則淪乎渾冥之泉,邪氣不能干其度,

鎮東參軍。 元康初,拜太子舍人,上釋奠頌。 其辭曰: 初應州辟,後以父老,辭位致養。太康中,舉秀才,爲太常博士。 歷高陸令、淮南王允

能

安身矣。

楹之間,陳罍洗於阼階之左。几筵旣布,鍾懸旣列,我后乃躬拜俯之勤,資在三之義。 紳先生之徒,垂纓佩玉,規行矩步者,皆端委而陪於堂下,以待執事之命。 于崇正殿。實應天縱生知之量,微言奧義,發自聖問,業終而體達。三年春閏月,將有 謙光之美彌劭,闕里之教克崇,穆穆焉,邕邕焉, 眞先王之徽典,不刊之美業,允不可替 爲殿,懸幕爲宮。夫子位于西序,顏回侍于北墉。宗伯掌禮,司儀辯位。二學儒官,搢 前,少傅在後,恂恂乎弘保訓之道,宮臣畢從,三率備衞,濟濟乎肅翼贊之敬。乃掃壇 事於上庠,釋奠于先師,禮也。越二十四日丙申,侍祠者旣齊,輿駕次于太學。太傅在 元康元年冬十二月,上以皇太子富於春秋,而人道之始莫先於孝悌,初命講孝經 設樽篚於兩

飲,沐浴芳潤,不知手舞口詠,竊作頌一篇。<a>[三]義近辭陋,不足測盛德之形容, 惠。 簫管之音,八佾六代之舞,鏗鏘闛閣,般辟俛仰,可以澂神滌欲,移風易俗者,罔 幼,不期而俱萃。皆延頸以視,傾耳以聽,希道慕業,洗心革志,想洙泗之風,歌來蘇之 奏。抑淫哇,屏鄭衞,遠佞邪,釋巧辯。是日也,人無愚智,路無遠邇,離鄉越國,扶老攜 內外羣司,百辟卿士,蕃王三事,至于學徒國子,咸來觀禮,我后皆延而與之燕。 皇代之壯觀,萬載之一會也。 之遐度。 然後知居室之善,著應乎千里之外,不言之化,洋溢于九有之內。 於是牲饋之事旣終,享獻之禮已畢,釋玄衣,御春服,弛齋禁,反故式。 天子乃命 其辭曰 尼昔忝禮官,嘗聞俎豆。今廁末列,親覩盛美, 於熙乎若典,固 光聖明 潍漬徽 不畢

化流率土。 以龍飛。宣基 三元迭運,五德代微。 後帝承哉,丕隆曾構。奄有萬方,光宅宇宙。 一誕命,景熙遐緒,三分自文,受終惟武。 黄精旣亢,素靈乃暉。 有皇承天,造我晉畿。 席卷要蠻,蕩定荒阻,道濟羣生, 祚以大寶,登

降 穆穆,侍講 L) 篤 下問。 生上 誾 一嗣,繼期挺秀。 鋪以金聲,光以玉潤。 抽演微言,啓發道眞。 聖敬日躋,濬哲閎茂。 如日之升,如乾之運。 探幽窮賾,溫故知新。 留精儒術,敦閱古訓。[2] 遵道 乃延台保,乃命學臣。 講業旣終,精義旣研。 譲齒

傳

崇 聖 |重師,卜日告奠。 陳其三牢,引其四縣。 旣戒旣式,乃盥乃薦。

謙光,仁以恩懷。我酒惟淸,我肴惟馨。舞以六代,歌以九成。 樂我雲韶。瓊瑤誰剖。四門洞開,雲韶奚樂。神人允諧。蟬冕耀庭,細珮振階。 來洞微。濟濟二宮,藹藹庶僚。俊乂鱗萃,髦士盈朝。如彼和肆,莫匪瓊瑤;如彼儀鳳, 恂恂孔聖,百王攸希。亹亹顏生,好學無違。曰皇儲后,體神合幾。兆吉先見,知

我以道。萬邦蟬蛻,矧乃俊造。鑽蚌瑩珠,剖石摛藻。絲匪玄黃,水罔方圓。引之斯 流,染之斯鮮。若金受範,若埴在甄。上好如雲,下效如川。 莘莘冑子,祁祁學生。 洗心自百,觀國之榮。 學猶蒔苗,化若偃草。 博我以文,弘

晉,永世昌阜。微微下臣,過充近侍。猥躡風雲,鸞龍是廁。身澡芳流,目玩盛事。 穆不已。 誠作頌,祗詠聖志。 昔在周興,王化之始。曰文曰武,時惟世子。今我皇儲,齊聖通理。緝熙重光,於 於穆伊何?思文哲后。媚茲一人,實副元首。孝洽家邦,光照九有。純嘏自 竭

出 爲宛令,在任寬而不縱,恤隱勤政,厲公平而遺人事。入補尚書郎,俄轉著作郎。 爲

乘輿箴,其辭曰:

湯稱「有天地然後有人倫,有父子然後有君臣」。傳曰:「大者天地,其次君臣。」然

將以導羣生之性,而理萬物之情。豈以寵一人之身,極無量之欲,如斯而已哉!夫古 極,雖劫殺而不避。故曰「天下非一人之天下,乃天下之天下」,安可求而得,辭而已 之爲君者,無欲而至公,故有茅茨土階之儉;而後之爲君,有欲而自利,故有瑤臺瓊室 君臣父子之道,天地人倫之本,未有以先之者也。故天生蒸人而樹之君,使司牧之, 無欲者,天下共推之;有欲者,天下共爭之。推之之極,雖禪代猶脫屣;爭之之

其過,而所美,莫美於好聞其過。若有君於此,而曰予必無過,唯其言而莫之違,斯孔子 喻,使言之者無罪,聞之者足以自誡。先儒旣援古義,舉內外之殊,而高祖亦序六官, 閑其邪僻而納諸正道,其自維持如此之備。故箴規之興,將以救過補闕,然猶依違諷 皆仰之。雖以堯、舜、陽、武之盛,必有誹謗之木,敢諫之鼓,盤杅之銘,無諱之史,所以 所謂其庶幾乎一言而喪國者也。蓋君子之過,如日月之蝕:過也,人皆見之,更也,人 酌其得失焉。春秋傳曰「命百官箴王闕」,則亦天子之事也。 論成敗之要,義正辭約,又盡善矣。自虞人箴以至于百官,非唯規其所司,誠欲人主斟 夫修諸己而化諸人,出乎邇而見乎遠者,言行之謂也。 故人主所患,**莫甚**於不知

尼以爲王者膺受命之期,當神器之運,總萬機而撫四海,簡羣才而審所授,孜孜於

列

賢,髣髴崇軌,譬猶丘坻之望譁岱,恒星之繫日月也,其不逮明矣。 哉?是以不量其學陋思淺,因負擔之餘,嘗試撰而述之。「吾不敢斥至尊之號,故以「乘 得人,汲汲於聞過,雖廷爭面折,猶將祈請而求焉。 輿」目篇。蓋帝王之事至大,而古今之變至衆,文繁而義詭,意局而 至於箴規,諫之順者,曷爲獨闕之 頌曰:(3) 辭野,將欲希企前

尙矣。 德用不勤。 | 義|| 農已降,暨于|| 夏| 殷。 或禪或傳,乃質乃文。 元元遂初,芒芒太始。清濁同流,玄黄錯跱。上下弗形,尊卑靡紀。赫胥悠哉,大庭 皇極啓建,兩儀旣分。彝倫永序,萬邦已紛。國事明王,家奉嚴君。 各有攸尊,

焉憑?左輔右弼,前疑後丞。一日萬機,業業兢兢。夫出其言善,則千里是應,而莫余 違,亦喪邦有徵。樞機之動,式以廢興。殷監不遠,若之何勿懲!〔七〕 禮刑實滋。旣譽旣畏,以侮以欺。作誓作盟,而人始叛疑。煌煌四海,藹藹萬乘,匪誓 太上無名,下知有之。仁義不存,而人歸孝慈。 無爲無執,何欲何思。忠信之薄,

世道衰,末俗化淺。耽樂逸游,荒淫沈湎。不式古訓,而好是佞辯,不遵王路,而覆車 何? 周文日昃,昧旦丕顯。夫德輶如毛,而或舉之者鮮。故濩有慚德,武未盡善。下 龍肝豹胎。 且厚味腊毒、豐屋生災。洋作琁室,而夏興瑤臺。糟丘酒池,象箸玉杯。 惟此哲婦、職爲亂階。殷用喪師,夏亦不恢。是以帝堯在位,茅茨不 厥肴伊

之猶傷,而知其寒燠。 是踐。 成敗之效,載在先典。 故能撫之斯柔,而敦之斯睦;無遠不懷,靡思不服。 匪唯陵夷、厥世用殄。故曰樹君如之何。將人是司牧。視 夫豈厭縱一

人,而玩其耳目,內迷聲色,外荒馳逐,不修政事,而終於顚覆?

莫云我聰,或此面從,莫謂我智,聽受未易。甘言美疾,尟不爲累。 夫,

伊起有

| 一声。

負

鼎

鼓

刀

力

而

謀

合

聖

神

。

夫

豊

告

官

左

右

、

而

取

介

近

瓦

。
 土。而紂之百克,卒於絕緒。 姓、社稷無常主。四嶽三塗、九州之阻。彭蠡、洞庭、殷商之旅。虞夏之隆、 柰何人主,位極則侈? 昔唐氏授舜,舜亦命禹。受終納祖,丕承天序。放**桀惟**陽,克殷伊武。故禪代非 故王者無親,唯在擇人。傾蓋惟舊,白首乃新。 由夷逃寵、遠於脫 蓋有國 有家者 非由尺 望由釣

孰]弭斯患?若九德咸受,儁乂在官,君非臣莫治,臣非君莫安。 故書美康哉,而易貴金 知人則哲,惟帝所難。唐朝旣泰,四族作姦。 周室旣隆,而管蔡不虔。 匪我二聖,

蘭。

有皇司國,敢告納言。

侍、侍中、秘書監。永興末,爲中書令。時三王戰爭,皇家多故,尼職居顯要,從容而已。 起義,乃赴許昌。冏引爲參軍,與謀時務,兼管書記。 及趙王倫篡位,孫秀專政,忠良之士皆罹禍酷。 事平,封安昌公。歷黃門侍郎、散騎常 尼遂疾篤,取假拜掃墳墓。聞齊王冏 雕

列

憂虞不及,而備嘗艱難。 永嘉中,遷太常卿。 洛陽將沒,攜家屬東出成鼻,欲還鄉里。 道遇

賊,不得前,病卒於塢壁,年六十餘。

張載 弟協 協弟亢

張載字孟陽, 安平人也。父收,蜀郡太守。 載性閑雅,博學有文章。 太康初, 至蜀省

父,道經劍閣。|載以蜀人恃險好亂,因著銘以作誡曰:

巖巖梁山,積石峨峨。 遠屬荆衡,近綴岷嶓。 南通邛僰,北達褒斜。 狹過彭碣,高

踰嵩華。

惟蜀之門,作固作鎭。 是日劍閣,壁立千仞。 窮地之險,極路之峻。 世濁則逆,道

清斯順。閉由往漢,開自有晉。

秦得百二,幷吞諸侯。齊得十二,田生獻籌。 矧茲狹隘,土之外區。 人荷戟,萬

夫趦趄。形勝之地,非親勿居。

昔在|武侯,中流而喜。河山之固,見屈吳起。 洞庭孟門,二國 不祀。 興實由德,險

軌,無或重跡。 勒銘山阿,敢告梁/益。 亦難恃。自古及今,天命不易。 憑阻作昏,尟不敗績。 公孫旣沒,劉氏衛璧。 覆車之

載又爲權論曰:

退,頑 烏獲 在荆山 說,則 者哉 **猶** |朱與瞽者同眼之說也。處守平之世,而欲建殊常之勳,居太平之際,而吐違俗之謀,此 設使秦莽修三王之法,時致隆平,則漢祖,泗上之健吏,光武,春陵之俠客耳,況乎附麗 若兹之類,不可勝紀。蓋聲發響應,形動影從,時平則才伏,世亂則奇用,豈不信 何以 放其撮東郭於韝下也?白猨玄豹,藏於欞檻,何以知其接垂條於千仞也?孱夫與 步 ?!故當其有事也,則足非千里,不入於輿,刃非斬鴻,不韜於鞘。 是以駑蹇望風而 無鳴條之事,則伊尹,有莘之匹夫也,周武無牧野之陣,則呂牙,渭濱之釣 夫賢人君子將立天下之功,成天下之名, 非遇其時, 曷由致之哉! 故嘗 試 論 之: · 鈍未試而廢。及其無事也,則牛驥共牢,利鈍齊列,而無長塗犀革以決之,此離 頑慧均也。 而 ,隨珠之潛重川,非遇其人,焉有連城之價,照車之名乎!青骹繁霜,繫於籠中, 登山,鬻章甫於越也。漢文帝見李廣而歎曰:「惜子不遇,當高帝時,萬戶侯 了」故智無所運其籌,勇無所奮其氣,則勇怯一也;才無所騁其能,辯無所展其 是以吳榜越船,不能無水而浮,青虯赤螭,不能無雲而飛。故和璧之 歟 也。

列傳

第

二 十

五.

張載

稱,曾不足以多說。

伊管之略,沒世而不齒者,此言有事之世易爲功,無爲之時難爲名也。 餓夫庸隸,[亞抱關屠釣之倫,一旦而都卿相之位,建金石之號者,或有懷顏]孟之術,抱 若斯湮滅而不

猴而 傑,卓躒俶儻之徒,直將伏死嶔岑之下,安能與步驟共爭道里乎!至如軒冕黻班之士, 豈不哀哉!今士循常習故,規行矩步,積階級,累閥閱,碌碌然以取世資。 若夫魁梧儁 黨、聚虛譽以驅俗。進之無補於時,退之無損於化。而世主相與雷同齊口,吹而煦之, 苟不能匡化輔政,佐時益世,而徒俯仰取容,要榮求利,厚自封之資,豐私家之積,此沐 冠耳,尙焉足道哉 況夫庸庸之徒,少有不得意者,則自以爲枉伏。 莫不飾小辯、立小善以偶時,結朋

家佐著作郎,出補肥鄉令。復爲著作郎,轉太子中舍人,遷樂安相、弘農太守。長沙王义請 爲記室督。 載又爲濛汜賦,司隸校尉傅玄見而嗟歎,以車迎之,言談盡日,爲之延譽,遂知名。起 拜中書侍郎,復領著作。」載見世方亂,無復進仕意,遂稱疾篤告歸,卒於家。

郎,遷中書侍郎。轉河間內史,在郡淸簡寡欲。 協字景陽,少有儁才,與載齊名。辟公府掾,轉祕書郎,補華陰令、征北大將軍從事中

于時天下已亂,所在寇盜,協遂棄絕人事,屏居草澤,守道不競,以屬詠自娛。 擬諸文

工作:北命。其辭曰:

流霜 濘, 不卷道 臨重 居,傾 世陸沈,避地獨竄,有生之歡滅,資父之義廢。 之遐阻,吞響乎幽山之窮奧。於是徇華大夫聞而造焉。乃整雲輅,駿飛黃,越奔沙,輾 不遺,來萃荒外,雖在不 日,飛礫起而灑天。於是登絕巘,遡長風,陳辨惑之辭,命公子於巖中。曰:「蓋聞聖人 溟海渾濩涌其後,懈谷峫嶆張其前,尋竹竦莖蔭其壑,百籟羣鳴籠其山,衝飇發而回 短羽之栖翳薈! 曲 **,陵扶搖之風,躡堅冰之津,旌拂霄崿,軌出蒼垠,天淸冷而無霞,野曠朗而無塵,** 沖漠公子,含華隱曜,嘉遯龍蟠,超世高蹈,遊心於浩然,玩志乎衆妙,絕景乎大荒 四海之歡,殫 而背時,智士不遺身而匿跡,生必耀華名於玉牒,沒則勒鴻伐於金册。今公子違 而攬轡,顧石室而迴輪。遂適沖漠公子之所居。其居也,崢嶸幽藹,蕭瑟虛玄, 九州之腴,鑽屈穀之瓠。江四解疏屬之拘,子欲之乎。」公子曰:「大夫 今將榮子以天人之大寶, 悅子以縱性之至娛, 窮地而遊, 中天而 敏,敬聽嘉話。」 愁洽百年,苦溢千載,何異促鱗之遊汀

岸崥婦,右當 ·夫曰:「寒山之桐,出自太冥,含黃鐘以吐幹,據蒼岑而孤生。 1風谷。 左臨雲谿,上無陵虛之巢,下無跖實之蹊,搖別峻挺,茗邈嶕嶢,晞 旣乃瓊巘層崚,金

纓而 彫。 未能也。」 宕百罹之儔,撫促柱則酸鼻,揮危弦則涕流。若乃追淸哇,赴嚴節,奏綠水,吐白雲,激 宮,發蓐收之變商。若乃龍火西頹,暄氣初收,飛霜迎節,高風送秋,羈旅懷土之徒,流 一春之溢露,遡九秋之鳴飇,零雪寫其根,<</p>
「□霏霜封其條,木旣繁而後綠,草未素而先 楚迴,流風結,悲蓂莢之朝落,悼望舒之夕缺。 榮嫠爲之擗摽,孀老爲之嗚咽,王子拂 舉樂奏,促調高張,音朗號鐘,韵淸繞梁。追逸響於八風,採奇律於歸昌,啓中黃之妙 於是構雲梯,陟崢嶸,翦蕤賓之陽柯,剖大呂之陰莖。營匠斲其樸,伶倫均其聲。器 傾耳,六馬噓天而仰秣。此蓋音曲之至妙,子豈能從我而聽之乎。」公子曰:「余病

恣觀。 於林麓。 朗。 錯以瑤英,鏤以金華,方疏含秀,圓井吐葩。 常之闕,圜以萬雉之墉。 陛陵山,望玉繩而結極,承倒景而開軒。 焦冥飛而風生,尺蠖動而成響。 大夫曰:「蘭宮秘宇,雕堂綺櫳,雲屏爛旰,瓊壁青蔥,應門八襲,琁臺九重,表以百 仰折神廟,俯採朝蘭,愬惠風於蘅薄,眷椒塗於瑤壇。爾乃浮三翼,戲中沚,潛 登翠阜,臨丹谷,華草錦繁,飛采星燭,陽葉春青,陰條秋綠,華實代新,承意 爾乃嶢榭迎風,秀出中天,翠觀岑青,彤閣霞連,長翼臨雲,飛 若乃目厭常玩,體倦帷幄,攜公子而 賴素煥爛,粉栱嵯峨。陰虯負檐,陽馬承阿。 重殿疊起,交綺對榥。 幽堂晝密, 雙遊,時娛觀 明室夜

爲水嬉,臨芳洲兮拔靈芝。』樂以忘戚,遊以卒時,窮夜爲日,畢歲爲期。 風 鰓駭,驚翰起,沈絲結、飛熘理,掛歸翮於赤霄之表, 出華鱗於紫潭之裏。 然後縱櫂隨 。明楫乘波,吹孤竹,撫雲和,川客唱淮南之曲, 榜人奏採菱之歌。 歌曰:『乘鷁舟兮 此蓋宴居之浩

,子豈能從我而處之乎。」公子曰:「余病未能也。」

芳煙。 伎。 論 山,僵踣掩澤,藪爲毛林,隰爲丹薄。 巒,畫長壑以爲限,帶流谿以爲關。旣乃內無疏蹊,外無漏跡,叩鉦散校,舉麾贊獲,彀 驂唐公之驌驦,屯羽隊於外林,縱輕翼於中荒。 爾乃張脩罠,布飛羅,曰三陵黃岑,挂青 風 形移影發, 金機、馳 因 最 .氣以效殺,臨金郊而講師。爾乃列輕武,整戎剛,建雲髦,啓雄芒。駕紅陽之飛燕, 生,怒目電蹤,口齩霜刃,足撥飛鋒,顯林蹶石,扣跋幽叢。 搞勤,息馬韜弦,肴駟連臕,酒駕方軒,千鍾電釂,萬燧星繁,陵阜沾流膏,谿谷厭 **瞰封狶,攢馮豕,拉甝虪,挫解豼,鉤爪摧,踞牙擺。** 大夫曰:「若乃白商素節,月旣授衣,天凝地閉,風厲霜飛,柔條夕勁,密葉晨稀,將 歡 鳴鏑,翦剛豪,落勁翮,連騎競騖,駢武齊轍,翕忽揮霍,雲迴風烈,聲動響飛, 極 舉戈林聳,揮鋒電滅,仰傾雲巢,俯殫地穴。乃有圓文之新,斑題之豵,鼓鬣 樂殫,迴節而旋。 此亦畋遊之壯觀,子豈能從我而爲之乎。」公子曰:「余病 於是徹圍頓網、卷旆收鳶,虞人數獸,林衡計鮮, 瀾漫狼藉,傾榛倒壑,隕胔挂 於是飛黃奮銳,實育逞

列

未能也。」

麾晉則千里流血。[11] 豈徒水截蛟鴻,陸灑奔駟,斷浮翮以爲工,絕重甲而稱利云爾而 公子曰:「余病未能也。」 或馳名傾秦,或夜飛去吳。是以功冠萬載,威曜無窮,揮之者無前,擁之者身雄,可以 已哉!若其靈寶、則舒辟無方、奇鋒異模、形震薛燭、光駭風胡、價兼三鄉、聲貴二都、 發,光如散電,質如耀雪,霜鍔水凝,冰刃露潔,形冠豪曹,名珍巨闕,指鄭則三軍白首, 乃鑠,萬辟千灌。 九國,橫制八戎,爪牙景附,函夏承風。此蓋希世之神兵,子豈能從我而服之乎。」 大夫曰:「楚之陽劍,歐冶所營,邪谿之鋌,赤山之精,銷踰羊頭,鍱越鍛成。 豐隆奮椎,飛廉扇炭,神器化成,陽文陰漫。旣乃流綺星連,浮采艷 乃鍊

越 整秋 我而御之乎。」公子曰:「余病未能也。」 所不遊,躡章亥之所未跡,陽烏爲之頓羽,夸父爲之投策。斯蓋天下之儁乘,子豈能從 紅,汗如振血,秦青不能識其衆尺,方堙不能覩其若滅。爾乃巾雲軒,踐朝霧,赴春衢, 四 御,虯踊螭騰,麟超龍翥,望山載奔,視林載赴。氣盛怒發,星飛電駭,志陵九州,勢 大夫曰:「天驥之駿,逸態超越,稟氣靈川,受精皎月,眸瞷黑照,玄采紺發,沫如揮 影不及形,塵不暇起,浮箭未移,再踐千里。爾乃踰天根,越地隔,過汗漫之

黃之鮯,丹穴之鷚,玄豹之胎,燀以秋橙,酤以春梅,接以商王之箸,承以帝辛之杯。范 蟣星沸,飛華萍接,玄石嘗其味,儀氏進其法,傾罍一朝,可以流湎千日,單醪投川,可 公之鳞,出自九谿,赬尾丹腮,紫翼青鬐。爾乃命支離,飛霜鍔,紅肌綺散,素膚雪落, 黃雀,圓案星亂,方丈華錯。封熊之蹯,翰晉之跖,燕髀猩脣,髦殘象白,靈川之龜,萊 使三軍告捷。斯人神之所歆羨,觀聽之所煒曄也,子豈能强起而御之乎。」公子曰:「耽 之楱,析龍眼之房,剖椰子之殼。芳旨萬選,承意代奏。乃有開南烏程、豫北竹葉,浮 樓子之豪不能廁其細,秋蟬之翼不足擬其薄。繁肴旣闋,亦有嘉羞。 爽口之饌,甘腊毒之味,服腐腸之藥,御亡國之器,雖子大夫之所榮,顧亦吾人之所畏, 商山之果,漢皐

之時。王猷四塞,函夏謐靜,丹冥投鋒,青徼釋警,卻馬於糞車之轅,銘德於昆吾之鼎。 以豐其澤。皇道昭煥,帝載緝熙。導氣以樂,宣德以詩,敎淸乎雲官之世,政穆乎鳥紀 也,隆於姬公之處岐,其垂仁也,富乎有殷之在亳。南箕之風不能暢其化,離畢之雲無 大夫曰:「蓋有晉之融皇風也,金華啓徵,大人有作,繼明代照,配天光宅。 其基德

余病未能也。」

之沼。 不擾。 痊。 之貊,語不傳於輶軒,地未被乎正朔,莫不駿奔稽顙,委質重譯。于時昆蚑感惠,無思 時雍,巍巍蕩蕩,玄髫巷歌,黃髮擊壤,解羲皇之繩,錯陶唐之象。 封之人,上有大哉之君,余雖不敏,請從後塵。」 吾人之所欲,故靡得而應子。至聞皇風載韙,時聖道醇,舉實爲秋,摛藻爲春,下有可 然而興曰:「鄙夫固陋,守茲狂狷。蓋理有毀之,而爭實之訟解,言有怒之,而齊王之疾 工,兆發乎靈蔡,搢紳濟濟,軒冕藹藹,功與造化爭流,德與二儀比大。」言未終,公子蹶 ·荫反素,時文載郁,耕父推畔,漁豎讓陸,樵夫恥危冠之飾,輿臺笑短後之服。 向子誘我以聾耳之樂,栖我以蔀家之屋,田遊馳蕩,利刃駿足,旣老氏之攸戒,非 萬物烟熅,天地交泰,義懷靡內,化威無外,林無被褐,山無韋帶。皆象刻於百 苑戲九尾之禽, 囿棲三足之鳥, 鳴鳳在林, 夥於黃帝之園, 有龍游川, 盈於孔甲 若乃華裔之夷,流荒 六合

世以爲工。

永嘉初,復徵爲黃門侍郎,託疾不就,終於家。

「三張」。中興初過江,拜散騎侍郎。祕書監荀崧舉亢領佐著作郎,出補鳥程令,入爲散騎常 | **亢字季陽。才藻不逮二昆,亦有屬綴,又解音樂伎術。 時人謂載協亢、陸機雲曰「二陸」**

居正,安其身而後動,契其心而後言,著論究人道之綱,裁箴懸乘輿之鑒,可謂玉質而金相 倚門之訓,乾沒不逞之間,斯才也而有斯行也,天之所賦,何其駁歟!正叔含咀藝文,履危 藻如江,濯美錦而增絢。混三家以通校,爲二賢之亞匹矣。 士衡。 賈論政範,源王化之幽賾,潘著哀詞,貫人靈之情性。 機文喻海,韞蓬山而育蕪, 孝悌,旨深致遠,殊有大雅之風烈焉。安仁思緒雲騫,詞鋒景煥,前史儔於賈誼,先達方之 景陽摛光王府,棣萼相輝。洎乎二陸入洛,三張減價。 史臣曰:孝若掞蔚春華,時標麗藻。覩其抵疑詮理,本窮通於自天,作誥敷文,流英聲於 孟陽鏤石之文,見奇於張敏,濛汜之詠,取重於傅玄,爲名流之所挹,亦當代之文宗 然其挾彈盈果,拜塵趨貴,蔑棄 考覈遺文,非徒語也。 田

終亦罹殃。尼標雅性,夙聞詞令。 贊日 才高位卑,往哲攸歎。 載協飛芳、棣華增映。 **岳實含章,藻思抑揚。** 趨權冒勢,

校勘記

咨爾弟 列 傅 二 十 各本作「咨爾昆弟」,多一「昆」字,今從宋本。下文所敍六人,皆其弟。 五 校 册府八一六亦

勘 記

無「昆」字。

正月丁未 藉田。」且是月己巳朔,有丁亥,無丁未。則「丁未」實「丁亥」之誤。李善文選注亦云「丁未誤」。 孫志祖文選考異:據月令疏,耕用亥日,明此「丁未」誤。 按:武紀云,「丁亥,帝耕于

[]] 竊作頌一篇 「竊」,各本作「切」,今從殿本。

敦閱古訓 料注:初學記一四「敦閱」作「敦悅」。案:孔融上書薦謝該:「清白異行,敦悅道訓。」

[五] 嘗試撰而述之 「嘗」,各本作「當」,今從殿本。

「六」頌曰 周枚:當作「箴曰」。

[4].若之何勿懲 「懲」,各本作「徴」,今從殿本。

蓋聶政與荆卿爭勇 蓋聶與荆軻爭勇,事見史記刺客列傳了政」字衍文。

[4] 故餓夫庸隸 周校:「故」下脫「有」字。

屈穀 局本原校:「穀」一作「轂」。案:"屈轂,本於韓非子外儲說左上,亦作「轂」。文選、後漢書

孔融傳及注亦均作「轂」。

零雪寫其根 「零」,各本作「雰」,今從宋本。,文選、類聚五七、通志一二四上均作「零」。

[三] 布飛羅 周校:文選作「飛羉」,於韻較協。

麾晉則千里流血 「麾」,各本作「摩」,今從宋本。 此用越絕書。 文選及類聚五七、御覽三四四

晉書卷五十六

列傳第二十六

江統 子彪 惇

|統靜默有遠志,時人爲之語曰:「嶷然稀言江應元。」與鄕人|蔡克俱知名。 江統字應元,陳留圉人也。 祖處,以義行稱,爲譙郡太守,封亢父男。父祚,南安太守。 襲父爵,除山陰

令。

時關隴屢爲氐羌所擾,孟觀西討,自擒氐帥齊萬年。 統深惟四夷亂華,宜杜其萌,乃作

徙戎論。其辭曰:

之地,與中國 其言語不通,贄幣不同,法俗詭異,種類乖殊;或居絕域之外,山河之表,崎嶇川谷阻險 夫夷蠻戎狄,謂之四夷,[l] 九服之制,地在要荒。 壤斷 土隔,不相侵涉,賦役不及,正朔不加,故曰「天子有道,守在四夷」。 春秋之義,內諸夏而外夷狄。以

列

傳

第二十

六

江統

效也。 其弱 暴,三 則侵 之君牧夷狄也,惟以待之有備, 以殷之高宗而憊於鬼方,有周文王而患昆夷、獫狁,高祖 禹 平 也,周公來九譯之貢,中宗納單于之朝,以元成之微,而 叛。 九土,而西戎卽敍。 而兵甲不加遠征,期令境內獲安,疆場不侵而 故匈奴求守邊塞,而侯應陳其不可,單于屈膝未央,望之議以不 雖有賢聖之世,大德之君,咸未能以通化率導,而以 其性氣貪婪,凶悍不仁,四夷之中,戎狄爲甚。 禦之有常, 雖稽類執贄,而邊城不 已。 困於白登,孝文軍 **猶四夷賓服。** 恩德柔懷也。 ·弛固守; 臣。 弱則 此其已然之 於霸上。 當其 是以 爲寇賊强 畏服,强 强 有道 也, 及

走匈 燕路。 當春秋時,義渠、大荔居秦晉之域,陸渾、陰戎處伊洛之間,鄋瞞之屬害及濟東,侵入齊 陸渾,趙武胡服,開楡中之地,秦雄咸陽,滅義渠之等。 **|宋,陵虐||邢衞,南夷與北狄交侵,中國不絕若綫。** 間,得入中國。 奴五 及至周室失統、諸侯專征、以大無小、轉相殘滅、封疆 故仲尼稱管仲之力,嘉左衽之功。〔三〕逮至春秋之末,戰國方盛,楚吞蠻氏,晉翦 嶺 長城,戎卒億計。 或招誘安撫,以爲已用。 雖師役煩殷,寇賊橫暴,然一世之功,戎虜奔卻,當時 故申繒之禍,顛覆宗周 齊桓攘之,存亡繼絕,北伐 始皇之幷天下也,南兼百 不固, ,襄公要秦,遽興姜戎 而利害異 ij 山戎,以開 戎狄乘 越,

中國

無復四夷也。

敗,赤眉因之,西都荒毀,百姓流亡。 關中,居馮翊、河東空地,而與華人雜處。數歲之後,族類蕃息,旣恃其肥强,且苦漢人 **漢興而都長安,關中之郡號日三輔,禹貢雍州,宗周豐、鎬之舊也。及至王莽之** 建武中,以馬援領隴西太守,討叛羌,徙其餘種於

將五營士於孟津距羌,十年之中,夷夏俱斃,四任尚、馬賢僅乃克之。此所以爲害深 動,二州之戎,一時俱發,覆沒將守,屠破城邑。剛騰之征,棄甲委兵,輿尸喪師,前後 **侵之。永初之元,騎都尉王弘使西域,發調羌氐,以爲行衞。於是羣羌奔駭,互相扇** 宜之計,一時之勢,非所以爲萬世之利也。今者當之,已受其鄭矣。 唐、千萬等,後因拔棄漢中,遂徙武都之種於秦川,欲以弱寇强國, 扞禦蜀虜。 此蓋權 滅。魏興之初,與蜀分隔,疆場之戎,一彼一此。魏武皇帝令將軍夏侯妙才討叛氐阿 段頻臨衝,自西徂東。雍州之戎,常爲國患,中世之寇,惟此爲大。漢末之亂,關中殘 瘡大遲愈之故哉!自此之後,餘燼不盡,小有際會,輒復侵叛。馬賢忸忲,終于覆敗, 重、累年不定者、雖由禦者之無方、將非其才、亦豈不以寇發心腹,害起肘腋,疢篤難療, 相繼,諸戎遂熾,至於南入蜀漢,東掠趙魏,唐突軹關,侵及河內。及遣北軍中候朱龍

之饒,畝號 夫關中土沃物豐,厥田上上,加以<u>涇</u>渭之流漑其舄鹵,鄭國、白渠灌浸相通,黍稷 鍾,百姓謠詠其殷實,帝王之都每以爲居,未聞戎狄宜在此土也。 非我族

列傳

處,戎夏區別,要塞易守之故,得成其功也哉 夏之心,風塵之警,則絕遠中國,隔閡山河,雖爲寇暴,所害不廣。 隴右,著陰平、武都之界。 廩其道路之糧,令足自致,各附本種, 反其舊土, 使屬國、撫 擾,暴害不測。此必然之勢,已驗之事也。當今之宜,宜及兵威方盛,衆事未罷,徙馮 其怨恨之氣毒於骨髓。至於蕃育衆盛,則坐生其心。以貪悍之性,挾憤怒之情,候隙 類 數萬之衆制羣羌之命,有征無戰,全軍獨克,雖有謀謨深計,廟勝遠圖,豈不以華夷異 夷就安集之。戎晉不雜,並得其所,上合往古卽敍之義,下爲盛世永久之規。 娜、北地、新平、安定界內諸羌,著<u></u>先零、罕开、析支之地,徙扶風、始平、京兆之氐,出還 乘便,輒爲横逆。而居封域之內,無障塞之隔,掩不備之人,收散野之積,故能爲禍滋 一其心必異,我狄志態,不與華同。而因其衰弊,遷之畿服,士庶翫習,侮其輕弱,使 是以充國、子明能 縦有猾 以

疲悴之衆,徙自猜之寇,以無穀之人,遷乏食之虜,恐勢盡力屈,緒業不卒,羌戎離散, 望寧息之有期,若枯旱之思 心不可一,前害未及弭,而後變復橫出矣。 **癘之災,札瘥夭昏。** 難者曰:方今鷳中之禍,暴兵二載,征戍之勞,老師十萬,水旱之害,荐饑累荒,疫 凶逆旣戮,悔惡初附,且款且畏,咸懷危懼,百姓愁苦,異人同 雨露,誠宜鎭之以安豫。 而子方欲作役起徒,興功造事,使

資,悔惡反善,懷我德惠而來柔附乎。將勢窮道盡,智力俱困,懼我兵誅以至於此乎? 也。 也。 若憚暫舉之小勞,而忘永逸之弘策,惜日月之煩苦,而遺累世之寇敵,非所謂能開物成 爲濟行者以廩糧,遺居者以積倉,寬關中之逼,去盜賊之原,除旦夕之損,建終年之益。 須 之動而得覆車之軌,何哉。且關中之人百餘萬口,率其少多,戎狄居半,處之與遷,必 轉禍爲福,因敗爲功,值困必濟,遇否能通。今子遭弊事之終而不圖更制之始,愛易轍 者不易事,安其居者無遷志。方其自疑危懼,畏怖促遽,故可制以兵威,使之左右無違 異類瓦解,同種土崩,老幼繫虜,丁壯降散,禽離獸迸,不能相一。子以此等爲尙挾餘 爲侵掠之害也。 日,無有餘力,勢窮道盡故也。然則我能制其短長之命,而令其進退由己矣。夫樂其業 口實。 夫聖賢之謀事也,爲之於未有,理之於未亂,道不著而平,德不顯而成。其次則能 迨其死亡散流,離逷未鳩,與關中之人,戶皆爲讎,故可遐遷遠處,令其心不懷土 答曰:羌戎狡猾,擅相號署,攻城野戰,傷害牧守,連兵聚衆,載離寒暑矣。而今 若有窮乏糝粒不繼者,故當傾關中之穀以全其生生之計,必無擠於溝壑而不 今我遷之,傳食而至,附其種族,自使相贍,而秦地之人得其半穀,此

|
針
州 之胡 ,本實匈奴桀惡之寇也。 漢宣之世,凍餒殘破,國內五裂,後合爲二,呼 **,創業垂統,崇基拓跡,謀及子孫者也。**

子孫孳息,今以千計,數世之後,必至殷熾。今百姓失職,猶或亡叛,犬馬肥充,則有噬 本居遼東塞外,正始中,幽州刺史毌丘儉伐其叛者,徙其餘種。始徙之時,戶落百數, 虜。 審,況於夷狄,能不爲變!但顧其微弱,勢力不陳耳。 性驍勇,弓馬便利,倍於压羌。 若有不虞風塵之慮,則幷州之域可爲寒心。 滎陽句驪 調其兵,部衆不從,而殺羌渠。 塞,居於漠南,數世之後,亦輒叛戾,故何熙、梁慬戎車屢征。 韓邪遂衰弱孤危,不能自存,依阻塞下,委質柔服。 而作,鹵掠趙魏,寇至河南。 近者郝散之變,發於穀遠。今五部之衆,戶至數萬,人口之盛,過於西戎。然其天 咸熙之際,以一部太强,分爲三率。 泰始之初,又增爲四。 於是劉猛內叛,連結外 建安中,又使右賢王去卑誘質呼廚泉,聽其部落散居六 由是於彌扶羅求助於漢,以討其賊。仍值世喪亂,遂乘 建武中,南單于復來降附,遂令入 。中平中,以黃巾賊起,發

夏纖介之憂。惠此中國,以綏四方,德施永世,於計爲長。 須夷虜在內,然後取足哉!此等皆可申諭發遣,還其本域,慰彼羇旅懷土之思,釋我華 夫爲邦者,患不在貧而在不均,憂不在寡而在不安。以四海之廣,士庶之富,豈

"不能用。未及十年,而夷狄亂華,時服其深識。

遷中郎。 選司以統叔父屠爲宜春令,統因上疏曰:「故事,父祖與官職同名,皆得改選,

也。 名與官職同者,宜與觸父祖名爲此,體例旣全,於義爲弘。」朝廷從之。 違 上嚴君父,下爲臣子,體例不通。若易私名以避官職,則違春秋不奪人親之義。 士人殷富,至使有受寵皇朝,出身宰牧,而令佐吏不得表其官稱,子孫不得言其位號,所以 而 經禮諱尊之義,若詭辭避迴,則爲廢官擅犯憲制。今以四海之廣,職位之衆,名號繁多, 一未有身與官職同名,不在改選之例。臣以爲父祖改選者,蓋爲臣子開地,不爲父祖之身 而身名所加,亦施於臣子。佐夷係屬,朝夕從事,官位之號,發言所稱,若指實而語,則 臣以爲身

轉 太子洗馬。 在東宮累年,甚被親禮。 太子頗闕朝覲,又奢費過度,多諸禁忌,統上書

諫曰:

左,惟蒙一省再省,少垂察納 失行,言無口過,德音發聞,揚名後世。 臣 聞古之爲臣者,進思盡忠,退思補過,獻可替否,拾遺補闕。是以人主得以舉無 臣等不逮,無能云補,思竭愚誠,謹陳五事

如

苦 右就 頃 聖 體 屢 有 疾 患 , 數 闕 朝 侍 , 可堪 養 其一日,六行之義,以孝爲首,虞舜之德,以孝爲稱,故太子以朝 無方。 扶)興,則 文王之爲世子,可謂篤於事親 宜自力。 湯曰:「君子終日乾乾。」蓋自勉强不息之謂 遠近觀聽者不能深 者也, 知 故能 其故,以致疑惑。 擅三代之美, 夕視君膳 伏願殿下雖有微 爲百王之宗。 也 爲職,左 自

列 傳 第 + 六 江 統

美煥然光明。 令,宣揚德音,諮詢保傅,訪逮侍臣,覲見賓客,得令接盡,壅否之情沛然交泰,殿下之 備,登崇大業,刑措不用,流聲洋溢。伏惟殿下天授逸才,聰鑒特達,臣謂猶宜時發聖 五 臣 一興,周文以四友隆。及成王之爲太子也,則周召爲保傅,史佚昭文章,故能聞道早 、二日,古之人君雖有聰明之姿,叡喆之質,必須輔弼之助,相導之功,故虞舜以 如此,則高朗之風,扇於前人,弘範令軌,永爲後式。

世不朽、蓋儉之福也。 原憲以蓬戶繩樞,邁其淸德。 相齊,鹿裘不補,亦能匡君濟俗,興國隆家。庶人修之者,顏回以簞食瓢飲,揚其仁聲, 節用,聲列雅頌,紛冒以篳路藍縷,用張楚國。 梯,足履革舄,以身先物,政致太平,存爲明王,沒見宗祀。 及諸侯修之者,魯僖以躬儉 足爲侈也。然上之所好,下必從之,是故居上者必愼其所好也。 金銀,刻磨犀象,畫室之巧,課試日精。 庶人有擊鍾鼎食。 珍則熊蹯豹胎,酒池肉林。 其三日,古之聖王莫不以儉爲德,故堯稱采椽茅茨,禹稱卑宮惡服,漢文身衣弋 亦罔不亡國喪宗,破家失身,醜名彰聞,以爲後戒。 及到末世,以奢失之者,帝王則有瑤臺瓊室,玉杯象箸,肴膳之 諸侯爲之者,至於丹楹刻桷,餼徵百牢。 此皆聖主明君賢臣智士之所履行也。 臣等以爲今四海之廣,萬物之富,以今方古,不 大夫修之者,文子相魯,妾不衣帛,晏嬰 昔漢光武皇帝時,有 故能懸名日月,永 大夫有瓊弁玉纓, 竊聞 後園鏤飾

焚之都街。高世之主,不尙尤物,故能正天下之俗,刑四方之風。臣等以爲畫室之功, 獻千里馬及寶劍者,馬以駕鼓車,劍以賜騎士。世祖武皇帝有上雉頭裘者,卽詔有司 可且減省,後園雜作,一皆罷遣,肅然淸靜,優游道德,則日新之美光于四海矣。

以古道,誠可愧也。今西園賣葵菜、藍子、鷄、麪之屬,虧敗國體,貶損令問。 以來,風俗轉薄,公侯之尊,莫不殖園圃之田,而收市井之利,漸冉相放,莫以爲恥,乘 妾織蒲,又譏其不仁,公儀子相魯,則拔其園葵,言食祿者不與貧賤之人爭利也。 秦漢 救旦夕之命,故爲庶人之貧賤者也。樊遲匹夫,請學爲圃,仲尼不答,魯大夫臧文仲使 **『周禮三市,旦則百族,畫則商賈,夕則販夫販婦。 買賤賣貴,販鬻菜果,收十百之盈,以** 資祿,莫有不贍者也。 是以士農工商四業不雜。 交易而退,以通有無者,庶人之業也。 其四曰,以天下而供一人,以百里而供諸侯,故王侯食籍而衣稅,公卿大夫受爵而

小忌而廢弘廓大道,宜可蠲除,於事爲宜。 其 、五日,竊見禁土,令不得繕修牆壁,動正屋瓦。 臣以爲此旣違典彝舊義,且以拘

朝廷善之。

流漣。 及 太子廢,徙許昌,賈后諷有司不聽宮臣追送。 都官從事悉收統等付河南、洛陽獄。 付郡者,河南尹樂廣悉散遣之,繫洛陽者猶未 統與宮臣冒禁至伊水,拜辭道左,悲泣

列

統作誄敍哀,爲世所重。

都官從事孫琰說賈謐曰:「所以廢徙太子,以爲惡故耳。 東宮故臣冒罪拜辭,涕泣路

侍,領國子博士。 平郗鑒爲賢良,陳留阮脩爲直言,濟北程收爲方正,時以爲知人。 正,每州郡疑獄,斷處從輕。 「昔王子師爲豫州,未下車,辟荀慈明,下車,辟孔文舉。 貴州人士有堪應此者不。」統舉高 母憂去職。 後爲博士、尙書郞,參大司馬、齊王冏軍事。 服闋,爲司徒左長史。 永嘉四年,避難奔于成阜,病卒。 成都王顯請爲記室,多所箴諫。申論陸雲兄弟,辭甚切至。以 東海王越爲兗州牧,以統爲別駕,委以州事,與統書曰: 凡所造賦頌表奏皆傳於後。二子"嚴、 **葬遷黃門侍郎、散騎常** 遷廷尉

山命。 侍中、吏部尚書。永和中,代恒景爲護軍將軍。出補會稽內史,加右軍將軍。代王彪之爲 參軍,俄而復補長史。翼薨,大將下瓚作難,至影影計平之。除尚書吏部郎,仍遷御史中丞、 鑒又請爲司馬,轉黃門郎。車騎將軍庾冰鎭江州,請爲長史。 復爲州別駕,辟司空都鑒掾,除長 冰薨,庾翼以爲諮議

尙書僕射。 田,虨並以 爲禮廢日久,儀注不存,中興以來所不行,謂宜停之。 哀帝卽位,疑周貴人名號所宜,虨議見禮志。帝欲於殿庭立鴻祀,又欲躬自藉 爲僕射積年,簡文帝爲相,

毎訪政事、厳 子敳,歷琅邪內史、驃騎諮議。 **敞子恒,元熙中爲西中郎長史。** 恒弟夷,尚書。

轉護軍將軍,領國子祭酒,卒官。

多所補益。

棄也。 欽重。 雖隱顯殊途,未有不傍禮教者也。 里宗其道,有事必諮而後行。 太尉掾,康帝爲司徒,亦辟焉,征西將軍庾亮請爲儒林參軍,徵拜博士、著作郎,皆不就。邑 惇字思悛,孝友淳粹,高節邁俗。 養志二十餘年,永和九年卒,時年四十九,友朋相與刊石立頌,以表德美云。 乃著通道崇檢論,世咸稱之。 東陽太守阮裕、長山令王濛、皆一時名士、並與惇游處、深相 若乃放達不羈,以肆縱爲貴者,非但動違禮法,亦道之所 蘇峻之亂,避地東陽山,太尉都鑒檄爲兗州治中,又辟 性好學,儒玄並綜。每以爲君子立行,應依禮而動,

孫楚 孫統 綽(公)

不羣,多所陵傲,缺鄉曲之譽。 孫楚字子荆,太原中都人也。 年四十餘,始參鎭東軍事。 **祖資,魏驃騎將軍。** 父宏,南陽太守。 楚才藻卓絕,爽邁

列 傳 第二十 六 孫 楚

文帝遣符劭 、孫郁使吳, [七] 將軍石苞令楚作書遺孫皓日:

引譬類 是故許鄭以衡壁全國,曹譚以無禮取滅。載籍旣記其成敗,古今又著其愚智,不復廣 蓋見機 ,崇飾浮辭。 而作,周易所貴;小不事大,春秋所誅。此乃吉凶之萌兆,榮辱所由生也。 **苟以夸大爲名,更喪忠告之實。今粗論事要,以相覺悟。**

首。 越布于朔土,貂馬延于吳會,自以控弦十萬,奔走之力,信能右折燕齊,左震扶桑,輮轢 沙漠,南面 帶燕胡,憑陵險遠,講武游盤,不供職貢,內傲帝命,外通南國,乘桴滄海,交酬貨賄,葛 淑美,重光相襲,故知四隩之攸同,帝者之壯觀也。昔公孫氏承藉父兄,世居東裔,擁 晶 九野清泰,東夷獻其樂器,肅愼貢其楛矢,曠世不羈,應化而至,巍巍蕩蕩, 由是九州絕貫,王綱解紐,四海蕭條,非復漢有。 夏,協建靈符,天命旣集,遂廓弘基,奄有魏域。 於是遠近疆場,列郡大荒,收離聚散,大安其居,衆庶悅服,殊俗款附。 昔炎精幽昧,曆數將終,桓靈失德,災釁並興,豺狼抗爪牙之毒,生靈罹塗炭之難 一稱王。 宣王薄伐,猛銳長驅,師次遼陽,而城池不守, 太祖承運,神武應期,征討暴亂,克寧 土則神州中嶽,器則九鼎猶存,世載 枹鼓暫鳴, 自茲以降, 而元凶折 想所具聞

吳之先祖,起自荆楚,遭時擾攘,潛播江表。 劉備震懼,亦逃巴眠。 遂因山陵積石 也。

厲秋霜 中國 之固 落之漸,而徘徊危國,冀延日月,此由魏武侯卻指山河,自以爲强,殊不知物有興亡,則 由,則成都 使竊號 妙略潛 ,三江五湖浩汗無涯,假氣遊魂,迄茲四紀。 授,偏 う廟勝 之雄,稽顙絳闕,球琳 又南中呂興,深覩天命,蟬蛻內附,願爲臣妾。 白謂一 自潰、曜兵劍閣 三分鼎足之勢,可與 師同 之算,應變無窮,獨見之鑒,與衆絕慮。 心,上下用力,陵威奮伐,深入其阻,幷敵一向,奪其 則姜維 重錦,充於府庫。 泰山共 面縛。 相終始 開 地六千,領郡三十。 夫韓幷魏徙,號滅虞亡,此皆前鑒,後 也。 兩邦合從,東西唱和,互相扇動,距 相國晉王輔 外失輔車脣齒之援,內有羽毛 主上欽 明,委以萬機,長 兵不踰 相帝室,文武桓 時,梁益 膽 氣。 轡遠御, 小戰江 肅清, 桓,志 零 事 捍

舟 飲 以存亡,殷勤之指,往使所究也。 相眷眷未 車 了嬰齊入侍,北面稱臣,伏聽告策,則世祚江表,永爲魏藩,豐功顯報,隆於今日矣。 之用 南 方 海。 今百僚濟濟,儁乂盈朝,武臣猛將,折衝萬里, 便電發者,猶以爲愛人治國,道家所尙,崇城遂卑,文王退舍,故先開 未 有 自頃 如今之殷盛者也。 國家整修器械,興造舟楫,簡習水戰,樓船萬艘,千里相望,刳木已來, 若能 驍勇百萬,畜力待時。 審勢安危,自求多福,蹶然改容,祗 國富兵强,六軍精練, 役不再舉,今日之師也。 承 往 思復翰飛, 錫,追慕 大信,喻 然主

所美非其

地

也。

列

旌旗 若猶 見其已死,扁鵲知其無功矣。 之疾者,必進苦口之藥,決狐疑之慮者,亦告逆耳之言。 鋒鏑爭先,忽然一旦,身首橫分,宗祀淪覆,取戒萬世,引領南望,良助寒心! 夫療膏肓 而 西 刑捌 星流,龍游曜路,歌吹盈耳,士卒奔邁,其會如林,煙塵俱起,震天駭地,渴賞之士, 侮慢,未順王命,然後謀力雲合,指麾從風,雍梁二州,順流而東,靑徐戰士,列江 ·茂豫,爭驅八衝,征東甲卒,武步秣陵,爾乃王輿整駕,六戎徐征,羽校燭日 勉思良圖,惟所去就。 如其猶豫,迷而不反,恐愈附

劭等至吳,不敢爲通。

參軍不 子 紅 經年,事未判,又與鄉人郭奕忿爭。武帝雖不 命我參卿軍事。」因此而嫌隙逐構。 楚後遷佐著作郎,復參石苞驃騎軍事。 敬府主,楚旣輕苞,遂制施敬,自楚始也。 苞奏楚與吳人孫世山共訕毀時政,楚亦抗表自理,紛 楚旣負其材氣,頗侮易於苞,初至,長揖曰:「天 顯明其罪,然以少賤受責,遂湮廢積年。初,

祥無所 昊,而今蟠于坎井,同於蛙蝦者,豈獨管庫之士或有隱伏,厮役之賢沒於行伍。故龍見光 羣臣將 征 賀者,可謂楚旣失之, 上賀,楚上言曰:「頃聞武庫 西將軍、扶風王駿與楚舊好,起爲參軍。 而齊亦未 并中有二龍, 爲得 也。 轉梁令,遷衞將軍司馬。 夫龍 羣臣或有謂之禎祥而稱賀者,或有謂之非 或俯鱗潛于重泉,或仰攀雲漢游乎蒼 時龍見武庫井中,

卿,舉獨行君子可惇風厲俗者,又舉亮拔秀異之才可 景,有所感悟。 化,甫是士人出筋力之秋也。 先逸賤。 夫戰勝攻取之勢,**并**兼混一之威,五伯之事,韓白之功耳,至於制禮作樂,闡揚道 願陛下赦小過,舉賢才,垂夢於傅巖,望想於渭濱,修學官,起淹滯,申命公 伏願陛下擇狂夫之言。」 以撥煩理難矯世抗言者,無繫世族,必

惠帝初,爲馮翊太守。元康三年卒。〔六〕

情生於文,覽之悽然,增伉儷之重 流。」誤云「漱石枕流」。濟曰:「流非可枕,石非可漱。」楚曰:「所以枕流,欲洗其耳,所 石,欲厲其齒。」楚少所推服,惟雅敬濟。 能目,吾自爲之。」乃狀楚曰:「天才英博,亮拔不羣。」楚少時欲隱居,謂濟曰: 初,楚與同郡王濟友善,濟爲本州大中正,訪問銓邑人品狀,至楚,濟曰:「此人非卿所 初,楚除婦服,作詩以示濟,濟曰:「未知文生於情, 「當欲枕 以漱 石 漱

三子:衆、洵、纂。衆及洵俱未仕而早終,「亞惟纂子統、綽並知名。

褚裒 心碎務,縱意游肆,名山勝川,靡不窮究。 **、聞其名,命爲參軍,辭不說,家于會稽。** 統字承公。 幼與綽及從弟盛過江。 誕任不羈,而善屬文,時人以爲有 後爲餘姚令,卒。 性 |好山水,乃求爲|鄭令,轉在吳寧。 楚 風。 征 居職不留 北 將軍

子 騰嗣, 以博學著稱,位至廷尉。騰弟登,少善名理,注述子,行于世,仕至尚書郎,

早終。

情遠致 京,五經之鼓吹也。」嘗作天台山賦,辭致甚工,初成,以示友人范榮期,云:「卿試擲地,當作 楚可憐,但恐永無棟梁日耳。」綽答曰:「楓柳雖復合抱,亦何所施邪」|綽與詢一時名流,或 禮門爲龍津,則當點額暴鱗矣。」所居齋前種一株松,恒自守護,鄰人謂之曰:「樹子非不楚 年,乃作遂初賦以致其意。嘗鄙山濤,而謂人曰:「山濤吾所不解,吏非吏,隱非隱,若以元 金石聲也。」榮期曰:「恐此金石非中宮商。」然每至佳句,輒云:「應是我輩語。」除著作佐郎, 愛詢高 綽字興公。博學善屬文,少與高陽許詢俱有高尙之志。居于會稽,游放山水,十有餘 ,弟子早已伏膺,然一詠一吟,許將北面矣。」絕重張衡、左思之賦,每云:「三都、 二 邁,則鄙於綽,或愛綽才藻,而無取於詢。沙門支遁試問綽:「君何如許。」答曰:「高

歯曰:「簸之颺之,糠秕在前。」 綽性通率,好譏調。 嘗與習鑿齒共行,綽在前,顧謂鑿齒曰:「沙之汰之,瓦石在後。」鑿 襲爵長樂侯

征西將軍庾亮請爲參軍,補章安令,徵拜太學博士,遷尚書郎。 揚州刺史殷浩以爲建

威長史。會稽內史王羲之引爲右軍長史。轉永嘉太守,遷散騎常侍,領著作郎。

時大司馬桓溫欲經緯中國,以河南粗平,將移都洛陽。 朝廷畏溫,不敢爲異,而北土蕭

條,人情疑懼,雖並知不可,莫敢先諫。綽乃上疏曰:

革,中宗龍飛,非惟信順協於天人而已,實賴萬里長江畫而守之耳。 易稱「王公設險以 旂電舒,朝服濟江,反皇居於中土,正玉衡於天極。」斯超世之弘圖,千載之盛事。 孫,亡者丘 蕭條,井堙木刊,阡陌夷滅,生理茫茫,永無依歸。播流江表,已經數世,存者長子老 分,不得不保小以固存。自喪亂已來六十餘年,蒼生殄滅,百不遺一,河洛丘虛,函 守其國」,險之時義大矣哉! 斯已然之明效也。今作勝談,自當任道而遺險,校實量 之。 之所懷,竊有未安,以爲帝王之興,莫不藉地利人和以建功業,貴能以義平暴,因而 興五陵,卽復 懷愍不建,淪胥溱京,遂令胡戎交侵,神州絕綱,土崩之釁,誠由道喪。然中夏蕩 一時橫流,百郡千城曾無完郛者,何哉?亦以地不可守,投奔有所故也。天祚未 伏見征西大將軍臣溫表「便當躬率三軍、討除二寇、蕩滌河渭、淸灑舊京。然後神 一隴成行。雖北風之思威其素心,目前之哀實爲交切。 緬 成遐域。泰山之安旣難以理保,烝烝之思豈不纏於聖心哉! 若遷都旋軫之日,中 然臣 撫 夏

溫 今此 舉,誠欲大覽始終,爲國遠圖。 向無山陵之急,亦未首決大謀,獨任天下之

列

傳

今天時人事,有未至者矣,一朝欲一宇宙,無乃頓而難舉乎? 而圖大,勢屈則遵養以待會。使德不可勝,家有三年之積,然後始可謀太平之事耳。 取裁?此仁者所宜哀矜,國家所宜深慮也。自古今帝王之都,豈有常所,時隆則宅中 頓仆道塗,飄溺江川,僅有達者。 夫國以人爲本,疾寇所以爲人,衆喪而寇除,亦安所 田宅不可復售,舟車無從而得,捨安樂之國,適習亂之鄉,出必安之地,就累卵之危,將 空荒之地,提挈萬里,踰險浮深,離墳墓,棄生業,富者無三年之糧,**貧者無一**飡之飯, 以反舊之樂賒,而趣死之憂促哉!何者。植根於江外數十年矣,一朝拔之,頓驅踧於 至 |難也。今發憤忘食,忠慨亮到,凡在有心,孰不致感!而百姓震駭,同懷危懼者,豈不

廢,則貧者殖其財,怯者充其勇,人知天德,赴死如歸,以此致政,猶運諸掌握。何故捨 文簡樸之至,去小惠,節游費,審官人,練甲兵,以養士滅寇爲先。十年行之,無使隳 之救痛痒,率然之應首尾,山陵旣固,中夏小康。陛下且端委紫極,增修德政,躬行漢 如此,賊見亡徵,勢必遠竄。如其迷逆不化,復欲送死者,南北諸軍風馳電赴,若身手 陵、掃平梁許、清一河南、運漕之路旣通、然後盡力於開墾,廣田積穀,漸爲徙者之資。 百勝之長理,舉天下而一擲哉!陛下春秋方富,溫克壯其猷,君臣相與,弘養德業,括 臣之愚計,以爲且可更遣一將有威名資實者,先鎭洛陽,於陵所築二壘以奉衞山

囊元吉, 豈不快乎!

戮,使丹誠上達,退受刑誅,雖沒泉壤,尸且不 陳。 聞天聽者,竊以無諱之朝,5103狂瞽進說,芻蕘之謀,聖賢所察,所以不勝 若陛下垂神,溫少留思,豈非屈於一 .唱高議,聖朝互同,臣以輕微,獨獻管見。 人而允億兆之願哉! 朽 出言之難,實在今日, 如以干忤罪大, 至憂, 而臣 **屬冒干** 欲加顯 區 區必

刊石焉。 桓溫見綽表,不悅,曰:「致意興公,何不尋君遂初賦,知 **綽少以文才垂稱,于時文士,綽爲其冠。** 年五十八,卒。 溫、汪、郗、庾諸公之薨,必須綽爲碑文,然後 人家國事邪! | 尋轉廷尉卿,領著作。

子嗣,有綽風,文章相亞,位至中軍參軍,早亡。

難 謂 筆 運距中衰,陵替有 也。 兄弟矣。 命輕鴻毛,義貴熊掌。 史臣曰:江統風檢操行,良有可稱,陳留多士,斯爲其冠。 而負 才誕傲,蔑苞忿奕,違遜讓之道,肆陵憤之氣,丁年沈廢,諒自取矣。 孫楚體英絢之姿,超然 漸,假其言見用,恐速禍招怨,無救於將顚也。 **厳位隆端右,竭誠獻替。** 出類,見知武子,誠無娘色。 惇遺忽榮利,聿修天爵。 徙戎之論,實乃經國遠圖 覽其貽 皓之書,諒曩代之佳 逮愍懷廢徙,冒禁拜辭 雖 出處異塗,俱 統綽棣華

列

僔

第

=

+

六

孫

楚

秀發,名顯中興,可謂無忝爾祖。 統竟淪跡下邑,窮觀勝地,會其心焉。綽獻直論辭,都不

慴元子,有匪躬之節,豈徒文雅而已哉,

綽冠羣英。 贊曰:應元蹈義,子荆越俗。 江寡悔尤,孫貽擯辱。 **膨統昆弟**, 江左馳聲。 彬彬藻思,

校勘記

- 夫夷蠻戎狄謂之四夷 「四夷」,各本作「四海」,今從吳本。 册府九九〇亦作「四夷」。
- (三) 爲寇賊強暴 「爲」,删府九九○作「雖」,疑是。
- 嘉左衽之功 「嘉」,各本作「加」,今從吳本。 册府九九〇、 通典一八九、 通志一二四下均作

四山 夷夏俱斃 弊」同一疑「斃」爲誤字。 「斃」,通鑑八三作「敝」,羣書治要三〇、 通典一八九、 通志一二四下作「弊」。

敝

- C五」干費 見卷八校記。
- (公) 孫統綽 原目作「子衆洵纂纂子統綽」。 按:正文楚三子無傳、唯楚孫統、綽有傳、今改正。
- . . U 文帝遣符劭孫郁使吳 斠注"文帝紀、吳志三嗣主傳、文選爲石仲容與孫晧書注引臧榮緒晉書

Cペン 元康三年卒 「元康」、各本作「太康」、今從宋本。

[九] 三子至洵俱未仕而早終 孫洵、孫盛傳及魏志劉放傳注引晉陽秋俱云爲潁川太守、非未仕。

(10) 竊以無諱之朝 「竊」,各本作「切」,今從宋本。通志一二四下亦作「竊」。

晉書卷五十七

列傳第二十七

羅憲 兄子尚

周門人稱爲子貢。性方亮嚴整,待士無倦,輕財好施,不營產業。 羅憲字令則,襄陽人也。 父蒙,蜀廣漢太守。 憲年十三,能屬文,早知名。 仕蜀爲太子舍人、宣信校 師事譙周,

尉。再使於吳,吳人稱焉。

軍盛憲 皆棄城走,憲斬亂者一人,百姓乃安。 拜憲領軍,爲宇副貮。 吾寧當 時黃皓預政,衆多附之,憲獨介然。皓恚之,左遷巴東太守。時大將軍閻宇都督巴東, 西上,四外託救援,內欲襲憲。 爲降虜乎」乃歸順。 魏之伐蜀,召字西還,憲守永安城。 於是繕甲完聚,厲以節義,士皆用命。 知劉禪降,乃率所統臨于都亭三日。 憲曰:「本朝傾覆,吳爲脣齒,不恤我難,而邀其利, 及成都敗,城中擾動,邊江長吏 及鍾會、鄧艾死,百城無 吳聞蜀敗,遣將

列

傳第二

+

羅憲

急而 東軍事、使持節,領武陵太守。 疾疫太半。 主,吳又使步協西征,憲大破其軍。 棄之,君子不爲也。 或勸南出牂柯,北奔上庸,可以保全。 畢命於此矣。」會荆州刺史胡烈等救之,抗退。 孫休怒,又遣陸抗助協。 憲曰:「夫爲人主,百姓所仰,旣不能存, 憲距守經年, 救援不至, 城中 加陵江將軍 大監巴

年卒,贈使持節、安南將軍、武陵太守,追封西鄂侯,諡曰烈。 泰始初入朝,詔曰:「憲忠烈果毅,有才策器幹,可給鼓吹。」又賜山玄玉佩劍。 泰始六

初,憲侍讌華林園,詔問蜀大臣子弟,後問先輩宜時敍用者,憲薦蜀人常忌、杜軫等,皆

西國之良器,武帝並召而任之。

子襲,歷給事中、陵江將軍,統其父部曲,至廣漢太守。 兄子尚。

尚及劉喬爲參軍,並委任之。太康末,爲梁州刺 尚字敬之,一名仲。父武,牂柯太守。 尚少孤,依叔父憲。 史。 善屬文。 荆州刺史王戎以

益州 富擬魯衞,家成市里;貪如豺狼,無復極已。」又曰:「蜀賊尚可,羅尚殺我。平西將軍,反 刺史、西戎校尉。性貪,少斷,蜀人言曰:「尚之所愛,非邪則佞,尚之所憎,非忠則正。 及趙廞反于蜀,尚表曰:「廞非雄才,必無所成,計日聽其敗耳。」乃假尚節爲平西將軍、

更爲禍。」

雄僭號,都于郫城。 使兵曹從事任銳僞降,〔三因出密宣告于外,剋日俱擊,遂大破之,斬李特,傳首洛陽。 史宗岱率建平太守孫阜救之,三次于江州。 時李特亦起於蜀,攻蜀,殺趙廞。 尚遣將軍隗伯攻之,不克。 又攻尚於成都,尚退保江陽。初,尚乞師方嶽,荆州刺 岱、阜兵盛,諸為寇所逼者, 俄而尚卒,雄遂據有獨土。 人有奮志 尚 乃

滕脩

滕脩字顯先,南陽西鄂人也。仕吳爲將帥,封西鄂侯。

脩在南積年,爲邊夷所附 毅各送印綬,詔以脩爲安南將軍,廣州牧、持節、都督如故,封武當侯,加鼓吹,委以南方事 王師伐吳,脩率衆赴難。至巴丘而皓已降,乃縞素流涕而還,與廣州刺史閭豐、蒼梧太守王 脩宿有威惠,爲嶺表所伏,以爲使持節、都督廣州軍事、鎭南將軍、廣州牧以討之。 孫晧時,代熊睦爲廣州刺史,甚有威惠。 徵爲執金吾。 廣州部曲督郭馬等爲亂, 、未克而 問 以

紲吳壤,爲所驅馳,幸逢開通,沐浴至化,得從俘虜握戎馬之要,未覲聖顏,委南藩之重,實 太康九年卒,請葬京師,帝嘉其意,賜墓田一頃,諡曰聲。 脩之子並上表曰:「亡父脩羈

乃賜

諡

日忠。

瞻望雲闕,實懷痛裂。 由 勳勞少聞天聽故也。 竊聞博士諡脩日聲,直彰流播,不稱行績,不勝愚情,冒昧聞訴。」帝 年衰疾篤,屢乞骸骨,未蒙垂哀,奄至薨隕。 臣承遺意, 輿櫬還都,

廣州 刺史。 並 子含,初爲庾冰輕車長史,討蘇峻有功,封夏陽縣開國侯,邑千六百戶,授平南將軍、 在任積年,甚有威惠,卒諡曰戴。 含弟子遯,交州刺史。

脩曾孫恬之,龍驤將軍、魏郡太守,戍黎陽,爲翟遼所執,死之。

馬隆

無敢 收者。 馬隆字孝興,東平平陸人。 隆以武吏託稱愚客,以私財殯葬,服喪三年,列植松柏,禮畢乃還, 少而智勇,好立名節。 魏兗州刺史令狐愚坐事伏誅, 一州以爲美 舉州

談。

署武猛

從事

足以 有其人,勿限 盡殊才。 泰始 中,將興伐吳之役,下詔曰:「吳會未平,宜得猛士以濟武功。 所取。」兗州舉隆才堪良將。 其普告州郡,有壯勇秀異才力傑出者,皆以名聞,將簡其尤異,擢而用之。 稍遷司 馬督。 雖舊有薦舉之法,未 苟

初,涼州刺史楊欣失羌戎之和,隆陳其必敗。 俄而欣爲虜所沒,河西斷絕,帝每有西顧

從跳議,賜爵加秩各有差。

所以 有 司奏隆將士皆先加顯爵,不應 爲誘引。 今隆全軍獨克,西土獲安,不得便以前授塞此後功,宜皆聽許,以明要信。」 乃 更授。 衛將軍楊珧駁曰:「前精募將士,少加爵 命者, 此適

器,將若田者。 軍,屯據西平。 太康初,朝廷以西平荒毁,宜時興復,以隆爲平虜護軍、西平太守,將所領精兵, **虜以隆無征討意,御衆稍怠。** 時南虜成奚每爲邊患,隆至,帥軍討之。 隆因其無備, 進兵擊破之。畢隆之政,不敢 **虜據險距守,隆令軍士皆負農** 叉給牙

驚懼。 舒與楊駿通親,密圖代隆,毀隆年老謬耄,不宜服戎,於是徵隆,以舒代鎭。氐羌聚結,百姓 太熙初,封奉高縣侯, 朝廷恐關隴復擾,乃免舒,遣隆復職,竟卒于官。 加授東羌校尉。 積十餘年, 威信震於隴右。時略陽太守馮翊嚴

瑚所敗,沒於陣。 子咸嗣,亦驍勇。 成都王穎攻長沙王乂,以咸爲鷹揚將軍,率兵屯河橋中渚,爲乂將王

胡奮

胡奮字玄威,安定臨涇人也,魏車騎將軍陰密侯遵之子也。奮性開朗,有籌略,少好武

猛帳 匈奴 中部 下將李恪斬猛 宣帝之伐遼東也,以白衣侍從左右,甚見接待。 帥劉猛 叛,使驍騎路蕃討之,以奮爲監軍、假節,頓軍硜北,爲蕃後繼。擊猛,破之, 而降。以功累遷征南將軍、假節、都督荆州諸軍 還爲校尉,稍遷徐州刺史,封夏陽子。 事,遷護軍 ,加散騎常

侍。 **奮家世將門,晚乃好學,有刀筆之用,所在有聲績,居邊特有威惠**

奮兄弟六人,兄廣,弟烈,並知名。 婢耳,何能損益!」時人皆爲之懼。 者,但早晚事耳。觀卿舉措,適所以速禍。」駿曰:「卿女不在天家乎。」奮曰:「我 時楊駿以后父驕傲自得,奮謂駿曰:「卿恃女更益豪邪。歷觀前代, 天之上。」奮旣舊臣,兼有椒房之助,甚見寵待。遷左僕射,加鎭軍大將軍、開府儀同三司。 子,爲南陽王友,早亡。及聞女爲貴人,哭曰:「老奴不死,唯有二兒,男入九地之下,女上九 泰始 末,武帝怠政事而耽於色,大採擇公卿女以充六宮,奮女選入爲貴人。奮唯有一 **駿雖衡之,而不能害。後卒於官,贈車騎將軍,諡** 與天家婚,未有 女與 卿女作 不滅門

廣字宣祖,位至散騎常侍、少府。廣子喜,字林甫,亦以開濟爲稱,仕至凉州刺史、建武

將軍、假節、護羌校尉。

先,攻殺會,名馳遠近。 烈字武玄,爲將伐蜀。鍾會之反也,烈與諸將皆被閉。烈子世元,時年十八,爲士卒 烈爲秦州刺史,及凉州叛,烈屯於萬卧塠,爲虜所圍,無援,遇害。

陶璜

陶 璜 字世英,丹楊秣陵人也。 父基,吳交州 刺史。璜仕吳歷顯位

以璜 病卒, 寶船 汜爲 秣陵 像,使爲書與系,又使像乘蹟軺車,鼓吹導從而行。 伏 其 松、王業、至墨能等,自蜀出交阯,破吳軍於古城,斬大都督脩則、交州刺史劉俊。吳遣虞 相 兵 順 將。 (監軍, 薛珝爲威南將軍、大都督, 璜爲蒼梧太守, 距稷, 戰于分水。 璜敗, 退保合浦, 亡 列 ,故致敗耳。」 尋爲其功曹李統所殺,帝更以建寧爨谷爲交阯太守。 領交州、為前 孫 南中監軍霍弋又遺犍爲楊稷代融,與將軍毛炅,九眞太守董元,牙門孟幹、孟通、李 旣苦遠役,咸思 錦 皓時,交阯太守孫諝貪暴,為百姓所患。 長戟 物數千匹遺扶嚴賊帥梁奇、奇將萬餘 **翊怒,謂璜曰:「若自表討賊,而喪二帥,其責安在。」璜曰:「下官不得行意,諸軍不** 於其 部督。 後。 翔怒,欲引軍還。 兵 爲亂。 璜從海道出於不意,徑至交阯,元 機接,元僞退,璜追之,伏兵果出,長戟逆之,大破沅等。 郡吏呂興殺醑及荀,以郡內附。 **璜夜以數百兵襲董元,獲其寶物,船載而歸,翔乃謝之,** 人助璜。 會察戰鄧荀至,四擅調孔雀三千頭,遺送 元等日 「像尙若此,系必有去志。」 乃就 元 距之。 谷又死,更遣巴西馬融代之。 有勇將解系同在城內, 武帝拜興安南將軍、交阯太 諸將將戰,璜疑 斷牆 璜 以 前 誘 其弟 內有 所 融 得

殺之。琊、璜遂陷交阯。吳因用璜爲交州刺史。

與市,皆壞爲田器。 璜 有謀策,周窮好施,能得人心。朦脩數討南賊,不能制,璜曰:「南岸仰吾鹽鐵,斷勿 如此二年,可一戰而滅也。」脩從之,果破賊。

降,允求復讐,曂不許。艮密謀襲璜,事覺,收炅,呵曰:「晉賊」」艮厲聲曰:「吳狗!何等爲 稷交州,炅及松能子並關內侯。 等,並送之。稷至合浦,發病死。 加賞賜,以爲日南太守。先是,以楊稷爲交州刺史,毛炅爲交阯太守,印綬未至而敗,卽贈 側竹弩,言能作之,皓留付作部。後幹逃至京都,松、能爲晧所殺。幹陳伐吳之計,帝乃厚 所事,宜宥之以勸邊將,

暗從其言,將徙之臨海。

幹等志欲北歸,

慮東徙轉遠,以吳人愛蜀 贼。」允剖其腹,曰:「復能作賊不。」 艮猶駡曰:「吾志殺汝孫晧,汝父何死狗也!」 璜旣擒稷 不亦可乎!」稷等期訖糧盡,救兵不至,乃納之。 死,不能救閥等必矣,可須其日滿,然後受降,使彼得無罪,我受有義,內訓百姓,外懷鄰國, 至,吾受其罪。」閥等守未百日,糧盡,乞降,曂不許,給其糧使守。 初,霍弋之遣稷、炅等,與之誓曰:「若賊圍城未百日而降者, 孟幹、爨能、李松等至建鄴,皓將殺之。或勸皓、幹等忠於 脩則旣爲毛炅所殺,則子允隨璜南征,城旣 諸將並諫,璜曰:「霍弋已 家屬誅;若過百日救兵不

九眞郡功曹李祚保郡內附,璜遣將攻之,不克。 祚舅黎晃隨軍,勸祚令降。

列

國三十餘縣。 一、交州 自吳 牧。 祚自晉臣 武平、九德、新昌土地阻險,夷獠勁悍,歷世 徵璜爲武昌都督,以合浦太守脩允代之。 • 唯力是視耳。」踰時乃拔。 皓以璜爲使持節、都督交州諸軍事 不賓,璜征討,開置三郡,及九眞屬 、前將

職,封宛陵侯,改爲冠軍將軍 晧 旣 降晉,手書遺璜息融敕璜歸順。 **璜流涕數日,遣使送印綬詣洛陽。** 帝詔復其本

千四 郡 竄。 交阯 復 厭 臣 且 當 其 以 去州海行千有餘里,日外距林邑纔七百里。 連 接 萬 安樂,好爲 叉臣 尩 吳 臣亡國之餘,議不足採,聖恩廣厚,猥垂飾擢,蠲其罪釁,改授方任,去辱卽寵,拭目更 郡 百二十人。今四 戶。 扶南、種類猥多、朋黨相倚、負險不賓。往隸吳時、數作寇逆、攻破郡縣、殺害長吏。 既平,普減州郡兵,璜上言曰:「交土荒裔,斗絕一方,或重譯而言,連帶山海。 駑, 昔為故國所採, 偏戍在南, 十有餘年。 千六百里, 所統 至於 之卒本七千餘人,南土溫 禍亂。又廣州 服從官役,纔五 水陸 海混 一並通、一 同、無思 南岸,周旋六千餘里,不賓屬者 互相 于 不 餘家。 維 ·服,當卷甲消刃,禮樂是務。 衞。 一溼,多有 州兵未宜約損,以示單 一州曆 夷帥范熊世爲逋寇, 氣毒,加累年征討,死亡減耗,其見在者二 雖前後征討,翦其魁桀,深山僻穴,尚有逋 齒, 唯兵是鎮。 乃五 萬餘 虚。 又寧州 而此州之人,識 自稱爲 戶,及 夫 風 興 塵 古接 桂林 王,數攻百姓。 之變, 據 不 義 上流,去 出於非 之輩, 者寡, 叉南

困。 採上珠之時,聽商旅往來如舊」。並從之。 以采珠爲業,商賈去來,以珠貿米。 視,誓念投命,以報所受,臨履所見,謹冒瞽陳。」又以「合浦郡土地磽确, 又所調猥多,限每不充。 今請上珠三分輸二,次者輸一,粗者蠲除。 而吳時珠禁甚嚴,慮百姓私散好珠,禁絕來去, 無有田農, 自十月訖二月,非 人以饑 百姓唯

卒。 彦代璜。 起兵討壽,禽之,付壽母,令鴆殺之。碩乃迎璜子蒼梧太守處領刺史,在職甚得百姓心,三年 壽求領州,州人不聽,固求之,遂領州。 威弟淑,子綏,後並爲交州。 在南三十年,威恩著于殊俗。 **彦卒,又以員外散騎常侍顧祕代彥。** 自基至綏四世,爲交州者五 及卒,舉州號哭,如喪慈親。 壽乃殺長史胡肇等,又將殺帳下督梁碩,碩走得免, 祕卒,州人逼秘子慘領州事。 人。 朝廷乃以員外散騎常侍吾 **參尋卒,參弟**

韓晃所殺,追贈廬江太守。 豫,並有名。 **璜弟濬,吳鎭南大將軍、荆州牧。** 煙至臨海太守、黃門侍郎。 抗子回,自有傳。 濬弟抗,太子中庶子。 猷宣城內史,王導右軍長史。 濟子湮,字恭之,煙弟猷,字恭 湮子馥, 于湖令, 爲

吾彦

| 吾彦字士則,吳郡吳人也。 出自寒微,有文武才幹。身長八尺, 手格猛獸,旅力絕羣

仕 吳爲通江 吏。 時將軍薛翊杖節南征,軍容甚盛,彥觀之,慨然而歎。 有善相者劉札謂之

曰:「以君之相,後當至此,不足慕也。」

陽狂 一拔刀 初爲 八跳躍 小將,給吳大司馬陸抗。抗奇其勇略,將拔用之,患衆情不允,乃會諸將,密使人 而來,坐上諸將皆懼而走,唯遂不動,舉几禦之,衆服其勇,乃擢用焉。

乃退舍禮之。 鎖、横斷江路。 稍遷建平太守。 及師臨境,緣江諸城皆望風降附,或見攻而拔,唯序堅守,大衆攻之不能克, 時王濬將伐吳,造船於蜀,彥覺之,請增兵爲備, 晧不從,彥乃輒爲鐵

乎。」帝甚嘉之。 敗亡之釁,由此而作矣。」其後帝又問彦,對曰:「吳主英俊,宰輔賢明。」帝笑曰:「君明臣賢, 坐,謂彥曰:「君爲吳將,積有歲年,蔑爾無聞,竊所惑矣。」彥厲聲曰:「陛下知我,而卿不聞 對曰:「歸命侯臣皓之君吳,昵近小人,刑罰妄加,大臣大將無所親信,人人憂恐,各不自安, 何爲亡國。」。彥曰:「天祿永終,曆數有屬, 所以爲陛下擒。 吳亡,彥始歸降,武帝以爲金城太守。 帝嘗從容問薛瑩曰:「孫皓所以亡國者何也。」瑩 此蓋天時, 豈人事也」

張華時在

順陽內史,彥淸身率下,威刑嚴肅,衆皆畏懼。 轉在 敦煌,威恩甚著。 遷雁門太守。 時順陽王暢驕縱,前後內史皆誣之以罪。 暢不能誣,乃更薦之,冀其去職。 遷員外散 及彦爲

騎常侍。 帝嘗問彦:「陸喜、陸抗二人誰多也。」「彥對曰:「道德名望,抗不及喜,立功立事,喜

不及抗。」

卿便獨坐也。」於是機等意始解,毀言漸息矣。 等曰:「自古由賤而興者,乃有帝王,何但公卿。 若何元幹、侯孝明、唐儒宗、張義允等,並起 本微賤,爲先公所拔,而答詔不善,安可受之」機乃止。因此每毁之。長沙孝廉尹虞謂機 自寒微,皆內侍外鎭,人無譏者。 會交州刺史陶璜卒,以彥爲南中都督、交州刺史。 卿以士則答詔小有不善,毀之無已,吾恐南人皆將去卿 重餉陸機兄弟,機將受之,雲曰:「彥

一十餘年,威恩宣著,南州寧靖。 初,陶璜之死也,九眞戍兵作亂,逐其太守, 自表求代,徵爲大長秋。 九眞賊帥趙祉圍郡城,彦悉討平之。 卒於官。 在鎭

張光

張光字景武,江夏鍾武人也。身長八尺,明眉目,美音聲。 少爲郡吏,家世有部曲,以

牙門將伐吳有功,遷江夏西部都尉,轉北地都尉。

馬蘭山北,賊圍之百餘日。 初,趙王倫爲關中都督,氐羌反叛,太守張損戰沒,郡縣吏士少有全者。 光撫厲將士,屢出奇兵擊賊,破之。 光以兵少路遠,自分敗沒。 光以百餘人戍

加

甄

宜 會梁王彫遣司馬索靖將兵迎光,舉軍悲泣,遂還長安。 賞,以明獎勸」。於是擢授新平太守,加鼓 形表光「處絕圍之地,有**耿**恭之忠,

關 正 一色答 西大族,心每輕光,謀多不用。及二州軍潰,爲顒所擒,顒謂光曰:「前起兵欲作何策。」光 屬 雍州 日 但劉雍州 刺史劉沈被密詔討河間王顒,光起兵助沈。 不用鄙計,故令大王得有今日也。」顯壯之,引與歡宴彌日,表爲右衛 沈時委任秦州刺史皇甫重,重自以

司

馬。

稱為 使光設伏以待之,武陵太守苗光爲水軍,藏舟艦於沔水。 水 陸同 南楚之秀。 陳敏作亂,除光順陽太守,加陵江將軍,率步騎五千詣荆州討之。 奮,賊衆大敗。 時江夏太守陶侃與敏大將錢端 弘表光有殊勳,遷材官將軍、梁州 相距於長岐,將戰,襄陽太守皮初 刺史。 皮初等與賊交戰,光發伏兵應之, 刺史劉弘雅敬重光, 爲 少軍,

赴州? 英雄。」正沖曰:「張燕受賊金銀,不時進討,阻兵緩寇,致喪漢中,實燕之罪也。」光於是發 雄 殷遣巴西太守張燕討之。 ,雄遣衆救定, 先是,秦州 止 於 魏興,乃結諸郡守共謀進取 人鄧定等二千餘家,饑餓流 燕退,定遂進逼 定窘急,僞乞降于燕,幷餽燕金銀, 漢中。 0 燕唱言曰:「漢中荒敗,迫近大賊, 太守杜正 入漢中,保于成固 沖東奔 魏興、公殿亦棄官 燕喜, ,[t] 漸爲抄盜。 爲 之緩師。 克復之事 而遁。 梁州 定 密結李 刺史張 光 當俟 不得

怒,呵燕令出,斬之以徇。 **綏撫荒殘,百姓悅服。 光於是卻鎭漢中。**

不克。 距之。 有二子:炅、邁。 賊,今得自死,便如登仙,何得退還也!」聲絕而卒,時年五十五。 敵,謂之曰「流人寶物悉在光處,今伐我,不如伐光。」難敵大喜,聲言助光,內與運同,光弗 於光曰:「運之徒屬不事佃農,但營器杖,意在難測,可掩而取之。」光又信焉。 自夏迄冬,憤激成 之知也,遣息援率衆助邈。 時逆賊王如餘黨李運、楊武等,自襄陽將三千餘家入漢中,光遣參軍晉邈率衆於黃金 光乞師於氐王楊茂搜、茂搜遣子難敵助之。難敵求貨於光、光不與。 邈受運重賂,勸光納運。光從邈言,使居成固。旣而邈以運多珍貨,又欲奪之,復言 疾。 佐吏及百姓咸勸光退據魏興, 光按劍曰:「吾受國厚恩,不能翦除寇 運與難敵夾攻邈等,援爲流矢所中死,賊遂大盛。 百姓悲泣,遠近傷惜之。 楊武乃厚賂難 遭邈衆討運, 光嬰城固守,

助,內闕資儲,以寡敵衆,經年抗禦,厲節不撓,宜應追論顯贈,以慰存亡」。敦不能從。 守應詹白都督王敦,稱「光在梁州能興微繼絕,威振巴漢。 王喬奉光妻息,率其遺衆,還據魏興。 炅少辟太宰掾。 邁多才略,有父風。州人推邁權領州事,與賊戰沒。 其後義陽太守任悟爲梁州,光妻子歸本郡。 值中原傾覆, 征鎭 別駕范曠 失守, 外無救 南 及督護 平 太

五六六

趙誘

趙誘字元孫、淮南人也。世以將顯。州辟主簿。

成敗, 州而 將兵會盟,亦中策也。 若遣小軍隨形助勝,下策耳。」隆曰:「我受二帝恩,無所偏助,正欲保 起,其敗必矣。今爲明使君計,莫若自將精兵,徑赴許昌,上策也。 不決,遂爲其下所害。 ·已。」誘與治中留實、主簿張褒等諫隆:「若無所助,變難將生,州亦不可保也。」 隆猶豫 値 恐爲冏 [刺史||鄱隆被齊王|||檄,使起兵討趙王||倫,隆欲承檄舉義,而諸子姪並在洛陽,欲坐觀 所討,進退有疑,會羣吏計議。 誘說隆日:「趙王篡逆,海內所病。 不然,且可留後,遣 今義兵飇 猛將

爲荆楚 時杜 又擊杜弢於西湘。太興初,復與卓攻弢,滅之。累功賜爵平阿縣侯, 曾迎第五猗於荆州作亂,敦遣誘與襄陽太守朱軌共距之。 誘還家,杜門不出。 所 歸。 誘等苦戰皆沒,敦甚悼惜之,表贈征虜將軍、秦州 左將軍王敦以爲參軍,加廣武將軍,與甘卓、周訪共討華軼,破之。 猗旣愍帝所遣, 刺史,諡曰 代 陶侃為武昌 加有時望, 1太守。

曾,胤請從行。 子襲,與誘俱死。 訪憚曾之强,欲先以胤餌會,使其衆疲而後擊之。 元帝爲晉王,下令贈新昌 大守。 襲弟胤,字伯舒。 胤多梟首級。 王敦使周訪擊杜 王導引為

從事 中 郎。 南頓王宗反, 胤殺宗,於是王導、庾亮並倚杖之。 轉冠軍將軍,遷西豫州刺

史,至卒於官。

策,竟而俱斃,貞則斯存。 敗,譏楊駿之速禍。 指巴東而受脹,出嶺嶠而揚麾。 自遠;鼙鼓之臣,厥聲彌劭。景武,南楚秀士;元孫,累葉將門,赴死喩於登仙,效誠陳於上 之忠烈,罕輩于茲!孝興之智勇,玄威之武藝,滅醜虜於河西,制凶酋於脛北,審楊欣之必 史臣曰:忠爲令德,貞曰事君,徇國家而竭身,歷夷險而一節。 陶璜、吾彥,逸足齊驅,毛炅屈其深謀,陸抗奇其茂略。 屬鼎命淪胥,本朝失守,屆巴丘而流涕,集都亭而大臨。 羅憲、滕脩,濯纓入仕, 薪楢之任,清規

楊門致譏。 立功西湘。 贊曰:憲居玉壘,才博流譽。脩赴石門,惠政攸著。孝興、玄威,操履無違。 **璜謀超絕,彥材雄傑。潛師襲董,觀兵歎嶭。** 惟趙與張,神略多方。 作尉北地, 愚墳畢禮,

校勘記

一」盛憲 校文:吳志孫休傅作「盛曼」。

列

傅

第二十

七

趙

校

勘記

. 7.

(二) 宗岱 惠紀、李特載記作「宋岱」。

任銳 考異:"李特載記作「任明」,蜀錄作「任叡」,當以「叡」爲本名。 按: 通鑑八五亦作「任叡」。

[四] 鄧荀 魏志陳留王紀作「鄧句」。

C五」王業 通鑑七八作「王素」。

[A] 又南郡去州海行千有餘里 李校:「南」上當脫「日」字。

【《】杜正沖 通鑑八六作「杜孟治」。

成固

原作「城固」,據下文及地理志上、通鑑八六改。

元〕遷西豫州刺史 勞校:「西」字行。

晉書卷五十八

列傳第二十八

周處 子玘 玘子勰 玘弟札 札兄子莚

及。」雲曰:「古人貴朝聞夕改,君前塗尙可,且患志之不立,何憂名之不彰」」處遂勵志好學, **患已之甚,乃入吳尋二陸。時機不在,見雲, 具以情告,曰:「欲自修而年已蹉跎, 恐將無** 里,而處與之俱,經三日三夜,人謂死, [1]皆相慶賀。處果殺蛟而反,聞鄉里相慶,始知人 田獵,不脩細行,縱情肆慾,州曲患之。處自知爲人所惡,乃慨然有改勵之志,謂父老曰: 之,則一郡之大慶,非徒去害而已。」處乃入山射殺猛獸,因投水搏蛟, 蛟或沈或浮,行數十 「南山白額猛獸,長橋下蛟,幷子爲三矣。」處曰:「若此爲患,吾能除之。」父老曰:「子若除 「今時和歲豐,何苦而不樂耶?」父老歎曰:「三害未除,何樂之有!」處曰:「何謂也?」答曰: 周處字子隱,義興陽羨人也。 父魴,吳鄱陽太守。 處少孤,未弱冠,膂力絕人,好馳騁

列

難督。

有文思, 志存義烈,言必忠信克己。春年,州府交辟。仕吳爲東觀左丞。孫晧末,爲無

末分崩,三國鼎立,魏滅於前,吳亡於後,亡國之感,豈惟一人」渾有慚色。 及吳平,王渾登建鄴宮釃酒,旣酣,謂吳人曰:「諸君亡國之餘,得無感乎?」處對曰:「漢

侍。處曰:「古人辭大不辭小。」乃先之楚。而郡旣經喪亂,新舊雜居,風俗未一,處敦以敎 義,又檢尸骸無主及自骨在野收葬之,然始就徵,自遠近稱歎。 三十年而不決者,處詳其枉直,一朝決遣。以母老罷歸。 尋除煙內史,未之官,徵拜散騎常 入洛、稍遷新平太守,撫和戎狄、叛羌歸附,雍土美之。轉廣漢太守。郡多滯訟,有經

爲征 平, 及氏 慨 全!旣辭親 即路,志不生還。中書令陳準知肜將逞宿憾,乃言於朝曰:「駿及梁王皆是貴戚,非將率之 我知其 伏波將軍 人齊萬年反,朝臣惡處强直,皆曰:「處,吳之名將子也,忠烈果毅。」乃使隸夏侯駿西 西大將軍、都督關中諸軍事。處知肜不平,必當陷己,自以人臣盡節,不宜辭憚,乃悲 及居近侍,多所規諷。遷御史中丞,凡所糾劾,不避寵戚。梁王肜違法,處深文案之。 (為人),才兼文武,若專斷而來,不可當也。 事君,父母復安得而子乎。今日是我死所也。」萬年聞之,曰:「周府君昔臨新 ·孫秀知其將死,謂之曰:「卿有老母,可以此辭也。」處曰:「忠孝之道,安得兩 如受制於人,此成擒耳。」旣 而 梁王肜

終。」言畢而戰,自旦及暮,斬首萬計。弦絕矢盡,播、系不救。左右勸退,處按劍曰:「此是 進,而絕其後繼。處知必敗,賦詩曰:「去去世事已,策馬觀西戎。 藜藿甘粱黍,期之克令 處進計,乃與振威將軍盧播、雍州刺史解系攻萬年於六陌。將戰,處軍人未食,肜促令速 才,進不求名,退不畏咎。 信,勢必不振。我爲大臣,以身徇國,不亦可乎!」遂力戰而沒。追贈平西將軍,賜錢百萬, 吾效節授命之日,何退之爲!且古者良將受命,鑿凶門以出,[m]蓋有進無退也。 今諸軍負 七萬,而駿逼處以五千兵擊之。處曰:「軍無後繼,必至覆敗,雖在亡身,爲國取恥。」彫復命 葬地一頃,京城 人,爲處前鋒,必能殄寇。 念,給其醫藥酒米,賜以終年。」 《地五十畝爲第,又賜王家近田五頃。詔曰:「處母年老,加以遠人, 殷每愍 不然,形當使處先驅,其敗必也。」朝廷不從。 周處吳人,忠勇果勁,有怨無援,將必喪身。宜詔孟觀以精兵萬 時賊屯梁山, 有衆

案諡法執德不 郡,安人立 書名良史。」及元帝爲晉王,將加處策諡,太常賀循議曰:「處履德淸方,才量 斧。人之云亡,貞節克舉。」又西戎校尉閻纘亦上詩云:「周全其節,令問不已。 處著默語三十篇及風土記,幷撰集吳書。時潘岳奉詔作關中詩曰:「周徇師令,身膏齊 一政;入司百僚,貞節不撓;在戎致身,見危授命:此皆忠賢之茂實,烈士之遠節。 回 日 孝。」 遂以諡焉。 有三子、冠、烯、札。 憐早卒、冠、札並知名。 高出,歷守四 身雖云沒,

列傳

故 名重一方。 **玘字宣佩。** 弱冠,州郡命,不就。[B] 刺史初到,召爲別駕從事,虛己備禮,方始應命。 累 强毅沈斷有父風,而文學不及。 閉門潔己,不妄交遊,士友咸望風敬憚焉,

Щ 史。 吳興太守顧祕都督揚州九郡軍事,及江東人士同起義兵,斬冰所置吳興太守區山 州,石冰攻揚州,刺史陳徽出奔,冰邃略有揚土。 薦名宰府,舉秀才,除議郞 趙鷺於蕪湖,因與玘俱前攻冰於建康。冰北走投封雲,雲司馬張統斬雲、冰以降, 冰遣其將羌毒領數萬人距冠,旺臨陣斬毒。 **玘不言功賞**,散衆還家。 昌等浸盛,殺平南將軍羊伊,鎭南大將軍、新野王歆等,所在覆沒。昌別率封雲攻徐 太安初,妖賊張昌、丘沈等聚衆於江夏,百姓從之如歸。 時右將軍陳敏自廣陵率衆助冠,斬冰別 迅密欲討冰,潛結前南平內史王矩,共推 惠帝使監軍華宏討之,敗于障 及諸 徐揚並 長

潰,單馬北走,獲之於江乘界,斬之於建康,夷三族。 軍、歷陽內史,以吳興錢廣爲司馬。 **令發兵臨江,己爲內應,翦髮爲信。** 陳敏反于揚州,以玘爲安豐太守,加四品將軍。 玘稱疾不行,密遣使告鎭東將軍劉準, 準在壽春, 遣督護衡彦率衆而東。 **玘密諷廣** 殺昶。 東海王越聞其名,召爲參軍。 **玘與顧榮、甘卓等以兵** 時敏弟昶爲廣武將 攻敏, 敏衆 韶補尙 奔

書郎、散騎郎,並不行。一元帝初鎭江左,以玘爲倉曹屬。

軍、八州都督,劫孫晧子克, 劉聰逼洛陽,畏愞不敢進。 計之,並以兵少未敢前。 , 起復率合鄉里義衆,與逸等俱進,討璯,斬之,傳首干·建康 陰欲殺敦,藉以舉事。 初,吳興 人錢璯亦起義兵討陳敏,越命爲建武將軍,使率其屬會于京都。 敦聞之,奔告帝。 帝促以軍期, 立爲吳王,旣而殺之。來寇玘縣。 璯乃謀反。 **璯遂殺度支校尉陳豐**, 時王敦遷尙書, 帝遣將軍郭逸、都尉 焚燒邸閣, 當應徵 白號 與璯俱西。 璯至 廣陵,聞 平西大將 宋典等 璯

興義兵、勳誠並茂,乃以陽羨及長城之西鄉、丹楊之永世別爲義興郡,以彰其功焉。 亂之後,百姓饑饉,盜賊公行。 **邱甚有威惠**,百姓敬愛之。 春年之間,境內 寧謐。 帝以玘頻 吳興 寇

諸執 改授 聞。 書與鐵, 怨望,復爲刁協輕之,恥恚愈甚。時鎭東將軍祭酒東萊王恢亦爲周顗所侮,乃與玘陰謀誅 建武將軍 政,推玘及戴若思與諸南士共奉帝以經緯世事。 **赶宗族强盛,人情所歸,帝疑憚之。于時中州人士佐佑王業,而**赶自以爲不得 令起兵,己當與玘以三吳應之。 、南郡太守。 田旣南行,至<u>蕪</u>湖,又下今日 「田奕世忠烈,義誠顯著,孤所欽 建興初,鐵已聚衆數百人,臨淮太守蔡豹斬鐵以 帝聞而祕之,召冠爲鎭東司馬, 先是,流人帥夏鐵等寓于淮泗,恢陰 未到,復 調,內懷

列

也。」吳人謂中州人曰「傖」,故云耳。贈輔國將軍,諡曰忠烈。子勰嗣。 謀泄,遂憂憤發背而卒,時年五十六。將卒,謂子勰曰:「殺我者諸傖子,能復之,乃吾子 今以爲軍 豁祭酒,將軍如故,進爵爲公,祿秩僚屬一同開國之例。」,玘忿於迴易,又知其

札 守袁琇,有衆數千,將奉札爲主。時人以疾歸家,聞而大驚,乃告亂於義興太守孔侃 怨。 世豪望,吳 俠樂亂者翕然附之,以討王導、刁協爲名。 生幾時,但當快意耳。」終於臨淮太守。 不同,不敢發兵。 勰因之欲起兵,潛結吳興郡功曹徐馥。 勰字彦和。 人所宗,故不窮治,撫之如舊。 常緘父言。時中國亡官失守之士避亂來者,多居顯位,駕御吳人,吳人頗 馥黨懼,攻馥,殺之。 孫弼衆亦潰,宣城太守陶猷滅之。 **勰爲札所責**,失志 孫皓族人酮亦起兵於廣德以應之。 酸家有部曲, 總使馥矯稱叔父札命以合衆, 豪 歸家,淫侈縱恣,每謂人曰:「 元帝以周氏 馥殺吳興太 加思

奕

知

勰弟彝,少知名,元帝辟爲丞相掾,早亡。

中、大司馬齊王冏參軍。 札字宣季。 性矜險好利,外方內荏,少以豪右自處,州郡辟命皆不就。 出補句容令,遷吳國上軍將軍。 辟東海王越參軍,不就。以討錢璯 察孝廉,除郎

贊大將軍從事中郎、武康縣侯、
贊弟縉太子文學、
都鄉侯,次兄子勰臨淮太守、
烏程公。
札 者,妖術惑衆,自言八百歲,故號李八百。自中州至建鄴,以鬼道療病,又署人官位,時人多 必不靜矣。周强而多俊才,宜先爲之所,後嗣可安,國家可保耳。」敦納之。時有道士李脫 敦曰:「夫有國者患於强逼,自古釁難恒必由之。 今江東之豪莫强周、沈,公萬世之後,二族 及敦疾,錢鳳以周氏宗强,與沈充權勢相侔,欲自託於充,謀滅周氏,使充得專威揚土,乃說 將軍、會稽內史。時札兄靖子懋晉陵太守、淸流亭侯,懋弟莚征虜將軍、至吳興內史,莚弟 有司彈奏,不得已乃視職。加散騎常侍。 事、東中郎將、鎭涂中,未之職、轉右將軍、都督石頭水陸軍事。 平,以札爲奮武將軍、吳興內史,錄前後功,改封東遷縣侯,進號征虜將軍、監揚州江 功,賜爵漳浦亭侯。 信事之。 門五侯,並居列位,吳士貴盛,莫與爲比,王敦深忌之。後遊喪母,送者千數,敦益憚焉。 王敦舉兵攻石頭,札開門應敦,故王師敗績。敦轉札爲光祿勳,尋補尚書。頃之,遷右 弟子李弘養徒灊山,云應讖當王。故敦使廬江太守李恒告札及其諸兄子與脫謀 元帝爲丞相,表札爲寧遠將軍、歷陽內史,不之職,轉從事中郎。 札腳疾,不堪拜,固讓經年,

旣

進軍

會稽,襲札。

時遊爲敦諮議參軍,卽營中殺遊及脫、弘,又遣參軍賀鸞就沈充盡掩殺札兄弟子,

札先不知,卒聞兵至,率麾下數百人出距之,兵散見殺。札性貪財好

色,惟以業產爲務。兵至之日,庫中有精杖,外白以配兵,札猶惜不與,以弊者給之,其鄙吝 如此,故士卒莫爲之用

所未悟。旣悟其姦萌,札與臣等便以身許國,死而後已,札亦尋取梟夷。朝廷檄命旣下,大 異!此言實貫於聖鑒。論者見姦逆旣彰,便欲徵往年已有不臣之漸。卽復使爾,要當時衆 隆人主巍巍之功耳。 若原情考徵也。 議,必

札之

開門

興

護

王、

周、

戴

異。 同例,事異賞均,意所疑惑。如司徒議,謂往年之事自有識以上皆與札不異,此爲邪正坦然 事旣定,便正以爲逆黨。邪正失所,進退無據,誠國體所宜深惜。臣謂宜與周顗、戴若思等 |導議以「||札在||石頭, 忠存社稷,義在亡身。 至於往年之事, 自臣等有 識 以 上,與||札情豈有 宜受若此之責,何加贈復位之有乎!今據已顯復,則札宜貶責明矣。」導重議曰:「省令君 有 同例。」尚書令郗鑒議曰:「夫褒貶臧否,宜令體明例通。今周、戴以死節復位,周札以開門 之役開門延寇,遂使賊敦恣亂,札之責也。追贈意所未安。懋、莚兄弟宜復本位。」司徒王 及敦死,札、遊故吏並詣闕訟周氏之冤,宜加贈諡。事下八坐,尚書卞壼議以「札石頭 **昔宋文失禮,華樂荷不臣之罰,齊靈嬖孼,高厚有從昏之戮。以古況今,譙王、周、戴** 論者謂凡知隗、協亂政,信敦匡救,苟匡救信,姦佞除,即所謂流四凶族以 如此,札所以忠於社稷也。後敦悖謬出所不圖,札亦闔門不同,以此 今札開門,直出風言,竟實事邪。便以風言定褒貶,意莫

列 傳 第 + 八 周 處

美談。 陵廷爭,可不謂忠乎? 也。 召忽死爲失。 隗 順,受戮凶邪,不負忠義明矣。」鑒又駁不同,而朝廷竟從導議,追贈札衞尉,遣使者祠以 之貞節者,于時朝士豈惟周札邪!若盡謂不忠,懼有誣乎譙王、周、戴。各以死衞國,斯亦 滅族,是其死於爲義也。夫信敦當時之匡救,不圖將來之大逆,惡隗、協之亂政,不失爲臣 人臣之節 協矣。 漢祖 固知 。昔子糾之難,召忽死之,管仲不死。若以死爲賢,則管仲當貶,若以不死爲賢,則 遺約,非劉氏不王,非功臣不侯,違命天下共誅之。後呂后王諸呂,周勃從之,王 也。 **|死與不死,爭與不爭,苟原情盡意,不可定於一概也。且||人闔棺定諡,違逆黨** 先典何以兩通之? 明爲忠之情同也。死雖是忠之一目,亦不必 爲忠皆當死 但所見有同異,然期之於必忠,故宜申明耳。 周勃誅呂尊文,安漢社稷,忠莫尙焉,則王陵又何足言,而前史兩爲 即如令君議,宋華、齊高 其在

札長子澹,太宰府掾。次子雅,察孝廉,不行。

少牢。

到,爲一 元帝議欲討之, |莚卓犖有才幹,拜征虜將軍、吳興太守,遷黃門侍郎。|徐馥之役,|莚族兄續亦聚衆應 郡所敬。 意謂 王導以爲「兵 直遣莚,足能殺續」。 (少則) 不足制寇,多遣則根本空虛。黃門侍郎周莚忠烈至 於是詔以力士百人給莚,使輕騎還陽羨。 遊卽

不許,委罪於從兄邵,誅之。。遊不歸家省母,遂長驅而去,母狼狽追之。其忠公如此。 刃逼遊,遊叱郡傳教吳曾:「何不舉手」」曾有膽力,便以刀環築續,殺之。 不肯入,莚逼牽與俱。 日 取道,晝夜無行。 既至郡,將入,遇續於門,莚謂續曰:「宜與君共詣孔府君,有所論。」續 坐定,莚謂太守孔侃曰:「府君何以置賊在坐。」續 衣裹帶小刀,便操 莚因欲誅勰, 札拒

後,與札同被復官。 三千人討沈充,未發而王師敗績。 遷太子右衞率。 及王敦作難,加冠軍將軍、都督會稽吳興義興晉陵東陽軍事,率水軍 |莚聞||札開城納敦,憤咤慷慨形于辭色。 尋遇害。 敦平

初,遊於姑親立屋五間,而六梁一時躍出墮地,衡獨立柱頭零節之上,甚危,雖以人功,

不能然也。後竟覆族。

遊弟縉,少無行檢,

嘗在建康烏衣道中逢孔氏婢,

時與同僚二人共載,便令左右捉婢上

車,其强暴若此。

周 訪 子撫 撫子楚 楚子瓊 瓊子虓 撫弟光 光子仲孫

祖纂,吳威遠將軍。 周訪字士達,本汝南安城人也。 父敏,左中郎將。訪少沈毅,謙而能讓,果於斷割,周窮振乏,家無餘財。 漢 末 避 地江南,至訪四世。 吳平,因家 廬江 尋陽焉。

令,皆不之官。 鄉人盜訪牛於冢間殺之,訪得之,密埋其肉,不使人 爲縣功曹,時陶侃爲散吏,訪薦爲主簿,相與結友,以女妻侃子瞻。 訪察孝廉、除郎中、上甲 知

口,約等又敗。 訪率衆擊破之。 卓、趙誘計華軼。 十人皆散走,而自歸於帝,帝不之罪。尋以爲揚烈將軍,領兵一千二百,屯尋陽 訪、
、、
、
、
、
、
、
、
、
、
、
、
、
、
、
、
、
、
、
、
、
、
、
、
、
、
、
、
、
、
、
、
、
、
、
、
、
、
、
、
、
、
、
、
、
、
、
、
、
、
、
、
、
、
、
、
、
、
、
、
、
、
、

< 及元帝渡江, 訪與甘卓等會於<u>彭澤,與</u>軼水軍將朱矩等戰,又敗之。 軼將周廣燒城以應 逸遁保柴桑, 訪乘勝進討。 軼遣其黨王約、傅札等萬餘人助逸,大戰於湓 命參鎭東軍事。 所統厲武將軍丁乾與軼所統武昌太守馮逸交通,訪收斬之。 時有與訪同姓名者,罪當死, 吏誤收訪,訪奮擊收者,數 鄂陵, 逸來攻訪, 與甘

陣鳴鼓 官軍 未 彦交戰,彦軍退走,訪率帳下將李午等追彦,破之,臨陣斬彦。 形色不 豫章,焚燒城邑。 曉 船艦,訪作長岐棖以距之,桔槹不得爲害。而賊從靑草湖密抄官軍,又遣其將張彥陷 而 帝以訪爲振武將軍、尋陽太守,加鼓吹、曲蓋。復命訪與諸軍共征杜弢。 退。 而來,大呼曰:「左軍至!」士卒皆稱萬歲。至夜,令軍中多布火而食,賊謂官軍益至, 及暮,訪與賊隔水,賊衆數倍,自知力不能敵,乃密遣人如樵採者而出,於是結 訪 謂 諸 王敦時鎭湓口,遣督護繆蕤、李恒受訪節度,共擊彦。 蕤於豫章石頭,與 將 曰:「賊必引退,然終知我無救軍,當還掩人,宜促渡水北。」旣渡,斷橋 時訪爲流矢所中,折前兩齒, 弢作桔槹打

列

海香。 訖, 而 軍人競拾之,弘因陣亂突圍而出。訪率軍追之, 城自守。 率兵逆擊,又破之,奔于臨賀。帝又進訪龍驤將軍。 賊果至,隔水不得進,於是遂歸湘州。 時湓口騷動,訪步上柴桑,偸渡,與賊戰,斬首數百。 尋而軍糧爲賊所掠, 退住巴丘。 糧廩旣至, 訪復以舟師造湘城,軍達富口, 獲鞍馬鎧 王敦表爲豫章太守。 復圍弘 杖不 賊退保廬陵,訪 於廬陵。 可 **游數。** 弘 弘入南康, 大 加征討都督, / 擲寶 追擊敗之,賊嬰 而弢遣杜弘 物 於城 太守將 賜 出

戰,自旦至申,兩甄皆敗。訪聞鼓音,選精銳八百人,自行酒飲之,敕不得妄動, 謀也。」使將軍李恒督左甄,許朝督右甄,訪自領中軍,高張旗幟。 沔。元帝命訪擊之。訪有衆八千,進至<u>沌陽。</u>曾等銳氣甚盛,訪曰:「先人有奪人之心,軍之善 會勇冠三軍,訪甚惡之,自於陣後射雉以安衆心。 將軍黃峻等討會,而大敗於女觀湖,誘、軌並遇害。會遂逐廛,徑造沔口,大爲寇害,威震江 不克,引兵向江陵。 關 爵尋陽縣侯。 。賊率杜會、擊瞻、胡混等並迎猗,奉之,聚兵數萬,破陶侃於石城,攻平南將軍荀崧於宛, 時 一趙胤 梁州刺史張光卒,愍帝以侍中第五猗爲征南 領其父餘兵屬左甄,力戰,敗而復合。 王敦以從弟廙爲荆州刺史,令督護征虜將軍趙誘、襄陽 令其衆曰:「一甄敗、鳴三鼓、 胤馳馬告訪、訪怒、叱令更進。 大將軍,監開、梁、益、寧四州, 曾果畏訪,先攻左右 太守朱軌、陵江 兩甄 聞鼓音乃 胤 出自武 號哭還 敗,鳴

列傳第二十八 周訪

謂其僚佐曰:「昔城濮之役,晉文以得臣不死而有憂色,今不斬會,禍難未已。」於 敦,說猗逼於會,不宜殺。敦不從而斬之。進位安南將軍、持節,都督、刺史如 意,又擊破之,曾遁走。訪部將蘇溫收曾詣軍,幷獲第五猗、胡混、擊瞻等,送於王敦。 而進,遂定漢沔。曾等走固武當。訪以功遷南中郎將、督梁州諸軍、梁州 待明日,訪曰:「會驍勇能戰,向之敗也,彼勞我逸,是以克之。 贼未至三十步,

訪親鳴鼓,將士皆騰躍奔赴,

曾遂大潰,殺千餘人。

訪夜追之,諸將請 初,王敦懼杜會之難,謂訪曰:「擒會,當相論爲荆州刺史。」及是而敦不用。 宜及其衰乘之, 刺史,屯 可滅。」鼓行 至王廙· 是出 襄陽 其不 叉白 去 訪

陰欲 訪大 不敢 **寇難荒弊,實爲用武之國,若以假人,將有尾大之患,公宜自領,訪爲梁州足矣。」敦從之。** 職,詔以訪爲荆州。敦以訪名將,勳業隆重,有疑色。 功之有 有異。 過之。 撫納,士衆皆爲致 人有小 <u>.</u>! 士以 敦手書譬釋,幷遺玉環玉椀以申厚意。 訪投椀于地曰:「吾豈賈豎,可以實悅乎」 善,鮮不自稱。 訪威 旣在襄陽,務農訓卒,勤于採納,守宰有缺輒補,然後言上。敦患之,而憚其强, 此重之。 風旣著,遠近悅服,智勇過人,爲中興名將。 性謙虛,未嘗論功伐。 死。 訪練兵簡卒,欲宣力中原,與李矩、郭默相結,慨然有平河洛之志。 卿功勳如此,初無一言何也。」訪曰:「朝廷威靈,將士用命,訪何 聞敦有不臣之心,訪恒切齒。敦雖懷逆謀,故終訪之世未敢 其從事中郎郭舒說敦曰:「鄙州雖遇 或問訪

爲非。

壽,周當下壽,優劣更由年耳。」訪小侃一歲,太興三年卒,時年六十一。帝哭之甚慟, 征西將軍、諡 初,訪少時遇善相者廬江陳訓,謂訪與陶侃曰:「二君皆位至方嶽, 曰壯,立碑於本郡。 二子:撫、光。 功名略同,但陶得上 詔贈

納之。 揚將軍、武昌太守。 將資遺其兄,而陰欲取緣。 軍事、CKD南中郎將、鎭沔中。 何忍殺之!由是俱得免。 曰:「何不速去!今骨肉尙欲相危,況他人乎!」嶽迴船而 撫字道和。 初,嶽爲西陽,欲伐諸蠻,及是諸蠻皆怨,將殺之。 强毅有父風,而將御不及。 王敦 命爲從事中郎, 明年,韶原 撫怒曰:「我與伯山同亡,何不先斬我!」會緣至, 撫出門遙謂之 及敦作逆, 敦黨、嶽、撫詣闕請罪,有詔禁錮之。 撫領二千人從之。敦敗,撫與嶽俱亡走。撫弟光 與鄧嶽俱爲敦爪牙。甘卓遇害,敦以撫爲沔北 元帝辟爲丞相掾,父喪去官。服闋,襲爵,除鷹 走,撫遂共入西陽蠻中,蠻鱼向蠶 蠶不聽,日:「鄧府君窮來歸我,我

奔于武昌,坐免官。 咸 峻平,遷監沔北軍事、南中郎 和 初,司 徒王導以撫 專遷振威將軍、豫章太守,後代毌丘奧監巴東諸軍事、益州刺史、假節· 爲從事中郎,出爲寧遠將軍、江夏相。 將,鎭 寒陽。 石勒將郭敬 | 率騎 蘇峻作逆,率所領從溫嶠 攻撫,撫不能守,率所領

將軍如故。尋進征虜將軍,加督寧州諸軍事。

立范賢子賁爲帝。初,賢爲李雄國師,以左道惑百姓,人多事之,賁遂有衆一萬。 寇隗文、鄧定等,斬僞尚書僕射王誓、平南將軍王潤,以功遷平西將軍。 永和初,桓溫征蜀,進撫督梁州之漢中巴西梓潼陰平四郡軍事,鎮彭模。 隗文、鄧定等復反, 撫擊破蜀餘 撫與龍驤

將軍朱燾擊破斬之,四以功進爵建城縣公。

撫討之,不能拔,引退。 征西督護蕭敬文作亂,殺征虜將軍楊謹,公據涪城,自號益州牧。 溫又令梁州刺史司馬勳等會撫伐之。敬文固守,自二月至于八月, 桓溫使督護鄧遐助

乃出降,撫斬之,傳首京師。

升平中,進鎭西將軍。在州三十餘年,興寧三年卒,贈征西將軍,諡曰襄。子楚嗣。

冠軍將軍。 州、假節,襲爵建城公。 年號鳳皇。 楚字元孫。 太和 叉隴西 中,蜀盜李金銀、「亞」廣漢妖賊李弘並聚衆爲寇,爲稱李勢子,當以聖道王, 起家參征西軍事,從父入蜀,拜鷹揚將軍、犍爲太守。父卒,以楚監梁益二 人李高詐稱李雄子,破涪城。 世在梁益,甚得物情。時梁州刺史司馬勳作逆,楚與朱序討平之,進 梁州刺史楊亮失守,楚遣其子討平之。是

歲,楚卒,諡

日定。

子瓊嗣。

降,朝廷以爲東羌校尉。 瓊勁烈有將略,歷數郡,代楊亮爲梁州刺史、建武將軍, 後衝反,欲入漢中,安定人皇甫釗、 京兆人周勳等謀納衝 領西戎校尉。 初,氏人竇衝求 瓊密知

之,收到

、勳等斬之。

尋卒。

子虓嗣。

微臣,猶 漆 身吞炭,不忘忠節。 虓不遜,屢請除之。 戎士二十萬,旌旗數百里,又問號曰:「朕衆力何如。」號曰:「戎狄已來,未之有也。」堅黨以 追得之。 如此?」虓攘袂厲聲曰:「戎狄集聚,譬猶犬羊相羣,何敢比天子」」及呂光征 入見堅,輒箕踞而坐,呼之爲氐賊。 獲"失節於此。 將朱肜邀而獲之,虓遂降于安。 寧康 虓字孟威。 後又與壓兄子苞謀襲壓,[103事泄,壓引虓問 初,苻堅將楊安寇梓潼,虓固守涪城,遣步騎數千,送母妻從漢水將抵江陵, 母子獲全,秦之惠也。 少有節操。 堅待之彌厚。 州召爲祭酒,後歷位至西夷校尉,領梓潼太守。 况虓世荷晉恩, 豈敢忘也。 堅欲以爲尙書郎,虓曰:「蒙國厚恩,以至今日。 虓乃密書與恒沖,說賊姦計。 堅不悅。屬元會,威儀甚整,堅因謂虓曰:「晉家元會何 雖公侯之貴,不以爲榮,況郎任乎」堅乃止。 其狀,虓曰:「昔漸離、 生爲晉臣,死爲晉鬼,復何問 太元三年,虓潛至漢中,堅 西域,堅出餞之, 豫讓, 但老 燕、智之 自是每 母見 爲堅

列傳第二十八 周訪

乎」堅曰:「今殺之,適成其名矣。」遂撻之,徙于太原。後堅復陷順陽、魏興,獲二守,皆執 節不撓,堅歎曰:「周孟威不屈於前,丁彦遠潔己於後,吉祖沖不食而死,皆忠臣也。」

百匹。」又贍賜其家。 烈。未及拔身,奄隕厥命。 庭,遂嬰禍荒裔,痛麌泉壤。臣每悲其志,以爲蘇武之賢,不復過也。前宣告幷州,訪 表功,崇義明節,所以振揚聲敎,垂美來葉。 殊節,使負霜之志不墜於地,則榮慰存亡,惠被幽顯矣。」孝武帝詔曰:「虓厲志貞亮,無愧古 喪,幷索其家。 |虓竟以病卒於太原。 其子興迎致其喪,冠軍將軍|謝玄親臨哭之,因上疏曰:「臣聞旌善 負荷數千,始得來至。卽以資送,還其舊隴。伏願聖朝追其志心,曰己表其 甄表義節,國之典也。 故西夷校尉、梓潼太守周虓、執心忠烈、厲節寇 贈龍驤將軍、益州刺史,賻錢二十萬,布 求姚

闔廬洲,光捕鳳,詣闕贖罪,故得不廢。蘇峻作逆,隨溫嶠力戰有功。 乎。」遽見其兄撫曰:「王公已死,兄何爲與錢鳳作賊。」衆並愕然。其夕,衆散,錢鳳走出,至 問,竊謂無復見勝。」敦笑以爲寧遠將軍、尋陽太守。及敦舉兵,光率千餘人赴之。旣至,敦 已死,光未之知,求見敦。王應祕不言,以疾告。光退曰:「今我遠來而不得見王公,公其死 光少有父風,年十一,見王敦,敦謂曰:「貴郡未有將,誰可用者。」光曰:「明公不恥下 峻平,賜爵曲江男,

卒官。

多寇、周氏世有威稱、復除仲孫監益、豫、梁州之三郡。 子仲孫、興寧初督寧州軍事、振武將軍、寧州刺史。 寧康初,楊安寇蜀,仲孫失守,舜官。 在州貪暴,人不堪命。 桓溫以梁益

後徵爲光祿勳,卒。

世爲益州四十一年,如其所言云。 山汙中,其地若葬,位極人臣矣。」又指一山云:「此亦其次,當世出二千石。」言訖不見。 侃 初,陶侃微時,丁艱,將葬,家中忽失牛而不知所在。 遇一老父,謂曰:「前崗見一牛眠

後雖假手凶徒,可謂罪人斯得。 終獲戾於權右,强弗如弱,信有徵矣。而、人受委扞城,乃開門揖盜,去順效逆,彼實有之。 思難,斯爲隘矣。終於憤恚,豈不惜哉! 宣佩奮茲忠勇,屢殄妖氛,威略冠於本朝,庸績書於王府。 比 凶蛟猛獸,縱毒鄉閭,終能克己厲精,朝聞夕改,輕生重義,徇國亡驅,可謂志節之士也。 史臣曰:夫仁義豈有常,蹈之卽君子,背之卽小人。周子隱以跅弛之材,負不羈之行, 朝廷議加榮贈,不其僭乎!有晉之刑政陵夷,用此道也。 |札莚等負儁逸之材, 以雄豪自許, 始見 旣而結憾朝宰,潛構異圖,忿不 疑於朝廷,

周訪器兼文武,任在折衝,戡定湘羅,克淸江漢,謀孫翼子,杖節擁旄,西蜀仰其威風, 中興

推爲名將,功成名立,不亦美乎!」孟威陷迹虜廷,抗辭爲主,雖圖史所載,何以加 焉

遊實懷忠。

尋陽緯武,擁旄持斧。 贊曰:平西果勁,始邪末正。 勇足除殘, 忠能致命。 日子日孫,重規疊矩。 孟威抗烈,心存舊主。 宣佩懋功,三定江 東。 札雖啓敵,

校勘記

- (一) 人謂死 經覽四三五、册府八九七「謂」下有「已」字。
- ベニシ 然始就徵 通志一二四下「始」作「後」。
- 鑿凶門以出 遞別傳「凶」上有「鑿」字。 按:御覽三一二引晉書正有「鑿」字。 語出潍南子兵略,當有「鑿」字,處別傳「凶」上有「鑿」字。 按:御覽三一二引晉書正有「鑿」字。 語出潍南子兵略,當有「鑿」字, 原無「鑿」字。|李校:「凶門」上當脫一「鑿」字。||斠注:類聚二〇、御覽四一七引周
- 今據補。
- 州郡命不就通志一二四下「命」上有「辟」字。
- 万五山 懋弟莚 「莚」,各本作「筵」,今從宋本。通鑑九二、九三、通志三四下亦作「莚」。下同。
- 以撫爲沔北諸軍事 通鑑九二「爲」作「督」。
- 朱熹 列 傅 原作「朱壽」,穆帝紀及庾翼、毛穆之、朱序等傳、通鑑九八、建康實錄八均作「朱燾」,今 + 八 椌 記

據改。

楊謹 勞校"本紀作「楊謙」。按"通鑑九七亦作「楊謙」。

李金銀 周校:廢帝紀作「李金根」。

〔10〕堅兄子苞

追其志心 勞校:載記「苞」作「陽」。

李校:「志心」疑是「忠心」之誤。按:册府一三七正作「忠心」。

晉書卷五十九

列傳第二十九

畿。洎成哀之後,戚藩陵替,君臣乘茲間隙,[1]竊位偸安。光武雄略緯天,慷慨下國,遂能除 吹齎,土地封疆,踰越往古。始則韓彭菹醢,次乃吳楚稱亂。 **祖勃興,爰革斯弊。於是分王子弟,列建功臣,錫之山川,誓以帶礪。然而矯枉過直,懲羹** 外闕藩維之助。陳項一呼,海內沸騰,隕身於望夷,繫頸於軹道。 克昌,卜年之基惟永。 至乎子弟,並爲匹夫,惟欲肆虐陵威,莫顧謀孫翼子。 枝葉微弱,宗祏孤危,內無社稷之臣, 戒衰周之削弱,忽帝業之遠圖,謂王室之陵遲,由諸侯之强大。於是罷侯置守,獨尊諸己, 封建親賢,並爲列國。當其興也,周召贊其升平,及其衰也,桓文輔其危亂。故得卜世之祚 迹可知。 自古帝王之臨天下也,皆欲廣樹藩屏,崇固維城。唐虞以前,憲章蓋闕,夏殷以後,遺 然而玉帛會于塗山,雖云萬國,至於分疆胙土,猶或未詳。 逮王赧卽世,天祿已終,虛位無主,三十餘載。 然雖克滅權偪, 事不師古,二世而滅。 泊乎周室, 爱及暴秦, 幷吞天下, **殖足維翰王** 、粲焉可觀,

列

傳

庇廕,遂乃三葉而亡。

兇靜亂,復禹配天,休祉盛於兩京,鼎祚隆於四百,宗支繼絕之力,可得而言。 之宏規,行忌刻之小數,功臣無立錐之地,子弟君不使之人,徒分茅祉,實傳虛爵,本根 魏武 志 無所 經國

莽卓。 則爲 輿幽縶,更同羑里。胡羯陵侮,宗廟丘墟,良可悲也。 託 失所,授任乖方,政令不恒,賞罰斯濫。或有材而不任,或無罪而見誅,朝爲伊周,夕爲 身擇利,利未加而害及,初迺無心憂國,國非憂而奚拯!遂使昭陽興廢,有甚弈棊,乘 有晉思改覆車,復隆盤石,或出擁旄節,蒞嶽牧之榮,入踐台階,居端揆之重。 機權失於上,禍亂作於下。楚趙諸王,相仍構釁,徒興晉陽之甲,竟匪勤王之師。 然而 始 付

俱亡, 禍者,咎在八王,故序而論之,總爲其傳云耳。 重宗社,日 何以言之? 大憝,則 險 ,蕃屏式固,禍亂何以成其階!向使八王之中,一蕃緊賴,如梁王之禦大敵,若朱虛之除 夫 身名並 **「爲國之有藩屏,猶濟川之有舟楫,安危成敗,義實相資。 舟楫且完,波濤不足稱其** 外寇焉敢憑陵,內難奚由竊發!縱令天子暗劣,鼎臣奢放,雖或顚沛,未至土崩。 琅邪譬彼諸王,權輕衆寡,度長絜大,不可同年。 遂能匹馬濟江,奄有吳會,存 百有 滅。 餘年。 善惡之數,此非其效歟!西晉之政亂朝危,雖由時主,然而煽其風,速其 雖曰天時,抑亦人事。 豈如趙倫、齊冏之輩, 河間、東海之徒, 家國

汝南王亮子粹 矩 羕 宗 熙 矩子祜

軍劉旂、騎督敬琰赴救,不進,坐是貶爲平西將軍。旂當斬,亮與軍司曹冏上言,節度之咎 節,出監豫州諸軍事。 東中 奔突有投,而坐視覆敗,故加旂大戮。今若罪不在旂,當有所在。」有司又奏発亮官,削爵 置騎司馬,增參軍掾屬,持節、都督關中羅涼諸軍事。 加侍中之服。 土。詔惟発官。 由亮而出,乞丐旂死。詔曰:「高平困急,計城中及旂足以相拔,就不能徑至,尙當深進。 郎將,進封廣陽鄉侯。討諸葛誕於壽春,失利,発官。 汝南文成王亮字子翼,宣帝第四子也。 頃之,拜撫軍將軍。是歲,吳將步闡來降,假亮節都督諸軍事以納之。 五等建,改封祁陽伯,轉鎭西將軍。 少淸警有才用,仕魏爲散騎侍郎、萬歲亭侯,拜 會秦州刺史胡烈爲羌虜所害,亮遣將 頃之,拜左將軍,加散騎常侍、假 武帝踐阼,封扶風郡王,邑萬戶,

本官如故,使訓導觀察,有不遵禮法,小者正以義方,大者隨事聞奏。 曰:「伏妃可謂富貴矣。」其年進號衞將軍,加侍中。時宗室殷盛,無相統攝,乃以亮爲宗師, 太妃嘗有小疾,祓於洛水,亮兄弟三人侍從,並持節鼓吹,震耀洛濱。武帝登陵雲臺望見, 咸寧初, 以扶風池陽四千一百戶爲太妃伏氏湯沐邑,置家令丞僕,後改食南郡枝江

列

第二十

九

汝南

王亮

犢車,錢五十萬。 頃之,徵亮爲侍中、撫軍大將軍,領後軍將軍,統冠軍、步兵、射聲、長水等 三年,徙封汝南,出爲鎭南大將軍、都督豫州諸軍事、開府、假節,之國,給追鋒車、阜輪

營,給兵五百人,騎百匹。 遷太尉、錄尚書事、領太子太傅,侍中如故

與太保衛 猷, 以康 已,表求過葬。 聞之,從中書監華廙索詔視,遂不還。帝崩,亮懼駿疑己,辭疾不入,於大司馬門外敍哀而 鎮許昌,加軒懸之樂,六佾之舞。封子、蒙爲西陽公。未發,帝大漸,詔留亮委以後事。 人而 「大司馬、汝南王亮體道沖粹,通識政理,宣翼之績顯於本朝,二南之風流于方夏,將憑遠 懼爲 及武帝寢疾,爲楊駿所排,乃以亮爲侍中、大司馬、假黃鉞、大都督、督豫州諸軍事,出 王化。 瓘對掌朝政。」亮論賞誅楊駿之功過差,欲以苟悅衆心,由是失望。 人所計」或說亮率所領入廢駿,亮不能用,夜馳赴許昌,故得免。及駿誅,詔曰: 駿欲討亮,亮知之,問計於廷尉何勖。 勖曰:「今朝廷皆歸心於公,公何不討 其以亮爲太宰、錄尚書事,入朝不趨,劍履上殿,增掾屬十人,給千兵百騎,

許,促兵攻之。長史劉準謂亮曰:「觀此必是姦謀,府中俊乂如林,猶可盡力距戰。」又弗聽, 不聽。 謀,矯詔遣其長史公孫宏與積弩將軍李肇夜以兵圍之。帳下督李龍白外有變,請距之,亮 楚王 俄然楚兵登牆而呼,亮驚曰:「吾無二心,何至於是!若有詔書,其可見乎?」宏等不 璋有勳而好立威,亮憚之,欲奪其兵權。璋甚憾,乃承賈后旨,誣亮與瓘有廢立之

粹、矩、蒙、宗、熙。 朝服一襲,錢三百萬,布絹三百匹,喪葬之禮如安平獻王字故事,廟設軒懸之樂。 爲亂兵所害,投于北門之壁,鬢髮耳鼻皆悉毀焉。及暐誅,追復亮爵位,給東園溫明祕器, 于車下,時人憐之,爲之交扇。將及日中,無敢害者。 逐爲肇 所執,而歎曰:「我之忠心可破示天下也,如何無道,枉殺不辜!」是時大熱,兵人坐亮 暐出令曰:「能斬亮者,賞布千匹。」遂 有五子:

粹字茂弘。早卒。

矩字延明。 拜世子,爲屯騎校尉,與父亮同被害。追贈典軍將軍,諡懷王。子滿立,是

爲威王。

軍。太寧中,進號衞將軍,加散騎常侍。咸和元年,薨,贈侍中、特進。 末,以寇賊充斥,遂南渡江,元帝命爲軍諮祭酒。建武初,爲鎭軍將軍。 并前二萬五千戶。

越征汲桑,表留

滿領兵三千守許昌,加鼓吹、

塵旗。

越還,

滿歸國。 之,特置四部牙門。永興初,率衆依東海王越,討劉喬有功,拜揚武將軍,以江夏雲杜益封, 「肺字水飲。永安中,從惠帝北征。帝遷長安,肺反國。及帝還洛,以征南兵八百人給 太興末,領左軍將

列傳第二十九 汝南王亮

劉稚謀反,推遵之爲主,事泄,伏誅。 監、侍中。 王統 薨,追贈光祿勳。 立,以南頓王宗謀反, 子義立,[三]官至散騎常侍。 弟楷之子蓮扶立。 被廢。 其後成帝哀亮一 宋受禪,國除。 薨,子遵之立。 門殄絕, 韶統復封, 義熙初,梁州刺史 累遷秘書

爲撫軍將軍,又以汝南期思、西陵益其國。永嘉初,拜鎭軍將軍,加散騎常侍,領後軍將軍, |楷與之親婣,竊之以逃,一夜八遷,故得觅。及||瑋誅,進爵爲王,歷步兵校尉、左軍驍騎將 元康初,進封郡王。 羕字延年。 太康末,封西陽縣公,拜散騎常侍。 永興初,拜侍中。 以長沙王乂黨,廢爲庶人。惠帝還洛,復羕封, 亮之被害也, 蒙時年八歲, 鎮南將軍裝

室元老,特爲之拜。一樣放縱兵士劫鈔,所司奏免樣官,詔不問。及帝寢疾,樣與王導同受顧 荒梗,復還。及元帝踐作,進位侍中、太保。以<u></u>蒙屬尊,元會特爲設牀。太興初,錄尚書事 復以邾、蕲春益之,幷前三萬五千戶。隨東海王越東出鄄城,遂南渡江 尋領大宗師,加羽葆、斧鉞,班劍六十人,進位太宰。 及王敦平,領太尉。 明帝卽位,以崇宗 命輔成帝。 元帝承制,更拜撫軍大將軍、開府,給千兵百騎。 詔與南頓王宗統流人以實中州,江西 時帝幼沖、詔蒙依安平獻王字故事、設牀帳於殿上、帝親迎拜。咸和初、坐弟南

頓王宗免官,降爲弋陽縣王。及蘇峻作亂,蒙詣峻稱述其勳,峻大悅,矯詔復漾爵位。

峻

爲庶人。咸康中,復其屬籍。綽爲奉車都尉、奉朝請。 之。宗以兵距戰,爲胤所殺,貶其族爲馬氏,徙妻子于晉安,旣而原之。三子,綽、超、演,廢 爲大宗正。宗遂怨望形於辭色。咸和初,御史中丞鍾雅劾宗謀反,庾亮使右衞將軍趙胤收 之。及帝疾篤,宗、胤密謀爲亂,亮排闥入,升御牀,流涕言之,帝始悟。 明帝踐作,加長水校尉,轉左衞將軍。與虞胤俱 轉爲驃騎將軍。 帝以宗戚屬,每容

熙初封汝陽公,討劉喬有功,進爵爲王。永嘉末,沒於石勒。

楚王瑋

國,都督荆州諸軍事、平南將軍,轉鎭南將軍。武帝崩,入爲衞將軍,領北軍中候,加侍中、 楚隱王瑋字彥度,武帝第五子也。初封始平王,歷屯騎校尉。 太康末,徙封於楚,出之

淮南、長沙、成都王屯宮諸門,廢二公。」夜使黃門齎以授瑋。瑋欲覆奏,黃門曰:「事恐漏 行太子少傅。 使亮、瓘上太宰太保印綬、侍中貂蟬,之國,官屬皆罷遣之。又矯詔赦亮、瓘官屬曰「二公潛 領,徑詣行府。助順討逆,天所福也。懸賞開封,以待忠效。皇天后土,實聞此言。」又矯詔 今輒奉詔,

免二公官。

吾今受詔都督中外諸軍。

諸在直衞者皆嚴加警備,

其在外營,便相率 亂相仍。間者楊駿之難,實賴諸君克平禍亂。而二公潛圖不軌,欲廢陛下以絕武帝之祀。 命,譖亮、瓘於賈后。而后不之察,使惠帝爲韶曰:「太宰、太保欲爲伊霍之事,王宜宣詔,令 **瑋所昵。瓘等惡其爲人,慮致禍亂,將收盛。盛知之,遂與宏謀,因積弩將軍李肇矯稱瑋 瑋性很戾,不可大任,建議使與諸王之國,瑋甚忿之。長史公孫宏、舍人岐盛並薄於行,爲** 楊駿之誅也,瑋屯司馬門。瑋少年果銳,多立威刑,朝廷忌之。汝南王亮、太保衞瓘以

謀,欲危社稷,今殆還第。官屬以下,一無所問。 若不奉詔,便軍法從事。 能率所領先出降

者,封侯受賞。 朕不食言」。 遂收亮、瓘,殺之。

窘迫不知所爲,惟一奴年十四,駕牛車將赴秦王柬。 帝遣謁者詔瑋還營,執之於武賁署,遂 張華計, 遺殿中將軍王宮齎騶虞幡麾衆曰:「楚王矯詔。」衆皆釋杖而走。 瑋左右無復一人, 爲社稷,今更爲罪。託體先帝,受枉如此,幸見申列。」頌亦歔欷不能仰視。 情用悲痛,吾當發哀。」暐臨死,出其懷中靑紙詔,流涕以示監刑尚書劉頌曰:「受詔 風、雷雨礔礰。 下廷尉。 岐盛說瑋,可因兵勢誅賈模、郭彰,匡正王室,以安天下。瑋猶豫未決。 韶以暐矯制害二公父子,又欲誅滅朝臣,謀圖不軌,遂斬之,時年二十一。其日大 韶曰:「周公決二叔之誅,漢武斷昭平之獄,所不得已者。 廷尉奏璋已伏法, 公孫宏、岐盛並 會天明,帝用 而行,謂

以計相次誅之。永寧元年,追贈驃騎將軍,封其子範爲襄陽王,拜散騎常侍,後爲石勒所害。 **瑋性開濟好施,能得衆心,及此莫不隕淚,百姓爲之立祠。** 賈后先惡瓘、亮,又忌瑋,故

趙王倫

趙王倫字子彝,宣帝第九子也,母曰柏夫人。 第二十 九 楚 王 瑋 趙 王 偷 魏嘉平初,封安樂亭侯。 五等建,改封康

安子,拜諫議大夫。

傅。 論。 將、宣威將軍。 令,華、頠復 將軍、開府儀同三司,鎭關中。 與 可以齊禮 緝 同罪。 深交賈、郭,諂事中宮,大爲賈后所親信。求錄尚書,張華、裴頠固執不可。 宜自於一時法 武帝受禪、封琅邪郡王。 制而明典刑也。 不許。 有司奏倫爵重屬親,不可坐。 咸寧中,改封於趙,遷平北將軍、督鄴城守事,進安北將軍。 中,如友所正。」帝是|毅駁,然以|倫親親故,下詔赦之。 倫知裘非常,蔽不語吏, 坐使散騎將劉緝買工所將盜御裘,廷尉杜友正緝棄市, 倫 刑賞失中,氐羌反叛,徵還京師。 諫議大夫劉毅駁曰「王法賞罰,不阿貴賤,然後 與緝同罪,當以親貴議滅,不得闕而 尋拜車騎將軍、太子太 及之國,行東中 元康 初, 叉求尚書 遷征 倫當 郎 西 不

無嫡 事 之要,性貪冒,可假 張衡 朝 人傷太子無罪,與殿中中郎 事 愍懷 嗣 、殿中侍御史殷渾、右衞司馬督路始,使爲內應。 起 社 太子廢,使倫 禍 稷 將危,大臣將起大事。 必 相 及。 以濟事,乃說倫嬖人孫秀曰:「中宮凶 何不先謀之乎。」秀許諾, 領右軍將軍。時左衞司馬督司馬雅及常從督許超,並嘗給事 士猗等謀廢賈后,復太子,以華、願 而 公名奉 事 中宮,與賈、郭親 言於 倫, 事將起,而秀知太子聰明,若還東 妬 倫 無道,與賈 納 焉。 善 不可移,難 遂告通事令史張林 太子 謐等共 之廢 與 廢 圖 太子。 皆云 權 倫 東宮, 豫知 及省 執 今國 兵

謂逼百姓之望,翻覆以冤罪耳。 爲 后,時議皆以公爲賈氏之黨。 《太子報讎,亦足以立功,豈徒免禍而已。」倫從之。 秀乃微泄其謀,使謐黨頗聞之。 倫、秀 將與賢 人圖政,量已必不得志,乃更說倫曰:「太子爲人剛猛,不可私請。 今雖欲建大功於太子, 太子含宿怒, 必不加賞於明公矣。 此乃所以速禍也。今且緩其事,賈后必害太子,然後廢后, 明公素事賈

因勸謐等早害太子,以絕衆望。

于金 使持節、大都督、督 請手詔。 |壽妻賈午等,付暴室考竟。 詔尚書以廢后事,仍收捕賈謐等,召中書監、侍中、黃門侍郎、八 華林令駱休爲內應,迎帝幸東堂。遂廢賈后爲庶人,幽之于建始殿。收吳太妃、趙粲及韓 皆從之。 閭 坐,皆夜入殿,執張華、裴頠、解結、杜斌等,於殿前殺之。尚書始疑詔 和,和從之,期四月三日丙夜一籌,以鼓聲爲應。至期,乃矯詔敕三部司馬曰:「中宮與賈 太子旣遇害,倫、秀之謀益甚,而超、雅懼後難,欲悔其謀,乃辭疾。一秀復告右衞依飛督 倫又矯詔開門夜入,陳兵道南,遣翊軍校尉、齊王冏將三部司馬百人,排閣而入。 誅趙粲 倫等以爲沮衆,斬之以徇。明日,倫坐端門,屯兵北向,遣尙 叔父中護軍趙浚及散騎侍郎韓豫等, 中外諸軍 事、相國,侍中、王如故, 一依宣文輔魏故事,置左右長史、司 內外羣官多所 書和郁 有詐, 郎師景露版奏 持節送賈 倫 尋矯詔 庶人 自爲

列

傅

第

+

九

馬、從事中郎四人、參軍十人,掾屬二十人、兵萬人。以其世子散騎常侍|養領宂從僕射,子 馥前將軍,封濟陽王,虔黃門郎,封汝陰王,翮散騎侍郎,封霸城侯。 孫秀等封皆大郡,並據

兵權,文武官封侯者數千人,百官總己聽於倫

琅邪 君子 從 之,厚待晉興,以爲己部曲督。 事 不樂其生矣。 游顥與殷渾有隙,渾誘顥奴晉興,僞告顥有異志。秀不詳察,卽收顥及襄陽中正李邁, 小史,累官於趙國,以諂媚自達。 倫 素庸下,無智策,復受制於秀,秀之威權振於朝廷,天下皆事秀而無求於倫。 前衞尉石崇、黃門郎潘岳皆與秀有嫌,並見誅。於是京邑 旣執機衡,遂恣其姦謀,多殺忠良,以逞私欲。司隸 秀起自

徙彫爲丞相,居司徒府,轉準、逵爲外官。 西道 侍 右 允發憤,起兵討倫。 衞 中宣韶,然後受之。 增相 爲 將 淮 軍 外 南王允、齊王冏以倫、秀驕僭,內懷不平。秀等亦深忌焉,乃出冏鎭許,奪允護軍。 府兵 ,詡爲侍中。 徼。 或謂秀曰:「散騎常侍楊準 爲二萬人,與宿衞同,又隱 允旣敗滅,倫加九錫,增封五萬戶。倫僞爲飾讓,詔遣百官詣府敦勸, 加考撫軍將軍 又以孫秀爲侍中、輔國將軍、相 、領軍將軍,馥鎭軍 、黃門侍郎劉逵欲奉梁王||形以誅倫。] 會有星變,乃 匿兵士,衆過三萬。 國司馬,右 將軍、領護軍將軍,虔中軍 起東宮三門四 率 ·如故。 角華櫓、斷宮東 張林等並居顯 將軍、領

十,爲射聲校尉,尚帝女河東公主。 深謀遠略。「考淺薄鄙陋,馥、虔闇很强戾,翮愚嚚輕訬,而各乖異,互相憎毁。 倫 無學,不知書,秀亦以狡黠小才,貪淫昧利。所共立事者,皆邪佞之徒,惟競榮利,無 公主母喪未朞,便納聘禮。 會形貌短陋,奴僕之下者, 秀子會,年二

初與富室兒於城西販馬,百姓忽聞其尙主,莫不駭愕。

左衞 圧濬,中書侍郎陸機從,到城下而反。使張衡衞帝,實幽之也 惠帝乘雲母車,鹵簿數百人,自華林西門出居金墉城。尚書和郁,兼侍中、散騎常侍、琅邪 以禪位于倫。 威兼侍中,出納詔命,矯作禪讓之詔,使使持節、尚書令滿奮,僕射崔隨爲副,奉皇帝璽綬 帝於北芒爲趙王佐助,於是別立宣帝廟於芒山。謂逆謀可成。以太子詹事裴劭、左軍將軍 等屯守諸門。 **卞粹等二十人爲從事中郎,掾屬又二十人。秀等部分諸軍,分布腹心,使散騎常侍、義陽王** 王輿與前軍司馬雅等率甲士入殿,譬喻三部司馬,示以威賞,皆莫敢違。其夜,使張林 倫、秀並惑巫鬼,聽妖邪之說。秀使牙門趙奉詐爲宣帝神語,命倫早入西宮。 義陽王威及駱休等逼奪天子璽綬。 夜漏未盡,內外百官以乘輿法駕迎倫。 倫偽讓不受。於是宗室諸王、羣公卿士咸假稱符瑞天文以勸進,倫乃許之。 又言宣

改元建始。是歲,賢良方正、直言、秀才、孝廉、良將皆不試;計吏及四方使命之在京邑者,太 倫從兵五千人,入自端門,登太極殿,滿奮、崔隨、樂廣進璽綬於倫,乃僭卽帝位,大赦, 傳第二十 趙王倫

終矣 孝 府庫之儲 加以爵位。 司,張林等諸黨皆登卿將,並列大封。 將軍領軍、廣平王,詡爲侍中、撫軍將軍、霸城王, 學生年十六以上及在學二十年,皆署吏,郡縣二千石令長赦日在職者,皆封侯,郡綱紀並爲 亷 ,縣綱紀爲 不充於賜, 每朝會,貂蟬盈坐,時人爲之諺曰:「貂不足,狗尾續。」而以苟且之惠取悅 廉吏。 金銀冶鑄不給於印, 以世子樗爲太子,馥爲侍中、大司農、領護軍、京兆王, 其餘同謀者咸超階越次,不可勝紀,至於奴卒厮役亦 故有白版之侯, 孫秀爲侍中、中書監、驃騎將軍、儀同三 君子恥服其章, 百姓亦知其不 虔爲侍中、大 人情,

錄小兒幷 頃、飛去。 行夕改者數四,百官轉易如流矣。 時所居內府,事無巨細,必諮 倫 親祠太廟,還,遇大風,飄折麾蓋。 鳥閉置牢室,明旦開 又倫於殿上得異鳥,問皆不知名,累 而後行。 視,戶如故,並失 時有雉入殿中,自太極東階上殿,驅之, 倫之詔令,秀輒改革,有所與奪,自書青紙 孫秀旣立非常之事,倫敬重焉。 人鳥 日向夕,宫 所在。 西有素衣小兒言是服 倫目上有瘤,時以爲妖 秀住文帝爲相 更飛西鍾 劉 爲韶,或朝 鳥。 下, 倫使 有 國

倫 故吏爲三王參佐及郡守。 時 齊王冏、河間王顒、成都王穎並擁强兵、各據一方。 秀知冏等必有異圖,乃選親黨及

秀本與張林有隙,雖外相推崇,內實忌之。及林爲衞將軍,深怨不得開府,潛與 **灣** [8]

|秀勸倫誅林,倫從之。於是倫請宗室會於華林園,召林、秀及王輿入,因收林,殺之,誅

三族。

師。 軍,率兵七千自延壽關出,征虜張泓、左軍蔡璜、前軍閭和等率九千人自堮坂關出,鎭軍 破 輒合,雅等不得前。許超等與成都王穎軍戰于黃橋,殺傷萬餘人。泓徑造陽翟,又於城南 素親愛劉輿,秀乃使輿說虔,虔然後率衆八千爲三軍繼援。而泓、雅等連戰雖勝,義軍散而 稱仙人王喬,作神仙書,述倫祚長久以惑衆。秀欲遣馥、虔領兵助諸軍戰,馥、虔不肯。 虔 軍,以招福祐。一秀家日爲淫祀,作厭勝之文,使巫祝選擇戰日。又令近親於嵩山著羽衣,詐 馬雅、揚威莫原等率八千人自成皐關出。召東平王楙爲使持節、衞將軍,都督諸軍以距義 大震,祕之,而召虔及超還。 亂 攻泓等不利。 齊王冏 ,徑歸洛自首。 使楊珍晝夜詣宣帝別廟祈請,輒言宣帝謝陛下,某日當破賊。拜道士胡沃爲太平將 及三王起兵討倫檄至,倫、秀始大懼,遣其中堅孫輔爲上軍將軍,積弩李嚴爲折衝將 輜重,殺數千人,遂據城保邸閣。而冏軍已在潁陰,去陽翟四十里。冏分軍渡潁, 「恐乘勝至于潁上,夜臨潁而陣。 問縱輕兵擊之,諸軍不動,而孫輔、徐建軍夜 輔、建之走也,不知諸軍督尙存,乃云:「齊王兵盛,不可當 會泓敗冏露布至,倫大喜,乃復遣超,而虔還已至庾倉。超還 ,泓等已沒。」倫

列傳

= +

九

趙王

儉

掖門 東除 之。 者,挾倫南 軍 上復位,吾歸老于農畝。」傳詔以騶虞幡敕將士解兵。 孫 登牆燒屋, 以下子弟年十五以上,皆詣司隸,從倫出戰。 北 惑其衆,令百官皆賀,而士猗、伏胤、孫會皆杖節各不相從。 弼 悉敗,憂懣不知所爲。 將軍,率步騎千人催諸軍戰。 泂 許超、士猗、孫會等軍旣並還,乃與秀謀,或欲收餘卒出戰,或欲焚燒宮室,誅 執前 樹 以 入,敕宫中兵各守衞諸門,三部司馬爲應於內。 自 ,皆破之,士卒散歸洛陽,泓等收衆還營。秀等知三方日急,詐傳破冏營,執得冏,以誑 徇 義兵之起,百官將士咸欲誅倫、秀以謝天下。 將 就孫旂、孟觀等,或欲乘船東走入 秀及超、猗遽走出, 時 軍 王輿屯雲龍門,使倫 阻,銳氣內挫。 謝惔、黄門令駱休、 司 馬馥在秀坐,輿使將士囚 義陽王威勸秀至尚書省與八坐議征戰之備,秀從之。 泓等悉其諸軍濟潁,進攻冏營,冏出兵擊其別率孫髦、 左衞將軍 爲韶曰:「吾爲孫秀等所誤, 會等與義軍戰于激水,四大敗,退保河上,劉琨 司馬督王潛,皆於殿 趙泉斬秀等以徇。 之于散騎省, 海,計未決。 內外諸軍悉欲劫殺秀,威懼,自崇禮闥 輿自 秀知衆怒難犯,不敢 文武官皆奔走,莫敢有居者。 中斬之。 以大戟守省閤。 往攻秀,秀閉 王輿反之,率營兵七百餘 收孫奇於右 以怒三王。 倫復授太子詹事 三部司 中書 衞 馬兵於宣 今已誅秀, 八 出省。 營, 三 付廷尉 坐皆 一南門。 劉琨 使京 入 燒斷河橋。 化闥 及聞河北 殺 殿 司馬譚、 其迎 黄門將 輿放 走還 城四 人 不附己 中, 督河 中斬 自南 坐 兵 딞 下

倫 自華林東門出,及灣皆還汶陽里第。於是以甲士數千迎天子于金墉,百姓咸稱萬歲。 帝

自端門入,升殿,御廣室,送倫及琴等付金墉城。

初,秀懼西軍至,復召虔還。 是日宿九曲,詔遣使者免虔官, 虔懼,棄軍將數十人歸于

汝陽里。

者。 死,飲以金屑苦酒。 尉獄,考竟。 自兵興六十餘日,戰所殺害僅十萬 梁王肜表倫父子凶逆,宜伏誅。 **馥臨死謂虔曰:「坐爾破家也」」百官是倫所用者,皆斥免之,臺省府衞僅有** 倫慚,以巾覆面,曰:「孫秀誤我 百官會議于朝堂,皆如肜表。 人。 孫秀誤我 」於是收夢、馥、虔、 造尚書袁敞持節賜 詡 付 倫 廷

還洛自殺,王輿以功免誅,後與東萊王蕤謀殺冏,又伏法。 誅,張衡、閭和、孫髦、高越 凡 與倫爲逆豫謀大事者:張林爲秀所殺;許超、 自陽翟還,伏胤戰敗還洛陽,皆斬于東市,蔡璜自陽翟降齊王冏 士猗、 孫弼、謝惔、殷渾與秀爲王輿所

齊王冏鄭方

信,遺太醫診候,皆言無病。 齊武閔王冏字景治,獻王攸之子也。 及攸薨,帝往臨喪,冏號踊訴父病爲醫所誣, 少稱仁惠,好振施,有父風。 初, 詔卽誅醫。 攸有 疾, 武帝 由是

見稱,遂得爲嗣。

將軍。 **倫篡,遷鎭東大將軍、開府儀同三司,欲以寵安之。** 元康中,拜散騎常侍,領左軍將軍、翊軍校尉。趙王倫密與相結,廢賈后,以功轉游擊 冏以位不滿意,有恨色。 孫秀微覺之,且憚其在內,出爲平東將軍、假節,鎭許昌。

守。 黨旣畢,率衆入洛,頓軍通章署,甲士數十萬,旌旗器械之盛,震於京都。 送首于冏。 四王,移檄天下征鎭、州郡縣國,咸使聞知。 定,乃收襲殺之。 加九錫之命,備物典策,如宜、景、文、武輔魏故事 日 :「齊無異志。」問旣有成謀未發,恐事泄,乃與軍司管襲殺處穆,送首於倫,以安其意。 會成都軍破倫衆於黃橋,問乃出軍攻和等,大破之。 冏因衆心怨望,潛與離狐王盛、潁川王處穆謀起兵誅倫。 冏屯軍陽翟, 倫遣其將閭和、張泓、孫輔出堮坂, 與冏交戰。 遂與豫州刺史何勖、龍驤將軍董艾等起軍,遣使告成都、河間、常山、新野 揚州刺史郗隆承檢,猶豫未決,參軍 及王輿廢倫,惠帝反正,冏誅討賊 倫遣腹心張鳥覘之,鳥反, 冏軍失利, 天子就拜大司馬, ·王邃斬之, 堅壘自

色,不入朝見。坐拜百官,符敕三臺,選舉不均,惟寵親昵。 以百數,使大匠營制,與西宮等。 問 於是輔政,居攸故宮,置掾屬四十人。 鑿千秋門牆以通西閣,後房施鍾懸, 大築第館、北取五穀市、南開諸署、毀壞廬舍 以車騎將軍何勖領中領軍。 前庭舞 八 佾 沈于酒 封

葛旟爲牟平公,路秀小黄公,「尽」衞毅陰平公,「引」劉眞安鄉公,韓泰封丘公,號曰「五公」,委 處土鄭方露版極諫,主簿王豹屢有箴規,冏並不能用,遂奏別殺之。有白頭公入大司馬府 以心膂。殿中御史桓豹奏事,不先經冏府,即考竟之。於是朝廷側目,海內失望矣。南陽

冏驕恣日甚,終無悛志。前賊曹屬孫惠復上諫曰:大呼,言有兵起,不出甲子旬。卽收殺之。

帝,復皇祚之業,此五難也。大名不可久荷,大功不可久任,大權不可久執,大威不可 外居。 未有行其五難而不以爲難,遺其不可而謂之爲可。 惠竊所不安也。 凶强之敵,任神武之略,無疑阻之懼,此四難也。 檄六合之內,著盟信之誓,升幽宮之 也。舍殿堂之尊,居單幕之陋,安囂塵之慘,同將士之勞,此三難也。驅烏合之衆,當 犯冒鋒刃,此一難也。奮三百之卒,決全勝之策,集四方之衆,致英豪之士,此二難 **惠聞天下五難,四不可,而明公皆以居之矣。捐宗廟之主,忽千乘之重,躬貫甲**

之甚者也。良史書過,後嗣何觀!天下所以不去於晉,符命長存於世者,主無嚴虐之 之刑,羣王被囚檻之困,妃主有離絕之哀。歷觀前代,國家之禍,至親之亂,未有今日 暴,朝無 自永熙以來,十有一載,「公人不見德,惟戮是聞。公族構篡奪之禍,骨肉遭梟夷 **善語烈之政,武帝餘恩,獻王遺愛,聖慈惠和,尙經人心。[4] 四海所係,實在**

列

傳

於茲。

遙重仞之墉,及其危亡之憂,過於潁翟之慮。羣下竦戰,莫之敢言。 高之凶,棄五嶽之安,居累卵之危,外以權勢受疑,內以百揆損神。 歸之鑾,宅大齊之墟,振泱泱之風,垂拱青徐之域,高枕營丘之藩。 金石不足以銘高, 物,不仁其化,崇親推近,功遂身退,委萬機於二王,命方嶽於羣后,燿義讓之旗,鳴思 密,國之親親,與明公計功受賞,尚不自先。今公宜放恒文之勳,邁臧札之風,芻狗萬 八音不足以贊美,姬文不得專聖於前,太伯不得獨賢於後。今明公忘亢極之悔,忽窮 今明公建不世之義,而未爲不世之讓,天下惑之,思求所悟。 長沙、成都,魯衛之 雖處高臺之上,逍

況惠受恩,偏蒙識養,雖復暫違,情隆二臣,是以披露血誠,冒昧干迕。 言入身戮,義讓 **閪戰陣,功無可記,當隨風塵,待罪初服。** 功舉,退就鈇鑕,此惠之死賢於生也。 惠以衰亡之餘,遭陽九之運,甘矢石之禍,赴大王之義,脫褐冠胄,從戎于許。 屈原放斥,心存南郢;樂毅適趙,志戀北燕。

冏不納,亦不加罪。

邚 軍校尉李含奔于長安,祚云受密詔, 使河間王顒誅冏, 因導以利謀。 顒從之,上 羣姦聚黨,擅斷殺生。密署腹心,實爲貨謀。斥罪忠良,伺闚神器。 按奏,而取退免。張偉惚恫,擁停詔可;葛旟小豎,維持國命。操弄王爵,貨賂公行。 立官屬。幸妻嬖妾,名號比之中宮。沈湎酒色,不恤羣黎。董艾放縱,無所畏忌,中丞 杖,嚴列不解。故東萊王|蕤知其逆節,表陳事狀,而見誣陷,加罪黜徙。 城。 御史,長史、司馬直立左右,如侍臣之儀。京城大清,篡逆誅夷,而率百萬之衆來繞洛 成都王之勳力也。 阻兵經年,不一朝艱,百官拜伏,晏然南面。壞樂官市署,用自增廣。輒取武庫祕 王室多故,禍難罔已。大司馬冏雖唱義有興復皇位之功,而定都邑,克寧社稷,實 而冏不能固守臣節,實協異望。在許昌營有東西掖門,官置治書侍 以樹私黨,僭

茂親,功高勳重,往歲去就,允合衆望,宜爲宰輔,代冏阿衡之任。 莫非腹心。雖復重責之誅,恐不義服。今輒勒兵,精卒十萬,與州征並協忠義,共會洛 陽。驃騎將軍長沙王乂,同奮忠誠,廢冏還第。有不順命,軍法從事。成都王穎明德 旨。臣伏讀感切,五情若灼。春秋之義,君親無將。冏擁强兵,樹置私黨,權官要職, 臣受重任,蕃衞方嶽,見冏所行,實懷激憤。即日翊軍校尉李含乘驛密至,宣騰詔

義衆、掃除元惡,臣子之節,信著神明。一王今日聽信讒言,造構大難,當賴忠謀以和不協 顒 表旣至,冏大懼,會百僚曰:「昔孫秀作逆,篡逼帝王,社稷傾覆,莫能禦難。孤糾合

傅

第二十

九

王冏

耳。」司徒王戎、司空東海王越說冏委權崇讓。冏從事中郎葛旟怒曰:「趙庶人聽任孫秀,移 就第。漢魏以來,王侯就第寧有得保妻子者乎!議者可斬。」於是百官震悚,無不失色。 殷未徧。 天易日,當時喋喋,莫敢先唱。公蒙犯矢石,躬貫甲胄,攻圍陷陣,得濟今日。計功行封,事 三臺納言不恤王事,賞報稽緩,責不在府。讒言僭逆,當共誅討,虛承僞書,令公

死者相: 暴冏尸於西明亭,三日而莫敢收斂。冏故掾屬荀闓等表乞殯葬,許之。 於閶闔門外,徇首六軍。諸黨屬皆夷三族。幽其子淮陵王超、樂安王冰、濟陽王英于金墉。 助者誅五族。」是夕,城內大戰,飛矢雨集,火光屬天。帝幸上東門,矢集御前。羣臣救火, 、神武門。冏令黃門令王湖悉盜騶虞幡,唱云:「長沙王矯詔。」义又稱:「大司馬謀反, 長沙王义徑入宮,發兵攻冏府。冏遣董艾陳兵宮西。义又遣宋洪等放火燒諸觀閣及 枕。明日,冏敗,乂擒冏至殿前,帝惻然,欲活之。以叱左右促牽出,冏猶再顧,遂斬

聞 而 惡之。 初 ·之盛也,有一婦人詣大司馬府求寄產。 吏詰之,婦人曰:「我截齊便去耳。」識者 時又謠曰:「著布袙腹,爲齊持服。」俄而冏誅。

世,緒于東國,作翰許京,允鎭靜我王室。誕率義徒,同盟觸澤,克成元勳,大濟潁東。朕用 冏 祀 永興初,詔以冏輕陷重刑,前勳不宜堙沒,乃赦其三子超、冰、英還第,封超爲縣王,以 ,歷員外散騎常侍。 光熙初,追册冏曰:「咨故大司馬、齊王冏:王昔以宗藩穆胤紹

封,命 日。用其 應 憑翼 一嘉茂績,謂篤爾勞,俾式先典,以疇茲顯懿。 嗣 戴之重, 子還紹 法,猶思其人。』況王 永隆 厥緒,禮秩 邦家之望。 典度,一 一功濟朕身,勳存 而恭德不建,取侮二方, 如 舊制 使使持節、大鴻臚即墓賜策, 祠以太牢。 社稷, 廓土殊分,跨兼吳楚, 崇禮備物, 追惟 有司 既往,有悼於厥 過舉,致王于戮。 心哉! 龍侔蕭霍, 今復王本 古人有言

超兄弟皆沒于劉聰, 永嘉 中,懷帝下詔,重述冏唱義元勳,還贈大司馬,加侍中、假節,追諡。 間遂 無後 及洛陽傾 有

靈,祗服

股

命,肆寧爾

心,嘉茲寵榮。」子超

嗣

爵。

光 稽王 禄 道 太元 勳 將 中,韶 子建之立。 討 桓玄, 以故 南頓 詔柔之兼侍中,以騶虞幡宣告江、荆二州,至姑孰,爲玄前鋒所害。 朱受禪,國除。 王宗子柔之襲封齊王,5102紹攸、問之祀,歷散騎常侍。 元興初,會

贈

命, 懼) 當使天下 泰 及 鄭方者,字子回。 而 冏 不 輔 驕 政專恋,方發憤 穆 所 如 以長守貴也。 清 風、宗室骨肉永無纖介、今則不然,其失二也。 慷慨有志節,博涉 步 詣洛陽, 自稱 今大王 一安不 史傳,卓犖不常,鄉閭有識者歎 慮危,耽于 荆楚逸民,獻書於冏曰「方聞聖明 酒色, 燕樂過 四夷交侵,邊境不靜,大) 度, 其 其奇,而未能薦達 失 輔世 也。 大王檄 夙 夜祗

列

第

+

九

齊

王

冏

陳誠。」冏含忍答之云:「孤不能致五闕,若無子,則不聞其過矣。」未幾而敗焉。 此則食言,其失五也。大王建非常之功,居宰相之任,謗聲盈塗,人懷忿怨,方以狂愚,冒死 王振救之令,其失四也。又與義兵歃血而盟,事定之後,賞不踰時,自清泰已來,論功未分, 王自以功﹔興隆,不以爲念,其失三也。大王興義,羣庶競赴,天下雖寧,人勞窮苦,不聞大

長沙王义

校尉。及璋之誅二公也,义守東掖門。會騶虞幡出,义投弓流涕曰:「楚王被詔,是以從之, 時年十五,孺慕過禮。會蹙王暐奔喪,諸王皆近路迎之,以獨至陵所,號慟以俟瑋。拜步兵 安知其非「瑋旣誅,义以同母,貶爲常山王,之國。 長沙厲王乂字士度,武帝第六子也。太康十年受封,拜員外散騎常侍。及武帝崩,乂

斬恢及其五子。至洛,拜撫軍大將軍,領左軍將軍。頃之,遷驃騎將軍、開府,復本國。 兵應之,過趙國,房子令距守,义殺之,進軍爲成都後係。常山內史程恢將貳於义,义到鄴, 以身長七尺五寸,開朗果斷,才力絕人,虛心下士,甚有名譽。三王之舉義也,义率國

之。」時聞其言者皆憚之。 | 义見齊王冏漸專權,嘗與成都王穎俱拜陵,因謂穎曰:「天下者,先帝之業也,王宜維 及河間王顒將誅冏,傳檄以义爲內主。冏遣其將董艾襲义,义將

列傳第二十九 長沙王乂

左右百餘人,手斫車幰,露乘馳赴宮,閉諸門,奉天子與冏相攻,起火燒冏府。 連戰三日,冏

敗,斬之,幷誅諸黨與二千餘人。

故復遺書。」 卻 則 即命將,示宣國威,未擬摧殄。 秀作逆,反易天常,卿興義衆,還復帝位。 等襲义。义並誅之。 各不能闡敷王教,經濟遠略。 行,遂其讒惡,離逖骨肉,主上怨傷,尋已蕩除。 因致書於|類曰:「先帝應乾撫運,統攝四海,勤身苦己,克成帝業, 六合清泰, 慶流子孫。 而釋,乃使中書令王衍行太尉,光祿勳石陋行司徒,使說穎,令與义分陝 色動,遂殺之。 己爲宰相,專制天下。 行一丈。 用刑之有常。 **頥本以义弱問强,冀义爲問所擒,然後以义爲辭,宣告四方共討之,因廢帝立成都王,** 卿宜還鎭,以寧四海,令宗族無羞,子孫之福也。 韶以义爲大都督以距順。 卿所遣陸機不樂受卿節鉞,將其所領,私通 **順遂與穎同伐京都。顯遣刺客圖义,時長沙國左常侍王矩侍直,見客** 既而以殺問,其計不果,乃潛使侍中馮蓀、河南尹李含、中書令下粹 今卿復與太尉共起大衆,阻兵百萬,重圍宮城。 自投溝澗,蕩平山谷,死者日萬,酷痛 齊王恃功,肆行非法,上無宰相之心,下無忠臣之 連戰自八月至十月,朝議以以、潁兄弟,可以辭說 吾之與卿,友于十人,同產皇室,受封外都, 國家。 如其不然,念骨肉分裂之痛, 想來逆者,當前行一尺, 無罪。 而居, 进 國 羣臣同忿,聊 穎不 恩之不慈, 义

任豺 深 商 內擒商等,收級遠送。如何迷惑,自爲戎首!上矯君詔,下離愛弟,推移輦轂,妄動兵威,還 肉 玄之、皇甫商等恃寵作禍,能不興慨!於是征西羽檄,四海雲應。 等首,投戈退讓,自求多福,穎亦自歸鄴都,與兄同之。奉覽來告,緬然慷慨。愼哉大兄, 思進退也! 彼 豫禍,后族專權,楊賈縱毒,齊趙內篡。 **湿,棄戮親善。行惡求福,如何自勉!前遣陸機董督節鉞,雖黃橋之退,而溫南收勝,** 一此,未足增慶也。今武士百萬,良將銳猛,要當與兄整頓海內。 穎 ·復書曰:「文景受圖,武皇乘運,庶幾堯舜,共康政道, 幸以誅夷,而未靜息。 恩隆洪業,本枝 每憂王室,心悸肝爛。羊 本謂仁兄同其所懷,便當 若能從太尉之命,斬 百 世。 豈 期 骨

見責 收义送金 而 义 了朝臣 孤危。 奉 义 前後破穎軍,斬獲六七萬人。戰久糧乏,城中大饑,雖曰疲弊,將士同心,皆願效死。 上之禮 墉 無正,各慮私 城。 若臣 未有 义表曰:「陛下篤睦,委臣朝事。臣小心忠孝,神祇 死 國寧,亦家之利。但恐快凶人之志,無益於陛下耳。」 虧失,張方以爲未可克,欲還長安。而東海王越慮事不濟,潛與殿中將 困,收臣別省,送臣幽宮。 臣不惜軀命,但念大晉衰微,枝黨欲盡, 所鑒。 諸王承謬,率衆

勸 越密告張方,方遣部將郅輔勒兵三千,就金墉收义,至營,炙而殺之。 义冤痛之聲達於左 殿 中左右 恨义功垂 成而敗,謀劫出之, 更以 延穎。 越 懼 難作, 欲遂誅乂。 黄門郎潘滔

右,三軍莫不爲之垂涕。時年二十八。

以其義士,不之問也。初,以執權之始,洛下謠曰:「草木萌牙殺長沙。」以以正月二十五日 廢,二十七日死,如謠言焉。永嘉中,懷帝以义子碩嗣,拜散騎常侍,後沒于劉聰。 义將殯於城東,官屬莫敢往,故掾劉佑獨送之,步持喪車,悲號斷絕,哀感路人。 張方

成都王穎

成都王穎字章度,武帝第十六子也。太康末受封,邑十萬戶。後拜越騎校尉,加散騎

常侍、車騎將軍。

證懼,由此出類爲平北將軍,鎭鄴。轉鎭北大將軍。 賈謐嘗與皇太子博,爭道。 穎在坐,厲聲呵諡曰:「皇太子,國之儲君,賈謐何得無禮」

歌,衆二十餘萬。趙驤至黃橋,爲倫將士猗、許超所敗,死者八千餘人,士衆震駭。穎欲退 馬。使兗州刺史王彦,冀州刺史李毅,督護趙驤、石超等爲前鋒。羽檄所及,莫不響應。至朝 保朝歌,用盧志、王彦策,又使趙驤率衆八萬,與王彦俱進。倫復遣孫會、劉琨等率三萬人, 盧志爲左長史,頓丘太守鄭琰爲右長史,曰〕黃門郎程牧爲左司馬,陽平太守和演爲右司 趙王倫之篡也,進征北大將軍,加開府儀同三司。及齊王冏舉義,潁發兵應冏,以鄴令

列傳

第二十九

成都王穎

驚,馳出送穎,至七里澗及之。穎住車言別,流涕,不及時事,惟以太妃疾苦形於顏色,百姓 臣 首建大謀,遂擅威權。顯營于太學,及入朝,天子親勞焉。顯拜謝曰:「此大司馬臣冏之勳, 穎 戰,騎等奔潰。穎遂過河,乘勝長驅。左將軍王輿殺孫秀,自己幽趙王倫,迎天子反正。及 與漪、超合兵距驤等,精甲耀日,鐵騎前驅。 觀者莫不傾心。 無豫焉。」見訖,卽辭出,不復還營,便謁太廟,出自東陽城門,遂歸鄴。 入京都、誅倫。使趙驤、石超等助齊王冏攻張泓於陽翟、泓等遂降。冏始率衆入洛,自以 **猗旣戰勝,有輕驤之心。** 未及溫十餘里,復大 遺信與冏別,冏大

云『行 四 斂祭, 葬於黃橋 饑 彦、趙驤等五 言於穎 時祭祀有所。 餓 一、入朝 凍 至鄴,詔遣兼太尉王粹加九錫殊禮,進位大將軍、都督中外諸軍事、假節、加黃鉞、錄尙 有死 餒,宜急振救。 曰:「黃橋戰亡者有八千餘人,旣經夏暑,露骨中野,可爲傷惻。 人,尙或墐之』。 不趨,劍履 人,皆封開國公侯。又表稱:「大司馬前在陽翟,與强賊相持旣久,百 北,樹枳籬 仍表其門閭, 上殿。穎拜受徽號,讓殊禮九錫。 乞差發郡縣車,一時運河北邸閣米十五萬斛,以振陽翟饑人。」盧志 爲之塋域。 況此等致死王事乎!顯乃造棺八千餘枚,以成都 加常戰亡二等。又命河內溫縣埋藏趙倫戰死士卒萬四千餘 又立都祭堂,刊石立碑,紀其赴義之功,使亡者之家 表論 興義功臣盧志、和演、董洪、王 昔周王葬枯骨,故詩 國秩 爲 姓創痍 衣服,

人。[1三)類形美而神昏,不知書,然器性敦厚,委事於志,故得成其美焉。

九錫。 及間 既恃功驕奢,百度弛廢,甚於冏時。 且歸,赴時務。 敗,穎懸執朝政,事無巨細,皆就鄴諮之。後張昌擾亂荆土,穎拜表南征,所在響赴。 及齊王冏 留義募將士旣久,咸怨曠思歸,或有輒去者, 穎猶讓不拜。 驕侈無禮, 昔以義來,今以義去。 尋加太子太保。 於是衆望歸之。韶遣侍中馮蓀、中書令下粹喻穎入輔政, 穎嬖人孟玖不欲還洛,又程太妃愛戀鄴都,以此議久 若復有急更相語。」類知不可留,因遣之,百姓乃安。 乃題鄴城門云:「大事解散蠶欲遽。 幷使受 請

黨斬輿降。穎旣入京師,復旋鎭于鄴,增封二十郡,拜丞相。河間王顒表穎宜爲儲副,遂廢 以大木函盛石,沈之以繫橋,名曰石鼈。 歐,每夜矛戟有光若火,其壘井中皆有龍象。進軍屯河南,阻淸水爲壘,造浮橋以通河北, 檄乂使就第。乃與顧將張方伐京都,以平原內史陸機爲前鋒都督、前將軍、假節。 太子覃,立穎爲皇太弟,丞相如故,制度一依魏武故事,乘輿服御皆遷于鄴。 之,夷其三族,語在機傳。於是進攻京城。時常山人王輿合衆萬餘,欲襲穎。會义被執,其 府,更以王官宿衞。 「顯方恣其欲,而憚長沙王义在內,遂與河間王顒表請誅后父羊玄之、左將軍皇甫商等, 僭侈日甚,有無君之心,委任孟玖等,大失衆望。 陸機戰敗,死者甚衆,機又爲孟玖所譖,穎收機 表罷宿衛兵屬 穎次朝 斬

四方 官,殺生自己,立郊於鄴南。 帝側,左右皆奔散,乃棄天子於藁中。 南軍 王師,云:「鄴中皆已離散。」由是不甚設備。 參軍崔曠 必敗。」類會其衆問計,東安王繇乃曰:「天子親征,宜罷甲,編素出迎請罪。」司馬王混、 ,

赴者雲集。

軍次安陽,

衆十餘萬,

鄴中震懼。 興初,左衞將軍陳眇,殿中中郎遼苞、成輔及長沙故將上官巳等, 勸穎距戰,穎從之,乃遣奮武將軍 超遂奉帝幸鄴。 石超率衆五萬,次于蕩陰。 超衆奄至,王師敗績,矢及乘輿,侍中嵇紹 穎欲走, 其掾步熊 穎改元建武, 害東安王繇, 有道術, **畛二弟匡、規自鄴赴** 奉大駕討穎, 日:「勿動 署置百 馳檄 死於

車而 乃挾帝,擁穎及豫章王幷高光、盧志等歸于長安。 進,與騰及烏丸羯朱襲穎。自己候騎至鄴,穎遣幽州刺史王斌及石超、李毅等距浚,爲羯朱 等所敗。 走,五日至洛。 安北將軍王浚、〇四寧北將軍 鄴中大震,百僚奔走,士卒分散。 **羯朱追至朝歌,不及而還。** 東嬴公騰殺穎所置幽州刺史和演, 穎懼,將帳下數十騎,擁天子,與中書監盧志單 河間王顒遣張方率甲卒二萬救穎,至洛,方 **顧廢穎歸藩,以豫章王爲皇太弟** 類 徴 浚 , 浚屯冀州不

以北方盛强,懼不可進,自洛陽奔關中。 將 軍 、都督河 類旣廢,河北思之,鄴中故將公師藩、汲桑等起兵以迎穎,衆情翕然。 北諸軍事,給兵千人,鎭鄴。 值大駕還洛,穎自華陰趨武關,出新野。帝詔鎮南 穎至洛,而東海王越率衆迎大駕,所在 題 復 拜 穎 隆起。 **《鎭軍大** 穎

之,時年二十八。二子亦死。 十。」穎曰:「知天命不。」徽曰:「不知。」穎曰:「我死之後,天下安乎不安乎? 歌、收合故將士數百人、欲就公師藩。 韶夜賜穎死。 將軍劉弘、南中郎將劉陶收捕穎,於是藥母妻,單車與二子廬江王普、中都王廓渡河赴朝 無他意。 三年,身體手足不見洗沐,取數斗湯來」,其 屬虓暴薨,虓長史劉輿見穎爲鄴都所服,慮爲後患,祕不發喪,爲令人爲臺使, 穎謂守者田徽曰:「范陽王亡乎。」徽曰:「不知。」 鄴中哀之。 頓丘太守馮嵩執穎及普、廓送鄴,范陽王虓幽之, 二子號泣,穎敕人將去。 穎曰:「卿年幾。」徽曰:「五 乃散髮東首臥,命徽 我自放逐,於今 稱 而

於洛陽,懷帝 讎,遂出潁棺,載之於軍中,每事啓靈,以行軍令。 題之敗也,官屬並奔散,惟盧志隨從不怠,論者稱之。 加以縣王禮 桑敗,棄棺於故井中。 其後汲桑害東嬴公騰,稱爲穎報 穎故臣收之,改葬

東萊王蕤子遵爲穎嗣 穎 死後數年,開封間有傳穎子年十餘歲,流離百姓家,東海王越遣人殺之。 封華容縣王。 後沒於賊,國除。 永嘉中、立

河間王顒

河 間 王 願字文載,安平獻王字孫, 太原烈王瓌之子也。 初襲父爵,咸寧二年就國。

列

中,顒於諸王爲疎,特以賢舉

爲北中郎將、監鄴 年,改封河間 少 城。 有清名,輕財愛士。 九年,代梁王肜爲平西將軍,鎭關中。石函之制,非親親不得都督關 與諸王俱來朝,武帝歎顒可以爲諸國儀表。 元康初,

顧聞二王兵盛,乃加長史李含龍驤將軍,領督護席薳等追方軍迴,以應二王。 而倫、秀已誅,天子反正,含、方各率衆還。 斬之。及冏檄至,顒執冏使,送之於倫。 人,以應問,遣信要顒。 及趙王倫篡位,齊王冏謀討之。 **閱遺主簿房陽、河間國人張方討擒奭,及其黨十數人,於長安市腰** 前安西參軍夏侯奭自稱侍御史,在始平合衆,得數千 倫徵兵於順,願遣方率關右健將赴之。 義兵至潼關, 方至華陰,

利害。 之,方衆大敗,死者五千餘人。方初於歐水橋西爲營,於是築壘數重,外引廪穀,以足軍資。 方爲都督,領精卒七萬向路。 商知含前矯妄及與顒陰謀,具以告义。义乃誅含等。 烙百二十里。檄長沙王乂討冏。 中、太尉,加三賜之禮。 後含爲翊軍校尉,與冏參軍皇甫商、司馬趙驤等有憾,遂奔顒,詭稱受密詔伐冏,因說 **顒納之,便發兵,造使邀成都王穎。以含爲都督,率諸軍屯陰盤,** 方攻商,商距戰而潰,方遂進攻西明門。 及冏敗,顒以含爲河南尹,使與馮蓀、卞粹等潛圖害义。 及問論功、雖怒順初不同,而終能濟義,進位侍 **顧聞含死,卽起兵以討商爲名,使張** 义率中軍左右 前鋒次于新安,去

义復從天子出攻方,戰輒不利。 及乂死,方還長安。 韶以顒爲太宰、大都督、雍州牧。 顒廢

皇太子厚,立成都王顯爲太弟,改年,大赦。

州,西 浚遣 乃假 **鄴,公自留鎭關中,**方北討博陵。 盧志 王浚等伐穎,穎挾天子歸洛陽。 與平昌 劉 諫,乃止。 左 [迎大駕,關中大懼,方謂顒曰:「方所領猶有十餘萬衆,奉送大駕還洛宮, 使成都王反 護 喬 衞 節 劉根、將三百騎至河上。闡出 將軍陳昣奉天子伐穎, 博 ,進位鎮東大將軍,遣成都王穎總統樓褒、江西王闡等諸軍,據河橋以距越。 陵 衆襲河橋,樓褒西走,追騎至新安,道路死者不可勝數。 方又逼天子幸長安。顯乃選置百官,改秦州爲定州 方將兵入殿中,逼帝幸其壘, 顒又遣方率兵二萬救鄴。 如此,天下可小安, 戰,爲根所殺。 穎頓軍張方故壘,范陽王虓遣鮮卑 天子已幸鄴。 掠府庫,將焚宮廟以絕衆 及東海王越起兵徐 方屯兵洛陽。 及

陽,范陽 與 顒 送首 郭偉於霸 分 初 陝而 以示 越 王 虓 以 居。 水 張 東 司 禦之, 馬 軍。 方劫遷車駕,天下怨憤,唱義與 **甌欲從之,而**方不同。及 劉 琨 葬 瞻等戰 . 變計 以方首示朗,於是 敗散 更遣刁默守潼關, 走。 顒乘單馬,逃于太白山。 別降。 東軍 乃咎輔 <u>Щ</u> 大捷,成都等敗,顧乃令方親信將郅輔夜斬 時 東諸侯剋期奉迎、先遣說順、令送帝還都、 東軍 殺方,又斬 ·旣盛,破刁默 東軍 輔。 入長安, 以入關, 顒 先遣將呂朗 顒 大駕旋,以太 懼,又遣 等據榮 馬

列

傅

第

+

九

河間

王

顋

護麋晃 弘農太守裴廙、秦國 弟太保梁柳 合從,迎顒於南山。 率國兵伐顒。 爲鎭 西 將軍,守關中。 顧初 內史賈龕、安定太守賈疋等起義討顒,斬馬瞻、 至鄭 不肯入府,長安令蘇衆、記室督朱永勸顒 顧將牽秀距晃, 馬瞻等出詣柳、因共殺柳於城內。 晃斬秀,
弁其二子。 表 義軍 梁邁等。 稱柳病 瞻等與始平太守梁邁 據有關中, 卒, 東 海王越遣督 輒知方事 顒保城

永 嘉初,詔書以顒爲司徒, 韶以彭城元王植子融爲顒嗣,改封樂成縣王。 乃就徵。 南陽王模遣將梁臣於新安雍谷車 薨, 無子。 建興 中, 元帝又以彭 上扼殺之,幷其 城康

而已。

東海王越

王釋子欽爲

融

嗣

宗。 衞將軍, 軍 東海 初以世子爲 復爲 加侍中。 孝 侍 獻 心中, 王 騎都 越字元超,高密王泰之次子也。これ少有令名,謙虚持布 討楊駿 加奉車 尉,與駙馬都尉楊邈及琅邪王伷子繇俱侍講 有功,封五千戶侯。 都 尉, 給溫信五十人,口心別封東海王,食六縣。 遷散騎常侍、 輔國 將軍、尚 東宮, **拜**散 書 衣之操, 石 永康初, 僕 騎 射, 侍 爲 郎, 爲中書 中 頟 游 外 歷 墼 左 所

令,徙侍中,**遷司** 空,領中書監

默 夜收乂別省,逼越爲主,啓惠帝줲乂官。事定,越稱疾遜位。 成 都王穎攻長沙王义,义固守洛陽,殿中諸將及三部司馬疲於戰守,密與左衞將軍朱 帝不許,加守尚書令。

范陽王虓遣督護田徽以突騎八百迎越,遇祐於譙,祐衆潰,越進屯陽武。山東兵盛,關中大 駕,還復舊都,率甲卒三萬,西次蕭縣。 輒選刺史守相,朝士多赴越。而河間王顒挾天子,發詔罷越等,皆令就國。 越唱義奉迎大 海。成都王穎以越兄弟宗室之美,下寬令招之,越不應命。 初、日立帝北征鄴,以越爲大都督。六軍敗,越奔下邳,徐州都督、東平王楙不納,越徑還東 起兵,楙懼,乃以州與越。越以司空領徐州都督,以楙領兗州刺史。越三弟並據方任征伐, 夾輔朝政,讓不受。東海中尉劉洽勸越發兵以備穎,越以洽爲左司馬,尚書曹馥爲軍司。旣 豫州刺史劉喬不受越命,遣子祐距之,行司越軍敗。 帝西幸,以越爲太傅,與太宰顒

詔越以太傅錄尚書,以下邳、濟陽二郡增封。

懼,顒斬送張方首求和,尋變計距越。越率諸侯及鮮卑許扶歷、駒次宿歸等步騎迎惠帝反

越曰:「、 盍思伊霍之舉,以寧社稷乎。」言未卒,越曰:「此豈宜言邪」」遂叱左右斬之。 止 其身,因此表除三族之法。 及懷帝卽位,委政於越。東部郎周穆,淸河王覃舅,越之姑子也,與其妹夫諸葛玫共說 主上之爲太弟,張方意也。淸河王本太子,爲羣凶所廢。 帝始親萬機,留心庶事,越不悅,求出藩,帝不許。 先帝暴崩, 以致、穆世家, 多疑東宮。公 越逐出

列

傳

鎭許昌。

永嘉初, 自許昌率苟晞及冀州刺史丁劭討汲桑,「三」破之。 越還于許, 長史潘滔說之

日「兗州天下樞要,公宜自牧。」乃轉苟晞爲青州刺史,由是與晞有隙

尋詔越爲丞相,領兗州牧,督兗、豫、司、冀、幽、幷六州。 越辭丞相不受,自許遷于鄭

城。 越恐清河王覃終爲儲副,矯詔收付金墉城,尋害之。

召不至。望旣渡河,甄退。李惲、薄盛斬田蘭,率其衆降,甄、祉、濟棄軍奔上黨 并州將田甄、甄弟蘭、任祉、祁濟、李惲、薄盛等部衆萬餘人至鄴,遣就穀冀州,號爲乞活。 遷于滎陽。召田甄等六率,曰三甌不受命,越遣監軍劉望討甄。 及騰敗,甄等邀破汲桑於赤橋,越以甄爲汲郡,蘭爲鉅鹿太守。、甄求魏郡,越不許,甄怒,故 王彌入許,越遣左司馬王斌率甲士五千人入衞京都。 鄄城自壞,越惡之,移屯濮陽,又 初,東嬴公騰之鎭鄴也,攜

以東海國上軍將軍何倫爲右衞將軍,王景爲左衞將軍,領國兵數百人宿衞 由殿省,乃奏宿衞有侯爵者皆罷之。 千人入宮收延等,自己付廷尉殺之。 越自滎陽還洛陽,以太學爲府。 越解兗州牧,領司徒。 時殿中武官並封侯,由是出者略盡,皆泣涕而 疑朝臣貳己,乃誣帝舅王延等爲亂,遣王景率甲士三 越旣與苟晞構怨,又以頃興事多 乃

越自誅王延等,大失衆望,而多有猜嫌。散騎侍郎高韜有憂國之言,越誣以訕謗時政

袂忘履,討之已晚。人情奉本,莫不義奮。當須合會之衆,以俟戰守之備。 **惲幷回倫等守衞京都。表以行臺隨軍,率甲士四萬東屯于項,王公卿士隨從者甚衆。** 輦以失機會,則釁弊日滋,所憂逾重。」遂行。 害之,而不自安。乃戎服入見,請討石勒,且鎭集克豫以援京師。 失利,帝鄉便爲戎州,冠帶奄成殊域,朝廷上下,以爲憂懼。 九錫。越乃羽檄四方曰「皇綱失御,社稷多難,孤以弱才,備當大任。 必滅之。賊滅則不逞消殄,已東諸州職貢流通。 匡救。檄至之日,便望風奮發,忠臣戰士效誠之秋也。」所徵皆不至。而尚晞又表討越,語 王室蠢蠢,莫有固心。朝廷社稷,倚賴於公,豈可遠出以孤根本,」對曰:「臣今率衆邀賊,勢 。留妃裴氏,世子、鎭軍將軍毗,及龍 此所以宣暢國威,藩屛之宜也。 皆由諸侯蹉跑, 帝曰:「今逆虜侵逼郊畿, 自頃胡寇內逼,偏: 宗廟主上,相賴 遂及此難。 若端 驤將 軍李 坐京 詔 投 裨 加

錢端 項。 在 地 「 晞傳。 越以豫州刺史馮嵩爲左司馬,自領豫州牧。 。」於是數十 越專擅 出兵 秘不發喪。 而 公私罄乏,所在寇亂,州郡攜貳,上下崩離,禍結釁深,遂憂懼成疾。 距勒,戰死,軍潰。 勤命焚越柩曰:「此人亂天下,吾爲天下報之,故燒其骨以 一威權,圖爲霸業,朝賢素望,選爲佐吏,名將勁卒,充于己府,不臣之迹,四海所 萬衆 以襄陽王範爲大將軍,統其衆。還葬東海。 ,勒以騎圍而射之,相踐如山。 王公士庶死者十餘萬。 石勒追及於苦縣甯平城,將軍 王彌弟璋焚其餘 永嘉五 年,薨于 告天

列傳

第

二 十

九

東

王越

衆,幷食之。天下歸罪於越。帝發詔貶越爲縣王。

許。裴妃不奉詔,遂葬越於廣陵。太興末,墓毀,改葬丹徒。 祭於墓,明非神之所處也。今亂形神之別,錯廟墓之宜,違禮制義,莫大於此。」於是下詔不 還。此墓廟之大分,形神之異制也。至於室廟寢廟祊祭非一處,所以廣求神之道,而獨不 禮,以事緣情,設冢椁以藏形,而事之以凶;立廟祧以安神,而奉之以吉。 人所略,賣於吳氏,太興中,得渡江,欲招魂葬越。一元帝詔有司詳議,博士傳純曰:「聖人制 **)**倉,又爲勸所敗,毗及宗室三十六王俱沒于賊。|李惲殺妻子奔廣宗,何倫走下邳。|裴妃爲 何倫、李惲聞越之死、秘不發喪、奉妃裴氏及毗出自京邑、從者傾城、所經暴掠。 送形而往,迎精而 至洧

帝以少子奕繼之。哀帝徙奕爲琅邪王,而東海無嗣。隆安初,安帝更以會稽忠王次子彦璋 爲東海王,繼沖爲曾孫。爲桓玄所害,國除。 初,元帝鎭建鄴,裴妃之意也,帝深德之,數幸其第,以第三子沖奉越後。薨,無子,成

子,昭鑒在焉。有晉鬱興,載崇藩翰,分茅錫瑞,道光恒典;儀台飾袞,禮備彝章。 和之姿,失於無斷,楚隱習果銳之性,遂成凶很。或位居朝右,或職參近禁,俱爲女子所詐, 史臣曰:昔高辛撫運,釁起參商,宗周嗣曆,禍纏管蔡。詳觀曩册,逖聽前古,亂臣財 汝南以純

端,戎羯乘其 情無奪。撫其遺節,終始可觀。穎旣入總大權,出居重鎭,中臺藉以成務,東夏資其宅心, 其無君之志,矜其不義之强。 鑾駕北巡,異乎有征無戰,乘輿西幸,非由望秩觀風。 若火燎 乃協契河間,共圖進取。而顒任李含之狙詐,杖張方之陵虐,遂使武閔喪元,長沙授首,逞 概邁俗,投弓掖門,落落標壯夫之氣,馳車魏闕, 懍懍懷烈士之風。雖復陽九數屯, 在三之 豹之奇策,納孫惠之嘉謀,高謝袞章,永表東海,雖古之伊霍,何以加焉!長沙材力絕人,忠 也。冏名父之子,唱義勤王,摧偽業於旣成,拯皇輿於已墜,策勳考績,良足可稱。 怨酷,上宰陷誅夷,乾耀以之暫傾,皇綱於焉中圮。遂裂冠毀冕,幸百六之會;綰璽揚纛,窺 相次受誅,雖曰自貽,良可哀也!倫實庸璅,見欺孫秀,潛構異圖,煽成姦慝。 皇失政,難起蕭牆,骨肉相殘,黎元塗炭,胡塵驚而天地閉,戎兵接而宮廟隳,支屬肇其禍 垂餌於豺狼,三十六王咸隕身於鋒刃。禍難之極,振古未聞。雖及焚如,猶爲幸也。自惠 彰,罄彼車徒,固求出鎭。旣而帝京寡弱,狡寇憑陵,遂令神器劫遷,宗社顚覆,數十萬衆並 原,猶可撲滅,矧茲安忍,能無及乎!東海糾合同盟,創爲義舉,匡復之功未立,陵暴之釁已 禍忘憂,逞心縱欲,曾不知樂不可極,盈難久持,笑古人之未工,忘已事之已拙。 九五之尊。夫神器焉可偸安,鴻名豈容妄假!而欲託茲淫祀,享彼天年,凶闇之極,未之有 、間隙,悲夫!詩所謂「誰生厲階,至今爲梗」,其八王之謂矣。 乃使元良遘 向若採王 然而 臨

爲亂亡。元超作輔,出征入撫,敗國喪師,無君震主。 始終靡慝,功虧一簣,奄罹殘賊。 敢竊龍圖,亂常奸位, 遄及嚴誅。 ·· 亮總朝政,瑋懷職競。 章度勤王,效立名揚,合從關右,犯順爭强,事窮勢蹙,俱 **偉哉武閔!** 讒巧乘間,艷妻過聽。 首創宏謨。德之不建,良可悲夫! 焚如之變,抑惟自取。 構怨連禍, 遞遭非命。 長沙奉國, 倫實下愚,

校勘記

- 君臣乘茲間隙 商權:「君臣」當作「巨君」,王莽字。
- (ニ) 存重宗社 李校:「存重」當是「重存」二字誤倒。
- **ハラン子義立** 勞校:孝武紀「義」作「羲」。
- 激水 年及杜注、水經溫水注。 周校: 惠紀作「溴水」。按:通鑑八四亦作「溴水」。 舉正云:紀作「湨水」爲是。 **溴水見爾雅釋地郭注、左傅襄公十六**
- 「五」 孫奇 校文:「奇」是「會」之譌,即孫秀子也。
- [人] 路秀小黄公 衞毅陰平公 舉正:紀「陰平」作「平陰」。 平陰屬河南郡、當是。 惠紀「路秀」作「路季」。通鑑八四從冏傅作「路秀」。
- 「ハ」十有一載 「一」字疑誤,實經十三年。

- [九]尚經人心 册府七二三「經」作「結」。
- 南頓王宗子柔之 之以南頓王孫紹齊王攸後」,則「子」字當是「孫」字之誤。 勝校: 頓傳云「三子綽、超、演」,無柔之名。 南史孝義司馬嵩傳云, 「高祖承
- 【il】鄭琰 鄭袤傳作「鄭球」。
- 左將軍王輿 勞校:「左」下脫「衞」字。 按:惠紀及淮陵元王淮、齊獻王攸傳皆有「衞」字。
- 趙倫 戰死士卒 通鑑八四及通志八〇「趙」下並有「王」字。
- 安北將軍王浚 「安北」原作「平北」,今據王浚傳、惠紀、懷紀、劉淵載記改。
- 二三 羯朱 勞校:水經濁漳水注作「渴末」。按:王浚傳亦作「渴末」。
- 八八 樓褒 周校:惠紀「褒」作「裒」。
- 高密王泰之次子也 字元超,下文又謂越「初以世子爲騎都尉」,則越爲長子,就本傳亦可證 |李校: 高密王泰傳言泰四子越、騰、略、模,是越爲長子。 按:李說是。 越
- 給溫信五十人 李校:「溫信」當作「恩信」,正戎傳「給恩信五十人」,正與此同。
- [1·2] 太安初 周校:宜作「永安」,即永興元年。
- 遣子祐距之 越、計劉喬有功」云云。「子」字疑誤。 越子未聞有名祐者。據本卷汝南王傳, 汝南威王名祐,「永興初, 率衆依東海王

列

傅

第二

+

九

校

勘記

(三) 丁劭 勞校:「劭」當作「紹」。按:良吏傳、 石勒載記、通鑑八六並作「紹」。 南陽王模傳則作

邵」。

田甄 石勒載記「甄」作「禋」。

工景 見卷四三校記。

大三〇

